

MARTYRE
DE LA ROYNE
D'ESCOSSE, DOVARIERE
DE FRANCE.

Contenant le vray discours des traïsons
à elle faiçtes à la suscitation d'Elizabet
Angloise, par lequel les mensonges,
calomnies & faulses accusations dres-
sees contre ceste tresuertueuse, tresca-
tholique & tresillustre princesse sont
esclarcies & son innocence aueree.

*Pretiosa in conspectu Domini mors
sanctorum eius.*

A EDIMBOVRG.
Chez IEAN NAFEILD.

1587.

AV LECTEUR.

SI ie reputois Elizabet Tither estre du nombre des oingts de Dieu, ou vraye & legitime Royne d'Angleterre, i'observerois en parlât d'elle le respect & l'honneur que i'ay accoustumé de garder à l'endroit de tous monarques pour infidelles ou payens qu'ils puissent estre recognoissant la puissance & auctorité qu'ils ont de l'ordonnance diuine, & nō de la disposition des hommes. Mais la reputant, comme ie dois avec raison, l'ennemie de tous Rois & de leurs estats la plus sanglante qui ait oncques esté au monde, & estant vraiment informé de son origine & de la condition de sa naissance, qui la rend entierement incapable de regner, & indigne de la sainte onction, dont elle mesme s'est mocquee, & l'a eüe à mespris & desdain, vous ne devez trouuer estrange si en ce discours ie

m'exaspere quelquefois contr'elle, comme cōtre vne abominable Pandore produite sur terre & enuoyee de Dieu offensé de noz pechez avec toutes les maledictions qu'il est possible d'excogiter pour la desolation & ruine de tous les royaumes de la Chrestienté. Ce ne luy est pas assez d'auoir par infinies trahisons reuolté la France, l'Espagne l'Italie, l'Allemagne, l'Escoffe, la Flandre: d'auoir enuoyé ses supposts iusques aux Indes & terres neufues pour les faire rebeller cōtre leur seigneur & maistre, d'emouuoir par ses ambassades & susciter le Turc à la guerre contre les Chrestiens: de meurtrir sans aucune apparēce de raison ou de droit la plus proche parente, naturelle & legitime Royne d'Escoffe & d'Angleterre, douairiere de Frāce, belle sœur des Rois de France & d'Espagne, alliee & apparentee de tous les princes de la Chrestienté: de profaner & fouler aux pieds la maiesté royalle: de prouoquer la iuste

vengeance de Dieu & des hommes par
iniure irreparable : tels phalarismes ne
suffisent point à la rancune immortelle
qu'elle porte à l'estat de tous vrayes & le-
gitimes Roys, si par libelles diffamatoi-
res, pasquilles, bibliothèques, & sembla-
bles inuentions diaboliques leur saint
& sacré nom n'est, tant qu'en elle est, of-
fusqué, prostitué, deschiré & réduit odieux
à leurs subiets & à tout le monde. Estant
en la ville de Londres, i'ouy crier par les
rues à haute voix, & vey vèdre publique-
ment des liures pleins de scandale & vi-
lennie cōtre la maiesté de noz Rois, con-
tre l'honneur de leur trefillustre dame &
mere, contre la bonne renommee de to⁹
les princes Chrestiens & Catholicques
de ce royaume, dont ie fis plainte à l'am-
bassadeur de leurs maiestez portât grief-
uemēt en mon cœur telle indignité sans
y pouuoir mettre ordre, quelque peu de
temps auparauant que feu monsieur y
allast pour le traicté qu'il auoit avec ce-

ste belle Roine, Dieu sçait comme il fut
depeint de toutes ses couleurs pour son
ministre à Grenniche en presence de plu
sieurs Mi-lords du conseil Anglois, dont
les noms furent aussi tost rapportez à
monfieur de Simiez par ie sçay bien qui,
avec les propos qui furent tenuz de son
altesse. Et cependant ceste nation de gés
est si superbe & outrecuidee, qu'en de
nigrant par les libelles, outrageant par
ses faiçts, & mesprisant tous les bôs Prin
ces de la Chrestienté, ils veulent que leur
bastarde soit respectée, & pensent tenir
les langues des hommes ainsi liees que
personne n'ose parler d'elle sinõ avec re
uerence de ses forfaits, ny blasmer sa ty
rannie felonnie & barbare, ains en con
uertissant le vice en vertu qu'on la doit
louer & priser contre verité, & contre sa
conscience. Quant à moy ie ne puis estre
si esclau. Et par ce à fin de leur monstrier
le peu de compte que nous en faisons, &
que les gens de bien ne l'estiment qu'à

son prix & merite, ie ne l'ay point espar-
gnee en ce discours, ains selon les occur-
rences l'ay seruie de ses qualitez, luy ac-
commodant ses epithetes qui luy sont
les plus propres, protestant pour ce n'a-
uoir faict aucune faute, quant à la verité
de l'histoire, de laquelle ie laisse le iuge-
ment à celuy qui lira ce discours d'esprit
tranquille, raisis, & non preuenü de faus-
se information, comme ie cognois plu-
sieurs de noz François, qui encores qu'ils
ne soiēt pas autrement mal affectiōnez en
ceste cause, neantmoins par faute d'estre
biē instruits, se sōt laissez aller à ie ne sçay
quels libelles semez par la France par l'ar-
tifice de l'Angloise cependant qu'elle
tenoit les langues des gens de bien en
bride, & les empeschoit d'en faire respō-
ce, & de descouurir la verité de cet affai-
re, de peur qu'ils auoient de l'irriter con-
tre sa prisonniere, & qu'elle executast sa
mauuaise volonté, comme elle a faict, a-
pres auoir longuement attendu le tēps,

& tenté la patience de ceux qui s'en de-
uoient ressentir. Donques n'ayant plus
rien maintenant à craindre ie me suis
mis à escrire ce que i'ay veu & sceu, &
& dont la verité paroistra à ceux qui se
voudroient curieusement enquerir, non
seulement par raisons infallibles, com-
me vous pouuez veoir en la plus part de
ce discours, mais aussi par escrits authen-
tiques, & par le tesmoignage de gens
d'honneur en grand nombre, qui ont e-
sté presens à l'execution de tout ce que
ie dis, & qui sont plus dignes de foy, que
ne sont ny les ministres de l'Angloise pre-
tendue Royne, ny les Puritains de son
conseil, auteurs de toutes ses abomina-
tions. A Dieu.

MONVMENTVM MARIAE SCOTORVM REGINAE.



MARIA Scotorum Regina Regis filia,
uxor & mater: Francisci. II. Galliarū
Regis vidua, Virtutibus Regijs, ac ma-
gnis corporis & animi dotibus ornata.
Cum in Angliam crebris nuntiis ac literis Reginae
Angliae Elizabethae (cuius agnata & heres proxima
erat) manuscriptis fuisset euocata: frustra saepius implo-
rato Iure Regio, post vndeuginti annorum carceris
molestias constantissimè & animo plusquam virili to-
leratas. Cumque per tot annos Reginam Angliae vi-
dere atque alloqui sibi ut liceret frustra etiam saepius
postularet: falsis accusationibus delata. Cum semper
Religionis auitae (quam & in Francia & in Sco-
tia publicè professā fuerat retinentissima fuisset, nec
ab ea ulla metu mortis abduci potuisset. Cum sui san-
guinis sitim, morum suauitate, vitae innocentia, diu-
turni carceris patitiō extinxisse videretur. Ecce (heu)
incomparabile nostri seculi ornamentum, & lumen
verè Regium: horrenda capitis lata sententia, immeri-
ta morte ac crudeli & nefaria cæde extinguitur: bar-
bara quidem & tyrannica senatus Anglici, magna
parte ex ipsius inimicis conflati, crudelitate, & con-
tra Regnorum omnium Regumque Iura, sed præcipuè
Elizabethae Angliae Reginae perfidia atque immanitate
plusquam Britannica: Heu, crudele & stupendum

tumuli genus, in quo cum mortua viui includuntur:
Siquidem cum una Scotorum Regina, omnes Europæ
Reges eorumque Iura & Sceptra humi prostrata fo-
de conspiciuntur, ac tanquam plebei facti, & ex tam
alto dignitatis gradu deiecti capite minuuntur: &
quod ante hac inauditum erat, exemplo sceleratorum
hominum supplicio mulctantur: quos tamen cruentis
manibus attrectare nefas omnino fuerat. Tu nunc co-
gita si potes (viator) ac reuolue animo, simile aliquid
unquam attentatum: nihil tale in omnibus Regum
Europæ annalibus scriptum inueneris. Vnicum hoc
erit, in omne æuum Anglica crudelitatis horrendum
exemplum, quod vix unquam bona posteritas credi-
derit. Cum sacris enim MARIÆ Scotorum Reginae
quos vides cineribus, omnium Regum ac Principum
uno ictu violatâ ac fedé suggillatam maiestatem:
(quod nunquam ante hac visum atque auditum fue-
rat) hic iacere si potes conspicio. Quod si quis Regi-
bus qui hodie viuunt sensus est, si quia illos huius hor-
rendi facti pietatisque in illam quondam serenissimâ
Reginam aliqua scintilla manet: si quid igneus ille vi-
gor & celestis origo in eorum animis diuinitus infu-
sas potest innoxiam hanc animam & Regale precisum
ab humeris caput horrendamque in seipsos latam ca-
pitis sententiam in vnius Reginae quondam florentissi-
mo Regali quod cernis corpore perpetuò ob eorum o-
culos versari credito. Et quia tacitum hoc monumen-
tum Regale satis superque Reges ac Principes quid spe

rare à perfidis hominibus: aut expectare ab his quia
fide maiorum defecerunt imposterum debeant admo-
net: plura non addo viator. Tantum hoc te volo ac
moneo (quisquis es) in **MARIAM** Scotorum Reginam
intuens Pius esto: omnesque res humanas pro nihilo
habeto, & memoriam christianissimæ, senerissimæ,
constantissimæque Reginae sanctæ & religiosè colito.
Et pro fide catholica cruenta morte defunctam perpe-
tuo honore prosequitor, sanguinemque illum inno-
xiū aliquando toti Europæ, bellis vexatæ atque a-
gitatæ pacem impetraturum sperato: Hoc te volebā,
nescius ne esses. **VALE.**

VITÆ SUMMA

Vixit annos xliiij. ac menses prope duos. Nata est
enim idib. Decemb. 1542. deducta in Galliam
mense Augusto. 1548. Rediit in Scotiam eodem mē-
se. 1561. In Angliā descendit auxiliij spe & opinione à
cognata promissi 16. Cal. Iun. 1568. ibidem contra
ius gentium, contra promissi fidem annos undevigin-
ti retenta hospitis execrabili iussu neci tradita, sangui-
nis liberaliter effusi testimonio Dei cultum & Eccle-
siæ Romanæ fidē professā, coronā meruit in cælis, illis
tribus illustriore quarū vsum violenter amisit in ter-
ris mane sub horā decimā. 12. Cal. Mart. 1587. suppu-
tatione Gregoriana, qua nūc utūtur Christiani. Ex
nobilissimī. & antiquissimī **STVARDÆ** & **LO-
TAHRENÆ** familiis orta: Latine, Gallicè, Scoticè,
Anglicè, Hispanicè, **DOCTA.** Inter omnes suæ æta-

tis Reginas admirabili atque incomparabili corporis pulcritudine prædita. Denique quondam Galliarum & Scotiæ florētissima Regina, nunc verò spectaculum rerum humanarum facta. VALE & à lacrimis si quis humanitatis sensus in te est, viator (si potes) tempera

MONVMENTVM REGALE.

Maria Scotorū Regina, Regis filia, Regis Gallorū vidua, Regiæ Angliæ agnata & hæres proxima virtutibus Regiis & animo Regio ornata, frustra sæpius implorato Iure Regio barbara & tyrannica Anglorum crudelitate atque sententia ornamentum nostri sæculi & lumen vere Regium extinguitur. Eodemque nefario iudicio & Maria Scotorum Regina morte naturali & omnes superstites Reges plebei facti morte civili multantur: nouum & inauditum tumuli genus in quo cum viuis mortui includuntur hic extat. Cum sacris enim diuæ Mariæ cineribus omnium Regum atque Principum violatam atque Prostratam maiestatem hic iacere scito. Et quia tacitum hoc monumentum Regale satis superque Reges sui officii monet, plura non addo viator.

P. C. Posuit.

SONNETS.

Les vertus de Iefabel Angloife.

MAssacrer ses subiets qui font profession
Du nom de Iesus-Christ, mettre leurs biens
en proye,
Leur arracher du ventre & le cœur & le foye,
Dont un Scithe cruel auroit compassion:
Se faire nommer chef de la religion,
Rehausser ses forfaits de parolles de foye,
Ne rire de bon cœur que quand la mer ondoie
Du sang des heritiers du sceptre d'Albion:
Detester hautement le sacré mariage
Pour se brusler au feu d'une impudique rage,
Entre tous les tyrans tenir le premier lieu,
Renouveler l'erreur de la secte vandoise,
Cracher contre le Ciel, se bander contre Dieu,
Sont les rares vertus de Iefabel Angloise.

Aux Anglois affligez pour la religion
Catholique.

Martyrs de Iesus Christ, d'invincible, courage
Qui pour l'honneur de Dieu, souffrez tant de
tourment,
Catholiques Anglois vous que iournellement
On bat, on frappe, on tue, on menace, on outrage.
Ne vous desesperés, le beau temps suit l'orage,
Les vens ne soufflent pas continuellement,
L'aspic le plus malin ne mord incessamment,
Et ne dure tousiours d'une louue la rage.
Après tant de travaux Dieu vous consolera,
Vous aurez du repos, vostre deuil cessera,
La mort au bon Chrestien, est principe de vie:
Courage donq' amis, qui meurt pour Iesus Christ
Dote en mourant l'enfer, le mode & l'ante-Christ,
La rage des tirans, la mort mesme & l'enuie.

Comparaison de Londres à Rome.

Londres peut bien à Rome en beaucoup ressembler,
Toutes deux de bastards, ont origine prise,
Le Tibre arrose l'une, & l'autre la Tamise,
Qu'õ voit de sang Chrestie d'heure en heure s'ësfler.
L'une mord ses voisins, & l'autre fit trembler
Iadis toute la terre, à son pouuoir soubmise:
L'une de toute erreur, & l'autre de l'Eglise,
Se peut bien iustement premier chef appeller.
Bref une louue morte en l'une est admiree,
Vne louue viuante en l'autre est adoree,
Celle-la pour auoir allaitté deux bessons,
Les premiers fondateurs de Rome pacifique:
Cette-cy pour auoir occis deux millions
D'innocens egorgez pour la foy Catholique.



E n'est pas de ce temps qu'Elizabeth Tither usurpatrice du Royaume d'Angleterre & de la seigneurie d'Irlande, a voulu mal de mort à sa cousine, vraye & legitime Roynne de toute la grande Bretaigne, ains ce mal-talent est inueteré, conçu dès le commencement de sa tyrânie, & depuis grandemēt augmenté par les rencontres de sa vie, qui l'ont diuersement trauaillee en son ame assez mal preparee à les porter modere-ment sous le ioug de droict & de raison. Car se iugeant en soy mesme incapable d'une telle fortune, & indigne du tiltre de Roynne, que le desastre de l'Angleterre, & mal intestin des Royaumes circonuoisins luy auoient acquis, elle a tousiours eu à contrecœur celle la qui par le droict de nature, & par les loix de la couronne y pouuoit iustement aspirer. Elle a tousiours couué en son ame contr'elle vne enuie mortelle, craignant sa grâdeur

2

& les moyens qu'elle auoit de maintenir son iuste tiltre, eſtât Roïne de France par le droict de mariage, & d'Eſcoſſe par la condition & loy de ſa naiſſance. Et tant plus que les loix des Royaumes la combattoient, & ſes merites l'eſloignoient du ſceptre royal qu'elle a enuahy par force, tant plus ſa rancune croiſſoit contre l'heritiere legitime, qui comme ſien le pouuoit vendiquer. Il n'y a homme tant ſoit peu verſé és affaires d'Angleterre qui ne ſçache qu'elle eſt non ſeulement baſtarde, mais auſſi nee de triple inceſte, qui la rend incapable, ie ne dy pas de la couronne, ains de tous droicts, deſquels peut iouyr vne perſonne libre & excepte d'infamie. Et pour le faire entendre à ceux qui n'ont iamais paſſé la mer pour ſ'enquerir de telles choſes (encore qu'elles ſoient bien amplement deſcrites par pluſieurs tant Anglois, François qu'autres) ie diſcourray icy le plus ſuccinctement que ie pourray l'hiſtoire de ſa naiſſance.

lance, & les amours incestueux & tragiques de son pere & de sa mere, non en intention de l'offenser & outrager de paroles, ^{Mais} ~~ains~~ à fin de monstrier au doigt & à l'œil la source & origine de tous les malheurs aduenuz en l'Europe depuis quarante ou cinquante ans en ça, & pareillemēt l'indignité du parricide cōmis en la personne de la Roynne d'Escoffe, sa cousine germaine, qu'elle deuoit honorer, respecter & seruir sur toutes choses du monde, comme sa souueraine dame & maistresse, si elle eust eu quelque religion ou crainte de Dieu deuant les yeux.

HENRY huictiesme de ce nom Roy d'Angleterre, estoit hōme tant adonné à ses plaisirs, que le iugemēt, les bonnes lettres & le sçauoir, qu'il auoit appris en sa ieunesse, estoient comme assopiz & esteints dans son corps abandonné brutalement à ses sens & concupiscences, & presque delaisné de l'ame participāte de raison & d'intelligēce, ressentant plus sa

beste que son homme. Entre les plus cheries & mieux aimees de celles qui luy donnoient esbat & passe-temps, il entretenoit la femme de Thomas Boulle, lequel pour ceste cause il crea Baron & Vicomte de Rochefort, n'estant auparauant que simple gentilhomme, & non des plus fortunez. Pour iouyr à son aise de ceste dame sans coriual & sans ialousie, il enuoya son mari en Frâce, pour luy seruir d'Ambassadeur ordinaire pres le Roy trescrestien, où il fut sans partir iusques au bout de deux ans, qu'il entendit que sa femme estoit acouchee d'une fille. Dont estant griefuement offensé & cuidant effacer ceste honte domestique par vn diuorce: estant de retour au pais, il intenta proces contr'elle par deuant l'official de Cantorbie, pour se voir separer d'auec luy de corps & de biens. Elle bien affligee de quoy elle ne pouuoit ny denier le faict, estat tout euident, ny purger la faute par aucune apparence de

5
raison, se iecta de genoux deuant luy, le
prient avec larmes de luy pardonner, si
elle n'auoit peu resister à la maiesté d'un
Roy, auquel elle n'eust osé refuser sa cō-
pagnie, protestant à l'aduenir se gouuer-
ner en sorte qu'il auroit occasion de s'en
contenter. Le Roy aduertí de ce mau-
uais mesnage enuoya par deuers Tho-
mas Boullen le marquis d'Orcestre pour
luy imposer siléce, & luy faire tresexpres
commandement de reprendre sa femme
en grace, & se departir de proces. Le pau-
vre homme craignant la fureur du Roy,
vaincu par les remonstrances du Marquis,
& asséuré non seulement par icelles, mais
aussi par le dire de sa femme, & par le rap-
port des premiers & plus grās seigneurs
du royaume, que ceste fille estoit au Roy
& non à autre, il se contenta, & la nour-
rit comme sienne, sous le nom d'Anne
Boullen. Depuis ce temps là ceux de la
maison de Boullen deuindrent grands
courtisans, biē honorez & respectez d'un

chacun, à cause du bon visage que le Roy leur portoit. Et entre autres dames de la cour, Marie Boullen sœur vterine d'icelle Anne estoit lors tant en la bonne grace du Roy qu'en fin il abusa d'elle cōme il auoit fait de la mere. La Cour estoit cōposée de gens fort debauchez, cōme hereticques & blasphemateurs du nom de Dieu, voleurs & pilleurs des pauvres gēs, escumeurs de mer, ioueurs, macque-reaux, paillards & ruffiēs: & entre autres y auoit vn nommé François Brian, cheualier de la famille des Boullen, homme plaissant & accord, qu'on appelloit ordinairement le vicair d'enfer à cause de son impietē, estant hōme sans Dieu, sans foy, sans loy. Cestuy-cy estant vn iour enquis par le Roy q̄lle espee de peché c'estoit de cognoistre la mere & la fille? respondit, en luy faisant semblable demande, quel peché luy sembloit-il de manger premierement la poule & puis apres son petit poulin? A quoy le Roy s'estant

pris à rire outre mesure, luy dit, veritablement tu es mon vicaire d'enfer. Anne Boullen n'ayant encore atteint l'aage de quinze ans, sçauoit fort bien chanter & iouer des instrumens, & estoit d'ailleurs richement douee de plusieurs dons de nature, si elle eust eu l'esprit à les employer comme il appartenoit. Mais en ceste ieunesse s'estant mal gouvernee & laissée deflorer par le sommelier & par le chapelain de son pere putatif, à fin de celer ceste vergoigne elle fut enuoyee en France, & y vesquit quelque temps chez vn gentil-homme du pays de Brie, amy de cedit pere putatif iusques à ce qu'elle fut menee en Cour. Où estant elle sceut si dextremēt cōduire ses amours, & prattiquer le Roy treschrestien François premier de ce nom, qu'elle s'insinua si auant en ses bonnes graces, qu'en fin elle eut sa compagnie si souuent & si apertement, qu'on l'appelloit la mule du Roy, & depuis s'estant prostituee indif-

ferement à tous ceux de la Cour qui en vouloient, luy fut imposé le nom de hacquenee d'Angleterre. Quelque tēps apres estant de retour en son pays, elle se mit à suiure la Cour du Roy Héry huiet-iesme son pere naturel, enuers lequel elle vfa de tant de ruses, qu'en fin elle l'empestra bien auant dans ses laqs. Elle auoit le corps haut & droit, les cheueux noirs, la face longue, la couleur iaunaistre, comme si elle eust esté malade de la iaunisse: en la genciue de dessus vne dent luy auançoit par dessus les autres, en la main droicte elle auoit six doigts: deffous le menton elle auoit vne petite bosse, pour laquelle cacher elle portoit des robbes & des collets haults, qui luy couuroient entierement le col & la gorge, & à son imitatiō les autres dames de la Cour en faisoiet de mesme, au lieu qu'elles auoiet auparauant de coustume d'auoir la poitrine nue & descouuerte. Elle auoit le reste du corps bien proportionné, & se

9
vestoit si proprement, introduisant tous
les iours quelque nouuelle sorte d'habit,
qu'elle seruoit de patron à toutes les grã
des dames d'Angleterre. Mais quant à
l'esprit elle n'estoit ornee d'aucune ver-
tu:ains estoit hautaine au possible, ambi-
tieuse, fiere, enuieuse, & du tout adon-
nee à ses plaisirs & voluptez, au reste e-
stoit de la secte de Luther, à fin que sa re-
ligion fust conforme à sa vie, & toutes-
fois ne laissoit pas de frequenter les Egli-
ses, & d'aller à la Messe de peur de faillir
aux occasiõs que ses amours & l'ambitiõ
de la Cour luy recõmandoient. Mais sur
tout elle se mōstra fort accorte, & rete-
nue à l'édroit du Roy, qu'elle voyoit biẽ
affollé & quasi perdu de son amour. De-
quoy estant plus que deuëmēt aduertie,
cognoissant son humeur fort enclin au
chāgement, & se mettant deuāt les yeux
si mere & sa sœur vterine, qu'il auoit tāt
ay mees, estre maintenant decheües de sa
grace avec le peu de compte qu'il tenoit

de ses autres concubines, lesquelles il re-
 iettoit tout aussi tost qu'il auoit obtenu
 d'elles l'accōplissement de ses desirs, elle
 se resolut de tenir bon, & de ne se laisser
 aller quelque importunité qu'il luy eust
 peu donner. Dont il aduint, que tant
 plus qu'il la poursuivoit, tant plus elle
 le reculoit, resistant à ses prieres, & iurāt
 & protestant qu'hōme viuant ne cueille-
 roit onques la fleur de sa virginité, sinon
 celuy qui se ioindroit à elle par le saint
 lien de mariage. Toutefois elle ne faisoit
 difficulté de deuiser, sauter, danser, &
 iouer avec luy à des petits ieux à la mode
 de la cour, seulement elle se feignoit ab-
 horrer le ieu d'amour, s'estāt vouee à ce-
 luy qu'elle choisiroit pour espoux. Par
 tels artifices & ruses ell' empieta si bien le
 pauvre Roy, qu'il deuint rauy de son bō
 sens, & se resolut de repudier Catherine
 fille de Ferdinād Roy d'Espaigne, sa legi-
 time espouse, à fin d'epouser sa propre ba-
 starde. Pour dōner couleur à ce diuorce,

il alleguoit qu'ayant auparauāt esté ma-
 riée avec Arthur son frere aîné, elle ne
 pouuoit estre sa femme. C'est vn vieil di-
 re de Mænander, qu'une personne qui a
 enuie de mal faire ne manque iamais de
 pretexte. Les pl^r sages de l'Europe & les
 plus sçauans de ce temps là ne trouuoïent
 aucune faute en ce mariage, & pour la va-
 lidité d'iceluy disoient, qu'encore qu'Ar-
 thur eust espousé Catherine, il n'eut tou-
 tesfois onq' aucune cognoissance d'elle. 14. Nou.
1501.
 Car n'ayant encore atteint l'aage de 15
 ans, & estant d'ailleurs asthmatique & ma-
 lade d'une fièvre lente, le Roy son pere
 par l'aduis des medecins donna bon or-
 dre qu'ils n'eussent aucune habitude en-
 semble. Cinq mois apres le contract
 passé, la mort d'Arthur apporta fort
 grand ennuy aux deux Roys, qui pen-
 soient par ce mariage renouer & entre-
 tenir l'ancienne ligue & alliance de la mai-
 son de Bourgogne avec celle d'Angleter-
 re, ils s'aduiserent de remedier à si grand

inconuenient, & reparer ceste perte s'il estoit possible par la conionction de Catherine avec Henry, frere du decedé, qui pouuoit lors auoir enuirõ l'aage de douze ans. La chose ayant esté mise en deliberation par deuant les plus sçauans Theologiens & Iurisconsultes des deux royaumes fut tresamplemēt disputee, & en fin trouuee sans doute. Et derechef ayant esté proposee au Pape Iules second par les ambassadeurs des deux Roys, & par luy bien curieusement examinee avec les aduis des plus excellents hommes en sçauoir de toute l'Europe, pour le bien public de la paix entre deux Royaumes si florissans, par sa bulle il declara ce mariage bon & vallable & que l'empeschement de droit humain, ne pouuoit auoir lieu en ce cas, puis que la loy de Dieu n'y apportoit aucun obstacle. Apres ces consultations & resolutions du mariage conclud & arresté, & auparauant la solēnité des nopces, Henry septieme decedé, son

fils, duquel nous parlons icy, ayant succedé à la couronne en l'aage de dixhui& ans, n'estât despourueu d'entendement, ains bien accort, fin & rusé pour sa ieu- nesse, de son propre mouuement & cer- taine sciéce, avec le consentemēt & aduis de tous ceux de son Royaume il espou- sa la femme de feu son frere le 3. iour de Iuin 1509. & le iour solēnel de S. Jean Ba- ptiste ensuiuāt la fait courōner Roynē d'Angleterre avec grand triomphe & ap- plaudissement de tout le peuple en l'E- glise royalle de Vvestmōstier à Londres. C'est grand cas, qu'apres auoir vescu a- uec ceste femme en grande amitié par l'espace de vingt ans & plus, & apres a- uoir eu d'elle trois enfans masles & deux filles, il se soit laissé si loin transporter de son esprit, que de la vouloir repudier à l'apetit d'une femme impudique & des- bauchee, & qui d'ailleurs ne luy pouuoit estre femme estant sa bastarde. S'il eust delaissé sa femme pour viure en conti-

nence ou pour espouser vne eſtrāgere, il y euſt eu qlque peu d'aparēce en ce qu'il diſoit de l'inualiditē de ſon mariage. Mais il n'a peu trouuer aucune couleur ou ſemblance de raiſon, d'abādonner la femme de ſon frere pour ſe ioindre avec ſa fille naturelle. Cecy me faiēt ſouuenir de la fable du chat, qui faiſoit le proces au coq ayant enuie de le deuorer. Il l'accuſoit de ce qu'il ne laiſſoit dormir les hommes la nuit, ains de ſon chant mal plaiſant leur oſtoit le repos que nature leur auoit ordonnē pour compenſer les trauaux & fatigues qu'ils enduroient le long du iour. A quoy fut reſpōdu par le coq, que cela tournoit à leur grād profit, & que ſon chant leur ſeruoit d'orloge, pour les eſueiller à leurs exercices ordinaires. Le chat ne pouuāt refuter ceſte raiſon, intente vn autre crime, l'accuſant d'inceſte, qu'il n'epargnoit ne ſa mere ne ſes fœurs, ains qu'il vſoit d'elles indifferemment cōtre la loy de nature. A quoy

ayāt repliqué le coq que cela seruoit aussi grandement à la vie des hommes pour l'abondance d'œufs qu'il apportoit à leur nourriture. Ce malitieux animal se voyāt vaincu de raison l'empoigna, & le mangea, luy disant en vn mot, tu as beaucoup de raisons pour te sauuer, mais il n'y a point de raison que ie meure de faim. Les hōmes malins & de nature peruerse en font de mesme : car quād ils ont quelque mauuais dessein en leur fantasie, auquel ils ne peuuēt trouuer ombre de raison pour le mettre en effect, ils ne laissēt de passer outre, & tout ouuertement cōfondent le tort & le droict sans s'amuser aux causes qui peuent colorer leurs sinistres & mauuais intentions. Mais ce bon Roy tenoit secrette la volonté qu'il auoit d'espouser sa bastarde, ains seulement mettoit en auant la iuste cause qu'il sembloit auoir de rompre le lien qui l'astreignoit à sa femme. Le Pape Clement septiesme luy estoit pour plu-

sieurs bonnes & iustes causes grande-
 mēt attenu & obligé, de maniere qu'il le
 pensoit tenir, cōme l'on dit, en sa mäche,
 pour luy octroyer tout ce qu'il luy plai-
 roit demander. Il enuoya par deuers luy
 ses ambassadeurs M. Estienne Gardinier
 grād iurifconsulte, & François Brian che-
 ualier (duquel nous auōs parlé cy dessus)
 à fin de faire casser & annuler la Bulle du
 Pape Iules. Mais voyāt qu'il y faisoit fort
 grande difficulté, & que les Cardinaulx
 de Campege & de Vvolfay, par luy com-
 mis à la cognoissance de ceste cause, te-
 noient la chose en longueur, il se propo-
 sa de se passer du consentement du pape,
 & se cōtenter d'auoir sur ce les aduis de
 quelques hommes de lettres, à fin de fai-
 re trouuer bon le diuorse qu'il preten-
 doit. Et à ceste fin il enuoya gens avec
 sommes notables d'or & d'argent à tou-
 tes les vniuersitez fameuses de France,
 d'Italie, & d'Allemagne, pour acheter
 les voix & suffrages des docteurs. Ceux
 qui vi-

qui viuoient en ce temps la ont laissé fort ample tesmoignage par escrit de la corruption dont on vsoit pour attirer les hommes à l'opinion du Roy d'Angleterre, & se plaignent de ce que quelques uns de la faculté de Theologie de Paris adulterās, comme ils disent, la parole de Dieu pour capter la bonne grace des hommes, ont contre leur propres consciences adheré à la paillardise du Roy, & se laisants corrompre par les Anges (monnoye d'Angleterre) sont tombez és liens du Diable. Et combien que ces pauvres gens ayant la veue esblouie de la splendeur des Angelots ne trouuoient le mariage fait avec Catherine soustenable, si est-ce que tous d'un accord disoient, qu'il ne pouoit estre rompu sans le congé du Pape. Et pour ceste cause le Roy embrasé iusques dans les os de l'amour d'Anne Boulleu, il tente le Pape derechef par ses ambassadeurs, qui estoient encore à Rome, ausquels il mande de n'espargner or, ny

Cardinal Polus,
Caietan-
us Petrus Len-
denis.
Sleidanus lib. 9.
& alij
quam plurimi.
Ferdinandus Bra-
filien. e-
pisc. ad tract. Al-
uari Gome-
sij de coniu-
gio regis Anglia.

argent:ains d'affaillir vñement les Cardinaux & les Theologiens qui leur pouuoient ayder. Par lesquels ambassadeurs il demande à sa saincteté deux choses, la premiere, qu'ell' eust à declarer la dispence du Pape Iules nulle & adulterine: la seconde, qu'il luy pleust (à fin d'establi la succession royale d'Angleterre) permettre que le Duc de Richemont son fils bastard, qu'il eut d'Elizabeth Blante, fust conioinct par mariage avec Marie sa fille aisnee qu'il auoit eüe de Catherine sa pretendue femme. Il adiousta la troisieme demande, qu'il luy faisoit par lettres escrites & signees de sa main, & nō par la bouche de ses ambassadeurs, qu'il pleust à sa saincteté (qui pouuoit par auctorité apostolique moderer les loix Ecclesiastiques) le dispenser & faire grace d'espouser Anne Boullen nonobstant la conioction charnelle qu'il auoit eüe avec Marie Boullé sa sœur vterine. Mais en fin se sentant frustré de l'opinion qu'il auoit de la facilité du Pape en son endroict, &

estränge
mariage
du frere
avec la
sœur

qu'il n'y auoit aucune apparence d'obtenir ce qu'il demandoit, ennuyé de si longue poursuite, & impatient d'amour, il retourne aux suffrages des docteurs, se contentant d'iceux, sans plus rechercher l'autorité du Pape. C'est vn cas admirable qu'en toutes les vniuersitez de France, Italie & Allemaigne il ne peut onques trouuer vn seul homme d'honneur ou de quelque estime & renommee qui voulust souffigner sa demande, ie ne dy pas d'espouser Anne. (car cela ne leur fut onques proposé) ains seulement de se diuertir & delaisser Catherine sa vraye & seule femme. Pour la deffence de laquelle tous les hommes celebres de ce temps là ont escrit contre l'aduis impudemment donné contre elle par gens qui auoient pour argēt abandonné Dieu & leurs propres cōsciēces. En Angleterre vous auez ce venerable prelat Iean Fischer mirouer de sainteté, euesque de Rochestre, le Cardinal Pol, Guillaume Vvarame primat du

Royaume, Archeuesque de Cantorbie, Cuthbert Toustal euesque de Lōdres, Ieā Holimā euesque de Bristo, Nicolas Vvest, Iean Clerc, Henry Standishe tous Euesques, Abel, Fetherston, Pouel & Ridlay Theologiens & Iurisconsultes des premiers de leur aage, avec plusieurs autres dont la pluspart ont enduré la mort pour n'auoir peu estre esbranlez de leurs opinions, & pour auoir soustenu la verité fort constamment contre leur Roy, qui pensoit forcer leurs consciences par gehennes, tortures & supplices afin d'adherer à son adultere triple inceste. En Espagne Frācisc⁹ Royas, Alphōsus Veruesi⁹, Alphonfus de Castro, & Sepulueda: En Allemagne Coclæus, Ludouicus Aschora, & autres: en France les instaurateurs de la iurisprudence ont interposé leur iugement sur ce differend, Eginarius Baro, François Duaren, & François Conan: En Italie Cajetan, & autres plusieurs en diuerses prouinces de la chrestienté, les-

quels ie ferois trop long à nommer, ont remué ceste pierre, & refuté par viues raisons l'ignorance de ceux qui se sont laissé gaigner par le Roy. Mais sur tout c'est vn case strange qu'en son royaume d'Angleterre il n'a peu trouuer vn seul hōme de bien consentant à son diuorce. Plusieurs ont mieux aimé mourir que de l'approuer, & entre autres & outre la plus part de ceux que i'ay cy dessus nommez, ce braue cheualier Thomas Morus, son Chancelier s'est acquis louange immortelle par l'effusion de son sang pour la deffence de ceste cause. En fin apres tant de disputes sur la validite du mariage de Catherine, le bruiet est semé par toute l'Europe, qu'Anne Boullen en estoit l'occasion, & que le Roy estoit arresté en l'opinion de la prendre à femme, puisqu'autrement il ne pouuoit auoir sa iouissance. Dequoy aduerty Thomas Boullen son pere putatif, qui pour lors estoit en France avec vn autre cheualier Anglois

2

nommé Anthoine Broun pour quelques affaires du Roy leur maistre incōtinent au desceu de son compagnō, & sans dire à Dieu à personne, prend la route d'Angleterre, craignāt qu'autre premier que luy eust aduerty & informé le Roy de l'impossibilité de ce mariage, & que cela luy tournast à preiudice. Ayāt esté introduit deuant son maistre par Henry No-reis, il luy expose en vn mot la cause de sa venue, & luy repete depuis le commencement la naissance d'Anne Boullen, & comme sa Maiesté l'auoit recogneue pour sienne: comment il vouloit repudier sa femme, & que sa Maiesté y auoit interposé son autorité pour l'empescher. A quoy le roy respōdit en ces mots, Taisez vous maistre sot, il y a cent hommes qui aussi bien que moy ont eu la cōpaignie de vostre femme, ie ne sçay duquel de tous ceux là Anne Boullen pourroit estre fille: mais ie vous assure bien qu'elle sera ma femme. Retournez à vo-

stre ambassade. Ayāt dit ces mots, il se retira & laissa là son hōme seul, & à genoux. Tout le peuple aymoît fort Catherine à cause de sa vie pleine d'innocēce, religiō & sainteté, & detestoît avec plusieurs maledictiōs les auteurs de ce nouveau mariage: & entre autres ceux du cōseil de sa maïesté n'estās ignorās de leur deuoir, & que leurs consciences estoient obligees à procurer l'hōneur de leur maistre, & luy remontrer son erreur, d'autant qu'ils estoient personnes layes ils ne se voulurēt mesler de parler du sacrement de mariage, ains seulement du mauuais bruit & vie dissolue de celle qu'il auoit esleuë pour compagne de son sceptre. Et entre autres choses luy declarerēt, q̄ Thomas Viat, l'un de ses principaux courtisās auoit abusé d'elle à sa discretiō, & s'il pensoit que ce fust chose fauce, que son plaisir fust de se cacher derriere vne tapisserie, & qu'ō luy monstreroit l'impudicité de ceste fille, qui sans estre recherchee accorderoit

à Viat ce qu'elle auoit si long temps refusé à sa maiesté. Aquoy il feit responce, qu'il ne faisoit doute de leur sincerité en uers luy, & que la bonne volonté qu'ils luy portoient leur faisoit faire telles remonstrances, mais qu'il sçauoit en son ame tout le contraire de ce qu'ils disoient & qu'Anne Boullen estoit tref-chaste & tref-vertueuse pucelle. Et quand à Viat que c'estoit vn ialoux & asseuré maque-reau, & qu'il ne se plaisoit en tels spectacles. Viat fut incontinent chassé de la Cour. En ce temps vint à vacquer l'Archeuesché de Cantorbie, premiere & principale dignité de l'Eglise d'Angleterre, par le decez de Guillaume Vvarame, homme de grand sçauoir & de sainte vie. Le Roy bien aise de ceste occasion se delibera de conferer ceste place à celuy qu'il trouueroit selon sa fantaisie, qui obeiroit à ses complexions, & qui le separeroit d'auec sa femme sans auoir esgard aux sentences ou arrests, qui pourroient

interuenir de la part du Pape, ou de ses deputez. Le plus illustre & digne personnage de l'Angleterre estoit le Cardinal Pol, & par ce ceste dignité luy fut presentee, mais ayant entendu la charge & condition qui y estoit apposee, il la refusa en disant, qu'il ne vouloit estre assis en la chaire de pestilence. Thomas Boullen s'accommodant à la volonté du Roy, & le voyant en grand peine de ce qu'il ne pouoit trouuer homme tel qu'il desiroit pour estre colloqué au premier degré d'honneur de l'Eglise Anglicane, luy dit qu'il auoit vn nommé Thomas Craumer, homme bien accort & sçauant, qui luy auoit long temps serui de chapelain, & duquel il l'asseuroit pour tresfidelle & tres-affectionné seruiteur, & qui ne procureroit chose en ce monde de meilleur courage que la separation que sa maiesté desiroit. Anne Boullen luy confirma ceste parole de maniere que voyla Craumer, homme de neant, & vray atheiste, s'il en fut on-

ques Primat du royaume d'Angleterre. Ie ne m'esbahi pas si son compaignon à Geneue l'a mis au rang des hommes illustres dans son liure des images. Car il estoit si preud'homme, que i'ay grand honte de le dire. Cependât que ce Craumer s'amuse à tromper le Pape par ses faulsetez & periures à fin d'auoir la despesche de ses bulles, le Roy ne pouuant plus endurer le feu qui le brusloit incessamment, & scachant que Craumer luy bailleroit tousiours telle sentence que bon luy sembleroit, il espouse clandestinement & de nuiet, & pour ce faire commande à l'un de ses chapelains nommé Roland de dire la Messe de grand matin, luy faisant entédre qu'il auoit gagné son proces contre Catherine d'Espaigne, & que le Pape luy permettoit contracter mariage ainsi que son cœur luy diroit. Le pauvre prestre ne pensant qu'un Roy eust voulu mentir, le marie avec Anne Boullé selō les ceremonies de l'Eglise Ro

maine, & parce moyen le voila cōioinct
 en mesme tēps avec deux fēmes. Il n'y a-
 uoit encor' aucune sentence dōnée pour
 la dissolution du premier mariage, & par
 ainsi il demeuroit encor' en son entier.
 Je laisse la cōclusiō au lecteur. Ce maria-
 ge estāt ainsi contracté, la pompe solen-
 nelle est differee iusqu' à la vigile de Pas-
 ques, auquel iour il espousa publicque-
 ment avec les ceremonies acoustumees
 d'estre de tout tēps obseruees és nopces
 royales. Le deuxieme iour de Iuin ensui-
 uāt il la feit courōner Roynne d'Angleter-
 re. Cependāt le Pape Clemēt apres plei-
 ne cognoissance de cause donne sa sen-
 tence, par laquelle il declare Catherine
 legitime femme du Roy, & vraye Roy-
 ne d'Angleterre, Anne adultere, & les
 enfans nez, ou qui pourront naistre de
 son pretendu mariage, bastards, inca-
 pables & indignes de pouuoir succeder
 à leur pere, lequel il interdit de la com-
 munion des Chrestiens, s'il ne delaisse

12. Au.
1533

ceste paillarde pour adherer à Catherine
 sa iuste & loyalle espouse. Craumer ses
 bulles expediees n'ayant plus que faire
 du Pape, prononce la sienne tout con-
 traire. Il se trāsporte à Doustable où ceste
 pauvre Royne bien desolee latitoit se
 consolant en Dieu avec prieres & orai-
 sons comme de coustume, & durant l'es-
 pace de quinze iours qu'il y seiourna, la
 fait appeller par deuant luy à plusieurs
 fois, dont elle ne fait aucun cas, sçachant
 bien que ce bon Apostre n'estoit qu'un
 singe vestu de pourpre pour iouer ceste
 farce à l'appetit de sa partie aduerse. Auf-
 si sçauoit elle qu'il ne pouuoit prendre
 aucune cognoissance de cause, le Pape
 l'ayant euoquee à Rome, & n'eust iamais
 pensé que sans aucune charge ou com-
 mission il eust voulu entreprendre par
 dessus son superieur, qui estoit le chef de
 l'Eglise dōt il se disoit membre. Ell'auoit
 des exceptions trespertinentes contre sa
 personne pour le recuser si elle l'eut esti-

méiuge, ou qu'il eust esté si outrecuidé que de se vouloir ingerer à bailler sentéce. Car il estoit seruiteur domestic de Boullen & à leur nominatiō indignemēt promu à ceste dignité, afin de procurer le diuorce & faire Anne Boullen Roine. Catherine n'estant ignorante de toutes ces choses, & que le Roy tenoit ce iuge & sa sentence en sa main, & qu'elle n'eust rien gaigné pour alleguer aucunes exceptions ou deffences, elle ne daigna comparoir. Au moyen dequoy ce bon Prelat sans vser de plus longs delays ou circuit, donne incontinent sa sentence, par laquelle il condamne le Roy de repudier Catherine disant que par la loy de Dieu force luy estoit de ce faire, & si y estoit refusât, qu'il ne trouuast mauuais, si pour le lieu qu'il tenoit en l'Eglise de Dieu il procedoit contre sa maiesté par censures Ecclesiastiques, luy permettant d'espouser telle autre femme que son cœur auroit agreable. Auparauant ceste senten-

ce Anne estoit enceinte, on ne peut bonement dire du faict de qui, ayant en ce temps esté aussi bien entretenue de George Boullen son frere Vterin, & de plusieurs autres aussi bien que du Roy son pere & mari, comme sera dit cy apres. Elle accoucha le septieme iour de Septēbre, 1533. les nopces ayant esté celebrees le douziesme d'Auril precedant. Le Roy recognoist le fruit pour sien, & la fait appeller Elisabet. Il la fait baptiser avec grā de pompe & magnificence en l'Eglise Catholique, n'estant luy mesme pour lors d'aucune Eglise: Car en hayne de la sentence du Pape donnee cōtre luy pour & au profit de sa legitime femme il renonça à l'Eglise Apostolique & Romaine, combien qu'il obseruoit toutes les ceremonies d'icelle, & poursuiuoit à feu & à sang tant les Lutheriens que sacramentaires, & autres sectes de son temps. Voyla le fondement de l'heresie qui regne auiourdhuy en Angleterre:

Car ce bon Prince pour paillarder à son aise repudia tout à vn coup sa legitime femme tant spirituelle que temporelle. Il ne recognoit plus l'autorité du Pape, ains se faiçt luy mesme chef d'une Eglise fantastique & imaginaire, qu'il presuppose estre en Angleterre, comme faiçt aussi pour le iourd'huy sa fille de peur de forligner, & d'estre reputée indigne d'un tel pere. Chose absurde, & ridicule qu'une femme, qui n'a point de chef, & qui est par la loy de Dieu commandée de se taire en l'Eglise, soit declarée & estimée chef d'icelle, pour la regir & gouverner, & commander aux consciences des hommes. Mais la pauvre femme est cōtrainte à ce faire, pour auctoriser le mariage de sa mere, & maintenir son estat presët, estat par l'Eglise Catholique declarée bastarde, cōme elle est, & sa mere adultere & paillard. Et pour mieux asseurer sa tyrannye, elle ne s'est contentée de suiure la voye, que son pere luy auoit frayée & se

faire nommer par vne impudence trop
 euidēte chef de l'Eglise sans delaisser les
 anciennes ordonnances & ceremonies
 d'icelle, ains au cōtraire, les a du tout ex-
 terminees, & en son Eglise pretendue a
 receu toutes sectes & especes d'hērefie
 tout differētes & destruisantes l'vne l'au-
 tre par effects contraires, il n'y a que la re-
 ligion catholicque forclosē & bannie de
 son royaume, ayant icelle mis au rang
 des crimes de leze maiesté, & non sans
 cause. Car par les loix & ordonnāces d'i-
 celle sa maiesté deuiendroit nulle, & se-
 roit du tout abolie & perdue, son pere
 ayant esté déclaré incestueux & adultere
 sa mere putain, & elle mesme bastarde &
 nee de plusieurs incestes. Voyla la cause
 de la grande cruauté qu'elle exerce con-
 tre tous les pauvres Catholiques en son
 royaume, leur supposant vn crime de ma-
 iesté pour les meurtrir & occire d'vne
 mort estrange & barbare, encores qu'ils
 n'ayent onques en leur vie songé à cho-
 se qui

se qui eust peu aucunement preiudicier, à sa persōne, ou à son estat. Il ne faut doncques pas trouuer estrange l'edict dernier de nostre Roy treschrestien publié en sa cour de Parlement le de ce mois de Iuillet par lequel il rembarre les heretiques de leurs propres inuentions, mais bien à plus iuste occasion que ne faict Elizabeth d'Angleterre. Car ses subiets heretiques luy font la guerre (si guerre se doit appeller vne manifeste rebellion & tyrannie) mais en Angleterre ne se trouue vn seul Catholique qui fasse seblāt de resister à la pretendue maiesté d'Elizabeth. Pour retourner à mon propos, le Roy Henry huietiesme ayant vescu enuiron deux ans avec sa nouuelle femme, il comença à descouurir ses ruses & sa vie dissolue, laquelle il ne pouuoit croire auparauant qu'il l'eust associee à sa couronne. Et neantmoins ne fait semblant d'en scauoir aucune chose iusqu'au premier iour de May 1536 qu'estāt à Grenniche cōme

on iouïoit des ieuz à la mode accoustumee du pays, il apperceut les caresses qu'elle faisoit à l'un de ceux qui auoient bonne part en ses bonnesgraces. Lors ne pouuât plus dissimuler, il quitta les ieuz de grande cholere, & accompagné seulement de six hommes se retira à son palais de Vvestmonstier à Londres, & le lendemain la feit emprisonner avec cinq de ses plus fauoris & bié aimez. Le dixneuuesme iour ensuyuant elle fut decapitee en la grosse tour de Londres, ayant auparauât esté condamnée d'adultere & d'inceste. C'est vne chose bien remarquable que Thomas Boullen son pere putatif en estoit du nombre des iuges qui donnerent la sentēce. Et le vingt & deuxiesme iour George Boullé son frere vterin, vicōte de Rochefort, Héry Noreis Guillaume Bouerton, François Vveston, gentils hōmes de la chābre priuee du Roy, & Marc Siueton musicien furent à cause de l'inceste & adultere commis avec la Roy

ne, executez à mort sur la montaigne de ladite tour. Thomas Vviat fut exempt de ceste cōdamnation pour auoir déclaré le crime au Roy & à son conseil auparavant que sa maiesté se fust laissée aller à ceste miserable femme, laquelle après auoir descouuert sa vilennie, le Roy eut tāt à contrecœur, qu'en l'assemblée des estats il fit declarer Elizabet, qui en estoit issue, bastarde & incapable des droits qui appartiennēt aux enfans des Roys. Voilale sommaire de l'histoire de la naissance de ceste dame, laquelle i'ay deduit le plus succinctement q̄ i'ay peu, cōtraint à ce faire pour mōstrer la source des maux, que Dieu a faict regner entre les hōmes, pour les pechez d'un Roy tyrā, à fin d'exterminer sa race par sa race mesme & par les effects propres de sa concupiscence. Car ceste femme impudique qu'il auoit prinse contre les loix, contre l'aduis de tous hommes d'hōneur, & contre sa propre conscience, sous esperance d'auoir

d'elle (comme il disoit) des enfans masles,
 a porté le fruit qui fera mourir l'arbre.
 Car sa fille se perdra elle mesme pour abo-
 li & esteindre ce qui reste du sang royal
 d'Angleterre. Je m'assure, lecteur, que tu
 prendras ceste digression en bonne part,
 quand il n'y auroit autre raison, sinon la
 verité de ceste histoire tragique & pres-
 que incroyable, laquelle a esté deguisee
 par aucuns de noz François afin de flatter
 ceste bonne dame, qui a depuis le com-
 mencement de sa tyrannie si bien com-
 mandé à la fortune, qu'elle a tenu les lan-
 gues des hommes en bride aussi bien en
 France qu'en Angleterre. Je retourneray
 doncques maintenāt au discours par moy
 entrepris de la mort inhumaine de la
 Royned'Escoffe, & des causes d'icelle.

Elizabet & son plus priué conseil en-
 tierement composé des plus sçauants ho-
 mes qu'elle a peu choisir de l'escolle de
 Machiauel (atheiste trop cogneu main-
 tenāt és cours des Roys par ceux qui fōt

les grands politiques) bien instruits & aduertis que le mariage du Roy avec Anne Boullen ne pouuoit subsister par aucune loy du monde, estant icelle Anne sa fille naturelle, & que lors qu'il l'espousa il auoit vne autre femme à luy cōioincte du consentement de ses pere & mere, & des estats d'Angleterre & d'Espaigne, & de l'auctorité du Pape & de la saincte Eglise, laquelle auroit reprouué & condamné ceste seconde conionction, comme auroit pareillement fait le Roy mesme depuis avec l'aduis de son parlement qui est la pleine assemblee de tout son Royaume, où il feit declarer ce mariage illegitime, & celle qui en estoit procree bastarde, preuoyāts, di-ie, Elizabet & s^{on} conseil tels inconuenients, qui la rendoient inhabile à regner, ils ont recherché des voyes sinistres & obliques pour la maintenir en auctorité souueraine, cōtre raison & contre les loix de la couronne, qui la priuoient entierement de tous droits de royauté. Ils ont regardé d'autre

part que la vraye heritiere du Royaume estoit Marie Royne d'Ecosse & de France, petite fille de Henry septieme Roy d'Angleterre: que ce Roy auoit eu deux enfans masles, Arthur & Henry, & trois filles, Marguerite, Marie & Catherine: qu'Arthur mourut biē ieune sans hoirs progrez de sa chair: qu'Henry depuis surnommé huiſtiesme auoit delaiſſé des enfans qui estoient tous morts sans lignee: qu'Elizabeth qui estoit seule demeuree de tous, estat illegitimement & non capable du tiltre de Royne, la couronne retournoit necessairement aux enfans de Marguerite fille ainee dudit Henry septiesme: que ceste Marguerite auoit esté mariee en premieres nopces avec Iacques quatriesme de ce nom Roy d'Ecosse, & auoit eu de luy Iacques cinquiesme, pere de ceste Marie de laquelle nous parlons, Royne d'Ecosse & douairiere de France, dont paroissoit euidement que le droit du royaume d'Angle-

terre luy escheoit par le deces de Marie fille de Catherine d'Espaigne, qui n'eust peu pretendre aucune chose audit royaume si Elizabeth eust esté fille legitime de son pere, & nee pour porter couronne. Ce que voyant Elizabeth, & les moyens que ceste Escossoise auoit de maintenir son tiltre, & d'entrer en iouissance de son droit avec le temps, & que s'estant mariee avec le Dauphin de France elle auoit prinse les escussions & les armoiries du royaume d'Angleterre, & que le Roy tres-chrestien Henry second de ce nom sollicitoit le Pape Paul quatriesme afin que suyuant la bulle de Clement septiesme le droit dudit royaume fut par luy adiugé à sa bru, qui estoit celle qui par toutes loix diuines & humaines le pouuoit iustement vendiquer. Elizabeth, di-ie, toutes ces choses bien considerees, propose d'y remedier de bonne heure, & transporter l'orage, qui pendoit sur sa teste, sur les royaumes circonuifins, qu'elle auoit grâ-

de occasion de redouter. Elle pratique des intelligences en France avec le feu Admiral de Coligny, ses complices & adherans, d'ot s'en est ensuiuie la coniuratiō d'Amboise, & autres semblables tragedies desquelles ie me deporteray de parler. Et en Escosse elle suscite Iacques Stuard prieur de saint André, frere bastard de la Roynie, seul aucteur de la subuersiō de son estat, & de la ruine de son pays. En quoy est bien considerable le iugement de Dieu punissāt les Roys & monarques, qui gratifient les meschants outre mesure, & les aduancent plus qu'ils ne doiuent. Iacques cinquiesme Roy d'Escosse craignant que ses bastards voulussent quelque iour entreprendre sur ses enfans legitimes, & pretendre à la royauté les auoit tous fait sequestrer du monde pour estre vouez & consacrez entierement à Dieu, pensant que par ce moyen ils ne pourroient retourner à vie profane, ne iouir d'aucune dignité seculiere, & qui

n'appartient qu'aux personnes layes. Ce que cognoissant bien ce bon Prieur, & les occasions qui se presentoient de faire ses affaires en l'absence de la Royne sa maistresse estant pour lors en France, & que la France estoit troublee par les menees de l'Admiral, avec lequel il auoit de bonnes intelligences, & pareillement avec Elizabeth Angloise qui luy promettoit mōts & merueilles, il quitta sa religion, & s'adonna au Calvinisme, n'ayāt autre moyē de paruenir à ses desseins. Mais Elizabeth scachant bien que ce bastard n'auoit pas tant de credit que besoin estoit pour reuerfer l'estat d'Escoffe, elle pratiqua Iacques Hamiltō cōte d'Arā fils aîné du seigneur d'Hamiltō Duc de Chastelleraud en Poictou, premier Prince dudit royaume, qui pour lors estoit en France mieux honoré & respecté qu'il ne meritoit, capitaine decēt hōmes d'armes, chef & cōducteur des bādes Escoffoises qui faisoient seruice au Roytres-chrestie en ses guerres, & sceut si bien en babouyner ce ieune Prince

plus vaillant & magnanime que sage & aduisé, que par les belles promesses à luy faictes de l'espouser, & le rēdre Roy des deux royaumes, il se reuolte contre sa maiesté treschrestienne avec les coniu rez d'Amboise, dont en fin il fut contraint d'abandonner la France, & perdre la Duché de Chastelleraud avec les honneurs & les biens qu'il y auoit. Et estant de retour en son pays, ioinct avec les rebelles, apres qu'il eut fait contre Dieu & contre sa maistresse tout ce qu'un fol & enragé pouuoit faire à fin de contenter Elizabet, & paroistre digne du mariage qu'elle luy auoit promis, elle se mocqua de luy & de ses ambassadeurs, & l'affronta de telle sorte qu'elle l'a réduit pauvre & miserable toute sa vie. Mais il n'est pas seul qu'elle a pippé par les beaux propos de son mariage. Elle a deceu & trompé neuf ou dix autres, ayant tousiours pour chose arrestee en son esprit de ne se marier iamais, de peur qu'elle a de l'af-

fuie tir à vn seul homme. Tant que ce fol
 prince faisoit la guerre cōtre sa maistres-
 se, & paracheuoit la ruine des Eglises, &
 de toute la police & ornement du roya-
 me d'Escoffe, il a esté tresbien assisté des
 forces d'Elizabet tāt par terre q̃ par mer
 sous la conduite du duc de Norfolk &
 de mi-lord Gray son lieutenant, & de mai-
 stre Vvynter Vic'admiral d'Angleterre,
 par le moyen desquelles il assiegea la vil-
 le de Lithe, qui est vn port de mer à vn
 quart de lieuë d'Edimbourg, que les Frā-
 çois & naturels Escossois auoient forti-
 fié en attendant le secours que monsieur
 le Marquis d'Elbeuf leur amenoit de Frā-
 ce. Mais ce secours ne pouuant venir à
 cause de la tempeste qui le dissipa & dis-
 persa par mer çà & là, les Anglois & les
 trahistres & rebelles Escossois estans les
 plus forts, contraignirent les François
 abandonner le royaume d'Escoffe, & rō-
 pirent la ligue la plus ancienne de l'Eu-
 rope establie entre les deux nations du

temps de Charles le Grand Empereur &
 Roy de France, & d'Achais Roy d'Es-
 cosse, pour se liguier & associer avec Eli-
 zabet, Vsurpatrice d'Angleterre, en quit-
 tant tout d'un coup Dieu, leur Royne &
 souverain magistrat avec leurs anciens
 amis & confederez, à fin de s'affranchir
 & delier de toute religion. Mais pour
 cela les bons & naturels Escossois ne se
 sont oncques oubliez ne mescogneuz,
 soit enuers Dieu, soit enuers leur mai-
 stresse, ses anciens alliez & amis, ains ont
 tresbien continué & maintenu de tout
 leur pouuoir le seruice de Dieu & de
 leur souveraine, avec l'amitié qu'ils ont
 tousiours porté aux François, pour la-
 quelle leurs ancestres auoient tant endu-
 ré, en soustenant les efforts & la tyrannie
 des Anglois, qui n'ont iamais peu esbrâ-
 ler leur constance. Je ne parleray plus
 de ce subiet, l'auteur de tel forfait
 estant plus griefuement puny que nous
 ne souhaitterions par ceux là mesme qui

l'ont mis en besoigne. Voila doncques l'Escoffe reuoltee, voila l'estat de ce pauvre royaume affligé, voila les bons subiects affoibliz & mis si bas par les complots & menees d'Elizabet, qu'il n'a esté possible depuis d'y remedier. La Royne apres la mort de sa mere & de François second son mari treschrestien (que Dieu absolue) pensant donner quelque ordre à ces inconueniens, se resolut de retourner au pays, & y mener vne bonne & puissante armee par l'aduis de messieurs ses oncles, qui pour lors auoient voix au chapitre & gouuernoient l'estat de la France, dont Elizabet aduertit incontinent Iacques Stuard son frere bastard à fin qu'il allast au deuant, pour rompre coup à ce dessein, comme il fait fort accortement. Car estant arriué en France, il se presenta deuant sa maistresse, avecques vn visage plus esleué & mieux assure, que n'eust faict vn plus homme de bien, & nullement trahi-

estre il met en auant beaucoup de raisons pour empescher la leuee de ceste armee, disant qu'il y auoit moyen d'appaiser le peu de trouble qu'il y auoit en Escosse sans entrer en aucuns frais: qu'à la premiere veue de sa maiesté le desordre qui restoit en son royaume s'esuanouiroit, tout ainsi que fait vne petite brouee du matin à la venue du Soleil: que sa parolle seule rageroit à raisõ les plus refractaires & desobeissãs: que c'estoit peine perdue de faire si grand appareil d'armes, & se consumer en despence non necessaire: qu'il prenoit sur luy à peine de son honneur & de sa vie que sa maiesté ne trouueroit aucune resistance, ou cõtredit en Escosse. Il presche si bien qu'il est escouté, comme il aduient souuent aux grãds, qui par ie ne sçay quel destin sont credules à leur malheur, & se laissent aisemēt persuader quand on leur propose l'espargne des frais. Incontinent on luy prepare des galeres, & la monte on sur mer. Dõt

Elizabet sa cousine aduertie incontinent luy dressa des embusches la voulant empoigner au passage. Ce qu'elle ne peut, estant ladite dame bien dextrement conduite par bons pilotes Francois, & tousiours couuerte d'une espesse nuee iusque à ce qu'elle fust rendue en Escosse. Estant arriuee elle fut fort bien receue de tout le peuple, hormis des Ministres, qui l'auoient tousiours en horreur tant à cause de sa religion, qu'à cause de messieurs de Guise ses parens, grands ennemis des heretiques, & protecteurs de la couronne de France contre ceux de leur secte, qui l'oppugnoient durant la minorité des Roys. Et d'ailleurs les ministres d'Escosse estans confederez, & la plus part pensionnaires d'Elizabet, estoient rendus propugnateurs de son autorité, qui estoit leur seul appuy, & fondemēt de leur credit, de sorte qu'en tous leurs sermons & presches ils affectionnēt la maniere de parler des Anglois afin que

par telle nouveauté, & fard de langage ils fussent plustost admirez de la simple populace, que bien entendus. Et par ainsi reputoient leur naturelle dame & maistresse leur plus grand' ennemie, qui detestoit leurs nouveautez en la religiõ, & suiuoit de tout son cœur la vraye & ancienne ligue Fráçoise. Toutesfois voyáts qu'elle permettoit l'exercice libre de leur pretendue Religion, & qu'elle se laissoit mener par son frere bastard, sur lequel elle se reposoit entierement, & le souffroit gouverner les affaires du royaume à sa fantasie, ils se sont tenuz coys pour quelque temps sans vser d'inuectives contre sa maiesté, se contentans de leur fortune, ne pouuans pour lors la souhaitter meilleure: aussi que sa maiesté pour contenter ce bastard, & le pensant rendre à elle plus astrainct & obligé consentit qu'il chāgeast de personnage, qu'il quictast la vie ecclesiastique pour retourner au mōde & à condition laye,

(cho-

(chose qu'elle luy auoit tât de fois refusé par le bon conseil de ses parens & amis en France) & apres luy auoir donné la cōté de Murray, & gratifié de plusieurs autres terres & seigneuries, & réduit si grand en biens, honneurs & dignitez que la fortune ne pouuoit passer outre sans le faire Roy, elle le maria fort richement en l'une des premieres maisons du royaume, faite aussi lourde qu'elle fait iamais en mesprisant l'aduis & intention bonne & sage du feu Roy son pere, qui ne vouloit, comme dit est, que ses bastards fussent aduancez en aucune dignité seculiere. Dieu s'est courroucé contr'elle d'auoir tant gratifié ce meschant homme, ingrat & indigne de la moindre partie de ses bienfaicts. Il aduient communement que le plaisir fait à vn meschant redonne à la confusion & dōmage de celui qui l'a fait. De là s'en est ensuiuie la perte de son estat & sa derniere ruine. De ceste façon de faire & de l'estat present

D

50

du royaume d'Escoſſe, nō seulement les ministres, mais aussi Elizabet l'Angloise se monstra fort contente, voyant le chemin ouuert à ses desseins. Pour amuser ceste bonne Princeſſe simple, franche & credule de nature, & pour l'entretenir en son erreur enuers le bastard, & en fin de ieu l'enuelopper plus aisément, l'occafion se presentant, elle luy enuoye ses ambassadeurs avec lettres pleines d'honnestes offres, & promesses de perpetuelle paix & amitié, laquelle ils stipuloient, la promettant reciproquement de la part de leur maistresse, avec grands serments, & pour gaige perpetuel & tesmoignage certain de ce luy feirēt present d'un beau ioyau. La Royne d'Escoſſe pour ratifier & approuuer ceste ligue nouuelle & inaccoustumee entre les Escoſſois & les Anglois, & toutesfois accordee sincerement & iuree entre elle & sa sœur (car ainsi lors s'appelloient elles l'une l'autre) luy enuoye aussi ses ambassadeurs avec un dia-

mant de grande valeur taillé en forme de cœur , duquel Buchanan a faict vn bel epigramme en ses hendecasyllabes, mais en son histoire il se donne bien de garde d'en dire vn seul mot, ne pareillement de ses ambassades & confederation de ces deux princesses. Car il dissimule bien dextrement en cest endroit, comme il faict en tous autres où se trouue quelque cas au preiudice de l'honneur & de la bonne renommee, credit & auctorité de l'Angloise. Tels presens s'appellent en leur langage token, c'est à dire signe, symbole, ou gage d'amitié reciproquement contractee, comme elle estoit entre ces deux Roynes sous telle condition, que si l'vne d'elles se trouuoit en peine, en renuoyant & monstrant le gage, l'autre la viendroit incontinent secourir de tout son pouuoir. Ceste paix & confederation a esté bien entretenue & gardee tant que la Roynie d'Escoffe se laissa manier à la volõté du bastard. Mais

ses trahisons estés descouuertes, & qu'elle
 se fust efforcee de conseruer sa vie & sa
 couronne, en se deliurant de ses mains,
 vous verrez cōme Elizabet n'a fait estat
 de ses sermens tant solennellement faits
 par ses lettres & par ses ambassadeurs, &
 que la foy Angloise merite donner lieu
 au prouerbe mieux que la Grecque ou
 la Punique. Ce maudit fils d'Agar enflé
 de sa trop bonne fortune, s' imagine ie
 ne sçay quoy en l'esprit pour enuahir le
 royaume. Il prend augure d'vne certai-
 ne vision de sa mere, laquelle estant en-
 ceinte de luy, en dormant songea qu'elle
 le portoit dans son ventre vn dragon,
 qui s'entortillât à l'entour de la teste du
 lyon, en fin le vainquit & le mit sous ses
 pieds. Par le lyon il entēdoit le royaume
 d'Escoffe qui a le lyō pour ses armoiries.
 Ce songe de sa mere l'encouragea gran-
 dement à pēser aux moyēs par lesquels il
 pouuoit paruenir au but auquel il tiroit.
 Il s'aduise qu'il y auoit trois maisons &

familles trop fortes, & beaucoup mieux appuyees que la sienne pour rōpre tous ses desseins, sçauoir est, celle d'Hamilton, celle de Hontley, & celle de Boduel. Il faict en sorte par ses praticques & meenes avec le credit & autorité qu'il s'attribuoit sous le nō de la Roynes, que le cōte de Boduel est banni & chassé du royaume, le comte de Hontley prodiueusement occis & assommé, & le comte d'Arranchef des Hamiltons emprisonné, de maniere qu'il n'a plus de resistance dans le pays, ains y commande absolument comme Roy, s'estant depestré non seulement de ceux qui auoient les plus grādes forces en main, mais aussi de ceux qui par experiēce des choses passees, par bōaduis ou cōseil se pouuoient opposer à ses machinations & entreprises au preiudice de la courōne. Cela fut cause queredoutāt grādemēt la prudēce de messire laques de Bethune Archeuesque de Glasco, qui pour lors estoit en France, & lequel il cognoissoit

estrel'homme du royaume le plus experi
 mēté & le mieux entēdu és affaires d'estat,
 pour y auoir esté tousiours employé de
 puis sa premiere ieunesse, & pour auoir
 serui sa maiesté & sa mere de bonne me
 moire nō seullemēt en cest endroit, mais
 aussi pour auoir fait sous leurs maiestez
 plusieurs Ambassades de tres-grande cō
 sequence vers les plus grands Princes &
 potentats de l'Europe, & d'ailleurs voyāt
 qu'il auoit plusieurs parens, amis, & al
 liez gens de marque qu'il pouuoit rete
 nir en leur deuoir enuers leurs maistresse
 fil retournoit au pays: & avec ce le co
 gnoissant homme rōd, entier, & de sain
 te vie, lequel on ne pourroit iamais fle
 chir ne destourner de son bon propos, ne
 du seruice de sa souueraine. Il fait tant en
 uers sa maiesté que sous ombre de lega
 tion honorable il est retenu en France,
 pour seruir d'orateur & Ambassadeur or
 dinaire vers leurs maiesté tres-chrestien
 nes. Laquelle charge il a fait si vertueuse.

ment, & avec telle diligence, foy, religiō
& intégrité, qu'il en a raporté louange
immortelle enuers toutes les nations du
monde. Car encores que ses moyēs soiēt
bien mediocres pour vn seigneur de son
calibre, & les grandes & vrgentes affai-
res de sa maistresse ne luyayent permis le
gratifier comme elle auoit la volōté, siest
ce qu'il a tousiours tenu maison ouuer-
te, pour seruir de refuge à tous Catholi-
ques Escossois & Anglois, qui pour leur
zele à la religion, ou pour le seruice de sa
maistresse auoiēt couru fortune, avec les-
quels il a tousiours vescu tref-honnora-
blement & trefamiablement, leur com-
muniquant sa bource, sa maison, & sa ta-
ble, sans que pource il ayt onques impor-
tuné les Roys de France, ne receu aucune
chose d'eux depuis vingt huiēt ans ença
qu'il est resident en leur royaume, & à la
suinte ordinaire de leurs cours. Mais afin
de reprendre noz erres en laissant ce pro-
pos, cependant que le bastard comman-

doit ainsi en Escosse, le prince d'Espagne,
 le Roy de Suede, & quelques autres Prin-
 ces & monarques recherchoiēt la Royne
 pour l'auoir en mariage. Ce qu'il ne vou-
 lut onques permettre, craignant que sa
 maiesté eust des enfans pour succeder à la
 couronne, de laquelle il esperoit s'empa-
 rer venāt faute de sa maistresse. Le moyē
 par lequel il pensoit paruenir est tel. Par
 gens interposez de sa faction il fait en-
 tendre à sa maiesté dix mille mensonges
 en detraictāt des chefs de la maison d'Ha-
 milton, premiers Princes du royaume, &
 ausquels le droit de regner appartenoit
 le cas aduenant que la Royne decedast
 sans hoirs procrees de sa chair. Entre au-
 tres choses ils mettent en auant l'imbeci-
 lité desprit du cōte d'Arā fils aîné de ceste
 maison, & la pitie que ce seroit, si vn hō-
 me fol & insensé comme luy venoit à cō-
 mander sur tout vn peuple: & que nō seu-
 lement le cōte d'Arā, mais aussi les autres
 freres, voire toute la race se sentoit de

ceste imperfectiō de nature. D'autre part ils extollent le nom des Stuards, leur ancienne vertu, leur valeur & le long tēps qu'ils ont regné, & le malheur que ce seroit si la couronne leur estoit ostee dessus la teste, & affectee à vn autre surnom. Et pour obuier à tel incōueniēt, & afin d'eterniser la memoire de sa maiesté, & faire chose digne d'elle, & agreable à tous ses subiets, qu'il faudroit affecter la couronne à quatre maisons du surnō des Stuards, & les substituer les vns aux autres, au cas que sa maiesté s'en allast de ce mode sans delaisser en fās de sa royalle personne. Ce regnard pēsoit qu'elle enterineroit fort aisement ceste requeste, & qu'il ne pouoit faillir d'estre nommé le premier, atēdu l'amitié qu'elle luy portoit l'autorité qu'il auoit au pays, estat de sō surnō, & avec ce fils naturel du feu Roy. Mais sa maiesté n'estoit si simple & peu aduisee, qu'elle ne comprist incontinent à quoy tendoit l'impudence de ceste demande.

Car si elle l'eust oüïroyé elle sçauoit que ceste substitutiõ estoit sa ruine, cognoissant les hommes qu'on luy nommoit (& principalement son frere bastard qui estoit le premier en rang) estre de nature si ambitieux qu'ils n'eussent eu patience aucune iusqu'à ce qu'ils eussent exterminé sa maieste par poison, par glaiue, ou par autre voye sinistre & oblique pour obtenir à leurs fins. Ce qu'elle dissimula toutesfois bien accortement, s'excusant sur sa minorité, & sur l'obligation qu'elle auoit à ceux, ausquels l'ordre de nature auoit destiné le royaume apres s^{on} decez. Par ceste responce cognoissat le bastard qu'il ne pouuoit corrompre la sainte intention de la Royne de conseruer la maison d'Hamilton comme la plus proche de la royale, & qu'elle estoit si ialouse de la grandeur & aduancement de ses legitimes heritiers, qu'elle ne souffriroit iamais que par ceste substitution on fermast le pas aux anciennes loix de la cou-

ronne, concernantes la succession legitime & naturelle, il excogita vn moyen, par lequel il pensoit abolir toute la race des Hamiltons, & aussi amuser sa maiesté qu'elle ne se mariaist, & en ce faisant à la parfin s'inuestir de la couronne. Ce moyen estoit la restitution de la maison de Lenox en son entier. Mais la chose luy succeda tout au rebours, comme vous verrez cy apres. Il sçauoit l'inimitié mortelle qui estoit entre ceste maison de Lenox & celle d'Hamilton, & qu'à l'occasiõ d'icelle le comte de Lenox s'estoit retiré en Angleterre, & y auoit demouré si long temps qu'on ne le tenoit plus pour Escossois, ains pour subiect naturel & vray vassal d'Elizabet, ayant pris femme en son pretendu royaume, dont il auoit eu deux enfans entre lesquels Mi-lord Darley son fils aîné, aagé de dixneuf à vingt ans, estoit l'un des plus beaux princes qu'on eust peu trouuer. Le bastard (lequel d'oresnauant nous appellerons

Mourray, puisque les autres escriuains, & ceux de son pays l'appelloient ainsi) ayant empesché sa maiesté de prendre parti outre mer & s'allier aux grands monarques qui la poursuiuoient, pensant la tenir inutile & sans porter enfans pour heriter à la couronne, & neantmoins se doutant que mal-aisément la pourroit il garder en si grande ieunesse, & avec tant excellente beauté qu'à la longue elle ne fust appariée à quelqu'un, il luy propose le mariage de ce ieune Prince, non en intention qu'elle le deust espouser, ains seulement pour la diuertir de l'opinion d'estendre à quelque autre party plus puiffant, & pour desguiser son dessein, qui estoit de ne permettre en façon du monde qu'elle se mariait. Car il tenoit pour chose toute asscuree qu'elle ne prendroit iamaïs ce ieune homme, tant à cause de leur proximité, luy estant cousine germaine, qu'à cause de l'inegalité de luy & de ceux qui cy deuant s'estoient pre-

sentez . Et en tout cas ores qu'elle l'eust voulu accepter pour espoux, il s'asseuroit bien qu'il rendroit ceste volonté sans effect, par l'empeschement qu'il y feroit donner de la part de la Royne d'Angleterre. Voyla donques comme il offroit parti à sa maiesté croyant fermement qu'elle le refuseroit & en le refusant, s'estoit proposé en son esprit de iouër accortement son personnage, & l'engarder de se ioindre à Prince, qui desormais le peust brider, & luy donner loy, sinon tant qu'il en voudroit prédre. La Royne n'auoit onques songé du seigneur d'Arley, ne du comte de Lenox son pere, lors que Mourray & ses cōplices luy entamerent les premiers propos, parlans de luy fort honorablement, & l'extollant par dessus les muets. Ils desiroient qu'elle reuoquast le pere de son exil, non en intention qu'elle prist le fils pour mari: ains à fin qu'elle se seruist de luy à leur fâtasie, & qu'ils eussent le moyen de l'opposer

à la maison d'Hamilton apres que par leurs menees il auroit esté bien auant insinué es bonnes graces de sa maiesté. Laquelle ignorant à quelle fin tēdoient tāt de louanges, les laissoit dire, sans autrement en faire estat, iusqu'à ce que quelque temps apres que le pere fut restitué à son honneur & à ses biens, ils feirent venir le fils, & le presenterent deuant ses yeux. A lors le voyant beau, gentil & de bonne grace, bien aimé, comme luy sembloit, de Mourray, & d'une bonne partie de la noblesse, qui l'auoient tant recommandé aussi bien absent que present, & tāt declamé ses vertus, qu'ils ne trouuoient prince dessous le ciel plus digne pour estre compagnō de son sceptre, elle cuidant que tels propos leur venoient aussi bien du cœur que de la bouche, le commence à prendre en amitié plus auāt que ne vouloient ceux qui l'auoient ainsi mis en ieu, & se laissant gagner petit à petit par leur importunité, en fin se re-

solut de l'associer à sa royale personne. Mourray & ses complices s'apperceuans que s'estoit à bon escient, & qu'il n'y auoit plus de raillerie, cuiderent creuer de despit, & se mangeans les ongles, & maudissant leur sottise blasmoient par tout la legereté de sa maiesté, qui s'estoit ainsi laissé aller à leurs persuasions. Toutefois le trahistre tenoit bõne contenance deuant elle, feignant trouuer bon ce mariage, dont luy mesme auoit esté l'auteur sans y pèser. Mais cognoissant qu'il estoit fort contraire à ses desseins, il taschoit sous main par tous moyens à rompre le coup par luy mesme eslançé. Toutes les ruses par luy pratiquées en Escosse ne peuuent de rien seruir. Il s'adresse à la Royne d'Angleterre avec dix mille calomnies & faux rapports contre le seigneur d'Arley & son pere, qui seroient trop longs à deduire, pèsant que par son commandement, ils se deporteroient de ceste poursuite. Messire Nicolas Trog-

morton est Ambassadeur deputé pour cest effet, qui ne laissa rien en arriere qui eust peu degouster la Royne de l'amour de ce ieune prince. mais les affectiōs mutuelles des deux amants auoient pris racine si auant en leurs cœurs, qu'il n'estoit plus possible par mesdisāces, ou par menaces de personne du monde les desplanter. Sa maiesté ne pensoit qu'il y eust eu homme en tout son royaume, qui n'eust ce mariage fort agreable, estāt à iceluy poufsee par son frere bastard, qui pouuoit tout, & par la plus part de sa noblesse, la priere de laquelle a presque forme de cōtrainte. Le seul empeschement qu'ell' y pēsoit estre c'estoit la cōsāguinité, dōt le Pape les auoit dispēsez. Le mariage estāt sur le point d'estre consommé, voyla Mourray & ses complices enragez, ils ont recours à la force, & se deliberent massacrer le seigneur d'Arlay & son pere à leur retour de la ville de saint Iean à Edimbourg, & confiner la Royne qu'ils accompagnoient

pagnoient en perpetuelle prison au chasteau Lochleuin appartenant au frere vterin de Murray. Le lieu destiné pour faire l'assassinat estoit l'Eglise de Bathe pres dudit Lochleuin. Ce qu'ils eussent executé, n'eust esté que cependant qu'ils attendoient la venue du côte d'Argyl, l'un des principaux de ceste coniuratiõ, le Baron de Doufil aduertit sa maiesté, & luy fit aduancer le pas & l'heure de son departement. Le comte de Rõthes obtint lettres de remissiõ de sa maiesté pour auoir esté complice de ce forfait. Les autres se voyants enfoncez si auant en acte si detestable, encores qu'ils fussent bien asseurez de la douceur & facilité de la Roine, plus prompte à leur pardonner qu'ils n'eussent esté à l'en requerir, ce neantmoins desesperez comme Iudas ils se resolurent à poursuiure leur pointe, & confondre le Ciel & la terre pour causer la dissolution de ce mariage tant preiudiciable à leur tyrannie. Car de s'estre mis en

E

chemin pour executer vne telle trahison & se iouer à leur maistre sans paracheuer vne telle entreprise, il se fit moiét q̃c' estoit tramer la corde qui les estrangeroit, ou acerer le cousteau qui leur couperoit la gorge. Ils se delibererent donc de ne se tenir plus les bras croisez ains proceder par guerre ouuerte. Et pour y attirer le peuple de nature trop prompt à s'esmouuoir à rebelliō, il fōt publier par toutes les villes d'Escoffe par les ministres de Calvin, leurs trompettes ordinaires, que le seigneur d'Arlay estoit papiste, comme estoient pareillemēt ses pere & mere, & que la Roynne ne l'auoit espousé en autre intention, que pour ruiner les fidelles (ainsi appelloient ils les heretiques) & pour renuerfer l'estat du royaume par eux establi au peril de leurs vies & de leurs fortunes & que pour faire reüssir ce dessein à la fin par eux pretendue ils auoient des secrettes, intelligences, & des preparatifs de siatout dressez en France,

chose qu'ils ne pouuoient & ne deuoient souffrir, non tant pour la conseruation de leurs personnes & estats, que pour la manutention & defence de l'honneur de Dieu, & de la pure & sincere religion par eux introduite au pays. Que leurs personnes, biens, & religion ne dependoient q'dela loyd'amnestie faite par lesdeputez de Frâce & d'Angleterre au siege du petit Leithe, & depuis confirmee par les estats d'Ecosse, laquelle toutesfois ils vouloient aujourd'hui corrompre & mettre à néant. Et qu'en ce faisant leurs procesleur estoient desia faits, cōme estants attains & cōuainc⁹ de crime de leze maïeste diuine & humaine, & ne leur restoit plus riē q' la corde. Que force leur estoit de preuenir le dāger cepēdāt qu'ils auoient les moyēs de resister, lesquels leur pouroient manquer en peu de temps, si la Royne & son mary estoient tant soit peu secouruz & assiste de forces estrangeres qu'ils attendoient de iour à autre. Et par ce beaucoup

mieux leur valloit d'affaillir que d'estre af-
 faillis, & preuenus par la tēpeste qui leur
 pendoit sur les testes. Ce pretexte de l'a-
 bolition de la loyd'amnestie & de leur re-
 ligion Caluinique estoit fort specieux &
 suffisant pour attirer beaucoup de gens
 à leur faction, mais d'autāt que plusieurs
 de la noblesse n'y auoiet point d'interest
 & ne se soucioient pas grandement de la
 religion en adiousterent vne autre raison
 ou deux qui touchoient la plus part des
 seigneurs du royaume, & qui leur pou-
 uoient bien donner occasion de penser à
 leurs affaires, leur donnant à entendre, &
 faisant bāniere de ce que sa maiesté vou-
 loit reuoquer toutes alienations du do-
 maine par elle faites durant sa minorité,
 chose coustumiere aux Roys d'Escoffe
 quand ils ont atteint l'aage de vingt cinq
 ans, recours aux actes de leurs parlemēts
 Et outre leur declarerent l'intention de
 sa maiesté de retirer & annexer à la cou-
 ronne toutes & chacunes les terres d'E-

glise occupees par la noblesse, qui valloient mieux que les deux parts du reuenue de tout le royaume, chose qui leur estoit par trop dommageable de desmordre vn si friat morceau. Car ils reputoient les biens ecclesiastiques leur propre patrimoine comme ils font encores. Ceste facon de faire commence bien fort en France au grand prejudice non seulement de l'Eglise, mais aussi du tiers estat, qui par ce moyen s'en va du tout aneanti, si nostre Roy treschrestien n'y donne ordre de bonne heure, comme il eust fait sans doute long temps y a sans les troubles & autres grandes incommoditez qui l'ont distrait & destourné d'un si bon & saint oeuvre, & tant necessaire à la conseruation de son estat, & au salut de son peuple. Mais ce n'est icy le lieu qu'il en faut parler, retour nons en Escosse. Ces raisons de Murray auoient quelque apparence, si le subiet eust esté veritable, principalement pour le regard de la religion.

Mais iamais n'est entré en la fantasie de
 la Royne, ne de son mary aucune opiniõ
 de troubler l'estat du royaume, ou de la
 religion qui estoit lors de son mariage.
 Car elle ne voyoit en ce tẽps là moyẽ
 au monde de pouuoir remuer aucune
 chose. Ains au contraire ils ne gardoiẽt
 aucunement de leur part ce qu'ils auoi-
 ent accordé à sa maiesté par leurs estats
 dont auons parlé cy dessus. Car il auoit
 esté dit que sa maiesté, & ceux de la suite
 de la cour ne seroiẽt inquietez en l'exerci-
 ce libre de leur religiõ. Et toutefois n'ay-
 ant qu'un prestre pour faire le diuin ser-
 uice, il fut battu & outragé deuant les
 yeux de sa maistresse, & ses ornements
 d'autel deschirez & ostez d'être ses mains
 par des coquins de la suite de Murray,
 & s'il est vray ce que rapporte Buchanan
 en ses liures de mensonges qu'il appelle
 histoire d'Escoffe, on luy vouloit faire son
 proces à fin de le punir (& par consequẽt
 la Royne) de la peine qui est ordonnee

contre les idolatres par la loy mosaïque. En quoy vous pouuez veoir le moyen qu'auoit ceste dame d'effectuer ce que disoient ces bons Apostres. Et toutesfois plusieurs Mi-lors & grands seigneurs, voire des plus gens de bien, & notamment le Duc de Chastelleraud, pere du comte d'Aran, se laisserent si bien embouyner par tels imposteurs, qu'ils prirent les armes avec Murray tenants pour vray ce qu'il disoit, pource qu'ils le voyoient gouverner la Roync à sa discretion, & croyoient qu'il sçauoit la plus part de ses secretes pensees. La chose qui principalement les mouuoit à le suivre, c'estoit la crainte qu'ils auoient d'estre recherchez de toutes les tragedies qu'ils auoient iouees en Escosse durant l'absence de leur maistresse, si ceste loy d'amnestie eust esté abolie. Les voyla donques en armes en intention d'attendre l'armee de sa maiesté, & luy liurer bataille au pont de Glasco. Entre autres de

leur faciende ils auoient Iacques Douglas cōte de Mortō & Je Mi-lor Lindsey, qui se feignoiēt neātmoins estre du parti de la Roine, & estoient demourez de son costé en intention de mener l'a-
uātgarde, & ce faisāt à la premiere abor-
dee prédre la fuitte, abādōner sa maiesté,
& faire en sorte qu'elle seroit prise si d'a-
uanture ils venoient aux mains. Mais par
la prouidence de Dieu les coniurez prin-
drent l'espouuante. Car encores qu'ils
fussent en assez grād nombre pour faire
teste à sa maiesté avec les intelligences
qu'ils auoient, toutesfois espris de ie
ne sçay quelle terreur Panique, ils n'ont
osé se soumettre au iugement douteux
d'vne bataille, ains armez comme ils
estoient, ils s'enfuirent conuillans de pla-
ce en place iusqu'à ce qu'ils furent réduz
en Angleterre, où tous trahistres à leurs
princes sont biē venuz, caressiez & reccuz
avec honneur. Estāt là ce trahistre fils de
putain faisoit le Coriolan Romain, solli-

citant Elizabet & les Anglois de sa ligue
 de faire la guerre à son pays. Mais le con
 seil d'Angleterre estoit d'aduis de ne
 proceder par guerre ouuerte, & ensei
 gnes desployees, ains par stratagemes &
 finesse, sans exposer vne si grande mul
 titude d'hommes au hazard de leurs vies
 & sans troubler les deux royaumes, ayās
 moyen d'ailleurs d'effectuer leur dessein
 en emouuant quelque sedition en cour,
 en laquelle la Royne & son mary se
 roient meslez pour les deux parties, cho
 se qui causeroit la desunion de leurs vo
 lontez, & mettroit discord & dissension
 mortelle entre-eux, qui seroit le moyen
 de les empoigner tous, deux & en despes
 cher premieremēt l'vne & puis apres l'au
 tre. Le Secretaire Cecile & sieur Tho
 mas Randolf sçauēt la verité de ceci, qui
 donnerēt l'aduis & cōseil de deux meur
 tres, dōt no⁹ parlerōs ci apres. L'executiō
 de ce cōseil estoit fort aisee, puisque Mor
 tōauoit credit en Cour, y ayāt esté delaissé

par l

74

es rebelles ses compagnons à fin de
sçauoir ce qui se passeroit en icelle & afin
de trahir sa maistresse. Car ils ne pou-
uoïent choisir homme plus accort que luy
pour faire vn tel acte, qui de tout temps
depuis sa premiere ieunesse a esté renom-
mé pour sa desloyauté, comme estoient
pareillement ses ancestres, qui ont touf-
iours eu des secretes intelligences avec
les ennemis de la couronne. Les actes de
leurs parlements en font foy, dans les-
quels vous trouuerez qu'à diuerses fois
ils ont esté restituez à leurs biens & hon-
neurs & ont eu pardõ de leurs trahisons.
Ce galand dõques, comme dit est, delais-
sé du coste de sa maiesté suyuant la cour,
faisoit si biẽ le bõ vallet, qu'il fut logé dãs
le Palais royal. Il y auoit aussi le secretaire
de sa maiesté nommé Dauid Riccio Pie-
mõtois de natiõ, hõme de grãde experiẽ-
ce, & qui entẽdoit des mieux les affaires
d'estat, lequel estoit biẽ respecté de sa mai-
stresse, nõ par aucune beauté ou bõne gra

ce qui fust en luy, eſtât hōme aſſez aagé,
 laid, morne & malplaiſant, ains pour ſa
 grande fidelité, ſageſſe & prudence, & à
 cauſe de pluſieurs autres bonnes parties
 dont ſon eſprit eſtoit dignement orné.
 Mais au contraire ſon maiſtre le haïſſoit
 grandement, tant à cauſe qu'il auoit tra-
 uailé pour le reſtabliſſemēt de la maiſon
 d'Hamilton, dont il eſtoit ennemi, qu'à
 cauſe que non ſeulement il refuſa ſigner,
 mais auſſi reuela à la Roine certaine con-
 ſpiration conclue entre ſon alteſſe, &
 les rebelles, par laquelle la reſolution e-
 ſtoit de renfermer ſa maieſté en vn cha-
 ſteau ſous bonne & ſeure garde à fin de
 ſattribuer toute authorité & l'étier gou-
 uernemēt du royaume mi-lord Reuē dōt
 le chef de ceſte cōſpiratiō avoulu trefgrād
 mal à ce pauvre ſecrétaire cōbien qu'il ne
 l'eufſt oſé ne peu celer à ſa maieſté qui l'a-
 uoit trouué & tous les coniurez enſem-
 ble au conſeil dans vn petit cabinet dōt
 ſon mari ſe faſcha cōtre elle & cuida cre-

uer de despit. D'ailleurs Morton redoutant grandement la preuoyance de cest homme qui estoit fort contraire à ses desseins, se resolut de le faire mourir, & en ce faisant executer bien dextrement l'aduis à luy donné par le conseil d'Angleterre, maudit & abominable, qu'il n'eust peu estre excogité, que par gens trahistres, desloyaux, & qui ne pensent qu'il y ait vn Dieu vëgeur de telles inuentiōs plus que diabolicques. Il s'adresse à ce ieune prince (qui n'estoit pas plus sage que son aage le permettoit) & luy met en teste l'inuestiture de la couronne, & les moyens d'y paruenir, & se faire grand, & pour estre obey, respecté & honoré de tout le peuple Escossois, à quoy il promettoit luy tenir la main, & de l'emanciper de la tutelle d'une femme, à laquelle n'appartenoit pas de cōmander par dessus son mari, estant chose contre nature que la poule chante deuāt le coq, & contre le cōmandemēt de Dieu, que l'hom-

me soit subiect à sa femme, estant l'homme l'image de Dieu, & la femme l'image de l'homme. Voila de belles entrees, & fort plausibles à vn ieune homme de grand cœur, & qui a les honneurs & la grandeur en teste, chose qui aduiét communement aux plus grands esprits, comme disent Platon & Cicero bons maistres de la police des republicques & monarchies de mesme temps les ministres commencent à prescher contre le gouvernement des femmes, & leur chef Iean Lenox vray membre & apostre de Satan, apostat, paillard, & inceste cōme estoit le Corinthiē duquel parle S. Paul en son Epistre 1. *Cor.* 5. en auoit fait vn liure tout expres. Mortō cognoissāt que ce prince luy prestoit l'oreille & pnoit plaisir à ses flagorneries, il passa outre, & par calomnie luy met en ceruelle, que le secretaire Dauid estoit plus familier avec la Roine, que son honneur ne le pouuoit permettre, & que la maiesté de la couronne ne le

deuoit endurer, & que c'estoit ce Dauid qui dissuadoit la Royne de luy octroyer la couronne matrimoniale, qui de droit luy appartenoit comme chef de sa femme laquelle il pouuoit contraindre par tout droit diuin & humain de consentir à vne chose tât raisonnable, & si elle refusoit à ce faire, il luy promettoit l'assistance de la Royne d'Angleterre & de Mouray, & ses adherants, qui y estoient retirez pour luy tenir main forte, moyennât qu'il luy pleust leur pardonner la faute passée, & les remettre en leurs estats, chose qu'il pouuoit & deuoit faire sans demander l'aduis d'une femme, qui ne doit depêdre que de la volôté de son mary. Et aussi moyennant ce il luy promettoit de sa part le tiltre du Roy non seulement durât & constât leur mariage, ains perpetual à luy & aux siens, s'il aduenoit que la Royne decedast sans enfans, & qu'il empescheroit biē les heritiers de sa maiesté d'y paruenir. Ces conditions sont stipu-

lees & acceptees d'une part & d'autre auf-
 fitost qu'elles sont proposees. De l'autre
 costé ce bon Iudas remonstroit à la Roy-
 ne la ieunesse de son mari, plein de sa vo-
 lonté, & qui se perdrait luy mesme, si sa
 maiesté ne luy tenoit la bride que la cou-
 ronne qu'il demandoit seroit la ruine de
 tous deux, si elle luy estoit accordée: qu'il
 le faisoit fort sagement de retenir la sou-
 veraineté par deuers elle, qui estoit reco-
 gneue de tout le peuple pour dame &
 maistresse, & que malaisement endure-
 roit il le ioug d'un Anglois, qui ne peut
 faire qu'il ne ressete le naturel du lieu de
 sa naissance, voulant dire que les Anglois
 s'ot tant fiers & superbes de nature, que
 les Escossois ne les peuuent supporter. Il
 ne se contenta pas de donner tel conseil
 à la Royne à fin de la rēdre odieuse à son
 mari, mais aussi descrioit-il ce pauvre
 prince, qui le pensoit son meilleur ami,
 enuers toute la noblesse, blasmant son
 outrecuidance, qui pensoit porter tiltre

de Roy en Escosse, & abuser de la Royne tout ainsi que d'une esclave: que son insolence estoit intolerable non seulement à l'édroit de sa maiesté, mais aussi de toute la noblesse: qu'il estoit besoin de la refrener, afin qu'il n'abusast de sa bonne fortune, & qu'il ne s'avancast plus que les loix du royaume ne le permettoient. Voyla les pratiques de ce bout-feu durant l'absence de Murray, son ami. Le pauvre Prince ne se doutant de la trahison qu'on luy brassoit tendant à sa dernière ruine, & ne songeant à rien qu'à son interest particulier, & aux moyens de s'agrandir, se fioit entierement en Morton & croioit que sa femme par le seul conseil du secretaire luy refusoit l'inuestiture du royaume, de maniere que voyla pour l'entree de leur tragedie la mort de ce pauvre homme resoluë & arrestee. La Royne ne sçauoit rien de ces belles conuentions entre Morton & son mari, ains voyât que l'occasion se presentoit par l'absence de

de Murray & de ses cōplices d'effectuer quelque chose concernant l'honneur de de Dieu & sa sainte religiō, que iusqu'à lors elle n'eust osé, & n'auoit eu le moyē d'entreprendre, elle auoit fait assembler les trois estats au cōmencement du mois de Mars, à fin d'auiser sinon à la restauration entiere del'Eglise Catholique, abolie en Escosse par les rebelles, à tout le moins qu'il fust permis aux gens d'Eglise de viure à la mode accoustumee & de seruir Dieu selon leur conscience, sans la forcer ou contraindre au Calvinisme. Le second chef qu'on y pensoit proposer, c'estoit l'exercice libre de la Iustice, à ce qu'elle fust rondement & exactemēt administree par tout le royaume, ayant puis quelques annees esté bannie & mise sous les pieds avec la religiō. De quoy son mari feignoit estre fort cōtent, & caressoit sa femme outre la coustume ne sçachant quelle chere faire pour luy complaire. Mais d'autant qu'en expediant ce

second chef, se deuoit traicter la cause des rebelles fugitifs en Angleterre, le soir precedant la premiere seance des estats, cest affaire fut interrompu par le moyen d'une trahison la plus sanglante & barbare dont on ait onques entendu parler au monde. La Roynie soupoit en son cabinet dedans son palais de sainte Croix lez Edimbourg, sur la fin du souper son mari, le comte de Morton, Mi-lord Reuen, Mi-lord Lindesay entrent dedans le cabinet avec bonne compagnie d'hommes en armes. Entre les autres, ce Reuen ayant vn casque sur la teste, & le reste du corps armé sous vne robe longue, à son entree se meit dans vne chaire, & faisoit fort laide grimace. La Roynie l'ayant aduise luy dist, qu'il n'auoit pas la façon d'un homme qui eust enuie de bien faire. A quoy il respondit, qu'il ne vouloit mal qu'à vn vilain qui estoit pres d'elle, montrant son secretaire avec le doigt, & qu'il falloit qu'il fortist. Ceste parolle ne

fut si tost dite, que le pauvre hōme ne fust
 assailli de toutes parts. Il tenoit la robbe
 de sa maiesté criāt à haute voix, giustitia,
 giustitia. Mais pour cela ils ne laisserent
 de frapper, mesmement par dessus les es-
 paules de la Roine sans respect aucun de
 sa royalle personne, enceinte & proche
 de son acouchemēt. Entre les meurtriers
 le fils aîné du Mi-lord Reuen, les autres
 disent que c'estoit messire André Kar de
 Fadonsid, oyant que sa maiesté se plai-
 gnoit de telle cruauté cōmise en sa pres-
 ce, luy presenta la pistolle contre le ven-
 tre le chiē abbattu, blasphemāt & reniāt
 Dieu, qu'il la tueroit si elle en disoit vne
 seule parolle, outre plusieurs iniures par
 luy proferées impudemment & felon-
 nement contre ceste esplouree princesse,
 dit dix mille vilénies de son fruit, qu'un
 homme d'honneur, sage & modeste ne
 voudroit proferer ne souffrir estre pro-
 feree contre la personne la plus vile &
 abiecte du monde. En quoy vous pou-

uez confiderer la bonne volonté qu'ils portoient au Roy à present regnant, & iuger sans vous tromper qu'ils estoient ses ennemis iurez auparauant qu'il fust né. Car si quelqu'un des assistans n'eust destourné de la main le bras de celuy qui presentoit le coup, ie ne sçay si sa maiesté eust suruescu son secretaire, & delaisné vn fils pour quelque iour venger vn tel forfait. On dit que l'intention de l'Angloise, qui auoit conseillé ce meurtre, estoit de faire auorter la Roynne, & la faire mourir avec son fruit, ou si elle escha poit avec, disgratier son mari, chef de ceste execution de telle sorte que iamais elle ne luy pourroit estre reconciliee dont ensuiuroit incontinent la ruyne de l'un & de l'autre à son souhait. Car ces causes cessantes, il n'estoit à besoin de tuer ce pauvre homme en la presence de leur maistresse ayans dix mille moyens de le tuer ailleurs. Car le iour mesme il auoit ioué à la paume avec le Roy. Il est

bien à presumer que le lieu n'a pas esté choisi sans mystere. Voila le massacre accompli, le pauvre secretaire deuant les yeux de sa maistresse meurtri & assassiné de soixante tant de playes, la plus part mortelles, elle mesme ferree & mise prisonniere dans vne chambre, ses gardes, seruiteurs & seruantes domesticques chassés hors la maison royale, & quatre vingts soldats de la suite des massacreurs apposez à la garde de la porte de sa chambre, à fin d'empescher que personne viuante n'approchast pour conferer avecques sa maiesté. Le lendemain environ douze ou quinze heures apres le meurtre commis, voicy Mourray & ses complices qui arriuent d'Angleterre bien accompagnez. En quoy vous pouuez veoir si l'Anglois estoit de la partie. l'appelle le mi lord Bedford gouuerneur de Beruic à tesmoing qui diroit biē la verité si Elizabet & son grand ami Lecestre le vouloient permettre. Estans arriuez,

la premiere chose qu'ils feirent ce fut de comparoir à l'assignation qui leur auoit esté donnee à trois briebs iours, dont ce iour la estoit le dernier, qu'ils deuoient estre depossédez de leurs biens & estats, degradez de noblesse, & leurs armoiries brisees en ceste assemblee du parlement s'ils eussent defailli. Ils se presenterent donques & demanderent acte de leur cōparution, n'ayants trouué personne en iustice qui leurs demādaſt aucune chose, le royaume estant si troublé que l'assemblee des estats fut rompue. Mourray à la premiere abordee donne son aduis que sa maieſté fust gardee plus estroitement en quelque forteresse qui fut à leur deuotion. Ce qu'ils delibererent faire, mais auparauant qu'executer cest aduis ils ſamuſerent à conferer ouuertement & à bon eſcient avec le Roy de ce qu'ils deuoient faire, la chose estant si bien commencee, & n'estant plus question de ſemoquer, puisqu'ils ſ'eſtoient fourrez si a-

uant, & auoient tant offensé la Royne, que ce seroit chose absurde & ridicule de la penser appaiser: qu'elle n'auroit point de cœur, si elle ne se ressentoit de telle cruauté; & que par ainsi force leur estoit de se deffaire d'elle tout incōtinēt: qu'il falloit publier par toute l'Europe, son adultere avec Daud, pour faire trouuer leur cause bonne non seulement enuers le peuple, afin d'appaiser sa fureur, mais aussi enuers le Roy de France, & tous les Princes Chrestiens qui en pourroient estre offensez, & poursuiure la vengeance d'un crime tant enorme. Cela fait pour bien establir au royaume & autoriser la doctrine Euangelique (ils entendoient le Calvinisme) & abolir la Messe, il falloit aussi tuer tous les papistes, ou à tout le moins vne bonne partie, & chasser les autres hors du royaume. Toutes ces choses bien executees, ils luy promettoient l'investir du royaume, & ne recognoistre d'oresnauāt autre autorité que la sienne.

Et pour luy donner assurance de leur dire ils vouloiēt que tout à l'instant quelques ordonnances & edicts fussent publiez par les carrefours d'Edimbourg, sous son nom seul, & sans y adiouster le nom de la Royne, comme l'on auoit de coustume. Mais de bonne fortune pour luy il aduint que Mourray se presenta, faisant le bon vallet, & parla à sa maiesté comme s'il eust esté innocent & ignorāt de toute la cōspiration, luy demandant pardon de la premiere faute par luy cōmise & par ses complices lors qu'ils se retirèrent en Angleterre, luy remonstrant outre le danger où elle estoit si elle ne trouuoit moyen d'appaiser ceux qui auoient tué son secretaire, ce qu'elle pouoit faire les receuant à mercy & leur ostant du cœur le desespoir qu'ils auoient d'obtenir grace. A quoy elle feit response qu'ils n'auoiēt onc cogneu en elle un esprit felō, cruel & vindicatif, ains au contraire que plusieurs d'entre eux auoient

expérimenté sa trop grande douceur &
 clemence, & dont elle ne se repêtoit pas,
 estant ceste vertu plus seante à vne prin-
 cesse telle qu'elle estoit, que nulle autre.
 Mais estât captiue & detenue par force
 ouuerte cōme il la voyoit, elle n'auoit au-
 cun moyen de la pratiquer maintenant,
 & la mettre en effect leur accordant la
 grace qu'ils demandoient. Car ce qu'elle
 feroit ne leur pourroit de rien seruir,
 ne pareillemēt à luy auquel elle desiroit
 gratifier sur tous autres & faire tout le
 plaisir à elle possible, comme elle feroit
 paroistre par les effects leur violēce ayāt
 prins son cours, que sa bonté surmonte
 leur felonnie. Apres que ce bastard eut
 eu responce si agreable, son mari entre
 en la chambre où sa maiesté estoit reser-
 rec, le voyant elle s'adresse à luy & luy
 remonstre doucemēt sa trop lourde fau-
 te, le danger auquel son ambition l'auoit
 precipité, le peu de moyen qu'il y auoit
 d'y remedier, le peu d'occasion qu'elle

90
luy auoit donnee à se distraire de son amitié pour adherer à ses plus mortels ennemis, qui tant de fois auoient iuré & attenté sa ruine: qu'il n'estoit riē en Escosse sinon par elle, & sous l'ombre de son autorité: qu'elle estoit preste à luy porter vn enfant qui accroistroit son pouuoir, & credit: qu'elle estoit en danger de mourir avec son fruit par le moyen des excès qu'on luy auoit faicts, que cela aduenant il estoit perdu, & ne deuoit auoir aucune esperance d'eschapper les mains sanglantes de ceux à la persuasion desquels il auroit tué sa femme & son enfant: qu'ils ne se cōtenteroient d'estre liberez de celuy qui auoit la veuë si aigue & subtile en leurs affaires q̄ ce n'estoit à Daud à qui ils en vouloient: qu'ils iroient biē plus auāt en besōgne: q̄ le s̄g innocent de ce pauvre hōme qu'il auoit fait massacrer si cruellement sans aucun respect, ou apparēce de raison & de iustice crioit vengeance à Dieu, & par ce qu'il eut re-

cours à sa diuine Maiesté avec repentance entiere de son enormité, & qu'il n'y auoit autre moyen de s'exempter du hazard où ils estoient à present reduits par son outrecuidance & temerité, sinon sa toutepuissante misericorde, qui n'abandonne ceux qui recognoissent leurs fautes avec vn cœur humble & contrit. Ce pauvre prince quelque ambition qui l'aveuglast auparauant, ayant bien ouy & considéré ces propos commence à mettre de l'eau en son vin, & songer à sa conscience, & avec la larme à l'œil apres luy auoir demandé pardon il luy descouure entieremēt le secret de l'escolle, sans celer vn seul poinct de toute la cōspiration, mesmement ce qui concernoit la vie de sa maiesté, & entre autres choses, qu'ils auoiēt arresté en leur conseil de faire trécher les testes par forme de iustice à Milord Fleming, Mi-lord Leuinston, & à messire Iacques Balfour, & de massacrer vne grande partie des premiers & prin-

cipauxseigneurs du royaume, & de noier
 plusieurs des dames d'honneur de sa maie
 sté, nō memēt celles qui estoient des plus
 anciennes & plus illustres familles. Il luy
 declare aussi les belles promesses qu'ils
 luy faisoient du tiltre de Roy, avec l'ai
 de & assistance de la Royne d'Angleter
 re & de Gaspar de Colligny admiral de
 France, au cas que le Roy treschrestien
 Charles qui pour lors regnoit, ou ceux
 de la maison de Lorraine, & autres parés
 de sa maiesté se voulussent ressentir de
 telles iniures. Mais qu'il ne se pouuoit
 fier en la parole de gens si cruels & in
 humains, & qu'au contraire il ne s'atten
 doit à autre chose, sinō d'accompagner
 sa maiesté à la mort, qui luy estoit desia
 comme certaine & resoluë. La Royne
 ayant entendu les misteres d'une si hor
 rible & incroyable trahison, apres luy a
 uoir remonstré de rechef, le danger qui
 les environnoit, & le peu d'assurance
 qu'il y auoit aux promesses de gens si bar

bares, desloiaux & remplis d'impieté, le
prie de retourner par deuers eux, & leur
rapporter qu'il l'auoit trouuee en fort
bône trépe, à leur accorder & souscrire à
tout ce qu'ils voudroient, mais qu'estant
prisonniere cōm'ell' estoit, tout ce qu'elle
feroit n'auroit aucune force ne vertu, &
qu'il estoit d'avis que pour ceste nuit là
seulemēt on la laissast en quelque liberté
& sās garde, aussi biē estoit elle si malade,
qu'elle ne se pouuoit tenir sur les pieds &
qu'il leur respōdroit de sa personne. Les
coniurez l'attendoient en grande deuo-
tion, pour entēdre sa negotiation avec
la Roine. Estāt retourné par deuers eux,
il leur fait respōce suiuant l'instructiō qui
luy auoit esté dōnee. Sur ceste respōce ils
furēt fort lōg tēps à deliberer. Lesvns di-
soiēt qu'il ne falloit perdre l'occasion de
se despestrer de celle de la mort de laq̃lle
leurs vies dependoient. Les autres met-
toient en auant l'emotion du peuple, si
on procedoit ainsi contre elle par voye

de fait. Les autres estoient bien d'aduis de la faire mourir, mais qu'il falloit attendre qu'elle eust soubigné leur remission & grace suyuant la resolution prise au conseil. En fin apres auoir esté bien informez que sa maiesté estoit en si grande extremité de maladie, qu'à grand peine seroit elle en vie le lendemain, il fut conclu que son mary la garderoit ceste nuit là & pourroit remuer & faire retirer les gardes qu'ils luy auoient donnez si bon luy sembloit. Ce qu'il feit, & enuirõ minuit trouuerent moyen de sortir par vne porte de derriere, ou la Roynne monta à cheual en trouffe derriere Arthur Erskin l'un de ses escuiers, qui les conduisit & mena tous deux à grande course iusques au chasteau de d'Vmbar distant de vingt milles Escossoises d'Edimbourg. Les rebelles cuiderent creuer de despit de ce qu'ils s'estoient laissez embabouyner & deniaiser par vne femme, & de quoy ils auoient perdu l'occasion de se desfaire

d'elle, qu'ils ne pourroient parauanture
 iamaïs recouurer. Et neantmoins ils font
 tout deuoir d'assembler leurs complices
 pour assaillir sa maiesté. D'autre part les
 comtes de Hontley, Bodvvel & Athol,
 qui s'estoient sauuez par les fenestres ce
 soir là que Daud fut tué, auoient desia
 amassé bien neuf mille hommes, qu'ils a-
 menerent au secours de sa maiesté dont
 les rebelles estonnez prindrent la fuite,
 les vns en Angleterre, leur receptacle or-
 dinaire, les autres en Argyl, vers les
 Escossois qu'on appelle sauuages, en at-
 tendant quelque nouuelle conspiration,
 & changement de cour, afin d'estre rap-
 pellez & reintegrez en leurs biés & hon-
 neurs & auoir moyen de iouer le dernier
 acte de ceste tragedie. La Roïne ne vou-
 lant que son mary fut diffamé d'un meur-
 tre sivilain & si detestable, fit publier à sō
 de trompe deffences expressees sur peine
 d'encourir son indignation & crime de
 leze maiesté, à toutes personnes de mal

parler de son altesse, & dire qu'il fust par-
 ticipant ou complice de la mort de Da-
 uid Riccio s^{on} secretaire. Aussi luy bailla el-
 le lettres de pardon, afin que ses ennemis
 n'eussent quelque iour moyé de se preua-
 loir contre luy d'un cas si enorme, non
 pource qu'elle eust crainte, ou se desfiast
 que tant qu'elle viuroit il peut estre pei-
 né pour raison d'un tel fait: Mais afin que
 si il aduenoit qu'elle decedast auant luy,
 ces lettres le peussent garentir de toute
 recherche. Car en Escosse les lettres vne
 fois donnees par le Prince, ne sont point
 subiettes à estre examinees & enterinees
 par les iuges, ne de sçauoir, *si preces veri-*
tate nitantur, comme en France, ains sont
 presumees auoir esté donnees avec plei-
 ne & entiere cognoissance de cause. En
 quoy vous pouuez veoir clairement la
 sincerité de son amour, & affection con-
 iugalle qu'elle luy portoit sans fraude &
 sans fiction, n^{on} obstant les rigueurs qu'elle
 le a fait contenance de luy tenir quelque
 temps

temps apres, lesquelles ne procedoient d'aucune volôté mauuaise, comme vous pouuez iuger, ains d'une grande discretion & sagesse, pour faire recognoistre à ce ieune prince, par trop haut à la main & volage, sa grande outrecuidanee & temerité. Je te prie lecteur cōferer ce miē discours avec celuy de Buchanan en son histoire d'Escoffe, en laquelle il y a presque autant de menteries que de mots, & avec le libelle diffamatoire par luy composé en Latin, & declamé à Londres lorsqu'il y fut avec Murray & ses cōplices, pour faire mourir la Royne leur maistresse, si l'Angloise l'eust osé entreprendre en ce temps là, comme sera déclaré cy apres, & tu trouueras que par ces propos fardez & mensonges exquis, il ne peut si bien desguiser la verité de ce fait, qu'il despit de luy elle ne se mōstre toute euidente à vn homme qui aye tant soit peu de iugement, & qui soit expérimenté aux affaires du monde en ce temps le

plus miserable qui ait onques esté depuis la memoire des hommes. Il fonde le principal argumēt qu'il propose cōtre sa souveraine pour la rendre coupable de la mort de son mary sur la hayne mortelle qu'elle luy portoit, ou qu'elle auoit occasion de luy porter, & sur les rigueurs dōt elle a depuis vſé en ſon endroit, à cause del' homicide de ce secretaire. Mais pour te faire paroistre le contraire, & que ceux qui massacrerent l'un procurerent aussi la mort de l'autre, & que les deux meurtres vindrent d'une mesme boutique & du conseil d'Angleterre, ie poursuiuray ma narration, encore que mes derniers propos des deffenses faictes par sa maiesté de mal parler de son mary & des lettres de remission à luy donnees, soient assez suffisantes pour la refutation du dire de cest impudent calomniateur peruers & maudit heretique. Apres la mort inhumaine & barbare de Daud les rebelles ne pouuans faire leur partie bonne, qui-

æerent les champs, & les vns (comme
 Morton, Reuen, Lindefay, & ceux qui
 s'estoient trouuez en personne au massa-
 cre) prindrent la route d'Angleterre, re-
 traite ordinaire de telles gens, les autres
 se retirerent en Argil avecques Mour-
 ray, qui se doutoit bien qu'il seroit bien
 tost rappellé en Cour, pensant estre hors
 de soupçon d'auoir participé à ce meur-
 tre, à cause de son absence, & que l'indi-
 gnité d'iceluy donnoit si grand creue-
 cœur à sa maiesté, que facilement elle
 effaceroit la memoire des offences pre-
 cedentes. Ce qui aduint ainsi: Car sa
 maiesté se voyant environnee de tra-
 histres, & ne sçachant à qui bonnement
 se fier, & d'ailleurs estant tous les iours
 importunee par personnes interposees
 à la deuotion de Murray, en fin par v-
 ne trop grande clemence luy accorda sa
 grace, & le remeit en tous ses estats &
 honneurs, luy communiquant ses affai-
 res & ses pensees les plus secrettes, cōme

elle auoit fait par le passé, qui a esté cause de tous les malheurs qui depuis l'ont accablée & poursuiuie iusques à la fin de sa vie.

Le Roy voyant ce trahistre en vogue, & que son credit par tout le royaume estoit plus grand que le sien, il se despit, & ne le peut édurer. De l'autre costé Murray, Morton & les autres bourreaux du pauvre secretaire vouloiēt mal de mort à ce ieune prince pour auoir abandonné leur parti, reuelé tout le secret de l'escole, & fait entendre à la Royne tous les mysteres de leur coniuration, pour les rendre odieux & suspects à tout iamais à sa maiesté. Pour laquelle cause il ne se pouuoit aucunement fier en eux cognoissant leurs cœurs desloyaux & felōs, sans crainte de Dieu, sans pitié des hommes. Il s'adresse à la Royne & luy declare l'intention qu'il auoit de tuer Murray, duquel il auoit si grande desfiāce, qu'il redoutoit son ombre & qu'il n'y auoit que ce

seul moyē pour s'asseurer de sa vie, luy re-
 monstrāt outre que la mort d'un tel tra-
 histre seroit le repos de tout le royaume
 l'asseurāce de l'estat & soulagemēt du peu-
 ple. Sa maiesté biē esbahie de tels propos
 luy defēdit avec paroles assez seueres d'e-
 uēter ce malheureux dessein ny de passer
 outre à l'effect d'iceluy, luy disant qu'il e-
 stoit mal-seāt à un prince, tel que luy, d'e-
 stre sanguinaire: qu'il se deuoit cōtenter
 d'auoir tué son secretaire: qu'elle ne pou-
 uoit ēdifier qu'il touchast à son sāt: qu'el-
 le portoit tāt d'honneur à la memoire du
 feu Roy sō pere, qu'elle ne pourroit voir
 respādre le sang de celuy qu'il auoit reco-
 gnu pour son fils naturel, encor' qu'il fust
 traïstre & desloyal, ne tenāt rien du sang
 dōt il estoit issu: qu'elle auoit la iustice en
 main pour le punir selon ses demerites,
 quād elle voudroit se deffaire de luy & q̃
 la voye de fait estoit defēdue de Dieu &
 des hōmes. Nō obstant ces remōstrāces il ne
 se pouuoit cōtenir, ains se descouuroit

à plusieurs personnes qui ne l'aimoiēt pas tant qu'ils faisoient Murray, & se van-
toit fort mal à propos d'effectuer son de-
sein à la premiere occasion qui se presen-
teroit. Murray plus fin & plus rusé que
luy, faisoit bonne contenance, & fei-
gnoit fort dextrement de ne rien sca-
voir de ceste entreprise, luy montrant
toufiours fort bon visage, & cependant
ne laissoit de donner ordre à le preuenir.
Il voyoit que la vie de ce ieune Prince e-
stoit entièrement contraire aux desseins
qu'il auoit de paruenir à la couronne, &
qu'il estoit de tel courage qu'il ne fau-
droit d'executer sa volonté pour pensee,
si de bonne heure il n'y pouruoioit. Et
pour ceste cause s'estant adressé à son con-
seil ordinaire d'Angleterre, il fit en sorte
tant par les prieres d'Elizabet, que par
l'intercessiō des plus fauorits de la cour,
& plus affectionnez seruiteurs de la Roy-
ne sa maistresse que Morton & ses au-
tres cōplices obtindrent pardon de leurs

trahisons, & furent rappelez de leur exil. Ce qui le fortifia grandement tant à cause de leur assistance, qu'à cause du bon conseil qu'ils luy apportèrent de la part d'Elizabet, qu'aussi pour la hayne inueterée qu'ils luy portoient. A la premiere abordee voyant que sa maiesté donnoit apparence de quelque mescontentemēt de son mary, ils luy veulēt mettre en teste de le repudier tant à cause de sa vie dissolue, qu'à cause du massacre de son secretaire, dōt ils le disoiēt estre seul autheur. A quoy elle fit responce, que son mary estoit encores ieune, & que bien aisemēt elle le reduiroit au droit chemin, & que de son naturel il estoit bon, & n'y auoit rien meilleur au mōde, que sa desbanche ne venoit que du mauuais cōseil de ceux qui ne luy estoient pas amis ne pareillement à sa maiesté. De ceste responce ils ne furent gueres contents, ayants par icelle descouuert que le mal talent de sa maiesté enuers son mary n'estoit que mi-

ne, & que de son cœur elle l'aimoit parfaitement. Jaques Hebron comte de Bodvvel, admiral hereditaire d'Escoffe auoit esté tout le temps de sa vie tressfidel le seruiteur de la couronne, homme autant vaillant & magnanime qu'on eust peu rencontrer, mais au reste audacieux, superbe, facile à persuader, prompt à entreprendre, & encore plus prompt à exécuter ce que trop facilement il auoit entrepris. Et pour ceste cause Mourray & ses complices le craignoient & redoutoient, & auoient de tout tēps esté ses ennemis plus que capitaux. Mais cognoissans bien l'humeur du personnage, & que c'estoit l'homme du monde le plus propre pour l'exécution de leur dessein, ils s'aiderent de le gagner, & le rendre de leur party, pour mettre en effect le conseil qu'ils auoient pris en Angleterre, tendant à la ruine nō seulement de la Royne & de son mary, mais aussi de la sienne propre qui n'auoit de l'esprit assez à le preueoir.

L'ayants accosté, ils luy proposent “
 l'indignité du mariage de leur maistres- “
 se avec vn ieune fol & estourdi, qui l'a- “
 uoit tant gourmandee que maintenant “
 elle l'auoit grandement à contrecœur, & “
 seroit fort aise d'en estre despestree, si “
 par quelque hōeste moyen cela se pou- “
 uoit faire. Mais qu'elle estoit si sage, ver- “
 tueuse & modeste, qu'elle n'osoit descou- “
 urir son mal à ses meilleurs seruiteurs, “
 qui y pourroient remedier, chose qui “
 luy caufoit vne tresgrande melancholie. “
 Car ayant prins ce ieune homme de son “
 propre mouuement, & sans le consen- “
 tement de ceux de Lorraine & de Guy- “
 se que sa maiesté estimoit les meilleurs “
 parents & amis, elle craignoit d'estre “
 par eux accusée de legereté, si mainte- “
 nant elle s'en deffaisoit. Mais si quel- “
 que bon compagnon luy donnoit le “
 coup de la mort à son desceu, & sans que “
 rien peust estre imputé à sa maiesté, elle “
 n'e auroit trop grād regret ne deplaisir. “

“ Car encore qu’il luy eust donné les plus
 “ grandes occasions du monde de le faire
 “ mourir soit par iustice, soit autrement, si
 “ est ce qu’elle n’y pouuoit ouuertemēt cō
 “ sētir, sans estre blasmee, tāt par la voix du
 “ peuple, ignorant de sa misere, que par ses
 “ plus proches parēts, desquels elle n’osoit
 “ demander l’aduis, qui toutesfois estans
 “ deuēment informez de la moindre par-
 “ tie des indignitez qu’elle est contrainte
 “ endurer d’un homme de neant, ils luy
 “ conseilleroient de prendre la vègeāce &
 “ employer la noblesse du pays pour la met-
 “ tre hors de seruitude. Car c’est luy qui e-
 “ stoit le seul auteur du meurtre de son se-
 “ cretaire, & ne se contentant dece, il pen-
 “ soit par mesme moyen depescher le mō-
 “ de de sa seigneurie (ainsi parloient ils à
 “ Bodvvel) fil ne se fust sauué par les fene-
 “ stres. Et apres auoir commis ce bel acte,
 “ il a esté si impudēt & si outrecuidé, qu’il
 “ a biē osé escrire au Roy de France, & aux
 “ plus grans princes de la Chrestienté let-

tres diffamatoires & pleines de menfon-
 ges contre sa femme, cuidât par ce moyē
 excuser sa felonie, & leur faire trouuer
 bon le massacre par luy autant cruelle-
 ment executé que malheureusement in-
 uenté. Car encores que ce pauvre hōme
 se fust mescogneu, & rédu odieux à la no-
 blesse, si est-ce qu'il ne le deuoit traicter
 de la façon, & en presence de sa maiesté,
 ayant moyen de le trouuer ailleurs, & a-
 uec moins de scandale. Il n'y a point de
 doute que les parens de sa maiesté n'aiēt
 fort agreable la vengeance de ce forfait,
 s'il estoit biē seant à vne femme de la de-
 mander. Mais quant à nous qui auōs cest
 honneur de tenir les premiers rāgs dans
 le royaume, & qui auons le principal in-
 terest en la cōseruation de l'honneur de
 nostre souueraine, & en la manutētiō de
 sa grandeur & autorité, nous ne deuōs
 attendre qu'on nous viēne prier, & que
 les estrangers nous montrent nostre le-
 çō. Ce nous est crime de leze maiesté de

“ sçauoir telles choses & les endurer. Nous
“ ne nous plaignons pas du peu de compte
“ qu’il tiét de nous, & de tous les seigneurs
“ de ce royaume qu’il estime moins que ses
“ esclaves, nous menassant de tuer les vns
“ & les autres à chaque parole qu’il profe-
“ re, mais le traitemēt indigne qu’il fait à sa
“ maiesté, me scognoissant le deuoir de sub-
“ iet, & la cause & fondement de sa fortune
“ ne doit par nous estre plus longuement
“ toleré. Nous nous sommes souuentefois
“ esbahis de vostre seigneurie, qui de tout
“ temps auez esté tres-affectionné à son ser-
“ uice, de quoy vous auez eu si bonne pa-
“ tience, & ne vous estes aucunement for-
“ malisé de tāt d’outrages que vous la voy-
“ ez iournellement endurer. Qui est la cau-
“ se qui nous a meu de nous adresser à vo-
“ stre seigneurie afin de sçauoir vostre in-
“ tention, si vous plaist soubcrire au con-
“ seil que nous auōs prins de liberer sa ma-
“ iesté de captiuité de ce ienne fol, & luy
“ donner pour mary quelque seigneur du

pays lequel nous luy ferons auoir agreea-
 ble. A quoy nous auons desia bien adui-
 sé, & auons fait choix de vostre person-
 ne, si vous trouuez la condition bonne.
 Entre nous autres ne se trouue homme
 qui la puisse accepter, les vns à cause de la
 proximité du sang, les autres à cause de
 l'impossibilité de les separer d'avec leurs
 femmes, les autres à cause du grand nom-
 bre de leurs enfans, les autres à cause du
 mal talét que sa maiesté leur porte, enco-
 res qu'ils luy soiét treshübles & trefaffe-
 ctionnez seruiteurs. Vous estes ieune sei-
 gneur des plus illustres de ce royaume,
 beau, vaillant, accort, sans charge, & sans
 enfans, honoré & respecté de sa maiesté
 pour les signalez seruices du temps passé,
 qu'elle ne pourra bonnement refuser
 estant par nous présenté, & choisi de la
 plus part de la noblesse pour confort de
 son sceptre. Noz prieres auront for-
 ce à la contraindre estant fondees sur
 des raisons si bonnes & si apparentes.

“ Car le royaume estant ainsi troublé com
 “ me vous voyez, & tant de querelles entre
 “ ceux de la noblesse, il ne luy sera pas seur
 “ de viure en viduité, & encores moins
 “ de prendre quelque Prince de pays estrā-
 “ ge pour mary. Les Escossois sont com-
 “ posez de telle humeur, qu’ils ne se peuent
 “ assubietir à la domination d’un estrāger.
 “ Ils ont secoué le ioug de la Roynne Marie
 “ de Lorraine, mere de sa maiesté: refusé
 “ l’obeissance deuë à François second, Roy
 “ de France & d’Escoffe. Et pensez vous
 “ qu’apres qu’ils se seront affranchis de la
 “ tyrannie de cest Anglois, ils souffriront
 “ estre commandez par autre, que par un
 “ homme de leur nation? se rapporteront
 “ ils de leur differents à un estranger, com-
 “ me ils feront à vostre seigneurie? Remar-
 “ quez bien noz propos, & ne laissez escou-
 “ ler ceste occasion, C’est vne bonne for-
 “ tune qui s’offre à vous digne du plus grād
 “ monarque du monde. Si vous la refusez,
 “ la repentence ne vous seruira de rien, ne

le regret immortel que vous aurez quād “
vn autre l'aura embrassée. “

Ces propos faisoient venir l'eau en la bouche à Bodvvel, & le chatouilloient merueilleusemēt en son ame. Car estant fort ambitieux de nature, & sur tout adonné à ses plaisirs, il admiroit l'ouuerture qu'on luy faisoit de contenter l'vne & l'autre de ses passions. Pour responce, apres qu'il leur eut rendu infinies graces de leur bonne volonté, & de l'opinion qu'ils auoient de sa preudhōmie, qui se sentoit moins que capable d'vne telle fortune, & à laquelle il n'eust iamais osé aspirer, il se meit à deplorer les iniures faites à sa maiesté par son mari desloyal & ingrat, & le grand heur que luy seroit & à tout le royaume, si elle en pouuoit estre deliuree: qu'il ne tiendrait pas à luy, & qu'il soubscriuoit fort volontiers à tout ce qu'il plairoit à leurs seigneuries pour le soulagement de sa maistresse, iurant & protestant leur demourer fidelle

& affectionné seruiteur toute sa vie quel que fortune qui luy pourroit aduenir. Mais quand à la condition qu'ils luy propoisoient du mariage de sa maiesté, il ne voyoit pas comment cela se pouuoit exécuter, attendu qu'il auoit desia pris alliance en l'une des premières maisons de tout le royaume, laquelle il ne pouuoit nullement dissoudre ou abandonner. A quoy fut respondu, qu'il ne se donast peine pour ce regard, ayant iuste occasion de diuorce, & auquel ils feroient consentir fort librement & sa femme & tous ses parens. Et encores qu'ils n'y voulsussent entendre, si est-ce qu'ils ne laisseroient de passer outre, ayant ledit Bodvvel espousé sa proche parente, de laquelle il auoit auparauant cogneu charnellement la cousine, qui estoit vn empeschement plus que legitime de tel mariage. Et quand il n'y auroit autre cause de diuorce que la paix & repos du peuple, on se deuroit contenter, avec ce que les person.

personnes des princes sont priuilegiees,
 qui pour bōnes & iustes occasions se di-
 spensent, & ne sont point subiectes aux
 loix, cōme sont les autres hommes. Et o-
 res qu'il n'y eust raison au monde ou ap-
 arence de raison pour le separer de sa
 femme, ils auoient les ministres à leur cō-
 mandement, qui faisoient les diuorces
 quand bon leur sembloit. En fin ils me-
 nerent si biē ce miserable ieune homme
 comte de Bodvvel par leurs inuentions
 qu'il entreprit le meurtre & assassinat du
 Roy, suiuant l'aduis & conseil par eux don-
 né, de tel artifice qu'en fin de ieu le soup-
 pçon & le blasme d'un acte si inhumain
 tomberoit sur celle qui en estoit tant é-
 loignée. Ceste resolution prise & confir-
 mee par escrit autentique & solennel, si-
 gné de leurs mains, & d'Alexandre Hay,
 comme personne publique, & qui est en-
 cores pour le present clerk des registres,
 Mourray s'adresse à la Royne & luy dict
 par forme d'aduertissement, que le sei-

gneur d'Arley son mary, le comte de Lenox son pere, le comte de Glenkarue, & plusieurs autres de la noblesse estoient assemblez à Glasco, à fin d'adviser entr'eux au moyen par lequel on pourroit priuer sa maiesté de l'administration du royaume, & d'iceluy inuestir son mari, & si elle n'y vouloit consentir, de la cōfiner en perpetuelle prison, & pour ceste cause la conseilloit s'y acheminer incontinent avec le plus grand nombre d'hōmes qu'elle pourroit amasser, à fin d'obuier à leurs desseins. Par tels rapports ce renard ne taschoit qu'à estranger le cœur de sa maiesté de l'amitié de son mari, & la disposer & preparer à porter moderement la perte de celui qu'elle aimoit vniquemēt nonobstant les rigueurs feintes & simulees qu'elle luy tenoit. Mais sa maiesté cognoissant bien le mal talent de Mourray enuers son mary, ne faisoit pas grand estat de son aduertissement : mais ayant esté d'ailleurs informee de son indisposi-

tion, & que la petite verolle luy estoit fortie, ne pouuant plus dissimuler l'amitié qu'elle luy portoit print incontinent le chemin de Glasco pour le visiter. Où estant elle l'entretint fort gracieusement sans faire aucune demonstration des offenses passées, & luy fait le meilleur traitement que femme du monde sçauroit faire à son mary. De quoy Mourray & ses complices ne furent gueres resiouiz, voyans le grand regret qu'elle auroit en sa mort par eux proiettee, qui pourroit effacer l'opinion du peuple qu'elle y fust consentante. Car c'estoit le principal but de leurs desseins, de faire en sorte que le soupçon de cest acte malheureux redondast sur le chef de la Royne, à fin de la rendre odieuse à tout le monde, & par ce moyen s'emparer du gouuernement & de l'estat. Apres auoir seiourné quelque temps à Glasco, & que la maladie eut prins son cours, Mourray remonstre à la Royne que besoin luy estoit de changer

d'air, & que puis n'agueres le seigneur de Borthuik s'estoit fort bien trouué de s'estre logé chez le preuost de Kirkof feild à Edimbourg estant le lieu haut, plaisant & en bel air, enuironné de iardins, & esloigné du bruit du menu peuple: & que au contraire le palais royal estoit situé en lieu bas, subiect au bruit à cause de la suite de la Cour. La Roynie trouue son conseil bon, & sans se douter d'aucun inconuenient y conduict son mary, & comme elle le menoit par la main à l'hostel du comte d'Aran, ioignant la maison dudit Preuost, elle fut destournée par Mourray, & menee dedans la maison funeste. Et y estant, sa maiesté le visita fort souuēt sans se deffier d'aucun mal (quoy que disent ses calomniateurs, qui ne scauent rien de ce faict sinon par l'instruction du libelle diffamatoire de Buchanan, & l'assista, luy donnant tout le contentement qu'elle pouuoit iusque à la dernière heure de sa vie. Car sa maie-

sté y fut encores presque à minuiet, &
 environ trois ou quatre heures apres la
 maison fut enleuee par la violence de la
 poudre à canon mise dedans la caue à
 l'heure mesme que sa maiesté y estoit par
 ceux qui depuis ont voulu paroistre les
 persecuteurs & vengeurs de ce forfait, dōt
 Mourray en estoit le chef. Car en sortant
 du logis, pour s'en aller à son Palais elle
 rencontra Paris seruiteur du comte de
 Bodvvel auquel elle demanda d'où il ve
 noit, qu'il sentoit ainsi la poudre à canō.
 Le iour precedent le defastre adueni
 Mourray print congé de la Royne fei
 gnant que sa femme estoit griefuement
 malade, à fin d'euter le soupçon qu'il en
 fust participant. Et toutesfois il ne s'est
 peu tenir qu'en partant de la court, il ne
 dist à Mi-lord Hereis, que ceste nuit là le
 Roy deuoit perdre la vie. Ce que le
 dict seigneur luy a depuis souuentefois
 maintenu, en barbe, mesmement en la
 ville de York, par deuāt les deputez de la

Royne d'Angleterre leur faultrice & cō-
 seillere de ceste trahison. Et nō seulement
 il dict ces parolles audit seigneur de He-
 reis, mais aussi il les repeta dedans le ba-
 teau à quelqu'un de ses amis en passant
 l'eau à Queiuis ferre, qui est vn petit
 bras de mer entre Edimbourg & Dum-
 fermelin. S'il eust eu regret en la mort
 de ce seigneur, comme il a voulu demō-
 strer quelque temps apres, pourquoy
 ne l'a-il pas aduerty de ceste coniuration
 puis qu'il la sçauoit? La moindre parolle
 de sa bouche pouuoit empescher vne
 mascarade si sanglante, & sauuer la vie à
 ce pauvre prince, & l'honneur à sa mai-
 stresse. Mais n'ayant peu estre arresté en
 Cour quelque instance que sa maiesté
 luy pouuoit faire, ains s'absentant pres-
 que sur l'heure que le meurtre deuoit es-
 tre executé, estant bien informé de la
 maniere qu'on y deuoit proceder, & y
 pouuant obuier par le moyen d'une seu-
 le parolle, en cela il declara assez qu'il

estoit pour le moins consentant au crime, & que ceste absence affectee n'estoit que pour luy seruir de couuerture d'innocence, & qu'il ne vouloit pas assister à l'exécution, se contentant de laisser des bons agens & ministres de sa volonté, sur lesquels il se pouuoit bien asseurer.

Le lendemain que ceste tragedie fut iouee de grãd matin arriue Robert Durie archer de la garde du Roy treschrestien enuoyé de la part de monsieur de Glasco tout expres par la voye de la poste, à fin d'aduertir sa maiesté de quelque grãde conspiration contre sa vie, de son fils, ou celle de son mari, ou de tous trois, & dont on luy auoit donné certain & asseuré aduertissemēt à Marseille sans toutefois luy pouuoir specifier les auteurs d'icelle, ny la personne de celuy contre qui elle estoit dressée.

Ce parricide ainsi commis & perpetré diuerses rumeurs courent par la ville de l'auteur, & des causes d'une si damnable

trahison, chacun les iugeant selon la bõ-
ne ou mauuaise affection qu'il auoit en-
uers les seigneurs de la court. Mais la
Royne à qui l'affaire touchoit de plus
pres qu'à nul autre, ignorãte des bruits
qui estoient semez par la ville, & ne pou-
uãt descouurir les ministres de ce parri-
cide, elle est contraincte faire publier à
son de trompe, la bonne volonté qu'elle
auoit de venger la mort de son mary, &
de recompenser liberallement ceux qui
reueleroient les auteurs d'icelle, les voi-
sins de la maison funeste sont ouys par in-
formation, le comte d'Argyl grand iusti-
cier du Royaume auoit commãdement
de sa maiesté de faire tout deuoir à luy
possible à fin de cognoistre la verité, &
apprehender les complices du forfait.
Ce qu'il n'auoit garde de faire ayãt esté
luy mesme de la partie. En fin par cer-
tains placarts & libelles affichez aux car-
refours de la ville, le comte de Bodvvel
est diffamé comme aucteur & executeur
d'iceluy, & ce par ceux la mesme qui l'a-

uoient mis en besongne. Ce qu'estât venu aux oreilles de la Royne, combië que mal-aisement elle pouuoit adiouster foy à telle accusation pour la bonne opinion qu'elle auoit dudit comte, qui iamais en sa vie ne luy auoit fait faute, neantmoins elle le fait prendre, & le met entre les mains de la iustice, à fin qu'on procedast cõtre luy par la voye ordinaire des loix. Elle ne choisit pas ceux qu'elle luy pensoit fauorables, Morton & la faction de Mourray, qui depuis ont poursuiuy sa maiesté de cet acte detestable, sont commis à l'instruction & iugemēt de son proces. S'ils l'ont absous sçachant bien qu'il en estoit coupable, c'est leur faute & ne peuuent rien imputer à celle qui l'auoit mis entre leurs mains pour en auoir la raison, ne se doutant en façon du monde qu'ils auoient soubscrit au crime, cõme depuis a esté bien & deument auéré non seulement par leurs signes apposez à l'instrument sur ce faict entre eux, mais aussi par la confession mesme de Morton,

qui pour ceste cause a laissé la vie entre
 les mains du bourreau, avec le regret
 de tout le peuple de ce que ses felonniez
 & desloyautez abhominables auoient si
 long temps croupy sans poursuite,
 & sans la iuste vengeance des loix or-
 donnees contre les trahistres. Ils l'en-
 uoyerent donques de ceste accusation
 contre leurs consciences, non pour la bô-
 nevolonté qu'ils luy portoient, estans ses
 ennemis mortels de tout temps, ains par
 ce qu'il n'y auoit encores rien qui en au-
 cune maniere eust peu rendre la Roïne
 suspecte de ce massacre, mais au contrai-
 re le pot aux roses estant descouuert par
 la mort de Bodvvel, fils l'eussent condâ-
 nez, l'innocēce de sa maiesté eust esté trop
 euidente, & leurs trahisons reuelees à
 tout le mōde, comme elles ont esté quel-
 que temps apres. Ils dissimulent donques
 bien finement la rancune qu'ils portoiēt
 en leurs ames contre Bodvvel, & font scē-
 blant de faire grand estat de son amitié

iusques à ce qu'ils eussent trouuë moyen
 d'enueloper la Royne, & la rendre mise-
 rable, afin d'empieter le maniment de la
 couronne, qui estoit le seul but auquel
 ils visioient. Et pour amorcer ce pauvre
 malencōtreux, & luy dōner argumēt cer-
 tain de leur zele & affectiō bōne dont ils
 luy faisoient parade, & afin qu'il ne se dou-
 tast de ce qu'ils luy brassioient, Mourray
 luy declara qu'il auoit vn voyage à faire
 en France, & luy recommanda ses affai-
 res luy laissant en sa protection & sauue-
 garde tous les moyens qu'il auoit en Es-
 cosse. Mais auparauant que partir il fa-
 loit couronner l'œuure d'une fin sembla-
 ble au commencement, & adiouster vne
 catastrophe à ceste tragedie bien confor-
 me aux autres actes. Pour neant auoient
 ils trauaillé si la chose demeueroit ainsi, &
 si la Royne ne couroit semblable fortune
 qu'auoit fait son mary. Ils l'abordent fi-
 nement, & luy proposent le grand desor-
 dre qui estoit en son royaume par la diui

sion de la noblesse, les inconueniens aus-
 quels les femmes vefues sont subietes, le
 peu de moyen qu'ils voyoient d'y reme-
 dier sinon par le mariage de sa maiesté a-
 uec vn homme qui fust à tous agreable.
 Ceste ouuerture ainsi faite, & voyant qu'a-
 pres plusieurs essays ils auoient presque
 gagné ce point sur elle qu'elle se rema-
 riroit, & qu'ils la forceroient à ce faire,
 ils luy proposent en premier lieu la diffi-
 culté de regir & gouverner le peuple Es-
 cossois, amateur de sa liberté, assez inso-
 lent de soy mesme, & inepte à porter le
 ioug d'un Prince estranger, luy mettant
 en auant plusieurs exemples, & entre au-
 tres de la Royne Marie sa mere, Princef-
 se autant sage, vertueuse de bonaire & ai-
 sée à manier qu'autre qui iamais fut au
 mode: du François second Roy de France,
 de Iean Baliol du pays de Normâdie l'un
 des premiers Princes toutefois du sang
 royal d'Escoffe, l'Empire desquels leurs
 esté insupportable, non pour autre raison,

sinon qu'ils auoient pris leur naiffance &
 origine en pays estrange. Ils adioustent
 les Romains & les Anglois, qui n'ont ia-
 mais peu tenir pied en Escosse. Et que par
 ainsi force luy estoit de choisir q̃lque sei-
 gneur de ses subiets selon son cœur, auq̃l
 ils s'obligeroiēt par serment solennel de
 l'honorer, respecter, & seruir, & de luy
 porter l'obeissance deuë au mari de sa ma-
 iesté. Au contraire si elle pensoit faire de
 sa teste, & refuser celuy auquel toute la
 noblesse, & tout son peuple se vouloit de
 son propre mouuement & franc vouloir
 assubiectir, elle se perdrait, elle & son e-
 stat, & mettroit tout son royaume en cō-
 bustion. Ses entrees ainsi faites, en fin de
 ieu ils luy mettēt en auant le cōte de Bo-
 dyvel admiral hereditaire du royaume,
 lequel ils extollēt tant pour sa noblesse,
 pour sa beauté, pour sa vaillātise & dexte-
 rité en fait de guerre, qu'ils ne luy trou-
 uēt point de paragō. Ils adioustēt les bōs
 seruices par luy faits à sa maiesté, sa cōstā-
 ce & fidelité, pourestre presque seul de to^r

les seigneurs de son royaume, qui n'a iamais varié ne manqué au deuoir d'un bõ subiet, & qui n'a espargné ne sa vie ne ses moyens pour l'aduancement de son authorité. Pour conclusion ils mettent en auât les grands differens, querelles & inimitiez mortelles, qui estoient entre la plus part de la noblesse, dõt ils se rapporteroient à luy, & non à autre, qui seroit le plus grand bien qui pourroit iamais arriuer à sa maiesté. En fin voyât les difficultez qu'elle faisoit de condescendre à leur conseil, & de s'abaisser iusque là, que de s'associer par un lien si estroit à l'un de ses subiets, ils font minuter un proiet de contract de mariage, lequel ils signent tous de leurs mains, & le donnent à Bodvvel pour s'en seruir en temps & lieu. Cependant parce que la principale exception qu'alleguoit sa maiesté pour resister à leurs persuasions, c'estoit le mariage contracté entre Bodvvel & la sœur du comte de Hontley, & que c'estoit cõ-

tre tout droit & raison qu'un homme eut
deux femmes à la fois, ils procurent le di-
uorce & dissolution de ce mariage par
plusieurs raisons bonnes en apparence,
lesquelles ie ne puis icy repeter, afin de
ne retarder le cours de ceste narration, la
quelle ie m'efforce rendre la plus succin-
te & brieue qu'il n'est possible. La Roynie
ne se contentant pas du diuorce par eux
fait, ains ayāt le mariage de Bodvvel fort
à contrecœur, ils luy donnent à enten-
dre que sa femme estoit decedee, & que
la chose estoit maintenant sans difficulté
L'occasion se presente que Bodvvel se
veut seruir du contract de mariage de
luy & de sa maïesté fait & soubsigné par
la plus part de la noblesse du royaume.
Car comme elle retournoit de sa ville de
Sterlin où elle estoit allé voir monsieur
le Prince son fils, il la guetta en chemin
accompagné de grand nombre d'hom-
mes en armes, & la mena au chasteau de
Dombar, où estant il luy monstra ledit

contrat, luy disant que force luy estoit d'y consentir, puisque la noblesse & tout le peuple le trouuoit expedient, tât pour le salut du public, que pour l'assurance de son estat, luy promettant au surplus luy demeurer tres-humble & tres-affectionné seruiteur, comme il auoit tousiours esté, & de ne se mesconnoistre iamais pour l'honneur qu'il receuroit de sa maiesté, ny pour la grandeur de sa fortune inesperee, & de laquelle le plus grand monarque de la terre se deuroit contenter. Ceste pauvre Princeesse se voyant captiue, assaillie de toutes parts, & importunee par les prieres & sollicitations des plus grands de son royaume, & d'ailleurs tout effroyee de la souuenance de son mari & de son secretaire & quasi tréblâte de la vision hideuse, & apprehension des meurtres cruellement executez en sa presence, ne sçachant où se tourner, ne à qui se fier, & ne pouuant plus resister à la volonté de tant de seigneurs, qu'elle voyoit

voyoit par escrit & par leurs seings estre
 coniurez à l'effect de ce mariage, en fin,
 quoy qu'à regret, elle y condescend, &
 donne lieu à la force & à la nécessité du
 temps, prenant le conseil de sa noblesse
 pour salutaire, & se persuadant que rien
 ne luy pourroit estre imputé, & que la
 faute (si faute y auoit) tōberoit sur le chef
 de ceux qui en estoient les auteurs, & nō
 sur sa maiesté qui n'y auoit onques pēsé.
 Ce mariage n'est pas encores accompli,
 & les voy la incontinent en armes, com-
 me si la chose eust esté faicte à leur de-
 sceu. A l'entree de ce nouveau tumulte
 & reuolte ils ne font aucune demonstra-
 tion d'en vouloir à la Roynne leur mai-
 stresse, ains font imprimer à la mode des
 rebelles, & publier par tout le pays cer-
 taine protestation, par laquelle ils iurent
 en prenant Dieu à tesmoing, qu'ils n'a-
 uoiēt pris les armes pour autre occasion
 sinon pour deliurer sa maiesté hors de
 seruitude, & de la captiuité de Bodvvel,

meurtrier du Roy, & pour ceste cause prioient tous les bons seruiteurs de la couronne, leur vouloir assister, & prester la main à vn oeuvre tant louable, & digne des hommes de leur degré. Qui fut cause que plusieurs personnes de marque, & non accoustumez à se rebeller se meirent de leur partie. Ceste conspiration fut entreprise à Dunkel, incontinent qu'ils virent sa maiesté accordee à Bodvvel, & de premiere abordee la pensoient surprendre au chasteau de Borthink, dont elle se sauua bien à grande peine, & se rendit à Dombard, auquel lieu ayant amassé bon nombre de ses fideses subiets, elle vint au deuant des rebelles à Carbery-hiel pres Mussilburg, qui n'est qu'à deux lieues de la ville d'Edimbourg & demeure ordinaire des Roys par eux occupez, les deux armées régees en bataille & prestes à choquer, les traistres enuoyent par deuers sa maiesté le seigneur Guillaume Kircalde Baron de Grange luy faire re-

Voyez
Buchanan lib.
18. qui
ne peut
si bien
desguiser
cecy,
qu'il ne
confesse
vne partie
de la
verité.

monstrances en toute humilité, qu'ils ne pouuoient souffrir de la veoir ainsi captiue, & comme esclaue de Bodvvel meurtrier inhumain de son mary, & s'il luy plaisoit le quicter, & se renger de leur costé, ils protestoient avec serments infinis qu'ils ne demandoient autre chose, & qu'ils luy demeureroient plus fidelles & plus affectionnez seruiteurs que n'estoit ny Bodvvel, ny autres qu'elle ayt onques eu en sa vie. La Royne estonnée de ce qu'on luy disoit de Bodvvel, & qu'à leurs instantes prieres & menaces elle auoit espousé celuy qu'on accusoit maintenāt à face descouuerte d'une telle felonnie, n'ayant aucun soin ne soucy de sa vie, elle commande audit Bodvvel de se retirer, disant que sa cause n'estoit pas bonne, & se réd incōtinēt entre les mains des rebelles le. 15. Iuin. 1567. en quoy elle fit vne trespourde faute, qui a depuis esté la ruine de sa maiesté & de tous ses bons seruiteurs. Car ell'auoit moyē de punir leur

outrecuidance, & les rengier à raison si el
 le eust voulu, ayant des forces plus que
 bastantes à ce faire. Mais pensant espar-
 gner le sang des trahistres, elle a esté cause
 que le sien propre, & celuy de ses inno-
 cents & loyaux subiets a esté entieremēt
 espendu, vray est qu'elle se fioit en la pro-
 messe solennellemēt iurée par ledit sieur
 de Grange qui ne la pensoit tromper, &
 qui ne se fust oncques mis en l'entende-
 ment que Morton & ses complices luy
 eussent voulu faire porter parole à sa ma-
 iesté pour la decevoir & trahir. Mais
 ayant veu le contraire, & que son hon-
 neur y estoit vilainement engagé, il s'en
 voulut ressentir, quoy que tard, & se
 tourna du costé de sa maiesté, & depuis
 ce temps là luy fait de bons seruices, dont
 en fin il fut payé suyuant la coustume &
 pratique ordinaire des huguenots, qui
 exterminēt en fin de ieu ceux qui les ont
 mis au mōde. Car ce bō seigneur, & sem-
 blablemēt Iaques Kircaldé son frere ho-

mes de valeur, & qui par trop auoient auacé leur prétendue religiō, s'estās renduz à la Royné d'Angleterre, qui les tenoit assiegez dans le chasteau d'Edimbourg par ion armee ils furent mis és mains du côté de Morton, qui les fait contre tout droit ciuil & militaire finir leurs iours sur vn gibet. Voila la recompence ordinaire q̄ font les Caluinistes aux auteurs & promoteurs de leurs heresies, dōt vo⁹ en trouuerez infiniz exēples, s'il vo⁹ plaist considerer la mort de plusieurs grans seigneurs de Frâce, d'Allemaigne, d'Escosse, d'Angleterre, & de Flandres, depuis trente ou quarāte ans en ça. Pour retourner à mon propos, Ces trahistres abominables ayāts entre leurs mains sans coup fraper la proye que si long tēps ils auoiēt cherchee, ils la menēt à Edimbourg, portās deuāt elle vne bāniere où estoit peint son mari mort, & son enfāt à ses piés, qui demādoit la végeāce. Ils pésoient par ce moyē la faire mourir d'ēnuy & de despit.

Ils auoient ceste baniere toute preste fa-
 seuràs qu'elle se rēdroit à eux sitost qu'el-
 le oyroit parler du paricide de Bodu-
 el. En quoy vous pouuez veoir leur tra-
 hison, ayant esté ainsi premeditez. Es-
 tās à Edimbourg ils se camperent dedās
 le Palais royal, & feirent loger la Roy-
 ne leur maistresse chez le Preuost de la vil-
 le en maison empruntée, deuant laquel-
 le ils ficherent la banniere, & la laisserent
 seule toute la nuit sans luy donner ny
 dame ne damoiselle, ne chambriere pour
 la seruir & cependant toute la nuit se
 meirent à piller tous ses meubles, ba-
 gues & ioyaux qu'elle auoit en son palais
 & ne luy laisserent chose quelconque
 dont elle & son fils n'ont oncques peu re-
 tirer que bien peu, le reste ayant esté
 baillé par le bastard Mourray à la Roynne
 d'Angleterre & à ceux de son conseil, ve-
 du en France & en Flandres. Le lende-
 main de grand matin l'ayant vestue d'un
 meschant cotillon de drap brun, qui ne

luy passoit gueres les genoux, ils la montent sur vne vilaine haridelle qu'ils auoient trouuée repaissant dans vn pré, & la mènent tout droit au chasteau de Locheleuin, appartenant au frere vterin de Mourray, & où la bonne dame sa mere viuoit encores. Ceste place est située dās vn profond lac, qui a plus de six lieues de circuit, & où il n'y a moyen d'entrer que par batteau, de sorte que les voyla bien asseurez de sa personne, pour en disposer à leur fâtaisie. Les principaux auteurs de ceste trahison, parens & alliez de Mourray, qui tendoient à le faire Roy, estoient d'aduis de la faire estrangler aux quenouilles de son lit, & faire courir le bruit qu'elle s'estoit perdue de ses propres mains de peur qu'elle auoit d'estre desfaite par iustice, son paricide ayant esté decouvert. Les autres plus politiques craignant que ceste cruauté les rendit suspects au peuple, & qu'il y auoit autre voye plus douce pour paruenir au bout de tous leurs

desseins, sont d'aduis de ne passer outre
 que Murray ne fust present, & parti-
 cipant d'une si dangereuse entreprise.
 Car encore que rien ne fust passé iusque
 lors, sinon par son conseil & auctorité,
 comme estant chef & aucteur de leur li-
 gue, si est-ce (côme trahistres se deffiet
 tousiours les vns des autres) qu'ils crai-
 gnoiët ses ruses & que pour plus aisémēt
 obtenir à ses fins, il fit semblāt d'estre of-
 fensé du mauuais traitement de sa sœur,
 & que cependāt il en demandast la ven-
 geance, cōbien qu'il n'eust en son cœur
 chose du mōde plus agreable que la de-
 pesche. Murray estoit pour lors en Frā-
 ce, negotiant avec l'admiral de Coligny,
 pour sçauoir comme il se deuoit gouuer-
 ner, les cartes estans ainsi brouillees, & le
 chemin à luy ouuert à la royauté. Le Roy
 Charles (que Dieu absolve) messieurs de
 Guise & tous les plus grans du royaume
 luy faisoient fort bonne chere, & luy fei-
 rent de fort beaux presens, moyennant

lesquels il leur promeit remettre la Roy-
 ne sa sœur en liberté, & appaiser ceux qui
 s'estoient reuoltez, & les reduire à l'obeif-
 sance deuë à sa maiesté. Cependant ayant
 receu lettres de ses cōplices par le moyē
 de la Royne Elizabet & de son ambassa-
 deur en fort grande diligence, par les-
 quelles luy estoit mandé qu'il eust à s'en
 retourner soudainement & sans aucun
 delay, il leur fait responce par mesme
 moyen qu'ils tuassent incōtinent la Roy-
 ne, & que l'Escoffe ne le verroit iamais
 tant qu'elle seroit en vie. Mais ses com-
 plices & amis craignans que leurs trahi-
 sons fussent trop euidentes à tout le mō-
 de, & que les excuses qu'ils pourroient
 faire n'auroiēt aucune apparence, si sans
 assembler les estats ils faisoient mourir
 leur maistresse l'ayāt en prison à leur de-
 uotiō, & estās respōsables de sa personne,
 ils aduisent de rendre Murray content
 sans attenter à la personne de la Roy-
 ne iusques à sa venuë. Par l'aduis de la

20. Juil-
let.
1567

Royne Elizabeth, ils font minuter vn acte, par lequel sa maiesté se demet du gouvernement & faict cession de la couronne, & de toute puissance & autorité royalle au Prince son fils, & luy baille pour tuteur le comte de Murray, qu'ils font appeller regent & gouverneur du royaume, & acte ainsi dressé, Elizabeth Royne d'Angleterre, conseillere & inuētrice de toute ces trahisōs, craignāt q̄ sa cousine n'y voullust cōdescendre de son bon gré (cōme ils desiroient) enuoie par deuers elle messire Nicolas Trogmartō son ambassadeur, avec lettres pleines de regrets & d'ennuy qu'elle feignoit auoir de son infortune, luy promettant toute faueur, ayde & secours, & d'y venir en personne avec vne forte & puissante armee pour sa deliurance, si ses subiets ne luy faisoient la raison. Mais que cependant estant informee qu'on la vouloit contraindre à resigner la couronne à son fils, & qu'on la tueroit si elle en faisoit au

cune difficulté, pour l'amitié qu'elle luy auoit iuree & vouee, & pour le desir qu'elle auoit de la garétir de figrad incōuenient, & luy sauuer la vie, elle luy enuoyoit son ambassadeur, afin de l'aduertir du danger où elle estoit, & luy remōstrer que tel acte ne luy pourroit aucunement preiudicier, estant extorqué d'elle par force & violence, en vne prison, & sous la puissance de ses ennemis. Et par ce la prioit instamment de ceder au tēps, & se conseruer en leur accordāt ce qu'ils luy demandoient. Ayant eu ce premier aduertissement de la part d'Elizabet, qui

24. iuil.
1567.

demonstrois assez que rien ne se faisoit sans elle, incontinent apres arriue le Milord Lindefay, homme furieux, & insensé, & qui n'a rien d'homme, sinon la parolle & la figure du corps. Car quand au reste il est si brutal & stupide, qu'il ne differe en rien de l'animal, duquel Marcus Varro parlant, dict que l'ame luy a eesté donnee en lieu de sel pour empes-

cher la chair de pourir .Cestuy ci se presente à sa maistresse sans aucune pface d'honneur, sans reuerence, sans respect, & sans faire aucune demonstration qu'õques il luy eust esté seruiteur ou subiet, & luy dit qu'il estoit enuoyé, par deuers elle de la part de la noblesse, qui vouloit qu'elle soubsignast l'acte qu'il auoit en main, & qu'elle cedast la couronne à son fils, leur Roy, luy declarant qu'il la contraindroit par voye de fait, si elle y faisoit tant soit peu de scrupule. A quoy elle repliqua, qu'elle ne tenoit rien ne de son fils, ne de la noblesse: que la couronne luy estoit escheue par heritage & succession, & non par aucun bienfait de ses subiets: & qu'au contraire la noblesse n'auoit rien en Escosse sinon de grace, & par les bienfaits d'elle & de ses progeniteurs qu'elle s'esbahissoit de leur impudence & de leur ingratitude enuers elle, qui leur ayant tant & tant de fois remis & pardonné leurs forfaits, ayant eu iustes occasiõs

& semblablement le pouuoir de les exterminer eux & leur race, soit par armes, soit par iustice, mais au lieu de ce s'estant despouillee de la plus part de son patrimoine & du domaine de la couronne afin de les enrichir & aduācer en biēs & en honneurs, & principalement Mourray, Mortō & Marre & les auteurs de toutes ces trahisons elle ne les peut fouler & rendre contents, qui en lieu de recognoistre tant de plaisirs veulent maintenant l'aneantir, & raurir par force ce quiluy reste, & qu'ils la persēcutent cruellement contre leurs propres cōsciences en sa vie & en son honneur: qu'elle sçauoit le but auquel ils tendoient, que ce n'estoit ny le profit & aduancement de son fils, ny le bien public & repos du royaume, ains le desir insatiable qu'auoit son frere bastard de se faire Roy: que quand il le seroit, il ne leur seroit ny si bon, ne si naturel qu'elle: que c'estoit vn grand cas

d'oster le gouuernement à la mere qui
 sçauoit commander, & qui par long vsa-
 ge & experience auoit appris à manier
 les affaires d'estat, & qui par le passé a-
 uoit si biē moderé son ioug, que person-
 ne n'a oncques esté ne pressé ne foulé,
 pour le transferer au fils qui n'auoit en-
 core vn an d'aage, & qui de long temps
 ne pourroit discerner le biē du mal pour
 respondre à leurs desirs: qu'il n'estoit pas
 bien seant qu'un bastard eust la surinten-
 dance & garde-noble du Prince, & non
 elle qui estoit la legitime heritiere du
 royaume, & mere de l'enfant, la garde
 duquel leur est octroyee par les loix, par
 les coustumes, & par la mesme natu-
 re, & que par ainsi elle ne pouuoit & ne
 deuoit soubcrire ne consentir à leur de-
 mände & quitter le droit que Dieu seul
 & nature luy auoit acquis. Lindeſay n'eut
 pas la patiēce qu'elle acheuaſt ce qu'elle
 vouloit dire, ains à chasque mot chan-
 geant de contenāce, ſourcillant le front,

herissant les cheueux, trāsi, & vsant d'une
 voix mal asseuree, qui ressentoit le
 transport de son esprit, apres plusieurs
 parolles rigoureuses & pleines d'iniures
 & blasphemes contre sa maiesté, luy dict
 eniurant execrablement, & reniant dieu,
 que si elle ne signoit incontinent sur son
 acte, qu'il le signeroit avec son sang, & le
 seelleroit sur son cœur, & par apres la iette
 roit dans le lac au pied du chasteau pour
 repaistre les poissons qui luy seruiroient
 de sepulture. Quelque constance qui
 tousiours ait accompagné ceste vertueu-
 se Princeesse, & quoy qu'en toutes ses an-
 goisses & aduersitez elle ayt esté d'un
 cœur invincible, si est-ce qu'à ce coup frap-
 pée de l'apprehension de la mort, & ne
 voyant moyen pour se preualoir d'une
 telle violence, & cognoissant l'humeur
 de ce personnage barbare, desloyal &
 sanguinaire sur tous les hommes dissimu-
 lant sa passion & iuste cholere, elle donna
 place à la necessité, & soubsigna ce mal-

heureux acte, inique & desraisonnable
 sans le lire, sans s'enquerir du contenu en
 iceluy, ny des moyens qui luy restoient
 pour l'entretienement de son estat & de
 sa vie, seulement elle le pria bien affectu-
 eusement luy faire ceste faueur (comme
 elle auoit auparauant prié Robert Mel-
 uin, gentilhomme d'honneur, qui luy fut
 enuoyé comme ie diray cy apres) rapor-
 ter de sa part à ceux de la noblesse qu'elle
 les supplioit que leur bõ plaisir fut à tout
 le moins de l'ouir en ses iustifications en
 leur cõseil, ou en l'assemblee des estats,
 au iugement desquels elle se soubmet-
 toit de tout ce qu'on luy scauroit mettre
 sus, tant elle se tenoit assuree de sa vie
 passee, & se fondoit sur la pureté de sa cõ-
 science, leur promettant en foy de Prin-
 cesse qu'au cas qu'elle fust trouuee coul-
 pable en aucune maniere de la mort de
 feu son mary, soit pour l'auoir sceu, soit
 pour l'auoir cõfeti sans se preualoir d'au-
 cune authorité, où priuilege de Royne
 ou Prin

ou princeſſe, ains comme la plus ſimpl^e
 criminelle du monde elle ne declineroi
 telle punitiõ & ſupplice qu'il leur en plai
 roit ordonner. Ceste requeſte leur fut
 pluſieurs fois reiteree, mais eux tenãſ au
 piege la proye que ſi long tẽps ils auoiẽt
 pourſuiuiue, ſ'eſtãſ reſoluz de la dechirer,
 en prendre curee, & ſ'en donner gorge
 chaude, ne voulurent onques entendre
 à ſes pleurs, doleances & plus que iuſtes
 remonſtrances, ains faiſoient la ſourde
 oreille, & ſe moquoient de ceux qui leur
 en parloient. Il ſe trouue encore des let
 tres de la main de Murray, par leſquel
 les il luy faiſoit reſponce qu'elle ne pou
 uoit eſtre ouye. On les produira quãd il
 ſera beſoin. A toutes les fois que ſa maie
 ſté ſe voyoit ainſi refuſee elle auoit cou
 ſtume de dire, qu'elle eſtoit de ceux qui
ſeſuriũt & ſitiũt iuſtitia, laquelle luy eſtoit
 deſniee par ſes ſubiets propres, auſquels
 elle ne l'auoit onc eſpargnee. Lindeſay e
 ſtãt de retour avec ſa depeſche à ſouhait,

ses complices furēt grandement resiouiz dequoy ils ne furent pour lors, & auparavant la venuë de Mourray, contraints de passer outre, & seruir en la personne de leur maistresse, comme ils auoient deliberé de faire au cas qu'elle refusast de soubscrire la demission & resignation de la couronne pour estre regie & gouuernee par ledit Mourray, comme ils auoient aduisé. Car il est certain que ledit Lindesay l'eust tuee. Donques le comte d'Athol & le seigneur baron de Lydinton secretaire d'estat, encores qu'ils fussent participans de la conspiration faicte de son emprisonnement, furent extremement desplaisans, & se repentans de leur forfait, apres auoir veu vne si cruelle resolution, prise au conseil des malins, abandonnerent leur parti, & aduertirent sa maiesté par Robert Meluin de tout leur dessein, & du peu de preiudice que tel acte luy pouuoit apporter, pour les raisons par eux escrites, & à elle donnees

plus amplement à entēdre par ledit Mel-
uin, la suppliant tresinstāment d'aquies-
cer à la demande inciuille & inique d'au-
cū de sa noblesse pour obuier à pl^o grād
incōuenient, & de leur pardonner la fau-
te par eux cōmise en se laissant abuser à
la bōne foy, & pour auoir suivi les trahi-
stres, qui leur auoiēt tousiours iuré & pro-
testé, qu'ils n'attēteroient iamais à la per-
sonne de sa maiesté, & qu'ils n'é vouloiēt
qu'au cōte de Bodvvel, & à ceux qui pro-
ditoirement de nuit & de guet à pend
auoient occis le Roy leur maistre, cōme
ils esperoient vn iour faire paroistre à sa
maiesté, s'il luy plaisoit se conseruer, & at-
tendre la vicissitude des choses, & le chā-
gement qui se feroit en peu de tēps de la
fortune presete aspre & rigoureuse avec
vne plus gracieuse, tranquille & serene. Et
pour token qu'ils appellent & assēurāce
de ce luy éuoierēt vne bague garnie d'v-
ne turquoise. Cest aduis du cōte d'Athol
& du secretaire Lydinton estonna sa ma-

iesté, & fut cause qu'elle se sousmeit plus
 prôptement à la volonté des rebelles, au
 tremét, ie ne sçay (encor' qu'elle cognust
 biē ledit Lindeſay pour homme non ſeu
 lemēt moniaque mais auffi demoniaque
 deſtitué de raiſon & depourueu de ſens
 cōmun) ſi elle euſt ſi ſoudainemēt baiſſé
 la teſte pour obeir à leurs paſſiōs. Les re-
 belles ayās ceſte declaration ſignee de la
 Roine, ſ'en vont à Sterlin, & mettent la
 couiōne royale ſur la teſte du prince ne
 ſçachāt encor' parler vn ſeul mot, & igno-
 rant de ce qu'ils faiſoiēt à ſon grād preiū-
 dice, & en intention de le frauder bien
 toſt & luy oſter la couronne avec la vie
 auffi bien qu'à ſa mere. En ce couronne-
 ment ne fault demāder ſi les ceremonies
 en tel cas requiſes & acouſtumees ont e-
 ſté gardees non plus que les loix, & an-
 ciēnes obſeruāces du royaume, qui veu-
 lent que telle choſe ſe face en plein par-
 lement & aſſemblee generale des eſtats
 & ce pendāt n'y auoit à vne choſe ſi ſo-

29 Iuillet
 1567

lennelle que sept personnes qui eussent
voix en parlement, & encore ceux la des
derniers, moins renommés, & des moins
remarquez entre la noblesse. La nouvel-
le de ceste trahison estant paruenue aux
oreilles de messire Iaques de Bethune ar-
cheuesque de Glasco, ambassadeur ordi-
naire de ladite dame en Frâce, cōme il est
hōme digne nō seulemēt de telle charge,
mais aussi de presider au conseil, manier
l'estat, & conduire les affaires du pl^r grād
monarque de la terre, il remōstre au Roy
treschrestie, que Murray estoit le seul ar-
chitecte & cōducteur de toutes les cōiu-
rations executees contre l'honneur & la
vie de sa maistresse, suppliant sa maiesté
de le retenir, & n'adiouster aucune foy à
ses belles promesses, qui ne tēdoiēt qu'à
le frauder & circonuenir, en ayant fait de
contraires à l'admiral de Colligny, les-
quelles il ne faudroit de garder inuiola-
blemēt pour l'aduancement de la cause
cōmune des rebelles de Frâce & d'Escoffe.

Hos v-
bique
Bucha-
nanus
procres
appellat
quasi
vero qui
reginæ
partibus
adhære-
bant vir-
tute, ge-
nere, di-
uitijs, di-
gnitate,
numero
potiores
procerū
appella-
tione cē-
fendi nō
essent.

Mourray ayant senti le vent de ce propos par quelque trahistre courtisan, cōme il y a tousiours quelque ludas non seulement cours, mais aussi au conseil des Roys, qui est bien souuent celuy qui est le plus fauori, & auquel on se fie le plus comme vous pouuez voir oculairement en tout ce discours) il change incontinēt de contree & prent la route d'Angleterre, pour conferer en passant avec la Royne Elizabet l'aduis à luy donné par ledit admiral, & sur ce prendre resolution certaine, afin de reformer, ou plustost ruiner & perdre l'estat des trois royaumes à leur desir & volonté, le conseil receu avec le fauorable & gracieux receuil de ladite dame, & promesse de la cōtinuatiō de sa pension de quatre mille pondis sterlin par an (qui valent quarante mille liures tournois) qui luy feroit tres-bien payee comme de coustume, & avec l'asseurance de son ayde, faueur & secours en toutes ses entreprises. Il diligente le plus

qu'il peut son retour en Escosse. Où estant arriué & voyant le train que ses affaires auoient pris durant son absence, & que ses desseins s'aduançoient outre & par dessus son attente, il commença tout aussi tost à oster le masque, & manifester son hypocrisie, en montrant à tout le monde sa desloyauté, & le peu de comte que gens de son mestier tenoient de leurs sermés. Car à la premiere abordee, quelque promesse qu'il eust faicte & iuré sainctement au Roy de France, & à messieurs de Lorraine, en s'obligeant à Dieu & aux hommes par sa foy, & par l'acceptation & reception des beaux presens qui luy furent donnez, il fait conuoquer le parlement (combien qu'il n'eust aucun pouuoir de ce faire) afin de faire ratifier & approuuer tout ce que ses complices auoient negocié pour luy durant son absence, au preiudice de la Royne, du Prince son fils, de l'estat & de tout le royaume. Ceste conuocation & assemblée des e-

stats fut plus solénelle que les autres par eux faictes depuis & au parauant ce temps là. Car à fin que rien ne manquast à ceste batterie, & que leur maniere de proceder ne fust declaree nulle & nō legitime, par le deffault des ceremonies qui de tout temps sous les Rois ou leurs lieutenans auoiēt de coustume en tel cas estre religieusement obseruees, ils y feirent trouuer & assister pour représenter l'estat Ecclesiastique le venerable maistre Adam Bodvval euesque des Orca des, apostat, infame, sorcier, magicien execrable, parfait atheiste, & pour plusieurs autres causes fort descrié par la cōmune fame & renōmee de tout le peuple. Lequel estat de la meslee & cōspiration des traistres, auoit aussi par eux esté choisi pour solenniser le mariage de Bodvvel avec la Royne, & depuis employé pour iceluy blasmer & arguer à York par deuant les commissaires, ausquels Elizabet, Royne d'Angleterre auoit attribué la cognois-

face de ceste cause. Ce digne prelat estoit accompagné de deux ou trois abbez & prieurs de mesme farine, proches parens de Mourray. Dieu sçait si l'Eglise y estoit bierepresentee. Les plus grâds du royaume, & qui auoient le plus grand interest és affaires qui se propoisoient par Mourray, ne se trouuerent à ceste farce, se persuadâs q̃ les rebelles seroiēt les plus forts & qu'ils ne gagneroiēt riē à leur cōtredire, d'autât que iustice n'y auroit point de lieu. Toutefois les cōtes de Hontley & d'Argil, mi-lord Hereis & quelque'autres seigneurs s'y trouuerent, & prindrēt acte de leur oppositiō tât à la demission de la Roine, qu'à l'electiō de Mourray pour regent & gouuerneur du royaume, nō obstant la souscription de sa maiesté par luy produite, disâs qu'ils ne pouuoient aprouer chose de si grâde importance, s'ils ne voioient le cōsentemēt libre & volontaire de la Roine estât hors de captiuité & de la crainte de ses ennemis. Leurs oppositiōs

& remonstrances ne seruirent de rien; la force surmontant le droit, & le nombre des trahistres excédât par trop celuy des bons & fidelles seruiteurs de la couronne. Il ne faut donques pas s'esbahir si la conclusion des estats fut prise selon le desir de Murray & de ses complices, par laquelle la naturelle & legitime Princesse fut priuee de son heritage, & iceluy adiugé à vn bastard sous le nom accommodé d'un enfant aagé d'un an, & qui ne pouuoit pour lors iuger de leurs actions comme il fait bien maintenant, ayant appris par experience qu'ils estoient ses ennemis mortels, & que tous leurs desseins n'estoient que trahison & felonnie pour l'accabler en la ruine de sa mere, & par ce moyen s'emparer de l'estat, & commander souuerainemēt sur leurs egaux. Auparauant que passer outre, considerons ie vous prie la ruse des trahistres. Au commencement de leur entreprise ils faisoient les bons valets, se iactoiēt & van-

toient estre fort affectionnez seruiteurs
de la Royne, & qu'ils auoient pris les ar-
mes pour la mettre hors de la captiuité
de Bodvvel, auquel seul ils en vouloient,
tant à cause du rauissement de sa maiesté,
qu'à cause du massacre du Roy, prote-
stans avec sermens effroyables & pleins
d'horreur, où ledit Bodvvel se seroit re-
tiré, de poser les armes, & de rendre le
seruice, honneur & respect qu'ils deuoient
à leur souueraine dame & maistresse. Mais
apres que ceste pauvre Princeesse ayant
par trop grande simplicité adiousté foy
à leurs beaux serments eust donné congé
à Bodvvel, & à son armee, & rendu sa
personne entre leurs mains, ils ne feirēt
plus contenance d'en vouloir à Bodvvel,
ains ayants agriphé & encagé l'oyseau
pour lequel ils auoient dressé tel piege,
ils laisserent là Bodvvel sans l'inquieter,
& souffrirent qu'il se tint plusieurs moys
au pays, & en lieu tel & si proche & voy-
sin d'eux, que fils eussent eu desir de le

punir, il estoit bien en leur puissance de l'empoigner. Mais c'estoit ce qu'ils craignoient le plus, car s'il eust esté attrapé, comme ils pouuoient bien faire s'ils eussent voulu, tout le mystere estoit decouuert, & l'innocence de la Roynie trop manifeste couppoit le chemin à leurs desseins. Quoy voyās, & qu'il ne tenoit compte de remuer mesnage, ils furēt contrains changer de personnage, & prendre autre pretexte & fondement de leur rebellion, disans qu'ils demandoient iustice de la mort du Roy & ne parloiēt plus de Bodvvel, qui en estoit l'executeur, ains s'attaquerent à leur maistresse seule, comme si ell'eust esté seule coupable de ce crime tant abominable. Et pour la charger & en tirer de la preuue, & aussi pour donner terreur à Bodvvel, afin qu'il se retirast ils firent mourir quelques gentils-hommes innocents du fait, pareillemēt quelques seruiteurs de Bodvvel complices du crime, apres les auoir genez extraordi-

remēt, pour tirer d'eux quelque mot contre leur maistresse, leur suggerāts le crime, & à chaque coup de marteau lesinterogāt si sa maiesté ne leur auoit pas parlé du fait & cōmādé le parricide de son mari. O la belle iustice! en lieu d'extorq̃r la verité, ils subornēt vn'accusatiō fausse, & à force de tourmēts taschēt forger de la preuue, corōpre destesmoins, leur suggerāts vn crime nō aduenu: Dieu sçait cōme ses gēs la ont bien estudié les loix & cōme ils sōt biē entendus au fait de la iustice, mais qui est le iuge qui ordōna ceste questiō? qui y presida? qui y assista? les accusateurs, ennemis capitaux de sa maiesté, estoient iuges, executeurs & bourreaux. Qui a iamais ouy parler d'une telle iustice? mais q̃lque torment qu'ils peurēt apliquer à ces pources miserables, pour extorquer q̃lque cōfession au preiudice de sa maiesté, iamais ils ne la voulurent accuser en aucune maniere, ains protesterēt & iurerēt sō innocēce, prenās Dieu à tesmoin qu'ell' estoit étieremēt ignorāte

de l'entreprise & que Murray, Morton & leurs partiffans en auoient esté les auteurs, & l'auoient foubfcrit & figné de leurs mains, & qu'à plusieurs fois ils auoient veu leurs feings, & l'instrument de tout le complot entre les mains de monfieur le cōte leur maiftre, & auquel les principaux de leurs parents affifterēt & aiderent de leurs mains à l'execution du forfait, duquel ils font auiourd'huy mine de pourfuyure la vègeâce, ce qu'ils confirmerent par ferments folennels en prefence de tout le peuple à l'article de la mort, & y perfisterent iufques au dernier foupir, maugreans & deteftans la defloyauté de Murray & de fes complices, qui les auoient ainfi trahis, & pareillement leur maiftre apres les auoir mis en befongne. Ils chargerent grandement maiftre Archibald Donglas proche parent de Morton d'auoir esté le principal miniftre de ceste malheureufe & damnable execution. Ce que ces bons iuges n'a

uoient garde d'employer au proces verbal de la questiō: car cela eust descouvert le pot aux roses, & neautmoins ledit Maister Archibald par plusieurs lettres de sa main escrites à la Roynes, depuis sa detention en Angleterre, & mesmemēt depuis la mort de Morton, qui sont encores en estre pour estre produites quand besoin sera, non seulement a déclaré auoir sceu l'intention de Mourray, Morton & autres seigneurs confederez, touchant la mort de s^r mari, mais aussi a recogneu sa faute, pour auoir à leur suscitation & cōmandement esté l'executeur du forfait, & dont auparauant il auoit communiqué au secretaire Lydinton de la part dudit Morton à fin de s'asseurer auant la main du pardon de sa maiesté, & qu'il luy fit responce, que de ce faire il n'y auoit aucune esperance, ny pour sa vie offeroit luy en ouurir la bouche, mais qu'il y pouruoyroit en despit d'elle par vn autre moyen. Ceste procedure intimida si

bien Bodvvel, qu'il commença à sa met-
 tre sur mer voltigeant sur la coste à fin de
 gagner pays si d'aventure on le pourfui-
 uoit, mais les coniuerez voyans qu'il ne
 se retiroit, ains qu'il se pourmenoit de
 lieu à autre sans faire demonstration de
 vouloir abādonner le royaume ils seme-
 rent vn bruit qu'il faisoit le corsaire & es-
 cumeur de mer, & pour ceste cause ap-
 presterent quelques nauires pour luy
 courir sus, qui l'eussent bien pris &
 apprehendé s'ils eussent voulu, mais ils se
 cōtenterent de le chasser, & faire en for-
 te qu'il quictast le pays. Ce qu'il feit, &
 se retira à Dannemarc, où estant reco-
 gneu par quelques marchāts Escossois il
 fut constitué prisonnier, & apres auoir
 esté gardé presque l'espace de dix ans, y
 deceda, ayant auparauant confessé sa fau-
 te, & demandé pardon à Dieu avec vn
 tresapre recours de conscience, en despi-
 tant & blasmant grandement sa felonnie
 & les autheurs d'icelle, lesquels il decla-

ra par

ra par noms & furnoms à l'Euesque & autres seigneurs de Dannemarc, qui assisterent à sa mort & furent tesmoins de ses derniers propos. Par lesquels il descharga la Royne sa maistresse entièrement du crime à elle imposé par ceux mesmes qui l'auoient commis & perpetré, appellant Dieu à tesmoin de son dire, qui ne contenoit autre chose que la narration de l'homicide par luy executé, de son mariage avec sa maistresse, & de la façon comme il y auoit procedé par le conseil & aduis de Mourray, Morton, & leurs adherants, comme cy dessus a esté deduit. I'ay entendu que ces propos ayant esté fidellement recueillis de la bouche de Bodvvel, & rapportez au Roy de Dannemarc, furent depuis enuoyez à plusieurs Princes Chrestiens, & nommement à la Royne Elizabet. Et par ainsi elle ne peut en façõ que ce soit excuser sa tyrannie plusque barbare,

L

d'auoir cōtre sa cōsciēce soustenu les traistres, enduré la fausse acufation, & réuersé par calōnie l'estat d'une si grād' princesse, si bōne voisine, & si proche parente. Mais no^r reseruerōs ce subiet à son lieu à fin de retourner à noz premiers erres. Apres la tenue des estats Mourray se voyant au supreme degré de fortune, & que rien ne luy manquoit que le nom de Roy, comme les affections des hommes ne se terminent iamais en la iouissāce de ce qu'ils ont desiré, ains aduient ordinairement que l'heureux succés d'un bien inespéré engendre vne esperance de bien plus grand, ce maudit fils d'Agar ne se contentant de sa condition, mais voyant qu'il auoit à faire à vn enfant, lequel il auoit en sa puissance aussi bien que la mere pour disposer de leurs personnes si & quand il luy plairoit, & qu'il ne luy restoit rien qu'à gagner le peuple, & luy faire trouuer bons ses desseins, il commence à se dire fils legitime du feu Roy Iaques cin-

quiesme, que sa mere estoit sa vraye & legitime espouse: qu'il y auoit promesse de mariage entre eux, precedante les mariages depuis contractez: que cela paroistroit par actes legitimes, & instruments authentiques, qui se trouueroient encores dans le greffe de l'officialité de saint André, quand besoin seroit: que ceste promesse n'apas esté vaine, ne frustratoire: que l'effect s'en est ensuiuy: qu'elle a esté parfaictement accomplie par la copulation charnelle, & procreation des enfans, vrayes tesmoins de mariage. Voyla les propos qu'il tenoit à ses amis, qu'il pensoit luy estre bien affectionnez, afin que par eux ils feussent diuulguez. Il se proposoit par ce moyen supplanter le vray sang royal, & destourner l'affection du peuple non seulement de la Royne, mais aussi de monsieur le Prince son fils. Mais tant s'en faut que ceste mensonge seruist aucunement à l'aduancement de la cause, qu'au contraire plusieurs des

plus grands, qui l'auoiēt auparauant assi-
 sté & fuiui trop legerement avec bonnes
 troupes de leurs seruiteurs & amis, s'estra-
 gerēt de luy & quitterēt la partie, s'em-
 ueillās de son impudence. Car si sa mere
 eust esté legitime femme du Roy, cōm'il
 pretēdoit effrōtement, & par mensonge
 trop euidēte, madame Madeleine de Va-
 lois fille de France, & madame Marie de
 Lorraine fille de Guise, n'estoiēt que ses
 paillardes & nō ses fēmes: la Roine d'Es-
 cosse & son fils n'estoiēt que bastards, &
 ne pouuoient rien pretēdre au royaume
 de leur pere. Ce propos ayāt este mis en
 auāt avec son intention execrable de fai-
 re mourir monsieur le prince suiuant son
 conseil d'Angleterre, si autrement il ne
 pouuoit venir à chef de ses desseins, fut
 cause que plusieurs seigneurs & gentils-
 hommes commencerent songer à leurs
 consciences, & à la parfin despita si bien
 le comte d'Athol, Mi-lord Hume, &
 quelques autres qu'ils abandonnerent

le parti de Murray, se repentans, bien
 que tard, de s'estre laissez mener par vn
 tel engeolleur, qui ne se contentant pas
 de l'honneur qu'il auoit d'estre respecté
 par eux, & recogneu pour fils naturel du
 Roy, n'estant rien moins que cela, ains
 seulement auorton de nature & fils ba-
 stard d'vn nommé Iacques Portirfeild,
 valet de chambre du mi-lord Erskin, vou-
 loit exclure les vrais enfans de la courô-
 ne paternelle, & la mettre sur sa teste par
 trop grande outrecuidance, & se ser-
 uir d'eux pour ministres de telle des-
 loyauté contre la loy de Dieu & des
 hommes. Mais pour cela il ne laissa d'e-
 stre secouru par les ministres de Sathan,
 qui manioient le peuple Escossois à leur
 fantasie. Car ils luy seruirent fidelle-
 mēt de promoteurs de ce dessein, com-
 me y ayants beaucoup d'interest. Car
 il leur falloit necessairement vn Roy ba-
 stard pour soustenir vne religiō bastarde

à l'exemple d'Angleterre où ils voyoiēt
 ceste chose bien prattiquee par vn Roy
 adultere fut introduit vne religion con-
 forme à ses mœurs, & depuis maintenue
 par sa fille nee d'inceste & paillardise,
 ayāt par son autre fille vraye & legitime
 esté totalement exterminée & renuoyee
 en enfer dōt elle estoit sortie. Mais pour
 retourner à noz ministres, en cetemps
 là en faueur de Mourray ils introduirēt
 vn maxime en leur Eglise, & de laquelle
 ils se seruent encores pour le iourd'huy
 quand il est question de mariage ou de
 diuorce, que par la simple & nue pro-
 messe de mariage, le mariage est vallable
 ment contracté: de sorte que si vo^r auer
 fait quelque promesse seconde, la pre-
 miere l'emporte, encore que la seconde
 soit executée par conionction charnelle
 & procreation d'enfans, qui ne peuuent
 empescher le diuorce, la promesse pre-
 miere tenant lieu de mariage parfait &
 accōply. Cцы se pratique tous les iours

par les ministres d'Escoſſe, à quoy ils n'auoient onques ſongé auant que Mourray euſt allegué que le feu Roy laques cinquième auoit promis eſpouſer ſa mere. Pour valider ceſte prétendue promeſſe & par ce moyen inueſtir Mourray du royaume, & de frauder la Roynes & ſon fils, il falloir neceſſairement inuenter ceſte fourbe, comme ils feirent pluſieurs autres. Car outre les faux bruits & libelles diffamatoires, par eux faits contre la Roine & feu ſon mari, tâtoſt diſant que le fils les reſſembleroit en toutes eſpeces de vilennie, tantot ſe feignât douter de ſa naiſſance, ſi elle deuoit eſtre attribuee au Roy, ou au ſecrétaire David (voyez l'impudence) cōbien que puis n'agueres ils l'auoient couronné, & reconnu pour légitime Roy, ils furent vn an entier à preſcher cōtre le gouuernemēt deſ femmes, & cōtre la ſucceſſion légitime de la couronne, dōt nous voyōs encore les liures expoſez en lumiere par Iean Lenox

chef de leur ministèrie, & par M. Georges Buchanan singulier propugnateur du bastard. Par lesquels liures ils s'efforcent persuader au peuple, que la domination d'une femme ne peut estre legitime, dont s'ensuiuoit, ce qu'ils ne disoiēt pas en termes ouuerts, mais le donoient bien aisēmēt à entendre, que l'estat d'Escoſſe ne pouuoit pretendre aucun droit au royaume à cause de sa mere. O le bel axiome! Mais voici d'autres de mesme calibre, que les royaumes ne s'acquierēt point par succession, ains par election du peuple, que le ſag legitime ne peut attribuer droit de regner, ni l'illegitime oster tel droit à celui à qui par autre voye il appartient: que tel droit ne depend de la consanguinité, ains de la vertu: que le Roy est subiect aux loix, que les loix ſont subiettes au peuple: que entre vn homme priué & le Roy il n'y a difference quand ils ont delinqué, estās également subiets au chastiement, *quia facinus quos inquinat, æquat*: que le peuple peut

lire & deposseder le Roy cōme bon luy
 sēble: brief que l'estat des Rois depēd en
 tieremēt de la volonté du peuple. Voila
 de beaux liures, voila de beaux sermons,
 & de belles maximes pour le fondemēt
 de leur maudite religion, & subuersion
 de toute police. Mais à quelle fin? Pour
 establir le royaume d'un bastard en fru-
 strāt le fils de l'heritage de sa mere, & en
 fin se faire Rois eux mesmes, quād il plai-
 roit au peuple. Ce seroit chose fort aisee
 à faire si leurs axiomes auoiēt lieu: car ce
 sont eux qui tournent & virent le peuple
 comme ils veulent. Ce sont eux qui font
 croire à cest animal de plusieurs testes, q̃
 le iour est nuit, que le blāc est noir, que le
 vert est sec. Il est donc aisé à iuger à quel-
 le fin ils attribuoient tant d'autorité au
 peuple le faisant maistre des Roys & des
 loix. Car par ce moyen ils s'autori-
 sent eux mesmes, & assubiectissent les
 Roys & les loix à tout ce que bon leur
 semble de trompeter au peuple en la

chaire de mensonge. Il ne faut donques
 point s'estonner si Mourray se voyant lou-
 stenu par ces boute-feus se disoit enfant
 legitime, & se vendiquoit le royaume
 d'Escoffe, & quand il alloit à Locheleuin
 veoir sa mere & ses freres vterins, il se cō-
 portoit enuers la Royne comme vn Roy
 enuers sa subiette, sans parler à elle, sans
 l'honorer & sans la respecter. Cepen-
 dant ses bons & fidelles seruiteurs la
 voyants en ceste misere, faisoiet ce qu'ils
 pouuoient pour moyenner sa deliuran-
 ce. Georges Donglas, le plus ieune
 des freres du seigneur de Lochleuin, ayāt
 pitie & cōpassion du mauuais traite-
 mēt qu'il voioit faire à sa maiesté gaigna
 quelques vns des gardes, & entre autres
 Guillaume Dōglas ieune garson aagé de
 seize à dixsept ans, lequel le Dimenche
 second iour de May, cōme ledit seigneur
 estoit à table luy desroba les clefs des
 portes qu'il auoit sous son assiette, & e-
 stant forty & ayant enfermē ceux de de-

dans le chasteau, il emmena la Royne par
 batteau iusqu'au bord du lac, où se trou-
 ua bonne compagnie de noblesse, qui
 recueillirent sa maiesté avec grande alle-
 gresse. Murray pour lors s'amusoit à
 piller & raçonner le peuple sous ombre
 de grands iours qu'il tenoit à Glasco,
 mais ayant entendu les nouuelles de la
 deliurance de la Royne, estonné de rage
 & de fureur fait assembler incontinent
 les forces de la faction des trahistres, sça-
 uoir est, les comtes de Morton, Glenkar-
 ne, Marre, My-lords Lindefay, Ruthuen,
 Sempil, Ogiltrie, Kirkart, Glames, & tous
 ceux du furnom de Donglas, avec plu-
 sieurs autres. Du costé de la Royne estoiet
 tous ceux de la maison & famille des Ha-
 miltons, de Cambel, Seton, Leuinston,
 Fleuing, Bruce, le comte de Rothes les
 seigneurs de Hereis, Vvachton, Balme-
 ry, Lochimbar, & autres infinis. Le com-
 te de Honteley & Mylord Ogilbe ve-
 noient avecques grandes troupes, mais

estās encor' loin de sa maiesté, ne peurēt
 ioindre assez à temps. Car se voulant re-
 tirer à Dombreton (forteresse inexpu-
 gnable) & espargner le sang de ses subiets
 elle fut contrainte de tenter la fortune
 d'une bataille par ses rebelles, qui se cam-
 perent au lieu de Langsyd par lequel il
 falloit necessairement passer. Ils furent
 conseillez à ce faire par vn du cōseil mes-
 me de la Royne qui a tousiours esté hō-
 me à deux visages, & qui la suyuoit à fin
 de la trahir, comme il fit. Car le soir pre-
 cedent le combat il escriuit à Mourray
 le dessein de sa maiesté, qui estoit, de ne
 rien precipiter, ains de mettre sa person-
 ne en seureté dans le chasteau de Dom-
 breton iusques à ce qu'elle eust assemblé
 toutes ses forces, qui estoient és derniers
 quartiers du royaume, plus que bastan-
 tes pour se venger de ses ennemis, & sans
 aucune chose hazarder, combien qu'à
 present elle auoit de bons hommes, &
 bien resoluz à se battre si quelque ren-

contre se presentoit par les chemins:
 Mais que toute la force de son armee
 consistoit en l'auantgarde, de laquelle il
 pouuoit auoir le dessus, qu'il ne se dōnast
 peine de ceux de la bataille, luy promet-
 tant qu'ils ne feroient pas grand effort.
 Ces lettres furent receues enuiron mi-
 nuit, & incontinent communiquees au
 conseil, & sur icelles prise resolution de
 combattre, sans attendre que la Roy-
 ne assemblast les troupes qui luy ve-
 noient de toutes parts. Ils sçauoient
 bien que rien ne leur estoit plus contrai-
 re que la demeure, & pour ceste cause
 encores qu'ils cogneussent leurs forces
 estre beaucoup inferieures à celles que
 pour lors auoit la Royne, toutesfois
 comme desesperez se resoulurent de les
 assaillir, & en ce passage iouer à quitte &
 à double, & y laisser du tout ou sau-
 uer leurs vies. Mais le desespoir &
 la furie ne leur commanda pas tāt, qu'ils
 ne s'aduissent bien de choisir lieu

fort à leur aduantage, qui fut cause de leur victoire, avec la conniuece d'aucuns du party de la Roine, qui ne feirēt resistance telle qu'ils deuoient, & comme ils auoient veu faire à ceux de l'auantgarde, qui attaquerent l'ennemi fort furieusement, & le presserent viuemēt sans s'esbranler en façon du monde, iusques à ce qu'ayans rōpu leur lances, & n'ayans plus riē de quoy s'aider, apres s'estre serui des esclats & trōçons de leurs lāces & espees, ils furēt en fin cōtrains de venir aux dagues & pierres, qui leur manquoient au besoin. En ce conflict furent tuez cinquante sept tant seigneurs que gentils-hommes portans le nom d'Hamilton, & vingt sept prisonniers, outre ceux des autres furnoms. La poursuite de ceste victoire fut fort sanglante. Car c'est là que se fait le grand carnage, chacun se vengeant de ses querelles particulieres. Les prisonniers, encores qu'ils fussent gentilshommes de marque, furent la plus

part enchainez pieds & poings comme bestes sauvages, & trefrigoureusement traitez. Apres ceste deffaite la Royne accompagnée de deux ou trois cornettes se retira en haste vers l'Angleterre, & ne s'arresta iusques à ce qu'elle fut rendue à Dundreuen où le conseil fut tenu, & contre l'aduis de tous resolution prise par sa maiesté de se retirer vers la Roine d'Angleterre. Plusieurs de ceux qui estoient pour lors presens luy offrirent leurs maisons, promettans la garantir contre la puissance de l'Angleterre & de l'Escoffe iusques à ce que ses fidelles subiets vinssent leuer le siege, si d'auenture il y estoit mis. Les autres luy conseilloyent de se retirer en l'une de ses forteresses là auprès, où elle auroit moyen d'attendre secours. Les autres la prioient de prendre la route de France, offrant la mener & conduire en seureté. La Royne craignant la fureur du bastard & de ses complices, qu'elle voyoit au desespoir estoit

d'aduis de tenter la bonne volonté de la Royne Elizabeth, ne pensant point qu'elle eust le cœur si felon qu'elle l'a depuis monstre. Sa maiesté estoit seule de cest aduis, s'opiniastrant en iceluy pour beaucoup de bonnes considerations, & assez peremptoires, si elle eust eu affaire à gens qui eussent eu aucune crainte de Dieu ou vergoigne des hommes deuant les yeux. Il luy sembloit qu'il n'y auoit aucune seureté pour elle en Escosse, ne sçachant en qui bonnement se fier, & ayant encores l'apprehension de la mort au cœur, dont elle auoit esté tant de fois menacee. D'aller en France en tel desarroy, sans vaisseaux, sans suite, sans equipage, la honte la destournoit plus que la distance des lieux ou le danger de la mer. Elle portoit avec elle le gage d'amitié que la Roine d'Angleterre sa sœur luy auoit enuoyé & les lettres qu'elle luy auoit escrites pleines d'honnestes offres de faueur & de secours en sa necessité. Et

incon-

incōtinēt qu'elle fut sortie de Lochleuin
 luy ayant renuoyé par vn gentilhomme
 expres vne bague de diamant qu'autre-
 fois elle auoit receuë d'elle pour token
 & gaige d'amitié, elle luy reitera les pro-
 messes que Trogmorton son ambassa-
 deur luy auoit faictes, avec assurance
 de secours contre ses rebelles, & mesme-
 ment s'il plaisoit à sa maiesté se retirer en
 Angleterre qu'elle viendrait iusques sur
 la frontiere pour la recevoir & assister en
 personne de tout son pouuoir. Qui fut
 la principale cause que sa maiesté se fioit
 entierement en elle, & s'asseuroit qu'elle
 ne luy feroit pas pire traictement qu'elle
 auoit fait à ses rebelles, & au pis aller, si
 elle luy manquoit de parole, ne voulāt
 desplaire à Murray & à ses complices,
 elle ne feroit si malheureuse que de vio-
 ler le droit d'hospitalité, & la liurer en-
 tre leurs mains, ains luy dōneroit le pas-
 sage libre pour se retirer en France par
 deuers ses parens & amis. Et ores que

M

toutes ces raisons n'eussent point de lieu, son honneur luy commandoit de s'adresser à la Roine d'Angleterre qui auoit tresgrand interest en la mort de son mari, qui luy attouchoit de sang plus pres que nul autre, & estoit le second heritier presomptif de sa couronne. C'estoit à elle à qui elle vouloit faire paroistre son innocence, & à la noblesse d'Angleterre, qui luy aideroit (comme elle cuidoit) non seulement à venger vn acte tant horrible & si detestable, mais aussi à esclaircir les calomnies que les auteurs du parricide mettoient sus à elle, bien qu'elle fust la plus esloignee. Aussi qu'elle y trouueroit madame Marguerite, mere de son mary & ses autres parens, qui se ioindroient à ceste poursuite, par le moyen & assistance desquels ce faict seroit bien examiné, & la verité descouuerte. Ceste seule cause luy sembloit plus que suffisante pour la faire descendre en Angleterre. Messire Iean Hamilton

Archeuesque de saint André, & primat
 de l'Eglise d'Escoffe, homme fort aagé,
 & de longue experience, ne peut onc-
 ques trouuer ceste opinion bonne, co-
 gnoissant bien de tout temps l'infidelité
 du conseil d'Angleterre. Il luy meit de-
 uant les yeux les exemples de plusieurs,
 qui pour auoir trop legerement creu
 aux promesses des Anglois, ont esté re-
 duits en extreme necessité, & en lieu des
 biensfaits promis ont rapporté honte
 & dommage en leur royaume. Il luy re-
 monstra comment Iacques, qui fut de-
 puis premier de ce nom Roy d'Escoffe
 pere grand du bisayeul de sa maiesté, pē-
 sant aller en France où le Roy Robert
 son pere l'enuoyoit pour euitier la tyran-
 nie de son oncle, estant descédu à Flam-
 bourg pour se rafreschir fut retenu pri-
 sonnier par l'Anglois l'espace de dix-
 huit ans & plus contre le droit des
 gens & contre la loy d'hospitalité, & en
 fin fut contraint de se racheter, & payer

autant de rançon qu'il eust fait, ayant esté prins en iuste guerre, & faisant acte d'hostilité. Le bon Roy Robert caduc & malade d'extreme vieillesse, trouua ceste desloyauté de l'Anglois si estrange que trois iours apres les nouvelles receuës de la prise & detention de son fils, il en mourut de melancholie. Henry second feit venir par deuers luy à Lōdres Macolme quatriesme de ce nom, & encores depuis son frere Guillaume Rois d'Escoffe sous pretexte de luy faire l'hommage que les Rois d'Escoffe luy deuoient à cause des pays de Northombellande, Houdinton, Courberlande, & autres terres & seigneuries qu'ils tenoient en son royaume, mais y estans, il les contraingnit le suiure outremer, & estre spectateurs de la guerre qu'il faisoit aux François, à fin de rompre par ce moyen la tresancienne alliance, qu'ils auoient avec le Roy de France, combien qu'auparuant y aller il leur eust promis & iuré de

ne leur demãder aucune chose qui pour-
roit tourner au preiudice de la libert 
de leurs personnes & des droicts de leur
couronne. Alexandre duc d'Albanie, fre-
re de Iacques troisi me, bisayeul de sa
maiest  retournant de Gueldres, o  il e-
stoit all  voir le Duc son grand pere du
cost  maternel fut aussi prins par les An-
glois sur mer, & sans aucune cause re-
tenu prisonnier iusques   ce qu'ils fu-
rent forcez le laisser aller par denoncia-
tion de guerre au cas qu'ils eussent est 
refusans de ce faire, & de luy rendre ses
vaisseaux & son equipage qu'ils auoient
pillez. Il y adiousta plusieurs autres bel-
les remonstrances, & la hayne mortelle
qu'Elizabet luy portoit, & l'obligation
qu'elle auoit   ses  nemis qui   sa persua-
sion, c seil & aduis, & par son aide, faueur
& suport auoi t t t iou  de tragedies en
Escoffe. Mais tout cela ne peut arracher
de la teste de ceste princesse l'assurance
qu'elle auoit  s promesses de sa cousine.

Quoy voyant ce venerable Prelat, & qu'elle se precipitoit en peril tout euidet & certain, comme elle se mettoit sur l'eau pour descēdre en ceste terre fatale se mit à genoux, la saisit au corps avec les deux bras, & avec larmes luy dit qu'elle auroit la peine de le trainer si elle passoit plus outre. Mais en fin la voyant obstinee en son malheur, & luy n'ayant moyē de resister à sa volonté, apres luy auoir encores vne fois remonstré que sa maiesté s'alloit perdre, son estat, son royaume, ses bons seruiteurs, & la foy catholique, il luy demanda congé de se retirer, & la pria luy octroyer acte de ses remōstrances pour valloir & seruir & à ceux de la maison d'Hamilton en temps & lieu, comme firent pareillement les autres seigneurs qui lors l'accompagnoient. Les actes seront produits quand besoin sera. Pendant ce temps Mourray couroit par pays avec son armee, confisquant les biens, & faisant demolir & ruiner de fond en co-

ble les chasteaux & maisons de ceux qui auoient fuiuy le party de la Royne, comme celles de Lochimbar, de Skirlin, & autres qui estoient les plus beaux ornemens du royaume. Et pour se continuer es bonnes graces d'Elizabet, & effectuer la promesse à elle faicte quelque temps auparauant, il fit mettre rez pied rez terre la tres-ancienne & royale maison de Dō bar, principale forteresse du royaume, & seul bouleuert du costé du Soleil leuant opposé aux incursions des Anglois en Escosse. Il pilla les maisons d'Hamilton & Dreffen, & ayāt appliqué to^r les meubles d'icelles à son vsage ymeit des garnisons. La Royne partant de Dundreuen descendit à Vvirkinton, premiere ville des frōtieres d'Angleterre, & de la s'en alla à Cokirmonth, de Cokirmonth à Carleil pensant aller le droit chemin en courtrouuer sa cousine, & luy faire ses doleances & à son conseil. Mais incontinent qu'Elizabet fut aduertie de sa venue, elle com-

manda qu'elle fust retenue prisonniere
 en bonne & feure garde, & le plus loin
 de la cour que faire ce pouroit, craignāt
 de la veoir & de rougir entendant ses
 plaintes, & voyant ses belles lettres que
 elle auoit en main, & de ne pouuoir re-
 pliquer aux reproches que iustement el-
 le luy pouuoit faire de sa perfidie. Le
 pretexte de cest emprisonnement estoit
 qu'elle la vouloit garder de peur qu'elle
 tombast es mains deses subiets, qui la vou-
 loient faire mourir, & qu'elle la renuoye-
 roit en son royaume avec vne armee
 quand il seroit temps, & par ce moyen
 amusa tousiours ceste pauvre dame, l'em-
 peschant de demander secours d'ailleurs.
 Elle fut arrestee à Carleil, & de là menee
 Bolton par Mi-lord Scrup, qui cōman-
 doit aux frontieres du costé de ponent.
 Auquel lieu fut enuoyé messire François
 Kueollis capitaine des gardes d'Elizabeth
 pour la garder, qui la gourmanda terri-
 blement, & luy fait dix mille indignitez.

Cependant la noblesse d'Escoffe irritée de la trahison faite à leur maistresse, & de la desloyauté de la Royne d'Angleterre, commence à se remuer, & s'assembler en armes avec grand appareil en intention de punir les trahistres, d'exterminer tous ceux de leur faction. Et de fait les comtes de Honteley & de Crafur avec le Milord Ogilbe accompagnés de six mille hommes s'estoient déjà acheminez vers la ville de saint Jean. Le comte d'Argyl avoit déjà passé la rivière de Dinuone suivi de trois mille hommes: Ceux de la maison d'Hamilton avec les Comtes de Cassilis & d'Egliton seigneur de Montgomeris, & le gros de l'armée les attendoient à Glasco lieu destiné pour se trouver tous ensemble. Murray se sentant trop foible & inégal à tant de forces advertit Elizabeth, la priant d'y donner ordre promptement, & de le secourir, ou qu'il estoit perdu & tous ses desseins rompus. Ceste nouvelle reçue par Elizabeth elle despescha

incontinent vn homme pardeuers la Royne pour luy remonstrier la fouldie & oppression de son peuple par le moyen des troubles passez: l'affoiblissement de son royaume, fils continuoient: que toujours la perte tomboit sur elle, qui deuoit par toutes voyes à elle possibles conseruer ses subiets: que pensant exterminer les meschans elle perdoit les bons: & parce son aduis estoit, qu'elle feist retirer les seigneurs de son party, qui vouloient commencer ce nouueau trouble, luy promettant qu'en ce faisant elle mettroit si bon ordre au parsus, qu'elle en auroit occasion de se contenter. Cest aduis d'Elizabet fut suyuy, & incontinent commandement fait par la Royne à ses fidelles subiets de se departir de leur entreprise, & retourner en leurs maisons, les asseurant de l'assistace d'Elizabet, & de la promesse qu'elle luy auoit faict, de la ramener en son royaume avec si bon nombre d'hōmes que ses ennemis ne les oseroient

enuifager . Mais toutes ces belles promesses n'estoient qu'amusements & trōperies . Car son dessein estoit de tenir ceste pauvre dame en suspens, iusques à ce que Murray eust faict ses affaires, & ruyné les bons seruiteurs de la Royne les vns apres les autres ainsi distraits & separez, preuoyant que le mauuais traitement qu'il feroit à la plus part feroit saigner le nez au demeurant, & refroidir l'ardeur de leurs courages, de sorte qu'il luy seroit fort aisé d'establir sa tyrannie sans coup frapper . Car quelque bonne mine ou semblant qu'elle fit de compa-
tir avec sa cousine, & laméter sa fortune, si estoit elle la seule cause & fabricatrice d'icelle, par ses menees & intelligences qu'elle auoit avec ses rebelles, colludant tousiours avec eux nonobstāt toutes ses promesses . Car si elle eust eu intention de la secourir, comme elle disoit, & iusques à cela contregarder & empescher qu'elle ne tombast és mains de ses subiets

desloyaux & trahistres, il n'estoit iabe-
 soin de la tenir si estroitement presque
 sur les frontieres d'Ecosse, ains la deuoit
 faire venir en cour à Lōdres, où elle eust
 esté en toute seureté, & où elle eust peu
 receuoir l'honnesterecueil qu'ō fait cou-
 stumieremēt à vne personne qu'on veult
 secourir. Ses ācestres fugitifs d'Angleter-
 re par la rebellion de leurs subiets ne fu-
 rent pas traittez en ceste facon par les
 Roys d'Escoffe. Henry sixiesme deposse-
 dé de sa couronne par le duc d'York, se-
 fstant sauué en Escoffe avec sa femme, ses
 enfans, ses freres, ses oncles, ses cousins,
 & plusieurs seigneurs de sa fuite, ne fu-
 rent pas retenus prisonniers par Iaques
 troisieme, ains ce bon Roy alla audeuant
 de luy, & l'ayāt mené en sa cour le traitta
 royalement avec toute sa compagnie, &
 tant qu'il luy pleut y demourer ne le lais-
 sa manquer de chose du monde couue-
 nable à son estat, & requise à la grandeur
 d'un Roy. Et en fin apres l'auoir festoyé

quelques moys, voyant que l'enuie le prenoit de retourner en son royaume, ill'ayda d'une bonne & puissante armee pour ranger ses subiets, & recouurer son estat. Il ne fit pas des complots & menees, & ne practiqua pas aussi des intelligences avecques ses rebelles pour enuahir son royaume, chose qui luy estoit fort aisee à faire s'il eust voulu, ayāt tous ceux auxquels la couronne pouuoit appartenir entre ses mains pour en disposer de leurs moyens, leur credit, leur auctorité & de leurs personnes à sa volonté. Mais Elizabet en recompense de tant de bons offices faits à ses maieurs par le bisayeul de ceste dame poursuuie de fortune comme ils estoient, & ayant à elle recours sur l'assurance de sa foy promise par ses lettres & par la voix de ses ambassadeurs qui deuoit estre sur toutes choses saincte & inuiolable, pour son entree luy prepare vne prison biē estroite, esloignee de sa veuë sous la puissance

de ses ennemis qui en lieu de la garder la brauent indignement & ne respectent aucunement sa royale personne. Et cependant elle pense engeoler le monde, & faire croire que c'est pour l'exempter de l'iniure de ses rebelles, avec lesquels elle a tousiours eu intelligence, lesquels elle a tousiours authorisez, aduouans leurs trahisons, desquelles elle est la seule architecte & maudite conseillere. Mais à fin de retourner à mon propos, ceux du parti de la Roine ayans posé les armes par son commandement à l'induction & persuation frauduleuse d'Elizabeth, à fin de maintenir Murray & Morton, son lieutenant general, en leurs authoritez, sous lesquelles pour lors l'Ecosse estoit reduite sans resistance ou cōtredit de personne quelconque. Elle escrit à Murray que les princes estrangers se pourroient offenser non seulement de la poursuite par luy faite contre sa maistresse, mais aussi de sa detention en An-

gleterre , estant princesse libre , & non subiecte à la puissance d'autrui , si on ne faisoit paroistre q̃lque pretexte de iustice qui les auroit meu à ce faire. Et pour ceste cause son aduis estoit de luy faire dresser vne forme de proces, & l'accuser de la mort de son mary , chose qui estoit de soy si odieuse , qu'elle adouciroit les cœurs des hōmes enflez du desir de vengeance du mauuais traictement faict à vne telle dame, nō seulement par ses subiects , qui semblent auoit quelque iuste occasion de mescontentement, mais aussi par elle , qui est sa plus proche parente, & qui par la loy de nature la doit maintenir & deffendre contre la force & violence de ses subiects. Que ceste forme de iustice donneroit couleur à tous leurs desseins, & appaiseroit l'indignatiō des autres princes, & clorroit la bouche de ses parens , leurs ennemis en France. Qu'il enuoyast ou qu'il vint luy mesmes en toute asseurance, & qu'il amenast avec

luy gens de conseil pour intenter ceste
 accusation, qu'ils seroient fort bien es-
 coutez iusqu'au bout, sans que leur mai-
 stresse fust ne veüe ne ouye, sinon para-
 gens ou procureurs, auxquels on ne don-
 neroit grand loysir de repliquer, & dire
 chose seruante à sa iustification, ains l'ac-
 cusation plainement entendue, & si tost
 que les agents de la Royne auront com-
 mencé entrer en propos, l'assemblee se-
 roit rōpue sur quelque q̄relle d'Alemai-
 gne, cōme on dit, ou quelque autre occa-
 sion, & accidēt qu'on feindroit estre sur-
 uenu, à fin de ne leur dōner temps de re-
 criminer, ne de se iustifier sinon tant soit
 peu pour dōner lustre à leurs procedures
 & induire le monde à croire qu'elles ont
 esté faites par la voye ordinaire de iusti-
 ce, sous ombre de laquelle tout ce feroit
 à leur aduantage, & au detrimēt & pre-
 iudice de leur maistresse. Mourray trou-
 uant bon cest expedient vouloit enuoy-
 er quelques seigneurs des plus apparens
 de sa

de sa factiō, & ligue avecques memoires
 & instructions pour intenter ceste acqui-
 sition, craignant qu'elle fust odieuse à la
 noblesse d'Angleterre, & mal seant en sa
 bouche, qui estoit frere bastard de l'ac-
 cusée, & aduancé par elle en biens & en
 honneurs, & qui n'auoit rien vaillant
 sinon ce qu'il tenoit de sa liberalité. Mais
 ayant esté refusé par eux, qui craignoiēt
 plus que luy la honte & l'infamie de tel-
 le poursuite, il fut contraint d'aller en
 personne, & se monstrier chef de l'entre-
 prise. Il mena avec luy ceux qui luy a-
 uoient tousiours serui quād il estoit que-
 stion de représenter les trois estats d'Es-
 cosse, sçauoir est l'apostat des Orca-
 des duquel nous auons parlé cy dessus,
 & maistre Robert Petcarne abbé de Dū-
 fermelin, pour l'eglise: le cōte de Mortō
 son lieutenant general & le mi-lord Lin-
 desay pour la noblesse: M. Iaques Magil
 & M. Héry Baluane, conseillers de la ses-
 sion d'Edimbourg, pour le tiers estat, a-

uec M. George Buchanan, qu'il mena
 pour donner lustre à leurs mensonges,
 estans par luy bien composez & digerez
 en beau l'agage Latin, à fin de les éuoyer
 en France, en Allemaigne & autres pays
 estrangers où l'Anglois n'est pas entédu.
 Et outre il s'acōpagna de Guillaume Me-
 tellan, sieur de Lydintō, quoy qu'à regret
 & refusant d'aller, sçachāt en son ame la
 verité du faict & les grandes calomnies
 qu'on impoisoit à sa maistresse. Mais co-
 gnoissant l'humeur de Murray qui le
 pressoit, il n'osa resister à sa volōté. Tho-
 mas Hauart duc de Norfolk, premier sei-
 gneur d'Angleterre en hōneurs, en biens,
 & en reputation, estoit commissaire de-
 puté par Elizabet avec le cōte de Suffex,
 & Rodolfe Sadler cōseiller d'estat, pour
 ouyr les doleances des parties. La Roine
 voyant que les calomniateurs ses subiets
 forlignans de la vertu de leurs ancestres,
 & suiuiās la trace de Iean Baliol (qui ven-
 dit son pays à l'Anglois, le recognoissant

pour superieur) nō seulement, se sousmet-
toiet eux mesmes au iugemēt d'elizabet,
mais aussi vouloient par tous moyēs luy
rēdre sa maiesté vassale & iustitiable, luy
enuoya ses agens la prier instāment que
son bō plaisir fust de l'ouyr en personne,
qu'elle estoit preste de respondre à tous
ceux qui la voudroient accuser, & se iusti-
fier deuant elle & son conseil, protestant
toutefois de ne les recognoistre pour iu-
ges, soit pour elle, soit pour ses bons
subiets, estant nee princesse & heritie-
re d'un royaume aussi libre que pou-
uoit estre celuy d'Angleterre, & qu'Eliza-
bet n'estāt que son egalle, ne luy pouuoit
estre iuge. Mais s'il luy plaisoit avec les au-
tres princes Chrestiens prēdre cognoissāce
de ceste cause, elle se sousmettroit à leurs
iugemens tresvolontiers, sans la recuser
pour aucune cause du temps passé. Ceste
requeste n'eut point de lieu. Car des le
commencemēt Elizabet s'estoit resoluē
de ne la iamais voir, n'ouyr en personne.

Cependant elle fait acheminer ses commissaires à la ville de Iork, lieu deputé pour ceste assemblée, bien instruits à la deuotion, & tresmal imbus de la Roynie d'Escoce par les faux rapports d'elle & de ses ennemis, qui estoient les principaux de son conseil d'estat. Les accusateurs s'y trouuent & font vn long narré de ce qui s'estoit passé en Escoce, & des ordonnances faites en leurs parlemens concernant la police & gouuernement du royaume, sans arguer la Roynie d'aucun crime, ains protestant estre ses tres-humbles & tres-affectionnez seruiteurs, neantmoins concludoient par supplication à la Roynie d'Angleterre de leur en faire iustice, & en auoir pour agreable ce qu'ils auoient conclu & arresté en l'assemblée de leurs estats. Apres qu'ils eurent esté bien escoutez tout au long, suiuant la promesse qui leur auoit esté faite, maistre Iean Lesté Euesque de Rosse, Mi-lord Boid, Mi-lord Hereis, & maistre Gauin

Hamilton Abbé de Kilvvien, agens de-
 putez de la Royne, voyants que les ac-
 cusateurs sous main attaquoient l'hon-
 neur de sa maiesté & cōbien qu'ils prote-
 stoiēt en public luy estre seruiteurs, que
 neantmoins secrettement & en priué
 leurs propos estoiet tout autres, & qu'ils
 auoient imbu les commissaires d'une tres
 mauuaise opinion de ses deportements
 enuers son mary, comme ils estoient biē
 & deumēt aduertis, ne se contēterent de
 respondre simplement à ce qui auoit esté
 proposé en pleine audience, ains trouue-
 rent expedient de refuter entierement
 toutes leurs calomnies & tout ce qui se
 pouuoit dire au defauantage de leur mai-
 stresse. Et partant remonstrerent à mes-
 sieurs les commissaires, qu'ils ne les pou-
 uoient recognoistre pour iuges de ceste
 cause, ne leurs aduersaires pour accusa-
 teurs, n'estās personnes legitimes pour e-
 ster en iugemēt à l'encōtre de leur souue-
 raine, à laquelle par les loix de Dieu & de

« nature ils estoient subiets, & nō à la Roine
 « d'Angleterre. Toutesfois desirans faire
 « paroistre l'innocence de leur maistresse à
 « tout le monde, & leur oster la mauuaise
 « opinion qu'ils s'estoient forgee en leurs
 « entendemens par les sinistres impressiōs
 « de ses ennemis, les prioient considerer
 « que le fondement des ordonnances des
 « estāts d'Escoffe par eux alleguees, & tou-
 « te leur acculation ne cōsistoit qu'en pre-
 « somptiōs, la pl^r part si friuoles & legeres,
 « qu'elles ne meritoient estre alleguees en
 « telle compagnie. Car en premier lieu ne
 « se trouue vn seul tesmoin qui aye veu la
 « maiesté presente à la mort de son mary,
 « ny qui l'aye ouye commander vn acte
 « felon. Les accusateurs mesmes ne le di-
 « sent pas, ains seulement qu'elle y auoit
 « cōsenti, à fin d'espouser Bodvvel, se fon-
 « dans sur ie ne sçay quelles coniectures
 « qui ne sont pas bastātes pour oppugner
 « l'hōneur ou la vie, ie ne di pas d'vne Roie
 « ne, exempte des loix, & n'ayant point de

superieur, ains d'une personne de la plus
vile qualité du monde. Car en tels cas le
droict commun veult que les preuues
soient plus claires que n'est le Soleil en
plein midy. Mais voyés les, ie vous prie,
& les regardons de pres. La premiere est
fondee sur la presumption du mal talent
qu'ils la disent auoir eu cōtre son mary à
cause de l'homicide inhumain de son se-
crettaire. La seconde sur le mespris de la
foy coniugale, dōnant part à Bodvvel en
ses bōnes graces. La troisieme sur les let-
tres pretēdues escrites de sa main, & au-
tres papiers & enseignemens qui furent
trouuez dans vn petit coffre d'argēt. La
quatriēme, sur le peu de cōpte qu'elle fit
de luy apres sa mort, dedaignant de me-
ner dueil, & le faire enterrer cōme il ap-
partenoit. La cinquiēme, sur le mariage
par elle cōtracté avec Bodvvel meurtrier
de son mari, & pour la fixiēme ils ēploiet
les cōfessions faites en la torture par les
seruiteurs de Bodvvel & autres ministres

« de ceste horrible executiō. Or combien
 « que toutes ces presomptions peuuent
 « estre refutees par vne simple denegatiō,
 « laquelle proferee de la bouche d'une tel-
 « le Princeſſe doit auoir plus d'efficace
 « que tout ce que dix mille tels hommes
 « que les accusateurs pourroient alleguer
 « au contraire, toutesſois à fin de conten-
 « ter voz eſprits, & vous rendre la verité
 « tout euidente, ſans toutesſois approu-
 « uer l'autorité de celle qui vous a com-
 « mis, ne vous recognoiſtre pour iuges,
 « nous diſons qu'elles ſont toutes fauces,
 « & fondees ſur le ſeul dire des ennemis de
 « ſa maieſté. Car quāt à la premiere, vray
 « eſt qu'elle auoit tref-iuſte occaſion de ſe
 « courouer cōtre ſon mary qui auoit cō-
 « ſpiré avec ſes ennemis, & tué trefmal-
 « heureuſement ſon ſecretaire homme in-
 « nocent, & ſon plus fidelle conſeiller, im-
 « plorāt l'ayde de Dieu & de la iuſtice. Mais
 « quoy? ſ'eſtoit elle pas depuis reconciliee?
 « Ce mal talent a il eſté continué iuſqu'à la

mort? Ce pauvre Prince apres auoir com-
 mis cest acte inhumain par l'induction &
 menee des accusateurs, voyant qu'ils a-
 uoiēt quād & quand mis en deliberatiō
 de faire mourir sa femme, trouua moyen
 de l'accoster, & apres s'estre ietté à ge-
 noux, & demandé pardon en pleurant,
 elle cogneut bien la fourbe, & que cela
 ne venoit pas de son inuention, neant-
 moins le cognoissant ieune homme fort
 volage & haut à la main, & qui eust bien
 vengé ce forfait sur les auteurs d'iceluy
 (tāt il l'auoit en horreur apres auoir des-
 couuert le dessein de ceux qui luy auoiēt
 conseillé à ce faire) sa maiesté fut con-
 trainte de faire bonne mine, & luy tenir
 la bride courte du cōmencement, pour
 empescher les efforts de son courage ar-
 dent du desir de vengeance de Murray,
 de Morton, & de ceux qui luy auoiēt mis
 cest acte execrable en teste, à fin de le met-
 tre en discord irrecōciliable avec sa fem-
 me. N'auoient ils pas moyen de le tuer

« ailleurs qu'en sa presence, & luy tenant
 « la robe? ne sortoit il iamais de son cabi-
 « net? Quand il alloit par ville auoit il si
 « grande suite qu'on ne l'eust osé atta-
 « quer? Ne le pouuoient ils pas faire tuer
 « par le moindre de leurs valets tous les
 « iours allant par les rues? Pourquoi don-
 « ques l'ont ils fait tuer par le mary en pre-
 « sence de sa femme enceinte & sur le ter-
 « me de son accouchement? ils le sçauent
 « bien en leurs ames, & quelques vns qui
 « pour lors estoient de la partie l'ont de-
 « puis confessé, que leur intention estoit
 « de donner telle frayeur à ceste esplorée
 « princesse, qu'elle & son fruit mour-
 « roient incontinent, & puis apres mettre
 « toute la faute sur son mary, & en despe-
 « cher le monde. Ce fait il n'y eust eu plus
 « rien qui empeschast mourrayd'estre roy.
 « La Roïne n'a pas esté si destituee de iu-
 « gement qu'elle n'aye depuis descouuert
 « & biẽ remarqué tout cecy. Qui fut cause
 « qu'elle ne diminua rien de son amitié &

affection accoustumee enuers son mary, «
 qui pour sa grande ieunesse & faute d'ex- «
 perience n'eust peu preuenir vn tel stra- «
 tageme dont elle en donna tref-certain «
 tesmoinage lors qu'il fut malade à Glas- «
 co. Car ayant entendu la nouuelle, elle y «
 acourut .incontinent, & le traitta & ca- «
 ressa fort amiablement, & de là l'ayant a- «
 mené à Edimbourg changer d'air, elle le «
 visita to^r les iours, & l'assista presque ius- «
 qu'à l'heure de sa mort. Vo^r dites q̄ ceste «
 amitié estoit simulée, nous le nions: au- «
 quel doit on croire? Mar. Æmilius Scau- «
 rus ayant esté accusé d'auoir trahi la re- «
 publique Romaine au Roy Mitridates, «
 pour de l'argent, encores qu'il fut hōme «
 assez corrópu, & reconnu pour tel, toute- «
 fois pour le grade qu'il tenoit au senat, «
 & pour l'inegalité de luy & de Vari^o Sucro «
 nésis sō accusateur, il fut enuoyé absouls «
 sur la simple denegatiō du fait. Et icy les «
 subiets de tout tēps trahistres & rebelles «
 disēt q̄ les caresses q̄ faisoit leur maistresse «

« à son mari quelque temps auparauant sa
 « mort n'estoient qu'amorces & appas
 « pour l'attirer à sa fin. Elle le nie, & iure
 « le cōtraire. Leur parole est elle pl^r croya
 « ble que la sienne? tels esclaués doiuent
 « ils estre ouiz contre leur souueraine da
 « me & maistresse? Si elle eust eu enuie de
 « se deffaire de luy quel besoin estoit il d'a
 « uoir recours à vne telle violence, & qui
 « ne se pouuoit celer? Vn coup d'espee ou
 « de dague eust esté biē plustost donné, &
 « avec moindre bruit. Elle le pouuoit fai
 « re mourir par iustice, ayant les loix à sa
 « deuotion, & le subiet propre & disposé
 « à ce faire sans longue procedure, la preu
 « ue estant claire, la Roynne l'ayant veu assi
 « ster au meurtre de son plus fidelle serui
 « teur, & ayāt trouué sa dague fichee dans
 « son ventre. Car ores qu'il fust son mary,
 « si n'estoit il pas Roy, ains son vassal &
 « subiect, & sous la puissance des loix cō
 « me les autres hōmes. Mais elle craignoit
 « direz vous le scandale, & l'eust-on blas

mee de trop grande cruauté, si elle l'eust
fait mourir publicemēt, & par la main
d'un bourreau. Je le veux. Mais vous qui
arguez la Royne de cruauté, si elle eust
fait un acte de iustice, la poursuivez à fin
de la faire perir iniustement par un bour
reau estranger, si on vous vouloit croi
re. Si elle craignoit le scandale public, &
les rapports des hommes, si elle eust con
ceu le damnable dessein dont vous la
calomniez. Estoit-elle si despourueüe
d'esprit qu'elle n'eust peu trouuer moyē
à se deffaire de luy par quelque voye se
crete & incognue aux hommes? Vous
avez esté si eshontez & impudiques que
de faire publier par la voix de voz mini
stres & par libelles de vostre artifice, que
la maladie dont il estoit detenu à Glasco
ne prouenoit que de poison à luy admi
nistré de la part de sa femme, & que les
pustules & vessies colorees, qui luy enle
uerent par tout son corps en estoient les
indices. Si cela est vray comme guarit-il

« de ceste maladie sans aucun antidote?
 « Ceux qui luy donnerent ce poison n'a-
 « uoient pas enuie de le tuer, puisqu'ils le
 « luy donnerent ou si foible, & sans vertu,
 « ou en si petite quantité, qu'il eschappa de
 « soy mesme & sans aucun secours des me-
 « decins. Vous vous abusez bien fort si vous
 « pensez que sa maiesté soit si grossiere & si
 « lourde d'esprit, que se voulant seruir de
 « tels artifices pour esteindre son mary, el-
 « le n'eust sceu luy faire preparer vn breua-
 « ge de qualité & quantité telle que le cas
 « requeroit. Quel argument auez vous
 « qu'elle ait ainsi fait? Les pustules s'engé-
 « drent aux corps des hommes non seule-
 « ment par poison, mais aussi par plusieurs
 « autres accidents auxquels naturellement
 « ils sont subiets, & principalement ceux
 « de son aage. Si donques vous n'auz au-
 « tre indice de ce fait, confessez vostre ca-
 « lomnie trop ouuerte & manifeste, & non
 « moins impudente que celle qui est sem-
 « blablement diuulguee par voz libelles,

l'arguant auoir voulu empoisonner son
 fils, & d'auoir serui de maq̃relle à son ma-
 ry, parolles indignes d'estre proferees ou
 entēdues d'vne telle princesse, mais dignes
 d'auoir esté inuētees par les ministres de
 Sathan, sans aucune apparence de verité,
 sans crainte de Dieu, sans honte des hō-
 mes & contre les presomptiōs de raisō &
 de nature résistantes à leurs mēsonges, &
 la vertu de ceste dame dementant leur
 outrecuidance. Au reste c'est la Princesse
 du mōde la plus douce, gratieuse, beni-
 gne & misericordieuse, qui a esté la cause
 de tout sō malheur. Car si elle eust chastié
 les accusateurs des trahisons infinies par
 eux cōmises, fās leur pardonner tāt de fois
 & les receuoir en grace pour les faire reci-
 diuer presque to⁹ les iours, elle ne seroit
 en la peine où ell' est, d'auoir recours à la
 mercy d'autrui pour se liberer de leurs
 mains sanglātes & impitoyables. Mortō e-
 stoit le principal bourreau de son secre-
 taire & Murray l'instigateur de sa mort,

« & neantmoins sa maiesté leur a pardon-
 « né cest acte barbare & inhumain, sans s'en
 « ressentir en façon du mōde. Luy estoiet
 « ils plus chers que son mari? Son mari e-
 « stoit il plus coupable qu'eux? Pouuoit
 « elle tenir son cœur en son endroit qui se
 « stoit laissé trōper à la bōne foy, & depar-
 « tir ses graces aux trōpeurs? Auparauant
 « ce forfait vous ne pouuez nier qu'elle ne
 « l'aimast vniquement. Est-il vray-sem-
 « blable que pour cest acte seul son affe-
 « ction se fust tellement esloignee de luy,
 « que depuis elle ne l'ait peu receuoir en
 « grace, puis qu'ellé s'estoit bien reconci-
 « liee avec vous qui estiez auteurs du par-
 « ricide. & qui ne luy estiez rien au prix de
 « son mari? le Comic dit, *amantium ira amo-
 « ris redintegratio est*. Ce qu'elle demonstra
 « par argumens infallibles & necessaires,
 « ayant par edict deffendu à toutes person-
 « nes de ne mal paler de son mari, ne de le
 « mettre au rang de ceux qui auoiēt com-
 « mis vn crime si malheureux & abomina-
 ble.

ble. Et outre elle luy bailla lettres de par
 don à fin de se preualoir contre ses enne-
 mis, au cas qu'ils luy voulussent imputer
 vn tel acte apres la mort de sa maiesté.
 En pouuez vous demander plus grande
 demonstration de parfaite amitié? Le
 poëte satyric dit que rien n'est plus vin-
 dicatif qu'une femme. Elle se deuoit dō-
 ques venger de Mourray, de Morton &
 de leurs cōplices, qui estoient beaucoup
 plus coupables que son mari. Ce sexe en-
 cores qu'il soit vindicatif, si est-ce qu'il
 abhorre la cruauté. Et quant à l'accusée
 elle s'est tousiours monstree trespiteuse
 & tresdebonnaire, mesmemēt enuers ses
 ennemis capitaux, & nōmément enuers
 les accusateurs cōme vo⁹ pouuez iuger par
 leurs faits ordinaires, & tāt de fois reite-
 rez en Angleterre. Il n'ya point d'aparēce
 qu'ēvn momēt de Roine elle soit deuenüe
 tyrā; de princesse treshumaine & douce,
 soit deuenue felōne, cruelle & barbare, &
 si trestost chāgee de l'vne des deux extre-

« mitez contraires en l'autre. Au commen-
 « cemēt qu'elle paroissoit estre fort offēsee
 « de l'homicide commis en la personne de
 « son secretaire, la plus part de la noblesse
 « luy proposa le diuorce & separation d'a-
 « uec son mary, qu'elle pouuoit iustement
 « faire si elle l'eust eu tant à contre-cœur
 « que vous pretendez. Et vous Morton e-
 « stant remis en grace & restitué à voz biens
 « & hōneurs luy en auez souuentes fois fait
 « l'ouuerture, & mesmement de passer plus
 « outre si elle eust voulu. Vous sçauiez la res-
 « ponce qu'elle vous a tousiours faite que
 « son mary estoit encores ieune & peu expe-
 « rimenté par faute d'aage, qu'il estoit aisé
 « à reduire au chemin de vertu, que de son
 « naturel il estoit bon & bien complexion-
 « né, & que sa desbauche ne venoit que du
 « mauuais conseil de ceux, qui ne luy e-
 « stoient pas amis, ne pareillement à sa ma-
 « iesté. Vous voyez donques la sincere a-
 « mitie de ceste dame enuers son mary, &
 « par consequent la presumption du mal

talent destruite, qui est le fondement sur «
 lequel les accusateurs ont basti leurs ca- «
 lomnies. Quand au second & troisieme «
 articles de leur accusation, concernant «
 le mespris de la foy coniugalle, qu'ils pen- «
 sent verifier par lettresmissiues, qu'ils di- «
 sent auoir esté par elle escrites au comte «
 de Bodvvel, c'est vne sanglâte calomnie, «
 & pure mensonge par eux faucement & „
 malitieusement excogitee pour donner «
 lustre à la conclusion que delà ils pen- «
 sent inferer du pretendu paricide. Car il «
 est à presumer qu'une femme adultere «
 ne fait non plus de conscience de prosti- «
 tuer & exposer la vie de s^{on} mary à la mer- «
 ci des ruffiës, qu'elle fait de prostituer s^{on} «
 propre corps à leur indiscrete & effrence «
 concupiscence. Ils alleguent quelques «
 faits particuliers si bien fardez & desgui- «
 sez, si bien confrontez & bornez par te- «
 nans & aboutissans, si bien descrits & de- «
 signez par les noms & furnoms des per- «
 sonnes, par les circonstances des lieux, «

„ du temps, des choses, & de leurs fins &
 „ euenemens. que les plus sages & aduisez
 „ en pourroient estre deceus & abusez. Nous
 „ en faisons formelle denegatiõ, & sa maiesté
 „ appelle Dieu & ses Anges à tescmoin, que
 „ ce sont choses fauces & inuentees à plaisir
 „ & dont les acufateurs ne pourrõnt onques
 „ rien verifier. Car quãd aux lettres par eux
 „ produites, desquelles ils se seruent cõme
 „ ayãs ceste seule preuue de tous les points
 „ de leur accusation, sa maiesté proteste &
 „ iure solennellement en foy de Princeesse
 „ & par la redemption de son ame, qu'elle
 „ ne les a iamais escrites, & qu'elles ont esté
 „ supposées par ses ennemis, & extorques
 „ de quelqu'un qui pẽsoit cõtre faire sa main
 „ Ce n'est pas la premiere fois qu'ils ont usé
 „ de ceste maniere de faire, Mourray icy
 „ present en sçauroit biẽ que dire, s'il vou-
 „ loit cõfesser la verité, laquelle toutes fois
 „ est si bien cogneue, & a esté tellement au-
 „ uerree, qu'il ne la peut nier. Lorsque le ieu-
 „ ne cõte de Hontley estoit prisonnier à Dõ-
 „ bar, Mourray despecha hõme par deuers

le Seig. de Craigulair capitaine du cha-
 steau avec lettres contrefaites de la main
 de sa maiesté, par lesquelles luy estoit en-
 joint qu'incōtinēt les presētes receues, &
 sans aucun delay il feist mourir ledit com-
 te. Le capitaine hōme courtois & grati-
 eux, & meu de pitié de ce pauvre ieune
 seigneur, luy monstre les lettres, & préd
 auis euec luy de differer l'execution ius-
 ques à ce qu'il eut entendu la volōté de sa
 maiesté par sa propre bouche, & pour ce
 faire, d'aller en toute diligēce en cour di-
 stāte; seulemēt de dix lieues francoises du
 lieu où il se toiet, & entre autres choses lui
 faire souuenir de la promesse qu'elle luy
 auoit faite qu'il n'auroit point de mal, &
 de laquelle il s'estoit tousiours fort asseu-
 ré. Ce cōseil est tout aussi tost executé. Car
 le capitaine esbahy de tel cōmādemēt, &
 biē se resouenāt de ceste promesse faite
 en sa presēce, & de fresche memoire mōte
 à cheual, & arriue cōme sa maiesté se cou-
 choit, & q̄ les portes estoiet de sia fermees.

Il importune fort les gardes, qui luy re-
fusoient l'entree iusques à ce que sa ma-
iesté l'eust commandé. S'estant présenté
deuant elle, il luy declare qu'il auoit ex-
cuté le contenu de ses lettres, & que son
cousin le comte de Hontley estoit mort.
Quoy entendu elle se print aux cheueux.
detestant & maudissant la desloyauté de
ceux qui auoient esté les auteurs d'un
tel acte. Alors le capitaine resiouy, re-
mercia Dieu de ce qu'il n'auoit creu à ses
lettres, lesquelles il luy monstra si biē fal-
sifiées que sa maiesté les pēsoit auoir ef-
crites, & y auoir apposé son nom, com-
bien qu'en sa vie elle n'eust onques pen-
sé au contenu d'icelles. Mais en fin elle
trouua que c'estoit son frere bastard, qui
les auoit enuoyées & qui auoit dressé ce
mesnage, pour oster ce comte de son che-
min, qui pouuoit grandement empes-
cher ses desseins de paruenir à la cou-
ronne, & quant & quant venger la
mort de son père, par luy sous le nom a-

commodé de la Royne traistreusement
 occis & meurtri apres la bataille, & apres
 qu'il se fut rendu à luy pour estre con-
 duit & mené à sa maiesté à fin de se pur-
 ger de ce dont on l'accusoit, & luy mon-
 strer son innocence. Et à fin que vous ne
 pensiez, messieurs, que ce soient bourdes
 que nous vous donnons en payement,
 tenez, & regardez, ie vous prie, voila les
 lettres. Et en ce disant leur mirent les
 dites lettres entre les mains, & quelques
 autres de mesme estoife, contrefaites par
 Mourray & ses cōplices, dont ils se trou-
 uerent bien confus & ne sceurent que re-
 pliquer. On fait assez que la lettre de Ma-
 rie de Bethune, l'une des dames d'hon-
 neur de sa maiesté, ressemble si fort à cel-
 le de sa maistresse, qu'il n'est pas possible
 de discerner la main de l'une d'avec celle
 del'autre. Aussi avez vous aujourd'huy
 plusieurs personnes en ce royaume, dōt
 vous en cognoissez bien quelques vns,
 qui sçauent si naifusement imiter la main

“ d'autrui que vous me scognoistriez vostre
 “ escriture, & approuveriez pour vostre cel
 “ le qui auroit par eux esté falsifiée. Nous di
 “ sons d'ôques que la Roynne n'a onques es
 “ crit ces lettres, & ores qu'elle les eust es
 “ crites, elles ne pourroient faire aucune
 “ foy, ny estre receues en iugemēt. Car el
 “ les sont *sine die & Consule*, comme on
 “ dit, & ne sçauons en quel temps elles ont
 “ esté escrites, ny par qui, n'estats ne soubs
 “ crites du nom de personne quelqu'ôque,
 “ & n'estant ny signees ny sceellees, ny l'es
 “ cripture recogneue, & neantmoins la
 “ dessus vous voulez que sa maiesté soit co
 “ damnee d'un crime si enorme. De là vous
 “ voulez inferer vn argument necessaire
 “ non seulement de son impudicité, mais
 “ aussi de la haine & inimitié mortelle de
 “ son mary. On ne procede pas ainsi con
 “ tre le plus abiet de ses subiets. On luy
 “ garde la forme prescrite par les loix, on
 “ luy garde l'ordre de la iustice: on ne le
 “ precipite pas sans preuue concluante &

valable pour asseoir iugement. Vous di-
tes que ces lettres s'adressent à Bodvvel,
nous le nions. Vous dites qu'elles ont esté
trouuees dans vn petit coffre d'argent
appartenant à la Royne, nous disons
(si cela est ainsi) que vous les y auez mises:
Car messire Iaques Balfoue capitaine du
chasteau d'Edimbourg gardiẽ & depositai
re dudit coffre, ayant derobbé les ioyaux
qui estoient appartenãs de sa maiesté, se re-
dit de vostre costé, & trahit le chasteau en
trevoz mains à beaux deniers cõptãs. Il est
hõme biẽ meslé en beaucoup de choses, &
nullement ignorat des lãgues latine & frã-
çoise. No^r ne voulons pas affirmer q[']c'est
luy qui aye forgé les lettres & vers Frãcois
qui se sõt trouuez dans ce coffre, ains seu-
lement qu'il est hõme assez accort & rusé
pour ce faire, quãd il l'auroit mis en sa fã-
taisie. Soit lui, soit autre, qui les ait escrites
& mises au coffre, ce no^r est tout vn, puisqu'
il estoit en vostre puissãce d'y mettre ce q[']
bõvo^r a sèblé. Tãt y a q['] no^r deniõs que ce

“ soit sa maiesté ne personne de sa cognoif
 “ sance, ou qui se puisse aduouër d'elle. A
 “ qui ferez vous croire, qu'une princesse
 “ tresprudente & tresaduisée se soit tant
 “ oubliee que d'escrire telles lettres de sa
 “ main, pour seruir de memoire & argu-
 “ ment infallible de sa turpitude? Est-il
 “ possible qu'elle ait esté si negligente de
 “ sa bonne renommee, ou qu'elle ait eu
 “ si peu d'esgard à son sexe, qu'elle ait en-
 “ uoyé telles lettres à Bodvvel tout ouuer
 “ tes, pour estre veuës & leuës de tout le
 “ monde, à tout le moins par celuy qui les
 “ portoit? Mais à propos, qui a esté le por-
 “ teur? L'homme que vous voyez en la Lu-
 “ ne. Bodvvel estoit-il tant esloigné de la
 “ cour qu'il fust besoin de luy escrire cho-
 “ ses tant secretes par lettres ouuertes &
 “ nullement cachetees? Bodvvel estoit-il
 “ tant stupide & froid en amour, qu'il ait
 “ esté besoin à une Roine la plus belle de
 “ la terre de l'attirer par vers, & le char-
 “ mer par la vertu de poésie? Mais quel est

le subiet de ces lettres? il n'y a mētion au-
 cune de meurtrir, de tuer ou d'vser d'au-
 cune espee de cruaute. Quel subiect ont-
 elles dōques? des folles amours. Bodvvel
 estoit homme trop adonné à telles cho-
 ses chacun le sçait, & n'estoit ia besoin de
 se seruir de telles niaiseres pour l'eschauf-
 fer. Il ne bougeoit de la cour, & eust esté
 chose vaine, & superflue de luy escrire
 chose qu'on luy pouuoit bien commu-
 niquer de bouche, sans publier son secret
 par lettres pour seruir à la posterité de
 perpetuelle note de sa sottise & vilēie.
 Et en tout cas à quelle fin les a-il gardees
 en ce coffret, puisque par icelles il luy est
 expressement commandé de les brusler?
 Sçauoit il pas bien que ce coffret passoit
 par les mains de beaucoup de gēs & que
 facilement il se pouuoit perdre? Sçauoit
 il pas biē que ces lettres eussent peu cau-
 ser sa mort, soit qu'elles fussent tombees
 entre les mains de la Royne, ayant con-
 treuenu au commandement par elle fait

« de les brusler, soit qu'elles fussēt tōbees
 « entre les mains de ses ennemis qui n'eus-
 « sent peu souhaitter vn meilleur subiect
 « pour le trauailler? Il n'estoit despourueu
 « d'esprit, qu'il ne preuoyast bien tels in-
 « conueniens. Si donques la garde de tel-
 « les lettres luy estoit dangereuse & ne luy
 « pouuoit apporter aucun profit ou con-
 « tentement, il n'est pas à presumer qu'il
 « les ait mises en ce coffret: & encore qu'il
 « les y eust mises, si est-ce qu'elles ne luy
 « ont pas esté enuoyees de la part de la
 « Roine, ains de la part de quelque dame de
 « plus ancienne cognoissance. Recours à la
 « lecture, la honte & la modestie m'empes-
 « chent de passer plus outre pour respon-
 « dre aux faits que noz aduersaires bastif-
 « sent sur coniectures tirees de ces lettres
 « dont les ordures & salletez sont plus grā-
 « des qu'elles ne furent onques de Messa-
 « line, ny de la femme de Marc Aurelle.
 « Mais telles coniectures sont si froides,
 « que ie m'estōne comme l'inuenteur d'i-

celles se soit osé si loin fouruoyer de rai-
 son, attēdu la reputation de son sçauoir
 que ceux de sa secte ont publiee partout
 l'Europe, luy donnans le tiltre du prince
 des poètes, comme il est veritablement,
 si ce mot de poème se prend pour fable
 & le mot de poete pour celuy qui feint
 des choses qui ne sont pas. Mais ayāt de
 meurē toute sa vie entre personnes im-
 pudiques és bordeaux, estant desle com-
 mencement de son aage hereticque ou
 plustost Epicuriē, atheiste, & n'ayant pra-
 ticqué que bien peu de temps parmy la
 licence honnestē qui est és maisons des
 Princesses, quoy que bien reglees, & où
 la grandeur efface les soupçons, & la ver-
 tu amolit les folles cōcupiscēces, ie m'e-
 stonnerois bien plus fort s'il en parloit
 autrement & s'il ne mettoit en terme de
 vilennie, & soupçon de salletē ce qui par-
 fois est bien seant aux grandes dames,
 & s'il ne mesuroit leurs affections aux

„ façons de faire de celles qu'il a toute sa vie
 „ trop fréquentées, mettant en mesme rang
 „ les Roynes & princesses avec ses Alises,
 „ Leonores, & semblables filles de ioye du
 „ temps passé, ses compagnons n'ont laissé
 „ dame d'honneur sans la blasonner d'impu-
 „ dicité, bastisans contre toutes celles de
 „ nostre religion des soupçons à leur aise,
 „ & les condannans honteusement cōme
 „ quelques garces publiques. S'il eust sceu
 „ surquoy fōder les preuues du crime qu'il
 „ reiette sur ceste dame, il n'eut eu recours
 „ à ie ne sçay quelles folles amours pour
 „ en tirer despresomptions si mal à propos
 „ & faire ainsi dementir deuant tout le mō
 „ de par la chasteté, vertu, & pudicité d'une
 „ si grande princesse, biē cogneue en Frā-
 „ ce par tous les grands, & qui n'a iamais
 „ esté fugilee en Escosse, sinon par luy & par
 „ ses compagnons icy presents, trahistres,
 „ desloyaux, & ennemis plus que capitaux
 „ de leur maistresse. Au quatriesme article
 „ de leur accusation ils mettent en auant

le peu de compte qu'elle a fait de son ma-
 ry apres sa mort, tant pour le regard de
 son deuil, que pour le regard de son en-
 terremēt. O que c'est vne chose aisée de ca-
 lomnier, & principalemēt ceux qui excel-
 lēt en quelque chose, soit en vertu, soit en
 honneurs, soit en richesses. *In maxima for-*
tuna minima licentia est, dit Salust. Car ils
 ne peuuēt faire chose si dextrement, que
 leurs ennemis ne trouuent à redire par
 sinistre interpretatiō. Le corps de ce Prin-
 ce, apres que sa maiesté l'eust regardé a-
 uec pleurs & par grande commiseration,
 fut par son commandement ciré, enbau-
 mé, & porté en terre par My-lord iustice
 clerc, par Mi-lod de traquaire, & par ceux
 de la noblesse qui estoient pour lors en
 cour, dans la sepulture des Roys, & où
 laques cinquiesme pere de sa maiesté a-
 uoit esté inhumé. Le pouuoit elle enter-
 rer en lieu plus hōnorable? Si les ceremo-
 nies de la sepulture n'ont pas esté telles
 qu'il appartenoit, à qui en doit on impu-

„ ter la faute? la religion de sa maieſté n'a-
 „ uoit point de lieu, qui deſiroit grâdemēt
 „ qu'on feit les ceremonies accouſtumees
 „ aux enterrements des Roys ſes predeceſ-
 „ ſeurs, mais elle ne trouua perſonne pour
 „ executer ſa volonté. Ceux du conſeile-
 „ ſtoient de la religion des rebelles, qui en-
 „ terrent leurs morts comme beſtes ſans
 „ aucune ceremonie. Quand au deuil, ſerē
 „ ferma elle pas? fut elle pas aſſez long
 „ temps ſans voir le iour? Qu'elle aſſeuran-
 „ ce auoit elle de ſa vie, ſi elle euſt demeu-
 „ ré en vn lieu tout le tēps qu'elle deſiroit?
 „ ſi elle n'eufſt chāgé de logis par fois pour
 „ obuier à voz remuements? Elle ſçauoit
 „ bien que vous auiez tué ſon mary, & que
 „ vous ne vo^r cōtēteriez pas de ce forfait
 „ ſans paracheuer ce qui reſtoit. Elle crai-
 „ gnoit voz deſſeins, & non ſans cauſe, les
 „ effets de voſtre bonne volonté depuis
 „ enſuyuis donnans preuue trop certaine
 „ qu'elle vous deuoit re douter, & ne faire
 „ trop long ſejour en vn lieu, ains remuer
 ſouuent, &

souuēt! & le plus à vostre desceu qu'elle «
 a peu. Vous vous mocquiez d'elle quand «
 elle estoit renfermee à la chandelle, habil «
 lee de noir (car c'est chose cōtraire à vostre «
 religion) & maintenant vous l'accusez «
 de ne l'auoir esté assez long temps, & de «
 là prenez argument qu'elle a tué son ma «
 ry. Voz femmes font elles tel dueil apres «
 le deces de leurs maris qu'elle a fait du „
 sien? Voz meres l'ont elles fait de voz pe- «
 res? vous sçauiez bien que non. Et ores «
 qu'elle n'eust rié fait du tout, ce n'est pas «
 chose tant à blasmer en Escosse, où telle «
 façon de faire est toute nouuelle & ina- «
 coustumee. Et ne pouuez nommer Roi- «
 ne d'Escosse qui aye fait à la mode que «
 vous dites, sinon qu'à sa discretion & vo- «
 lonté. Il ne fault pas mesurer ceste Roine «
 au pied des autres, qui n'estoiēt pl^r rien a «
 pres la mort de leurs maris que douarie- «
 res. Ceste cy ne tenoit rien de son mary, «
 qui au contraire n'auoit rien sinon cē „
 qu'il tenoit d'elle. Pour conclusiō de cest „

“ article, si en s^o ame elle se fust iugée cou-
 “ pable de la mort de son mari, elle auoit
 “ l’entendement assez bon pour deguiser
 “ sa faulte par des funerailles exquisés &
 “ magnifiques, avec escriemens & braye-
 “ mens, & toutes autres inuétions & singu-
 “ laritez qu’il eust esté possible d’excogi-
 “ ter, & comme ont accoustumé de faire
 “ ceux qui veulēt obscurcir & celer vn tel
 “ forfait. Ceste obiectiō ne meritoit point
 “ de responce, tant elle est friuole. Venons
 “ donc à la cinquiesme, qui est la plus poi-
 “ gnāte de toutes, & laquelle seule semble
 “ estre de si grād poids, que la presomptiō
 “ naissante d’icelle doit emporter sentēce
 “ diffinitive de ceste controuerse: Car ces
 “ mots, Elle a espousé le meurtrier de son
 “ mari, simplement prononcez, donnent
 “ vne si violēte impressiō au cœur de ceux
 “ qui les entendent, n’estans autrement
 “ instruits de cest affaire, & comme les cho-
 “ ses se sont passées, qu’ils ne laissent au-
 “ cun scrupule ou doute, qu’elle n’ait esté

consentante au meurtre. Mais quand le “
 fait sera deduit avec ses circonstances, “
 comme il est aduenü, les calomniateurs “
 qui luy imposent ce crime, n'oseront le- “
 uer le visage deuät ceste cōpagnie, enco- “
 res qu'ils l'ayēt d'acier, qui ne peut rou- “
 gir, tant ils sont effrontez, & tant asseu- “
 rez & conficts en leur impudence. Si les “
 premiers propos de ce mariage eussent “
 esté entamez par sa maiesté, s'il eust esté “
 faict & accordé de son propre mouue- “
 ment, & executé de sa seule volōté, sans “
 estre à ce poussee par autruy, on pour- “
 roit auoir iuste occasion de mal soupçon- “
 ner. Mais si ceux qui le blasment aujour- “
 d'huy en ont esté les auteurs, s'ils ont for- “
 cé la volonté de sa maiesté, d'y condescen- “
 dre, si par viues raisons ils l'ont induicte “
 si par menaces ils l'ont cōtraincte à ce fai- “
 re, comment la peuuent ils aujourd'huy “
 lapider d'un œuure prouenant de leur ar- “
 tifice? Comment la peuuēt ils condāner “
 d'une faute dont ils sont les architectes? “

« Il me semble que ie voy encores deuant
 « mes yeux les vieillards qui accuserēt Su-
 « fanne & la femme de Phutiphar qui met-
 « Ioseph en peine pour vn crime dont il e-
 « stoit innocent & elle coupable. Auez vo-
 « us doncques entendu vn tel scoganisme? Les
 « Anglois entendent ce mot. Tenez, lisez,
 « voila les lettres de Murray s'en allant en
 « France. Et vous messieurs les accusateurs
 « reconnoissez vostre escriture, reconnoi-
 « sez le seing de voz mains. Et en ce disant,
 « ils produirent des lettres de Murray, &
 « de quelques autres de ses complices, par
 « lesquelles non seulement ils luy conseil-
 « loient de prendre le comte de Bodvvel
 « en mari, mais aussi la menaçoient de plu-
 « sieurs grans inconueniens, si elle le refu-
 « soit. Ils produirent aussi vn proiect de ce
 « mariage signé des accusateurs, & de la
 « pluspart de la noblesse, & mis entre les
 « mains de Bodvvel à fin de monstrier à sa
 « maiesté leur resolution, & que force
 « luy estoit de passer par là, si elle ne vou-

loit pis endurer, & en monſtrant ce con-
 tract ils continuoient leur propos, diſant:
 Vous ne pouuez denier que vous n'ayez
 ſouſcrit ces lettres, vous ne pouuez meſ-
 cognoiſtre voz ſeings appoſez à ce con-
 tract. Nous ſouhaitterôs qu'il vo^s pleuſt
 auſſi bien recognoiſtre & confeſſer les
 belles louanges de Bodvvel, que vous
 châtiez to^s les iours à ſa maieſté, les fray-
 eurs & intimidations que vous luy don-
 niez, ſi elle ne l'eſpouſoit. Elle l'auoit mis
 entre voz mains, à fin de faire iuſtice: vo^s
 l'avez declaré innocent du crime, & l'a-
 vez exempté du ſupplice qui luy eſtoit
 iuſtemēt deu, en donnant dix mille bour-
 des en payement à ſa maieſté, pour l'at-
 tirer à ce deſhonneur, & la contraindre
 d'accepter ce party ſi peu ſortable à ſa
 grandeur. Qu'il vous ſouuienne de voz
 beaux ſermens avec proteſtation de per-
 petuelle fidelité, ſ'il luy plaiſoit auoir
 agreable celui que vous luy nommiez
 pour luy ſeruir de bonne & loyalle com-

« pagnie, pour l'assister en toutes ses af-
 « faires, pour la consoler en ses fascheries,
 « & pour la deffendre contre les assauts
 « de tous ses ennemis. Et quant à vous
 « Euesque indigne des Orcades, n'avez
 « vous point de honte de vous monstrier
 « en cestecompanie? N'est-ce pas vous
 « qui avez fait ce mariage en face de sain-
 « cte Eglise? N'est-ce pas vous qui les avez
 « conioincts? N'est-ce pas vous qui avez
 « donné la benedictiō nuptiale? Qui vous
 « a onques forcé de ce faire? Pourquoi ne
 « leur remonstriez vous que ceste copula-
 « tion estoit iniuste? Ne pensiez vous pas
 « encourir crime de leze maiesté, d'avoir
 « celé à vostre maistresse, que celuy qu'elle
 « espousoit estoit le meurtrier de son def-
 « funct mari? leur deuiez vous administrer
 « ce sacremēt ayant vostre consciēce char-
 « gee de ce forfait? Le deuoir episcopal &
 « le rāg que vous teniez en l'Eglise de Dieu
 « vous commandoit de les repousser. Sa
 « maiesté a tousiours esté obeissante fille

de l'Eglise, & n'eust esté si outrecuïdee
 que de résister aux césures d'icelle, quand
 vous eussiez voulu vser tant soit peu de
 vostre auctorité, & luy remontrer le vi-
 ce de ce mariage. Vous deuiez lors faire
 ce que vous faictes auicourd'huy. Vous
 eussiez sauué l'honneur de vostre maïstres-
 se, & la vie de plusieurs gētilshōmes, qui
 par le moyē de vostre filēce sont morts
 pour ceste querelle. Rougissez, si vo' pou-
 uez, rougissez enfans de mēsonge, en ac-
 cusant le fait dōt vous estes les auteurs.
 La plus cōstante femme du monde ayāt
 passé par les destroits de la fortune qu'a
 couruē ceste dame, & ayant à faire à
 gens de vostre humeur, n'eust osé pren-
 dre autre resolution, que celle qui a
 esté par elle prise malgré son intention
 & enuie. Et neantmoins elle iure &
 proteste bien solennellement, qu'elle se
 fust plustost laissée mourir de dix mil-
 le morts, s'il eust esté possible, que
 de condescendre à ce mariage, si elle

« eust eu la moindre opinion du monde,
 « que Bodvvel eust esté participât du meur-
 « tre proditoirement commis en la per-
 « sonne de son mary. Mais ses rebelles qui
 « maintenant l'accusent, luy ont tousiours
 « persuadé le contraire, iusques à ce qu'elle
 « se fust rendue entre leurs mains à Carbe-
 « ryhile, ou ils luy commencerent changer
 « de langage, & donner à cognoistre leur
 « felōnie, en accusât celuy qu'ils luy auoiēt
 « tant recommandé. On void bien main-
 « tenant à quoy tendoiēt tant de louāges:
 « on void quel estoit le but & la fin de tāt de
 « menaces. Ce n'estoit l'amitié de Bodvvel,
 « ce n'estoit le bien du royaume, comme
 « ils feignoient, ains le scandale & le des-
 « honneur de sa maiesté, pour seruir à l'ad-
 « uancement de leur cause, & pour leur
 « ouurir le chemin à l'vsurpation de l'estat,
 « en despouillant, comme vous voyez, cel-
 « le par force, à qui le droit de nature l'a-
 « uoit acquis. Les loix veulent qu'elle soit
 « reintegree, & que iusques à ce toute actiō

soit desniee à ceux qui l'ont iniustement
 & avec force publique brigandee & vol-
 lée. Mais il reste encores vn point qu'il ne
 faut pas passer sous silence, sçauoir est, les
 auditions & confessions faites en la tor-
 ture par deux ou trois des seruiteurs de
 Bodvvel, qui furent condânez à mourir,
 pour auoir esté participans du paricide.
 Dieu sçait qu'elle torture. Celle des bro-
 dequins (qu'ils appellent le bottes) reliez
 avec cercle de fer en lieu de cordes, des-
 quelles nous nous seruons en France, és
 endroits où la iustice est la plus seuerre, &
 la questiō & gehenne la plus rigoureuse.
 Quand quelqu'un y a passé, il est estropié,
 & s'en resent toute sa vie. Si la question e-
 stoit rude, ceux qui l'appliquoient ne l'e-
 stoient pas moins. Les ennemis de sa ma-
 iesté, qui y assistoient, qui y cōmādoient,
 qui y estoient iuges & parties, faisoient
 les interrogatoires, & suggeroiēt les res-
 pōces & confessions telles, qu'il leur plai-
 soit & faisoient rediger par escrit ce qui

« leur sembloit toucher l'honneur de leur
 « maistresse. Au proces verbal de ceste que
 « stion vous ne voyez vn seul mot de Mor-
 « ton, ne de son cousin maistre Archibald
 « Donglas, & neantmoins ils furent tous
 « deux chargez, l'vn pour auoir signé la cõ-
 « spiration de ce paricide (ce qui a esté de-
 « puis bien auéré par sa mort en face de iu-
 « stice) l'autre pour auoir esté en personne
 « à l'execution d'icelle. Mais ce n'estoient
 « pas ceux là qu'ils cherchoient, ils n'en
 « vouloient qu'à la Royne, laquelle ils nõ-
 « moient en chasque interrogatoire en
 « suggerant le crime aux patiens. En fin
 « qu'ont ils dict à son preiudice? En quoy
 « l'ont ils chargee? Voyons ie vous prie, &
 « examinons l'article de vostre proces ver-
 « bal, duquel vous faictes banniere en
 « tous voz libelles, & lequel vous auez
 « seul pour toute preuue. Vous l'auiez infé-
 « ré en la confession de Jean Hebron en ces
 « mots: Que personne ne face mal à la per-
 « suasion des grands, en estimant que

ceux là le sauueront . Car ie pensoye
pour certain la mesme nuit que le faict
fut executé, que cōbiē qu'il fust paruenu
à la cognoissance de chacun, neantmoins
que nul n'eust esté si hardy de dire que
c'estoit mal faict, voyant la souscription
des mains de tant de personnes, & co-
gnoissant en cecy l'intention de la Roy-
ne. Voyla tout ce que vous auez peu ex-
torquer de ces pauvres miserables con-
tre vostre maistresse: voyla tout ce que
vous auez peu fabricquer avec tant de
coups de marteau, vous contentans de-
quoy l'un d'eux eust proferé ce mot
de Royne. Mais, ie vous prie, auoit il
parlé à la Royne? luy auoit elle déclaré sō
intention? Elle n'eust pas esté si sottē, &
ne le pouuez dire. Comment l'a il donc
sceu? par le rapport de Bodvvelson mai-
stre. Cela se peut bien faire, que Bodvvēl
luy ayt donné à entendre que l'intētiō de
sa maiesté estoit telle encores qu'elle ne

« l'eust onques mis en sa fâtaisie. Car il fal-
 « loit bien se seruir de son nom pour exe-
 « cuter vne si haute entreprise. Mais il est
 « tout certain, que Bodvvel a tousiours
 « deschargé sa maiesté de ce crime, mesme-
 « mét en l'article de la mort a iuré & prote-
 « sté son innocence, qu'elle n'auoit iamais
 « ouy parler de la conspiration, ains que
 « les accusateurs icy presens en estoient les
 « auteurs, principaux entremetteurs &
 « negotiateurs, qui luy mirent en teste ce
 « malheureux & abhominable dessein, &
 « qui l'ont soubscrit & signé de leur mains
 « sans qu'auparauant il y eut onques pen-
 « sé. Aussi n'auoient ils garde d'exami-
 « ner cest Hebron, sur les soubscriptions
 « mentionnees en sa confession, sachás bié
 « que c'estoient eux mesmes & leurs cōpa-
 « gnons desquels ils parloiét cōme faisoiet
 « pareillement Talla, Daglis, & Paris estât
 « entre les mains du bourreau prest à rēdre
 « la vie. Car tous vnanimement deschar-
 « gerent la Royne, reietans toute la cause

du crime & de l'execution d'iceluy sur "
 ceux qui faisoient semblant d'en poursui- "
 ure la vengeance. Ce n'est pas chose nou- "
 uelle & inouye en Escosse, que ceux qui "
 ont commis quelque grande trahison en "
 demandent la punition, comme ont fait "
 noz accusateurs, qui se sentas coupables "
 de ce paricide, ont fait mourir trois ou "
 quatre personnes innocentes, & nulle- "
 ment attaintes où conuaincues d'iceluy, "
 pour dire qu'ils ont fait iustice, & avec "
 eux trois ou quatre valets de Bodvvel, "
 pauvres gens, sans appuy, sans moyen, "
 & sans parens pour venger leur mort, "
 & ausquels neantmoins ils promettoient "
 grace moyennant qu'ils chargeassent la Roi- "
 ne. D'où vient qu'ils ne se sont attaquez à "
 messire Jacques Balfour, qu'ils voyoient "
 chargé pour la deposition de ceux qu'ils "
 firent executer? Il eust descouvert le pot "
 aux roses. Il scauoit tout le secret, & auoit "
 les seings de Murray, de Morton, & de "
 leurs complices par deuers luy, come il a "

„ depuis fait paroistre quelques annees a-
 „ pres au Roy & à son conseil estant entré
 „ en different avec ledit Morton . Quelle
 „ instance ont ils fait contre maistre Archi-
 „ bald Donglas, qui estoit l'un des meur-
 „ triers de ce defaistré prince ? Telles gés a-
 „ uoient bec & dents pour se deffendre, &
 „ ores qu'on les eust fait depescher à la
 „ chaude, ils auoient des parens qui par a-
 „ pres s'en fussent ressentis. Vo⁹ voyez d'oc-
 „ messieurs, l'apparence qu'il y a aux pre-
 „ somptions sur lesquelles ils fondent leur
 „ accusation, mais si vous plaisoit confi-
 „ derer les présomptions contraires, & qui
 „ seruent à la descharge de sa maiesté, vous
 „ trouuerez les calomniateurs si embaras-
 „ sez en affaire, que iamais ils n'en pour-
 „ ront sortir. Car pour la premiere ie vous
 „ demanderois volontiers à qui ferez vous
 „ iamais croire qu'elle se fust rendue si fra-
 „ chement, & sans contrainte ou necessité
 „ entre les mains de ses ennemis à Carbe-
 „ ryhiel, si sa conscience l'eust condamnée

de ce parricide? Pour la secōde, quel pro-
fit pouuoit elle tirer d'une telle cruauté?
Son mary n'estoit il pas plus ieune, plus
beau, & pl⁹ agreable que Bodvvel? Si elle
eust esté si lubrique & adonnee à ses
plaisirs, que ses ennemis disent, la vie de
son mary luy eust plus serui pour l'effect
de ses desirs, que non pas sa mort. Car ou-
tre la iouissance de sa personne, belle au-
possible dispose & gaillarde, ell' eust eu la
frequentation de Bodvvel à souhait, le-
quel luy eust mieux vallu auoir pour a-
my, que pour mary, & qui se fust esti-
métrop heureux de seruir vne telle da-
me: & quand elle l'eust ainsi voulu, per-
sonne ne l'eust peu empescher, ayant
l'entendement assez bon pour euitier le
suspçon, & à prendre ses esbats sans
scandale. Puis doncques qu'ils ne peu-
uent alleguer autre raison que ceste cy
par laquelle ils la peuuent arguer & taxer
de ce crime tant horrible & tant effroya-

" ble ils, se doiuent maintenant conten-
 " ter des raisons plus peremptoires que
 " elle auoit de le conseruer. Tiercement
 " l'inimitié mortelle que Murray & ses
 " adherans portoiēt à ce prince tousiours
 " depuis son mariage & la crainte qu'ils a-
 " uoient qu'iceluy Murray fust massacrē
 " par luy s'il ne l'eust preuenu. Car se despi-
 " tant en soy mesme de quoy il auoit esté
 " si vilainement abusé par leur conseil, &
 " induit au meurtre du pauvre screttaire,
 " par leurs calomnies & mensonges exqui-
 " ses, il se delibera de venger ceste mort sur
 " Murray, & sur les auteurs & instiga-
 " teurs d'icelle. Pour la quatrieme l'ambi-
 " tiō insatiable de murray, dōt appert eui-
 " demment par la substitution de la cou-
 " ronne qu'il auoit requise & adiudicatiō
 " d'icelle à sa maison, & au furnom des
 " Stuarts: par les empeschemens qu'il a
 " tousiours dōnez aux mariages qui se pre-
 " sentoient à sa maiesté par les embusches
 " qu'il a dressez à son mary & à son pere
 pour

pour les tuer: par les causes de differend „
 & de diuorce par luy semees entre les „
 deux conioincts: brief, par l'vsurpation „
 du gouuernement que nous voyons au- „
 iourd'huy entre ses mains. Pour la cin- „
 quiesme les propos de Mourray le iour „
 precedent le meurtre, & son absentemēt „
 de la cour à fin de s'exempter de soup- „
 çon. Pour la sixiesme, le contract de ma- „
 riage de Bodvvel par eux signé. Et pour „
 la septiesme, l'instrument de la conspira- „
 tion souscrit par eux, & sellé de leurs ar- „
 mes, contenant la promesse faicte à ce- „
 luy qui tueroit le Roy, de le defendre & „
 maintenir contre tous qui en voudroiet „
 faire instance, à quoy s'accordent les de- „
 positions & tesmoignage de Iean He- „
 bron, Paris, Daglis, & autres faicts à l'ar- „
 ticle de la mort en toute affluēce du peu- „
 ple. Au contraire ne s'est onques trouué „
 vn seul tesmoing qui aye chargé la ma- „
 iesté de ce crime. Aces presomptions, qui „
 sont beaucoup plus violentes que celles „

Q

“ de nos parties, no^r adiousterōs l’absolu-
 “ tiō de Bodvvel par eux faicte, leur insigne
 “ malice qui en lieu d’aduerter sa maieſté q^{ue}
 “ Bodvvel eſtoit le maſſacreur de ſon ma-
 “ ri, luy preſchoiēt à toute heure ſes louā-
 “ ges, par le moyen deſquelles & de leurs
 “ menaces & intimidations, ils la contrai-
 “ gnirent de l’eſpouſer : qui eſtoit le ſeul
 “ but où ils tendoient, à fin d’auoir quelque
 “ raiſon apparente pour empieter l’eſtat
 “ en la depoſſedāt de la courōne. Et quād
 “ toutes autres preſomptions & coniectu-
 “ res ceſſeroient l’inſtante poursuite qu’ils
 “ en font demōſtre aſſez le grand intereſt
 “ qu’ils y ont, quelle eſt leur intention, &
 “ que ce n’eſt aucun zele de iuſtice qui les
 “ mene. Quand ie conſidere ceſte façon
 “ de faire il me ſemble que ie voy Landry,
 “ Maire du Palais courir ſus aux meurtriers
 “ de Chilperic premier de ce nom Roy de
 “ France, auſquels luy meſme à la ſuaſion
 “ de Fredegonde auoit commandé le par-
 “ ricide. Voz hiſtoires d’Angleterre font

métion d'un semblable acte de Vortiger
 duquel vous pouuez estre bien memora-
 tifs. Ce Vortiger estoit iadis gouuerneur
 de ce royaume sous le nom & autorité
 de Constantius, lequel pour cest effect il
 auoit tiré d'un monastere, & faict Roy.
 En fin apres qu'il eut assez long temps
 manié les affaires d'estat & disposé du
 royaume à sa fantasie, soit qu'il eust peur
 d'estre reduit au rang des autres subiets,
 & depossédé de son gouuernement, soit
 qu'il se faschast de commander precaire-
 ment, & sous le nom d'autrui, lequel
 force luy estoit recognoistre pour supe-
 rieur, il se proposa d'oster ce spectacle
 de deuât les yeux, & mettre à mort l'au-
 teur de son autorité. Ce qu'il executa au-
 si promptement qu'il l'auoit resollu par
 les gardes du corps du Roy que luy mes-
 me luy auoit donnez, & incontinent
 pour couvrir sa meschanceté fait empoi-
 gner tous ceux de la garde, tant les in-
 nocens que ceux qu'il auoit corrompuz,

„ & fans forme ou figure de proces les
 „ fait griefuement punir à la veuë du peu-
 „ ple, ne laissant en arriere signe quelcon-
 „ que de dueil, & de tristesse, qu'il ne le
 „ monstrest en l'exterieur. Il estoit aduis
 „ aux simples voyans telle vengeance de ce
 „ forfait que le desastre de Constantius a-
 „ uoit si fort touché au cœur de Vvortiger,
 „ qu'il ne pouuoit receuoir aucune conso-
 „ lation: mais les hommes d'entendement
 „ & qui cognoissoiët l'humeur du pelerin
 „ prindrēt argument de ceste trop exacte
 „ iustice, que c'estoit luy mesme qui auoit
 „ perpetré le crime, & que la poursuite
 „ qu'il en faisoit, n'estoit que pour pallier
 „ sa maudite traison & felonie. Noz accu-
 „ sateurs en font ils pas de mesme? Ils n'ot-
 „ onc monstté aucun signe d'amitié à leur
 „ maistre tāt qu'il a vescu, sinon lors qu'ils
 „ faidoient de ses ieunesses pour tourmen-
 „ ter sa femme, & maintenant apres l'auoir
 „ fait massacrer, ils font les bons vallets, ils
 „ courēt apres les volleurs, ils poursuient

les moins coupables sans toucher aux au-
 theurs, chefs & conducteurs du faict, de-
 peur d'acôpagner eux-mesmes au gibet
 ceux qu'ils y ont enuoyez. Mourray s'est
 emparé de l'estat, côme auoit fait le trai-
 stre & desloyal Vvortiger, il s'est fait Roy
 & Morton son lieutenant tous deux en-
 nemis iurez de leur maistresse, & de feu
 son mari, & toutefois ils sont si sots qu'ils
 se pésent faire paroistre innocents en re-
 iectant la faute sur celle qui en est la plus
 innocente & la mettant au rang de ceux
 qu'ils ont fait mourir pour auoir exe-
 cuté les traïsons & felonniees par eux cõ-
 mædees. Ils ont appris ceste piperie de Dõ-
 nevvaldiadis capitaine de la ville & cha-
 steau de Fores en leur prouince de Mour-
 ray, lequel estat irrité cõtre le Roy Duf-
 fus de ce qu'il auoit fait mourir par iu-
 stice aucuns de ses parens pour bõnes &
 iustes causes, & que (quelque requeste
 ou priere qu'il luy feist) il ne pouuoit
 obtenir leur grace ou pardon, il conclud

„ en son esprit la mort de ce Roy le plus a-
 „ mateur de s^{on} peuple & l'un des meilleurs
 „ iusticiers qui fut onques en Escosse. L'oc-
 „ casion d'exécuter son dessein se presente
 „ le Roy estant logé en son chasteau de Fo-
 „ res sans aucune fuite ou cōpagnie, hors-
 „ mis trois ou quatre vallets de chambre,
 „ & quelques vns de ses gardes. Le reste de
 „ la cour estoit logé en la ville. Apres que
 „ le Roy se fut couché, Donnevald se mit
 „ à bâqueter & festoyer les vallets de chā-
 „ bre lesquels il enyura si bien qu'il les en-
 „ dormit, de sorte qu'on eust emporté le
 „ chasteau & tout ce qui estoit dedās auāt
 „ qu'ils se fussent resueillez. Pendāt lequel
 „ tēps il entra dās la chābre avec quatre ou
 „ cinq de ses plus fidelles seruiteurs, & ayās
 „ tué le Roy tout sur l'heure le porterent
 „ par vne porte derriere tout sanglant en
 „ vn petit torrēt distant de là enuiron vne
 „ lieüe, où ils l'enterrerēt au plus profond
 „ du fleue, & l'attacherent à vne grosse
 „ pierre de peur que le corps flottant sur

l'eau descourist la façon de ce meurtre “
 barbare & inhumain . Ce fait, craignant “
 que ce beau chef d'œuvre à la longue ne “
 fust reuelé par ceux qui en auoient esté “
 les ministres , il les fait payer de pareille “
 monoye, & incōtinent les ayāt depesché “
 pour obuier au soupçon qui pouuoit tō- “
 ber sur luy de ce parricide, se met entre “
 les gardes passer le reste de la nuit, aus- “
 quels il racōte la bōne volōté que le Roy “
 luy portoit, les biēfaits qu'il auoit receuz “
 de sa maiesté, les signalez seruices qu'il “
 luy auoit fait durāt sa maladie, q̄ les plus “
 grās de la prouince de Murray f'estoiēt “
 reuoltez. Le lendemain matin la clameur “
 se leue en la chambre royale son lit ayant “
 esté trouué tout sanglāt, & son corps es- “
 garé. Donnevald accourt le premier, & “
 fait rage de chercher par tout le chasteau “
 le corps & les meurtriers. Il tue de premie “
 re abordee les vallets de chābre sans les “
 ouyr, & sans inquisitiō, & ayāt trouué la “
 porte derriere ouuerte sans gardes, il “

„ s'escrie, qu'il auoit raison de tuer les va-
 „ lets de chambre, & que c'estoient eux
 „ sans doute qui auoient massacré & em-
 „ porté le Roy, d'autant qu'ils auoient les
 „ clefs de toutes les portes en garde. Il ne
 „ se contente pas d'auoir meurtry ces pau-
 „ ures hommes nullement coupables du
 „ faict, il despesche des hommes par toute
 „ la prouince pour trouuer le corps du roi
 „ & les meurtriers, & faict vne inquisition
 „ si seuerre que tous les iours il en fai-
 „ soit mourir quelqu'un quoy qu'à tort
 „ & sans cause. Mais les seigneurs de la
 „ cour voyant vne affection de mesuree, &
 „ trop exacte diligence de Donnevaald en
 „ ceste recherche, le commencerent auoir
 „ pour suspect, & trouuerēt en fin que ç'a-
 „ uoit esté luy mesme, sa femme & sa famil-
 „ le qui auoient commis le paricide pour
 „ lequel ils auoient faict mourir tant d'hō-
 „ mes innocēts, bōs seruiteurs de leur Prin-
 „ ce. Il n'estoit pas en la puissāce des hōmes
 „ de trouuer les auteurs de ceste crua-

té barbare, si par le iugement de Dieu “
 elle n'eust esté descouuerte, qui ne laisse “
 iamaistels actes impunis. Depuis le iour “
 de ce massacre iusques au bout de six “
 mois que les auteurs d'iceluy furent re- “
 cogneus, & traittez selon leurs demerites, “
 on ne veit en Escosse aucun rayon ne du “
 Soleil ne de la Lune. Robert troisieme de “
 ce nô Roy d'Escosse auoit mis Dauid son “
 fils aîné entre les mains du Duc d'Alba- “
 nie son oncle, à fin d'estre par luy instruit “
 & esleué en tout honneur & vertu. Mais “
 au lieu de ce faire, ce malheureux homme “
 aspirant à la couronne apres la mort du “
 Roy son frere decrepité & valetudinaire “
 il detint ce pauvre ieune Prince en prison “
 estroite, où il luy couppa si biẽ le viures, “
 qu'apres s'estre repeu de toutes especes “
 de viscosites qu'il pouuoit rencontrer, & “
 mangé ses propres doits, en fin il mourut “
 miserablement de faim. L'auteur de ce “
 cruel paricide se purge enuers le Roy par “
 vn ombre de iustice, en faisant mourir “

“ ceus qui n’en pouuoient mais, & qui n’a
 “ uoient iamais veu ne cogneu ce ieune
 “ Prince. Voyla ceux sous lesquels noz accu
 “ fateurs ont fait leur apprantifage. Voyla
 “ ceux sous lesquels ils s’ôt passez maistres.
 “ Voyla ceux qui leur ont monstré l’ exem
 “ ple de courir leurs forfaits, & les pallier
 “ avec les couleurs de droit & de iustice, &
 “ mettre sur ceste innocente Princeesse le
 “ crime duquel ils ne se pourroient excu
 “ ser pardeuant vn iuge competēt, & à qui
 “ de droit la cognoissance en appartient.
 “ Etm’asseure, encores que vous, messieurs,
 “ soyiez tels qui ne pouuez pretendre aucu
 “ ne iurisdiction en ceste cause, que neant
 “ moins ils n’eussent osé comparoir parde
 “ uant vous n’estoit l’appuy & la faueur
 “ qu’ils ont des plus grands de la cour &
 “ du cōseil d’Angleterre. Aussi ne sommes
 “ nous pas icy venus pour vous demander
 “ iustice, ou raisō des iniures & torts faicts
 “ à la Roynenostre maistresse par ses des
 “ naturez & rebelles subiets, Dieu luy

ayant mis la iustice en main pour les cha-
 stier selon leurs demerites, ains seulemēt
 à fin de defraciner de voz cœurs les fini-
 stres oppinions que les ennemis vous
 pourroient auoir imprimees par faux ra-
 ports & mēsonges. Ce qu'elle demande
 aujourd'huy à la Royne d'Angleterre sa
 bōne sœur, c'est qu'elle luy preste la main
 pour se faire reintegrer en sō estat suyuant
 les promesses qu'elle luy auoit faites au-
 parauāt & depuis sō afflictio, sur lesquelles
 s'est asseuree, encores qu'elle voyoit prōpt
 secours d'ailleurs, elle s'est adressee à elle
 plustost qu'à nul autre de ses parēs, pour
 l'enuie qu'elle auoit d'estre sō obligee pre-
 mier que de nul autre, ayāt cest hōneur
 de luy estre cōiointe & proche de sang,
 que selō le cōmun ordre & cours de natu-
 re elle doit succeder à sa courōne. Ces pro-
 pos finis les accusateurs pour repliq̄ pro-
 duirēt les ordonnances des estats par eux
 tenus en Escosse, disāt qu'il n'estoit ia be-
 soin d'autre preuue pour assoir iugemēt

de condamnation contre leur maistresse
suppliants les commissaires de passer ou-
tre, & d'ôner leur sentence. A quoy ils fe-
rent respôce que cela excedoit leur pou-
voir n'estans deputez par la Roine leur
maistresse sinon pour entendre les plain-
tes & demâdes reciproques avec les rai-
sons & moyés des parties, & les rappor-
ter au conseil de sa maiesté, comm'ils pro-
mirét de faire, y donnât assignation aux
vns & aux autres dedâs certain delay par
eux ordonné. Pendant lequel les com-
missaires retournez par deuers Elizabeth
& son cōseil font fidelle rapport de tout
ce qu'auoit esté deduit & allegué par de-
uant eux, & par leurs aduis declarerent
la Roine d'Escoffe innocête de to⁹ les cas
& crimes à elle faulsemment imposez par
les accusateurs, ses subiets traïstres & des-
loyaux, & dont euxmesmes estoïët les au-
teurs: & que la poursuite qu'ils en fai-
soient, n'estoit qu'à fin de s'exempter du
crime par eux commis, se cuidans par ce

moyen purger, & couvrir la violente, tyrannique & dānable auctorité qu'ils vsurpent en escosse : en laquelle leur maistresse deuoit estre restituee, & en quoy ils conseilloyēt & adhortoient la Roine elizabet luy tenir la main par plusieurs bonnes & iustes considerations que personne ne peut ignorer. Suyuant cest aduis les plus grans du conseil, & nommément ceux de l'ancienne noblesse d'Angleterre, proposerent trois moyēs pour appointer tout ce qui estoit passé, & remettre ceste dame en son estat en rendāt elizabet, assuree du sien. Le premier estoit qu'elle bailleroit assurece à la Roine elizabet de ne la molester, traouiller, ny inquieter en la succession escheue à sa personne pour le tiltre de la courōne de Angleterre. Le secōd qu'elle facorderoit avec ses rebelles & desobeissans subiets, & estēdroit sa clemēce sur eux leur octroyant grace & remissiō de leurs forfaits, en les publiāt francs & quictes d'iceux selon

& ainsi que la Roynie d'Angleterre sa bõ
 ne sœur & ceux de sa noblesse & de son
 conseil trouueroient expedient de le fai
 re. Le troisieme, qu'elle consentoit d'e
 stre mariee avec quelque noble person
 nage d'Angleterre, qui se pourroit obli
 ger pour elle à garder toutes les promes
 ses qu'elle feroit à ladite Roynie, & à ses su
 iets qui feroit le vray moyen pour entre
 tenir ces deux royaumes en amitié perpe
 tuelle au temps à venir. Ils adiousterent à
 leurs aduis, que la Roynie d'Escoffe s'estât
 acquis vne si bonne & entiere reputatiõ
 par actes genereux, & par sa grande ver
 tu, qu'elle ne pouuoit, & deuoit luy estre
 tollue & rauie, ne mesme obscurcie où de
 nigerce par ses ennemis, & s'estant si sage
 ment gouvernee par le passé, ayant si cõ
 stammēt supporté ses aduersitez, elle leur
 sembloit digne d'estre recogneue & re
 ceue en son droit de legitime heritiere,
 plus apparente & secõde personne pour
 succeder à la courõne d'Angleterre, & de

regner sur eux, comme leur souueraine, quand le temps viendrait estant plus proche par sang & par succession que nul autre qui se pourroit preséter. Ces propos ne furent gueres plaisans à la Royne Elizabeth, ne à ses plus fauoris, qui auoient bien autre martel en teste que l'aduancement, profit ou repos de la Royne d'Escoffe, qu'ils desiroient estre cent pieds sous terre enseuelie, & pareillement le Prince d'Escoffe son fils, à cause de l'empeschement qu'ils donnoient à leur dessein, qui pour lors n'estoit pas encores cogneu comme il a esté depuis, de continuer la succession de la couronne d'Angleterre de bastard en bastard. Ce qui a esté cause que non seulement les seigneurs qui auoient mis ceste opinion en auant ont depuis esté grandement affligez en leurs personnes & biens par faux crimes contre eux intentez par ceux de la faction dudict Dudeley, mais aussi la Royne d'Escoffe, a esté fort rigoureusement traictee, & reserree

en plus estroite captiuté ayant esté mise
entre les mains du comte de Honditon,
l'un de ses plus cruels ennemis, tant à cau
se de sa religion, & de l'amitié & confe
deration qu'il auoit avec Mourray & ses
complices, que pour le droit qu'il prétend
à la couronne d'Angleterre, & la crainte
qu'il auoit que ladite dame fust declaree
seconde personne du royaume pour suc
ceder à Elizabet. Cestuy cy estât son geol
lier luy a faict dix mille vileinies, indi
gnes d'estre souffertes par la plus simple
damoiselle d'Angleterre, & lesquelles ie
laisseray en arriere pour retourner à la
poursuite des rebelles d'Escoffe. Le iour
escheu de l'assignation donnee aux par
ties par les commissaires, les vns & les au
tres ayants comparu Elizabet voyant les
accusateurs abattuz par la defiance qu'ils
auoiēt de leur cause, les ayant fait tirer à
part, & leur remontrer le peu de deuoir
qu'ils auoit faict à York, & que s'ils ne
vouloïent mieux faire elle seroit cōtrainte
de ren-

de renuoyer leur maistresse en son Royaume ne luy pouuant refuser honnestement le secours qu'elle demandoit. Mais au contraire s'ils vouloient prendre courage & la poursuiure viument deuant le conseil d'Angleterre de la mort de son mary, elle les asseuroit de son ayde & assistance, & d'une issue du proces à leur souhait. Ces parolles mirent le cœur au ventre aux accusateurs de sorte qu'ils baillerēt leur dire par escrit, avec vn grand libelle en latin composé par Buchanā, qu'il a depuis inseré presque mot à mot au dix huitiesme liure de son histoire, ou plustost fable d'Escoffe. Ce libelle n'estoit autre chose qu'une inuectiue contre sa maistresse, de laquelle seule il tenoit la vie & tous les moyens qu'il auoit au monde. Car ayant esté presque de son premier aage proscrit & banny par feu de bonne memoire Iacques cinquiesque, à cause de l'heresie Lutherienne, dont il estoit sectateur (cōbie que depuis il l'aye chāgee

R

avec le Caluinisme, n'ayant onques esté
 en son cœur ne Caluiniste ne Lutherien,
 ains vray Atheiste, chageât de religion se-
 lon les lieux & les personnes qu'il fre-
 quentoit) & pour ceste cause ayant long
 temps couru le pays & vagué çà & là par
 France, par l'Espagne, par le Portugal, &
 autres Royaumes estrangers sans se pou-
 uoir arrester en aucun lieu, en fin la Roy-
 ne desirant participer de son sçauoir, dont
 le bruit estoit plus grand que l'effect, le
 rappella de son bā, & luy donna des moyes
 pour se tenir honnestement alentour de
 sa personne, & pour l'auctoriser d'avan-
 tage, outre plusieurs benefices & autres
 bienfaits, elle luy meit entre ses mains le
 cachet ou petit seau de son priué conseil
 qui est de plus grand rapport. qu'il n'e-
 stoit besoing à vn tel compagnon que
 luy pour passer le temps sans soucy. Ce-
 neātmoins ce maudit hereticque pour
 la haine inueterée qu'il auoit contre feu
 son pere, luy a tousiours esté contraire

& à tous ceux qui l'attouchoient de sang & legitime parenté, les ayant en horreur, & s'entendant avec leurs ennemis, sans souffrir qu'aucune entreprise se feist, soit dedans soit dehors le Royaume contre la vie ou l'honneur de sa maiesté, qu'il ne fust de la partie. Il se trouuoit aux batailles & rencontres pour animer les soldats contre sa maistresse avec ses belles harengues, & tant qu'il a peu & eu la force de ce faire, il a seruy non seulement de ministre, mais aussi de gendarme, courant le premier au conflict apres qu'il eust dict & declamé ce qu'il pouuoit. En fin se sentant affligé des gouttes & tellement abattu par les delicts de la ieunesse, qu'en despit de sa volonté mauuaise & peruerse, force luy estoit de se retenir, & mener vie otieuse & sedentaire, ne pouuant plus nuyre à sa maiesté que par ses escrits, il s'est mis à corrompre toute l'histoire de ses progeniteurs, en brouillat & tracassant leurs actes genereux à sa

fantasie, & en effaçant par tout où l'occasion s'est presentee, les vestiges de leur ancienne pieté, les marques & enseignes de leur vraye & sincere religion aussi bien que les monumens de leur souueraineté, pouuoir, & auctorité sur leurs subiets. Car pour confirmer son dialogue *de iure regni apud Scotos*, qu'il auoit fait en hayne de la Royne & de son fils, pour inuestir le bastard Mourray du Royaume, il a falsifié presque toute l'histoire d'Ecosse, faisant les Rois electifs & suiets au peuple, sans que le sang ou la succession legitime leur puisse attribuer aucun droit de regner. Dont les estats du pays tresbien aduisez & meuz de raison plus que iuste & apparente ont condamné l'un & l'autre de ses ceuures, avec deffenses à toutes personnes sur grosses peines de ne les lire, ne mesmement les auoir en sa possession. Pour retourner au propos, ce Buchanan, homme ingrat & desloyal, comme vous voyez, abusant du sçauoir

que Dieu luy auoit donné, en presence de la Roynie d'Angleterre (qui rioit dans l'ame, & sautoit de ioye de voir ceste farce, pour le maltalent que de tout tēps elle portoit à la Roynie sa cousine) publia contre sa maistresse ce libelle diffamatoire, en luy improperant dix mille men songes, partie controuuez en son cerueau, partie suggerez par Mourray & ses complices, lesquels en somme peuuent estre reduicts à six chefs, que nous auōs cy deuant deduiets. Il a depuis adiousté à ceste declamation vn petit libelle du pretendu mariage du Duc de Norfolk, & de la façon de son proces, & le tout enuoyé aux freres à la Rochelle, lesquels voyants qu'il seruoit beaucoup à la cause, l'ont fait trāslater en François par vn quidā iadis aduocat à Poictiers, & maintenant trainespee, faisant le gentil-homme (chose trop commune & permise en France contre les loix, edicts & ordonnance des Roys) & tout aussi tost l'ont

faict imprimer à Edimbourg, c'est à dire
à la Rochelle, par Thomas Vvaltem, nō
aposté & faict à plaisir. Ce libelle diffamatoire (comme dict est) contenoit l'accusation de la Roynes avec toutes les circonstances qu'il leur a esté possible d'inventer pour rendre le crime vray semblable, les agents de sa maiesté furent tresbien aduertis par leurs amis secrets du conseil, qu'ils se donnassent garde d'entrer en contestation, d'autant que la resolution d'Elisabet estoit certaine & sans doubte de declarer leur maistresse attaincte & conuaincue du meurtre de son mary quelque chose qu'elle eust peu alleguer pour sa iustification, & d'enuoyer ce iugement à tous les Princes Chrestiens à fin de la rendre odieuse, & empescher non seulement qu'ils luy donnassent aucun secours, mais aussi qu'ils ne se souciasent de son desastre, ou eussent regret en sa mort. Qui fut cause que

ses agents en lieu de contester & denier le faict selon le pouuoir & mandement qu'ils auoient, ne voulurent onques passer outre, ains demandèrent, attendu que ce faict dependoit de la conscience de l'accusée, que selon le stile ordinaire de la iustice & la forme vsitée en matiere de crime, il luy fust permis de comparoir, & en leur presence se deffendre par sa propre bouche, attendu aussi que les accusateurs y estoient receuz en personne lesquels elle s'asseuroit faire trouuer les seuls auteurs du forfait que fausement & malicieusement ils imputoient à sa maiesté. Ce que leur ayant este tyranniquement refusé contre tout droit & raison, ils ne daignerent faire plus grande instance, se doutant qu'ils ne gagneroient rien voyans la contenance d'Elisabet & de ses mignons, les caresses & la bonne chere qu'ils

faisoient aux calumniateurs, & le peu de respect qu'ils portoient à leur maistresse cōtre laquelle pour leur hōneur, & pour la reuerence deue au nom des Roys, ils ne deuoient pas souffrir telles iniures estre proferees par vn sien esclaué stigmatique & fugitif. Seulement feirent ils remōstrances à la Royne d'Angleterre du prejudice qu'elle faisoit à elle mesme, & à l'Estat de tous Roys & Roynes souueraines, de vouloir entreprendre cestecognoissance, & que leur maistresse nela pouuoit recognoistre pour superieure ou iuge, la suppliants d'effectuer la promesse de secours à elle faicte & iuree par ses lettres & par ses Ambassadeurs, qui estoit la chose seule qui l'auoit attiree en son Royaume, & sans laquelle elle eust esté long temps a bien promptement secourue d'ailleurs, & ce sans l'amuser à la cognoissance de sa cause en l'exposant à la risée & mocquerie de ses trahistres & desloyaux subiets. Rien ne fut conclud,

Elisabet demonstrent bien qu'elle pre-
 noit grand plaisir à ces calomnies, & ne
 desiroit qu'à prendre son passetemps à
 ouyr mal parler de sa cousine. Mais au
 contraire les propos des agens de la Roy
 ne eurent tellement les gens de bien
 qui assistoient au conseil & qui estoient
 de l'ancienne noblesse d'Angleterre, qu'ils
 ne se peurent presque contenir, & endu-
 rer telles indignitez faictes à elle qui e-
 stoit de l'ancien sang de leurs Roys, &
 apparente heritiere de la couronne, de
 sorte qu'ils commencerent à murmurer,
 disans qu'il falloit eschiner les trahistres
 à leur retour en Escosse, & renvoyer leur
 maistresse en son Royaume, & en ce fai-
 sant acquieter la Royne Elisabet de sa foy
 & promesse, laquelle personne d'entre
 eux ne pouuoit ignorer. Mourray incon-
 tinēt aduertty de ce bruit, se sentāt prins
 pour auoir affaire aux grands d'Angleter-
 re, & qui pouuoient tout quand ils euf-
 sent voulu, retourne à ses trahisons &

praticques accoustumees non sans l'aduis & conseil des mignons d'Elisabet, & de Cecile & leur agents & promoteurs, qui manioiét ceste dame à sa fantasie, & sans l'aduis rien ne se faisoit en son Royaume. Il s'adresse au Duc de Norfolk, & luy propose le mariage de la Roynes d'Escoffe, luy promettant s'il auoit enuie d'y entendre, non seulement son consentement, & la bonne volonté de la noblesse Escossoise, mais aussi d'y faire condescendre la Roynes sa maistresse, & de reduire tout le pays à leur deue & naturelle obeissance. Le Duc fort resiouy de ceste ouuerture, pensant qu'il parlast de cœur & à bon escient, sans fraude & sans tromperie, & qu'il eust enuie par ce moyen de se reconcilier à sa maistresse, le laisse faire & luy moyenna vne bonne somme de deniers pour faire les frais de ceste entreprinse. Par ce moyen le trahistre s'aduança grandement, ayant receu de l'argent pour ayder à la cause, &

non seulement obtenu le passage libre pour s'en retourner en Escosse, mais aussi extorqué lettres de la Roynne adressantes à ses lieutenans qui auoient faict grande leuee d'hōmes pour accabler les ennemis, qu'ils eussent à licentier leurs troupes, leur donnant à entendre qu'il se mesnageoit vn affaire pour sa deliurāce dōt ils auroiēt cōtētemēt. En prenant congé d'Elisabet, il luy declare toute ceste negotiation, & le pourpaller de ce mariage, luy remonstrant que si elle souffroit telle chose auoir lieu, ce seroit le vray moyen de se tollir la couronne de dessus sa teste, & la mettre sur celle de sa cousine, le Duc de Norfolk estant fort & puissant, bien aymé & respecté de tous les grands, qui ne faudroit à l'assister à la defēse du tiltre qu'elle s'est tousiours attribuee au Royaume d'Angleterre, ne recognoisāt sa maiesté pour legitime Roynne & capable de si bōne fortune, la suppliant au parsus luy vouloir

tousiours continuer sa bonne volonté,
 & luy tenir la main roide cōtre leurs en-
 nemis cōmuns, & q̄ de sa part, cognois-
 sant biē de tout temps que sa fortune e-
 stoit conioincte avec la sienne, il ne man-
 queroit en aucune partie de son deuoir
 enuers sa maiesté, qu'il luy seroit tous-
 iours obeissant & fidelle, pour la servir, ho-
 norer & respecter avec tous ceux de son
 intelligēce: que de ce il en bailleroit telle
 asseurāce à sa maiesté, qu'il luy plairoit en
 demāder, si sa parole n'estoit suffisante,
 & si elle en faisoit aucun doute. A quoy
 elle feit respōce qu'elle n'estoit pas igno-
 rante de ce qui se traffiquoit entre sa
 cousine la Roynie d'Escoſſe & le Duc de
 Norfolk, qu'il eust à continuer ce qu'il a-
 uoit commencé, & à faire bonne mine,
 que ce seroit le moyen de se pouuoir hō-
 nestement depestrer des deux. Car quāt
 au Duc estant son vassal, elle en dispose-
 roit à son plaisir: mais quant à sa cousine
 elle craignoit le Roy de France & ses

parens, qui s'en pourroient ressentir, si el
 le luy faisoit vn outrage si manifeste
 & apparent, & ne demanderoient pas
 meilleure occasion pour luy faire la guer
 re. Toutesfois s'il luy vouloit bailler bon
 ne asseurâce & pleige qu'elle seroit touf
 iours assistee de ceux de son party en Ef
 cosse, & secourue promptement si d'aué
 ture quelque algarade ou assault luy e
 stoit donné du costé de la Frâce, elle luy
 réuoiroit sa cousine en son Royaume, &
 la liureroit entre ses mains pour en vser
 ou abuser comme bon luy sembleroit:
 qu'elle ne voyoit que ce seul moyé pour
 en lauer les mains honnestement, & fai
 re en sorte qu'il obtinst la fin de tous ses
 desseins, lesquels elle promettoit aduan
 cer & promouoir de toute sa puissance,
 l'estat de son Royaume, & la condition
 de ses affaires la contraignant d'ainsi fai
 re encores qu'elle n'en n'eust point d'en
 uie, sa fortune estant si estroitement liee
 & conioincte avec la sienne, qu'elle ne

peut estre distraicte & separee sans le peril euident de la perte & ruine de l'un & de l'autre. En fin apres plusieurs propos fut cōclud entre eux, que le Prince d'Escoffe seroit enuoyé en Angleterre pour pleige, & quelques forteresses d'Escoffe mises entre les mains des Anglois, & moyennant ce la prisonniere seroit renuoyee en son Royaume, & liuree es mains de Murray. En quoy vous pouuez bien clairement voir l'intention & les desseins de ceste meschante femme de s'approprier d'un Royaume qui ne luy appartient pas, & que des lors elle pēsoit par ce moyen s'emparer de la iouissance des deux Royaumes. Apres le partemēt de Murray, s'assurant sur ses belles promesses, & que sans doute par son moyen le ieune Prince d'Escoffe seroit mis entre ses mains, commença faire paroistre l'intelligence qu'elle auoit avec luy, & le peu d'affectiō qu'elle portoit à la Royne sa cousine, la tenāt plus estroi-

&ement qu'elle n'auoit faict au commē-
 cement, & ostant la liberté à ses fidelles
 seruiteurs d'aller & venir comme ils a-
 uoient de coustume, ains les faisant
 fouiller par ses gardes & capitaines des
 frontieres, & ouurir les lettres qu'ils por-
 toient à sa maiesté, & cependant luy te-
 nant le bec en l'eau sans aucune resolu-
 tiō de grace ou de disgrâce, secours ou re-
 fus, à fin d'empescher qu'elle ne donnast
 ordre à ses affaires par autre moyen, & re-
 cherchast ayde ou faueur d'ailleurs. Ce
 qu'elle luy auoit expressement defendu,
 la menaçāt au cas qu'il luy vinst aucun se-
 cours, ayde ou support de Frâce, ou d'Es-
 paigne pour sa restitution, qu'elle en-
 uoyeroit deux fois autant d'Anglois
 contre eux pour la defence des rebel-
 les d'Escoffe, & outre que la vie de sa
 maiesté en respondroit. Ce que vous pou-
 uez mieux iuger par trois ou quatre de
 ses lettres missiues adressantes à la Roynē
 Elisabeth, dont vous voyez icy les copies.

Madame ma bõne sœur aussi tost que
 i'ay receu vos lettres par Borthink i'ay des-
 pesché vn mien seruiteur nommé Ale-
 xandre Rog en Escosse, lequel i'ay atten-
 du iusques au vingtiesme iour. Au bout
 duquel terme n'en ayant aucunes nou-
 uelles, & estant informee que milord
 Housden a assisté & fortifié mes rebelles
 en personne, accompagné des bādes de
 Beruik à l'execution de l'vsurpee admi-
 nistration de Mourray & de ses compli-
 ces, & qu'un seruiteur du Duc de Cha-
 telleraud qui ia auoit eu son passeport
 fust renuoyé & arresté apres l'aduertisse-
 ment de Mourray, & ses lettres prin-
 ses, qui ie croy estoient pour moy, toutes-
 fois i'en puis rien sçauoir, qui me fait
 croire que ie suis en danger de n'auoir au-
 cunes nouvelles d'Escosse, s'il ne vous
 plaist y mettre autre ordre. Parquoy ie
 n'ay voulu plus longuement differer la
 depesche de mō conseiller l'Euesque de
 Rosse, present porteur, pour vous sup-
 plier

plier que sans plus vous attédre aux bōs
ou mauuais deportemens de mes sub-
iects, vous me donniez resolute responce,
& suyuant ma longue & instante requē-
ste vous me remettiez en mon estat, ou
bien que me permettiez aller chercher
ailleurs secours des autres princes mes a-
mis & alliez. Car il y a pres d'un an que
j'attens vostre resolution, durant lequel
temps mes rebelles se sont fortifiez de
beaucoup. Parquoy plus longuemēt ne
puis-je de mon gré receuoir aucun delay
sans me resouldre à quelque parti, com-
me plus au long l'euesque de Rosse vous
fera entendre de ma part. Auquel vous
suppliant donner credit comme à moy
mēme, ie vous presenteray mes affectiō-
nees recōmādations à vostre bōne gra-
ce, priāt Dieu qu'il vous dōne, Madame,
ma bōne sœur en santé lōgue & heureu-
se vie: De Vindefeild ce 25. d'Auril 1569.

Vostre affectionnee bonne sœur &
cousine, Marie R.

Madame, nonobstât qu'il vous a plu
 me mander par mi-lord Scherufbery, &
 par mon seruiteur Borthink, que mes
 seruiteurs auroient la mesme liberté d'al-
 ler & venir qu'a Bolton, si est-ce que
 monsieur de Housden n'a laissé passer
 Sandé Bog ayant lettres dudit comte se-
 lon vostre cōmandement pour son pas-
 seport, ains l'a retenu cinq iours iusques
 à ce qu'il eust lettres de Mourray pour ce
 faire, disant qu'il estoit ainsi cōmadé par
 vous de ne laisser aucun passer sans passe-
 port dudit Mourray. Je vous supplie, ma-
 dame, que voz officiers ne me frustrent
 point de la liberté que me donnez. Car
 i'aimerois mieux qu'il ne m'en fust point
 octroyé, que ne me servir de rien. Quant
 aux nouuelles d'Escoffe, Sandé Bog a e-
 sté destrouffé de ses lettres que mi-lord
 Housden vous a enuoyees par vn autre,
 apres luy auoir desia donné passeport.
 Parquoy vo^{us} en pourrez estre trop mieux
 aduertie, sinõ de ce que le duc & son fre-

re l'euesque & Hareis m'ont mandé: de
 quoy ie n'ay voulu faillir d'aduertir en di
 ligence l'euesque de Rosse pour vous fai
 re entendre selon ma promesse tout ce
 que ie sçay, vous suppliant considerer les
 complaints que là dessus il vous fera de
 ma part, pour m'en donner briefue reso
 lution, à fin que plus long delay ne me
 cause plus semblables inconueniens. Et
 me remettât sur mondit conseiller. Ie ne
 vo^r feray pl^u lōgue lettre, sinon pour vo^r
 presenter mes hūbles reommādations à
 vostre bonne grace, priāt Dieu qu'il vous
 donne, madame ma bonne sœur longue
 & heureuse vie. De Vvindefeild ce 26.
 d'Auril 1569. escrit en haste,

Vostre tresaffectionnee sœur, &c.

Marie R.

Madame, ayāt entēdu par l'euesque de
 Rosse mō cōseiller que q̄lques obiectiōs
 estoient faites pour empescher la prōpte
 demonstration de vostre bonne volōté

vers moy, alleguât que i'auois fait quelques contracts avec monsieur d'Aniou frere du Roy monsieur mon bon frere qui vous pouuoient preiudicier, ie me suis bien voulu efforcer, n'ayant encore recouuert ma santé, par ces mal-escrites lettres, vous asseurer sur ma conscience, honneur & credit, que iamais n'ay fait nul contract avec luy n'autre d'aucune chose, ne n'auray iamais en teste opiniõ de faire chose à vostre preiudice, ne tant mal aduantageuse à ce royaume, & à moy, que de faire aucun contract ou trãsmis- sion, de quoy ie vous dõneray telle preu- ue & asseurance qu'il vous plaira aduiser comme l'euesque de Rosse vous dira plus au long, vous suppliant le croire & m'ex- cuser. Car ie suis en assez foible disposi- tion pour vous escrire cõme i'en ay sub- iet & volonté. Seulement me suis-effor- cee vous rendre ce tesmoignage de ma main, auquel i'appelle Dieu à tesmoin, & prie Dieu qu'il vo' ayt en sa saincte garde.

Ce Dimanche matin 15. de May 1569.

Vostre affectionnee bonne sœur, &c.

Marie R.

J'ay encores les copies de plusieurs autres lettres semblables, escrites par sa maiesté les vnes en langage François, les autres en Anglois, tant à la Roine Elizabeth qu'au comte de Lecestre, par lesquelles on peut voir dix mille traueses qu'on donnoit à ceste dame, pour la tenir tousiours en suspend & en quelque opinion d'obtenir à ses fins, & cependât fortifier ses traistres & desloyaux subiets en desarmant les bons & fideles. Vous voyez par celles dont nous auons mis les copies en auant comment Elizabeth & son conseil pour descouurir toutes les affaires & intelligences que la Roine prisonniere pouuoit auoir avec ses bōs subiets, & en faire leur profit les cōmuniquât à Murray donoiēt des bōs passeports, & accordoiēt de parole aux seruiteurs de sa maiesté cōgéd'aller & venir libremēt, & sans aucū

destourbier, & neantmoins quand ils les voyoiēt chargez de quelques lettres, ils les faisoient retenir sur les frontieres, & leur oster lescdites lettres pour les enuoyer au conseil d'Angleterre à fin d'aduerter Mourray du cōtenu en icelles: de sorte que la permission & seureté qu'on leur donnoit, seruoit d'appast & d'amorce pour les attrapper. Vous voyez aussi l'assistance, ayde & confort qu'Elizabeth donnoit tout ouuertemēt aux trahistres par les garnisons qu'elle auoit sur les frōtieres, qui tenoient la main à Mourray, quād il les employoit au preiudice de sa maistresse & de son royaume. Vo⁹ voyez aussi les artifices & ruses qu'on inuētoit tous les iours pour amuser ceste pauvre dame, & la tenir sans aucune resolution. pendant que ses rebelles faisoient bien leurs affaires, & trauailloient par prison ou autrement les gens de biē & premiers princes du royaume, luy voulāt faire accroire qu'elle estoit la cause de son mal,

& de la lōgue demeure qu'elle faisoit sās estre secourue, luy imposant des choses auxquelles elle n'auoit onc songé ne pensē, cōm'est la cessiō de sō titre & du droit qu'elle pouuoit auoir à la courone d'Angleterre, qu'ils feignoiēt auoir esté par elle faite à monseig. le duc d'Aniou, qui est auourd'huy roy de Frāce à fin de trauailler Elizabet, & luy donner des affaires & à son royaume, dont elle s'excuse, cōme pouuez voir par la derniere de ses lettres. mouray apres qu'il fut de retour en Escos se faisoit bōne mine & cōtenāce d'hōme qui ne demādaſt autre chose sinon la deliurāce de sa maistresse, se iactāt q̃ c'estoit chose qu'il procureroit de tout son pouuoir, à fin d'establiſſir vne bonne paix au royaume. Et pour endormir les mulots, & abuser les bons seruiteurs de la Roine, il enuoye messire Robert meluin par deuers sa maieſté, à fin de sonder son intention sur le mariage par luy proposé au duc de Norfolk non qu'il eust volōté de

l'accomplir en façon du monde, ains seulement de luy tirer les vers du nez pour en faire son profit par apres. Et cependat sous ce pretexte il fait assẽbler la noblesse d'Escoffe à sainct Ihonston tant ceux de son party, que les autres, en intention d'emprisonner, où massacrer ceux qui se monstreroient constans & fermes en leurs opiniõs pour le seruice de leur maistresse. Mais ils se trouuerent si forts, qu'il ne peut executer son dessein. Durant que ceste assemblée se faisoit, le Duc de Norfolk luy escrit par vn gentil homme, & le somme de sa promesse, qu'il eust à luy enuoyer le consentement de sa noblesse au mariage de luy & de la Royne, dont luy mesme estoit l'auteur, & auoit mis en auant les premiers propos. Mourray selon sa coustume repaist ce gentilhomme de bourdes & de belles parolles, & cependant par vn autre des siens il renuoye la lettre du Duc à la Royne Elizabet, qui luy portant vne picque d'ailleurs ne deman-

doit que le moindre pretexte que ce fust
 pour s'en pouuoir honnestement desfai-
 retant pour le soupçon qu'elle auoit qu'il
 fut Catholique pour ce qu'il n'auot esté
 si rigoureux à l'endroit de la Royne d'Es-
 cosse comme elle desiroit, pensant lors
 qu'elle luy donna ceste cōmission, qu'il la
 condāneroit à mourir, ou pour le moins
 la traiteroit fort rudement, & au gré des
 accusateurs. En quoy elle se monstra biē
 fille de son pere qui fit mourir Thomas
 Morus son chancelier par ce qu'il auoit
 refusé de soubcrire à vn iugemēt inique
 contre Dieu & contre raison, suiure son
 intention luxurieuse & appetit desordō-
 né. Pour cause semblable ce braue Duc,
 vertueux & constant en droiture & iusti-
 ce, sans auoir onques pensé à aucun mal,
 & sans l'ayde duquel ceste bastarde ingrate
 vilaine ne fust iamais paruenue à la cou-
 ronne, est faisi au corps, & emprisonné
 dās la tour de Londres, & en fin decapité
 sous ombre de deffiances que les faux ra-

ports de Murray auoient engēdrées en la ceruelle de ce' miserable Prince. Les faiseurs de libelles & les heretiques, qui s'efforcent donner lustre à toutes ses actions, & excuser ses cruautéz, disent qu'elle auoit raison d'ainsi traiter le Duc de Norfolk, par ce que son intention estoit d'espouser la Royne d'Escoffe au deceu de sa maistresse, & par apres luy tollir la couronne d'Angleterre de dessus la teste & l'attribuer à ladite Royne quand elle eust esté sa femme y ayant droit & tiltre valable. Qui est vne chose non seulement fausse & calōnieuse, mais aussi du tout impossible. Car comment pouuoit il espouser la Royne d'Escoffe sans le consentement de l'Angloise qui la tenoit prisonniere? Cōment l'eust il peu aborder à son deceu? Il faut que ceux qui maintiennent vne telle mēsonge ayent le front d'acier. Car toute la noblesse, voire tout le peuple d'Angleterre en sçait le contraire, & n'y auoit vn seul au conseil priué d'Elizabeth à qui l'intētion du Duc n'eust esté cō-

muniquee, & qui ne l'eust trouué nō seulement bōne & expediēte, mais aussi necesfaire pour le biē cōmun de toute l'isle de Bretagne Bacon seul garde des seaux fut d'opiniō cōtraire. La Royne Elizabet du cōmēcemēt ne trouua pas mauuaise cest entreprise, ains mōstra sēblant de l'auoir tres-agreable, & promit pour la resolutiō d'icelle dōner audiēce audit seigneur en temps & lieu cōuenable. Ceste promesse luy ayāt esté faiēte à diuerfes fois à Guilford, à Faruhā, à Basinge, à Rithethfillolle, & à plusieurs autres lieux, ne fut pas executee pour les mauuaises opinions que ce maudit Ismaël & ceux de son party en Angleterre auoiēt imprimé en la fātaisie d'Elizabet, qui se laisoit aisement transporter à ses desfiāces. Car depuis le cōmēcemēt de sō regne elle n'a iamais vescu qu'ē doute & soupçō de tout le mōde, seiugeāt en sa cōsciēce indigne du tiltre de Royne qu'elle vsurpe par force cōtre droit & cōtre raison. Et pour ceste cause elle ne vit qu'en perpetuelle crainte & soucy, & est

aujourdhuy reduite en telle misere, que
 si elle voit seulement deux hommes en-
 semble qui conferent de leurs affaires do-
 mestiques, ils sont incōtinēt empoignez
 & accusez de trahison, & si de malheur
 ils disēt quelque mot de trauers à l'inter-
 rogatoire qui leur est faiēt, & qui puisse
 estre sinistrement interpreté, les voyla in-
 cōtinēt ataints & conuaincus de crime de
 leze maiesté traynezaugibet sur vne claie,
 fédus par le vërre, coupezen quartiers, &
 leurs corps encores respirāts & palpitans
 iettez au feu. Ceste cruauté barbare se pra-
 tique tous les iours cōtre les pauvres Ca-
 tholiques, lesquels elle a desclaré ses enne-
 mis mortels, & par consequent punissa-
 bles comme ayās offensé sa maiesté. Auf-
 si l'vne des causes principales du mal ta-
 lent qu'elle portoit à la Royne sa cousine
 c'estoit la religion chrestienne de ses an-
 cestres, laquelle sa maiesté n'a onques
 voulu abandonner pour aucune pro-
 messe qu'elle lui a peu faire de la remettre

en son estat, & de l'asseurer de la couronne d'Angleterre pour elle & pour les siés apres son decez. Mais voyant qu'elle perdoit son temps, & qu'elle ne la pouuoit esbranler aucunement, elle enuoye son ambassadeur pardeuers mourray pour luy appointer certain iour auquel il se deuoit trouuer sur les frontieres à fin de recevoir la Royne sa maistresse suyuant les pactions & conuenances entr'eux faites. Mais ainsi comme ce trahistre partoit de Lithco pour s'en aller à Edimbourg donner audience à l'Ambassadeur d'Elizabet, estant à cheual enuironné de ses amis, & de ses gardes, par la permission de Dieu il fut atteint d'une harquebuzade quelacques Hamilton de Bodelhauch luy donna dans le ventre, dont il deceda le mesme iour au soir en reniant & maugreant Dieu avec forces imprecations contre ses ennemis, & nommement contre celuy qui luy auoit donné le coup: & ne feit onques en mourant aucune de-

monstration qu'il fust chrestien en reco-
 gnoissant aucune faute par luy commise
 ny demandant aucune grace & pardon
 à Dieu de ses infinies trahisons, ou au-
 tres pechez quelquonques. Mais en
 ceste mort on doit bien remarquer le
 vray iugement & iuste vengeâce de no-
 stre seigneur (qui ne laisse iamais sacrile-
 ge impuni) que ce goulu a esté rassasié
 d'un petit boulet de plomb, qui iusques
 à ceste heure là ne pouuoit estre saoullé
 de tout le plomb dont la plus part des E-
 glises d'Escoffe estoient couuertes, & en-
 tre autres son Eglise Metropolitaine d'où
 il estoit le Prieur, & plusieurs autres de
 la ville de saint André, lesquelles furent
 par luy saccagees & ruinees pour ven-
 dre les couuertes en Flandres & ail-
 leurs, dont plusieurs marchants Escos-
 sois en furent appauuris & ruinez, les
 vaisseaux qui portoient lesdicts plombs
 pour estre debité festant enfondrez

dans la mer. C'est grand cas qu'un simple gentil homme, comme estoit le seigneur de Bodelhauth, trouua moyen de venger son iniure particuliere, & venir à bout de ce tyran, & que tout un royaume s'estoit rendu si esclau de ce fils d'Agar, qu'il a enduré de luy ce qu'il n'a iamais peu endurer de ses vrayes & legitimes Roys. Mais c'est bien plus grand cas que tout seul, & sans aucune assistance, ayant fait un tel coup il s'est peu sauuer d'entre les mains de tant d'hommes bien montez à l'aduantage, qui ne le peurent onques attendre. C'est un tres-grand argument que le coup estoit agreable à Dieu, qui a voulu que la mort de ce trahistre non seulement demeurast impunie, mais aussi que l'auteur d'icelle raportast honneur & louange enuers tous les hommes de bon & sain entendement. Elizabet estonnee de la perte de Murray & grandement irritee voyant qu'à l'occasion de son decès ses

entreprises ne pouuoient reussir à la fin
 qu'elle attendoit, elle change de dessein
 & tasche se deffaire de sa prisonniere par
 poison. Ce qu'elle ne peut, le venim ayāt
 esté descouuert par ses officiers qui luy
 apprestoient son boire & son manger,
 & qui depuis ce tēps là ont eu fort grand
 soin de sa bouche, se donnant garde de
 tels inconueniens. Cependant à fin d'em
 pescher la resiouissance que la Roine sa
 cousine pouuoit auoir dela deffaite d'un
 tel ennemi, elle enuoye le cōte de Suffex
 sur les frontieres d'Angleterre avec neuf
 ou dix mille hommes, faisant semblāt de
 chercher ses rebelles, mais toute l'execu
 tion qu'il feit avec ses troupes fut faicte
 en Escosse contre les vrays & naturels
 subiets de la Roine, comme estoient mi
 lord Hume, mi-lord Maxvel, mi-lord
 Hareis, le barō de Bacluch, le barō de Far
 neist, lesquels il poursuiuit à feu & à sāt,
 brusta toutes leurs terres, abbatit leurs
 chasteaux, prit l'artillerie & les munitiōs
 qu'il y

qu'il y trouua , & mena le tout en son pays. Quelque temps apres elle enuoya messire Guillaume Drourie avec vne armee pour assister les rebelles à paracheuer la ruine des bōs seruiteurs de la Royne. Ce qu'il feist de tout son pouuoir, & commença à la ville & tresancien chasteau d'Hamilton, appartenant au Duc de Chastellerauld, qu'il brusla apres les auoir eu par cōposition. Aussi brusla il le palais très magnifique, qui y estoit & toutes les maisons des Hamiltons là autour. Et au partir delas'en alla à Lithco, où il brusla la maison du Duc avec la belle maison & chasteau de Keuille. Tant y a qu'il ne laissa vne seule maison appartenant à ceux du furnom d'Hamilton, par ce que se repentants, quoy que tard, de leurs premieres folies qu'ils auoient faiçtes en introduisant les ministres en Escosse, & assistant à leur damnable rebellion (cause de leur ruine) ils s'estoient reduicts sous l'obeissance de leur souueraine, & portoiēt.

T

les armes pour son seruice contre Mour-
ray. Qui ayant du commencement des
troubles esté par eux eleué & soustenu
sous ombre de nouuelle religion, qu'ils
appelloient euangile, les auoit inconti-
nent exterminéz, & intruz soy mesme au
degré qui de droict leur appartenoit. Eli-
sabet, apres auoir ainsi affoibly les mei-
leurs seruiteurs de la Roynie, & osté les
moyens de faire dorefnauant aucune re-
sistance, elle faict semblant de vouloir
accorder avec elle, & la renuoyer en son
Royaume, moyennant qu'elle la reco-
gneust pour superieure, & luy meist es
mains la plus part des fortresses du Roy
aume, & luy donnaist monsieur le Prince
son fils, & tous les premiers de la nobles-
se qui tenoient son party pour pleiges
qu'elle ne se ressentiroit en façon que ce
fust de ce qui estoit passé, & n'auroit au-
cun recours aux Princes estrangers à fin
de se venger des iniures qu'elle auoit en-
durees, & outre qu'elle renonçast à la re-
ligion Catholique & à la Ligue ancienne

de Frâce, pour embrasser la Ligue & religio Angloise. mais la Royne voyât des demandes si extrauagantes & inciuiles, & cognoissant biẽ à quoy rẽdoiẽt telles ruses, ayma mieux demeurer en l'estat qu'elle estoit, q̃ d'abãdonner Dieu & se precipiter soy mesme, son fils, & toute sa noblesse en peril tout euidẽt & certain, & en se despouillãt de son auctoritẽ & de toutes ses forces, se tollir les moyens de secourir son fils, & de resister à la tyrãnie d'Elisabet si d'auẽture elle attẽtoit à sa vie. Car ayãt l'ẽfant en sa possẽssiõ avec les forteresses qu'elle demãdoit, elle eust disposẽ de la mere & du fils, & de tout le Royaume d'Escosse à l'apetit de Lecestre son amy. Mais sentãt son dessein descouuert, & qu'elle auoit à faire à vne dame qui n'estoit pas moins aduisee qu'elle pouuoit estre, elle se meit à traffiquer vne Ligue & cõfederation avec le Roy tres-chrestien Charles neufiesme, pour la cõfirmatiõ de laquelle mōsieur le Marechal de Montmorency

fut enuoyé en Angleterre. Entre les clauses & conditions de ceste Ligue fut dict expressement, qu'elle ne presteroit aucun ayde ou faueur aux rebelles d'Escoffe contre la Royne leur souueraine. Mais Dieu sçait comme ceste clause fut gardee. Car incontinct apres elle enuoya vne armee aux rebelles pour assieger le chasteau d'Edimbourg, qui en ce tēps la tenoit pour la Royne sous le commandement du Baron des Granges. Cestui-cy s'estant résolu par cōpositiō à l'Anglois (contrainct à ce faire à cause de l'infection de la fontaine qui estoit au pied du rocher, dont tous ses soldats furent empoisonnez) fut contre les loix de l'art militaire pendu & estranglé par Morton, alors tyran d'Escoffe sous le commandement & auctorité d'Elisabet, qui depuis ce temps a esté mieux obeye, crainte, & redoutée en ce pays là, qu'elle n'estoit en son pretendu Royaume d'Angleterre. Mortō son Lieutenant pilloit & rāçonnoit tout le mode

sans que personne s'osast plaindre, pour
 la crainte de l'Angloise, qui luy tenoit
 la main. L'Angloise aussi de son costé bri-
 gandoit & volloit indifferemment tous
 les Escossois de quelque religion qu'ils
 fussent, aussi bien les trahistres & rebelles
 que les fidelles subiets de la Royne par le
 moyen de Morton, qui cōtenoit les pau-
 ures gens, & les empeschoit de se venger
 comme ils auoient bien les moyens &
 l'enuie de ce faire dont est aduenue qu'en
 moins de deux ans se trouuerent de cōp-
 te fait plus de deux cens nauires Escos-
 soises chargees de marchandise pillées par
 les pirates Anglois durant la tyrannie de
 Morton: Qui est vne perte inestimable
 pour le Royaume que ceste belle Ligue
 par elle faicte avec les ministres d'Escos-
 se & leurs complices leur aporte. Le plus
 braue de ses ancestres n'a pas tāt endom-
 magé l'Escosse en toutes les guerres qu'il
 a peu faire, qu'a faict Elisabet sous cou-
 leur de paix & de bonne amitié. Pour

ceste cause les communautéz des villes,
 qui luy auoient tousiours esté les plus af-
 fectionnees, & les plus desloyalles à leur
 naturelle & legitime dame & maistresse
 furent contrainctes luy enuoyer Adam
 Foulertō avec quelques autres notables
 marchands, leurs agens, pour demander
 raison & iustice. Mais apres leur auoir te-
 nu le bec en l'eau par l'espace de deux ans
 entiers, & faict despendre infiny argent
 à la poursuite, les renuoyant de Cai-
 phe à Pilate, en fin furent licétiez sans au-
 tre responce, sinon que la Roynen n'en
 pouuoit mais, & qu'elle n'estoit tenue
 de respondre du faict des escumeurs de
 mer, ausquels ils se pouuoient adresser
 si bon leur sembloit. I'estois present
 à Grennicher en l'annee mil cinq cens
 septante neuf, que ceste responce leur
 fut dōnee, & au sortir du conseil vn hon-
 nesté & riche marchand me monstra vn
 Mi-lord qu'il appelloit Milord Burly, au-
 trement Cecil leur grand thresorier &

auparauant secretaire d'estat vestu de
ses soyes, qui auoient quelque temps au-
parauant esté recognues en sa maison,
& dont il auoit esté trouué saisi, & me
dict que c'estoient ceux du conseil mes-
me qui estoient les volleurs, ou qui les
auctorisoient & qu'ils s'estoient adressez
à eux, mais que la Royne faisoit la sour-
de oreille, & dissimuloit avec eux com-
me participante du butin. En quoy il
ya fort grande apparence. Car elle en
faisoit rendre à qui bon luy sembloit, &
nommement à quelques amis & serui-
teurs de Morton, comme ie vey lors, &
neantmoins ne faisoit aucune raison aux
autres Escossois, ny pareillement à noz
marchands de Normandie, combien
que les piraties à eux faictes estoient
si manifestes, qu'elles ne se pouuoient
celer ne desguiser en aucune manie-
re. Mais de cela ne se faut emerueil-
ler, n'ayant seigneur aucun en son pri-
ué conseil qui n'aye ses vaisseaux sur

mer pour piller & brigander aussi bien que leur maistresse, qui leur a frayé le chemin depuis le commencement des guerres ciuiles, qu'elle a tousiours entretenues en France, en Flandres & en Escosse pour cest effect, & à fin de s'enrichir, & auoir moyé d'entretenir les rebelles des Roys ses voisins à leurs propres cousts & despens. Ce qu'escriit Strabo, & les auteurs anciens du mont Coryce en Lydie, ou en Cilicie, tant renommé pour les voleries, qui s'y faisoient, n'aproche en rien des pratiques ordinaires de l'Angloise, & ne faut plus dire *Coryceus auscultauit*, ains *Angla auscultauit*, depuis que ceste maudicte Agarenne a vsurpé le tiltre de Roynne. Car depuis ce temps là ce Royaume a esté la spelonque, & le refuge de tous trahistres, brigands, meurtriers, & assassinateurs des gens de bien, sentine de tous vices, mere nourrice d'impieté, & de toute sorte d'héresies, marastre de toute vertu, & l'effroyable rocher contre le

quel toute espee de religion & de pieté font naufrage sans aucune recouffe ou mercy . Et pour l'impunité qu'il y a de toutes les meschâcetez du monde nous pouuons dire sans mentir ce que les anciens disoient de Lisee de Corfou, *Anglia libera, cacu ubi libet* . Tout y est bien venu excepté l'honneur & la vertu. Car ils ne peuuēt souffrir ces choses parmy eux, non plus que les Ephesiens, qui chasserēt Hermodere de leur cité sur ce seul subiet qu'il estoit trop homme de biē. Mais au propos des intelligences d'Elisabet & de ceux de son conseil avec les brigands, ie ne puis passer sous silence la vollerie faite à monsieur Dolu, Thresorier General de la Royne d'Escoffe. Il luy portoit quelques deniers de son douaire pour subuenir à ses menues necessitez, quelques bagues & ioyaux, vne chefne d'or du pris de cinq cens escus, vn mirouer de pareil prix. Vvalsinghame Secretaire d'estat apres luy auoir donné son passeport

le pésant trouuer chargé de la somme de soixante mille escus, & de quelques lettres secretes, le faict guetter par les chemins par quelque nombre de volleurs, & entre autres par deux archers de la garde de sa maistresse, qui furent bien recognuz, lesquels de premiere abordee, & sans qu'on se desfiast d'eux, naurerent le dict Dolu par derriere, blessèrent aucuns de ses gens, & leur osterent tout ce qu'ils portoient, dont on n'a onques peu depuis auoir aucune restitution, combien que deux des brigands furent apprehendez par le iusticier du lieu, & mis en la tour de Londres. Car en lieu d'estre puniz cōme le cas le requeroit, ils furent incontīnēt eslargis des prisons avec salaire & recōpense de leurs peines. Ce n'estoit pas assez d'auoir seduiēt & suborné le Cōte d'Arān à se desrobber de France à fin de dresser le complot general de la reuolte de toute la noblesse d'Escoffe, en l'an 1559. le repaissant d'vne vaine esperance

de son mariage, & en fin le ruiner, d'auoir abusé l'esprit ambitieux du frere bastard de la Royne avec infinies promesses de pésions & gouuernemés, à fin de l'armer cōtre sa maiesté: d'auoir seruy de garant & de refuge aux rebelles, leur aydant d'argent & de conseil comme ils se deuoient gouuerner, & dissimuler iusques à ce qu'ō leur eust impetré leur paix & reconciliation, à fin que plus facilement ils meissent en effect ce que depuis ils ont exécuté traitreusement: d'auoir pratiqué les meurtres premierement du secretaire David & puis du Roy son maistre, & cepédāt feindre n'auoir riē sceu de ses menees, ains au cōtraire faire sembāt d'estre fort offēsee, & de vouloir punir tels paricides, cōbien q̄ les principaux auteurs & ministres d'iceux estoiet à Beruik, qui hasterēt l'exécution par l'aduis de ceux du cōseil de Lōdres qui leur dōnerēt le mot, & mōstrerēt les moyēs & oportunité, & quād il fut besoin mirent le feu aux estoupes: d'auoir attiré

en son pays par lettres & par Ambassa-
des, la Roynie fuyante la fureur de ses re-
belles, & y estant en lieu de luy prester le
secours promis & iuré, l'auoir emprison-
née fort estroictemēt, luy ostant ses ser-
uiteurs & seruantes d'alentour d'elle, qui
deuoient estre aupres de sa personne pour
sa grandeur, pour son honneur, pour son
assurance, defendāt qu'aucun ne confe-
rast avec elle ny de bouche, ny par escrit,
qu'elle n'enuoyast, ou receust aucunes
nouuelles, qu'elle n'eust aucun confort
ou soulagement à elle enuoyé, fut en ar-
gēt, ioyaux, ou autre chose quelconque,
reputant pour seditieux, trahistres, iniu-
rieux, & mesdifans d'elle, & attaincts de
rebellion & crime de lese maiesté, ceux
qui la consoloient par escrit, qui parloient
à elle, qui la regardoient en pitié, qui fai-
soient quelque bon rapport d'elle, qui lou-
oient ses honnestetez, son bon naturel,
la rareté de ses graces, la modestie en ses
actions, sa sagesse, sa beauté, sa vertu, &

autres bonnes parties, voire qui professoient le moindre mot à son aduantage, ou tant soit peu pour l'excuser, en defendant son honneur, & soustenant son innocence: d'auoir empoisonne l'Euesque de Rosse son Ambassadeur: d'auoir gehé- né par diuers tourmens Charles Bailly son seruiteur pour auoir voulu publier vn petit liuret contenât la defense de son honneur, d'auoir à diuerses fois enuoyé des armées pour ruiner son Royaume, pour demolir & abatre ses forteresses, pour brusler & saccager ses villes, pour assister ses rebelles & trahistres par elle gagez & entretenuz, leur soudoyant des hommes de guerre, les recompensant par ses presens, & les fortifiant de ses pensions annuelles, & au contraire persecutant & chassant ses fideles seruiteurs de lieu en autre par force publique, les tourmentant en diuerses sortes, gastant & saccageant leurs terres, bruslant leurs maisons, ruinant leurs chasteaux, en

faisant meurtrir, escarteler & tenailler
ceux de la noblesse qui tōboiēt és mains
des regens & gouuerneurs par elle or-
donnez: d'auoir vollé & brigandé tous
ses subiets indifferemment de quelque
religion qu'ils fussent: Ce n'estoit pas as-
sez, di-ie, d'auoir exercé toutes ces cruau-
tez à l'édroiēt de ceste trefillustre & tref-
noble Princesse, si par mesme moyen el-
le ne brauoit le Roy de France, en exce-
dant & outrageant ses officiers, en les de-
stroussant par les chemins, à fin de de-
stourner tous les Princes Chrestiens, inti-
mider & decourager leurs suiets & ser-
uiteurs, qu'ils ne s'hasardassent pas de
vouloir apporter aucun contentement,
resiouyssance ou consolation à leur pa-
rente affligee contre tout droiēt & rai-
son. On dict qu'il n'y a rien si cruel qu'une
vieille putain, comme nous voyons
l'experience aux gouges qui suyuent
vn camp. Car ce que les soldats & gens
de guerre ont en horreur ces vilaines

l'executent barbarement. Apres vne def
 faicte elles attendent au champ de la ba-
 taille recherchant les corps les vns apres
 les autres pour la despouille, & pour a-
 uoir vne chemise ou vn porpoint, elles
 esgorgent les hommes qu'elles trouuēt
 respirants, & non encores à demy morts.
 C'est vne cruauté estrange remarquee
 en ce sexe, qui d'ailleurs est le plus hu-
 main, le plus doux, pitoyable, clement &
 misericordieux du monde. Mais ceste in-
 humanité plus que Scythique n'aduient
 qu'à celles qui toute leur vie ont esté pro-
 diges de leurs corps. Il ne faut donc-
 ques pas s'estonner si ceste vieille re-
 lique de Robert Dudely, & de plu-
 sieurs autres assez bien congneuz &
 renommez par l'Europe a eu le cœur
 d'ainsi traicter la Royne sa cousine,
 nonobstant toutes ses remonstnan-
 ces, & plus que iustes doleances, qui eus-
 sent peu emouuoir vne ~~tyrannie~~ *Cyprienne* ou
 vne tigresse à pitié & compassion.

Elle ne se contentoit de trauailler ceste
 princesse en son corps & en son ame,
 mais aussi en la personne de son fils pour
 luy rengreger ses douleurs. Car par ses
 menees & intelligences avec les trahi-
 stres d'Escoffe elle le fait prendre prison-
 nier au moys d'Aoust 1582. Auquel tēps
 c'estoit faict de la mere & du fils, s'il ne se
 fust sauué, & eschapé de leurs mains san-
 glantes par la grande prouidence de
 Dieu, qui a voulu conseruer cet enfant
 Iunonien à fin de venger quelque iour
 les iniures enormes, excès & outrages
 barbarement faits à sa mere par la suscita-
 tion, ayde & support de ceste bastarde
 maudite de Dieu & des hommes. La pau-
 ure mere ayant sceu le vent de ceste cap-
 tiuité, cuida mourir d'une extreme mala-
 die qui la faisoit cōme les medecins mel-
 mes d'Angleterre feirēt le rapport à leur
 maistresse, qui ne demandoit pas mieux,
 ayant desia le fils en sa puissance, & en-
 tre les mains de ceux qui de tout temps
 estoient

estoiēt à sa deuotiō. Ce q̄ sa mere craignāt
 & redoutant grandement, depourueue
 de tout ayde & secours, apres s'estre adres-
 see à Dieu avec prieres & oraisons, meit
 la main à la plume pensant obtenir quel-
 que grace, & adoucir la felōnie de sa cou-
 sine par le discours, que i'ay mis icy tout
 au lōg, tāt pour la iustificatiō qu'il cōtiēt de
 plusieurs points qu'ō luy mettoit sus, cō-
 me causes & moyens de sa longue detenti-
 on & mauuais traitemēt, que pour la cō-
 firmation de mō dire en la plus part de ce
 que i'ay cy dessus deduiēt, en vous demō-
 strant le cœur inhumain, tyrannic, felō &
 barbare de sa cousine pire qu'Angloise.
 “ Madame sur ce qui est venu à ma co-
 “ gnoissāce des dernieres conspirations
 “ executees en Escosse contre mon pau-
 “ ure enfant, ayant toute occasion d'en
 “ craindre la consequence, à l'exemple de
 “ moy mesme, il faut que i'ēploye si peu
 “ de vie & de force qui me reste, pour de-
 “ uāt ma mort vous descharger plainemēt

“ mon cœur de mes iustes & lamentables
 “ plaintes, desquelles ie desire que ceste
 “ lettre vo^s serue tāt que vo^s viurez apres
 “ moy d’un perpetuel tesmoignage & gra
 “ ueure en vostre cōsciēce, tant à ma des
 “ charge pour la posterité, qu’à la hōte &
 “ cōfution de to^s ceux qui sous vostre ad
 “ ueum^t ont si cruellement & indignemēt
 “ traictēe iusques icy, & menēe à l’extre
 “ mité où ie suis. Mais d’autant que leurs
 “ desseins, pratiques, actions & procedu
 “ res, pour detestables qu’elles puissent a
 “ uoir esté ont tousiours preualu en vo
 “ stre endroit contre mestres iustes remō
 “ strāces & sincerēs deportemens, & que
 “ la force que vous auez en main vous a
 “ tousiours donné la raison entre les hō
 “ mes, j’auray recours à Dieu viuant, no
 “ stre seul iuge, qui nous a esgallement &
 “ immediatement sous luy establies au
 “ gouuernemēt de son peuple, ie l’inuo
 “ queray à l’extremité de ceste miēne trel
 “ vrgente afflictioⁿ pour retribuer à vous
 “ & à moy (cōme il fera à son dernier iuge

"mēt) la part de noz merites & demerites
 "l'vne vers l'autre. Et souuenez vo⁹, mada
 "me, qu'à luy nous ne scaurions rien des-
 "guiser par les fars & polices du monde
 "ores que mes ennemis sous vous puiffēt
 "vn tēps couvrir aux hōmes, par auāture
 "à vous leurs subtiles inuentions. En son
 "nom & comme deuant luy seant entre
 "vous & moy, ie vo⁹ ramēteuray que par
 "les agēts, espies & mēssagers secrets en-
 "uoyez sous vostre nom en Escosse, durāt
 "que i'y estois, mes subiets ont esté corō
 "pus, & suscitez à se rebeller cōtre moy, à
 "attēter cōtre ma persōne, & en vn mot
 "à dire, faire, entreprēdre & executer ce
 "q̄ durant mes troubles est aduenu audit
 "pays: dōt neveux à presēt specifier autre
 "verificatiō q̄ celle q̄ i'ē tiray par la cōfes
 "siō & tesmoins à luy cōfrōtez d'vn qui
 "depuis a esté despl⁹ aduācez de sō bōser
 "uice, ell' entēd Thomas Randolph ambas
 "sadeur ordinaire d'Elizabeth en Escos
 "se, qui sous ombre de son office y a fait

“ dix mille trahisons à la Royne d’Escof-
“ se, corrompant ses subiets par or & ar-
“ gent pour les inciter à rebellion cōme
“ il a esté verifié par le proces à luy faict
“ Auquel si i’eusse deslors faict iustice, il
“ n’eust depuis par ses anciennes intel-
“ ligences renouellé les mesmes prati-
“ ques contre mon fils, & n’eust moyen-
“ né à tous mes trahistres & rebelles sub-
“ iets refugiez vers vous, l’ayde & support
“ qu’ils en ont eu, mesmes depuis ma de-
“ tention par deça, sans lequel support
“ ie pense que lesdits trahistres n’eussent
“ deslors preualu, ne depuis si longue-
“ ment subsisté comme ils ont faict. Du-
“ rant ma prison de Lochleuin feu Trog-
“ marton me conseilla de vostre part de
“ signer ceste demission, qu’il m’aduertif-
“ soit ne deuoir estre presentee, sur asseu-
“ rance qu’elle ne pouuoit estre valable.
“ Et depuis il n’y a eu lieu en la chrestie-
“ té où elle ait esté tenue pour telle, ne
“ maintenue que par deça, iusques à a-

"voir assisté par force ouuerte les au-
 "theurs d'icelle. En ma conscience, ma-
 "dame, voudriez vous cognoistre pareil-
 "le liberté & pouuoir en voz subiets? Ce
 "neantmoins mon autorité a esté par
 "les miens transmise à mon fils lors qu'il
 "n'estoit capable de l'exercer. Et depuis
 "que ie l'ay voulu legitimemēt asseurer
 "en icelle estat en aage de s'en aider pour
 "son bien propre, elle luy est soudaine-
 "ment rauie, & attribuee à deux ou trois
 "trahistres qui luy en ayāt desia osté l'es-
 "fect, luy en osteront comme à moy & le
 "nom & le tiltre, s'il leur cōtredit en façõ
 "que ce soit, & par auāture la vie, si Dieu
 "ne pouruoit à sa preseruatiõ. Sortie q̃ ie
 "fus de Lochleuin preste à donner bat-
 "taille à mes rebelles, ie vous renuoyay
 "par vn gentil-homme expres vne ba-
 "gue de diamant, qu'autrefois i'auois re-
 "ceue de vous en Token, & avec asseu-
 "rance d'estre par vous secourue contre
 "mes rebelles, & mesme que me retirant

“ vers vo^r, viédriez iusque sur la frôtiere
 “ m’assister, ce que par diuers messagers
 “ m’auoit esté confirmé. Ceste promesse
 “ venant & reiteree de vostre bouche (o-
 “ res q̄ parvoz ministres ie me fusse trou-
 “ uee souuēt abusee) me fit prendre telle
 “ fiâce en l’effet d’icelle, q̄ la route de mō
 “ cāp suruenue ie me vins droit ietter en
 “ trevoz bras si i’en eusse peu approcher,
 “ Mais deliberant de vous aller trouuer,
 “ me voyla à my chemin arrestee enuiron-
 “ nee de gardes, réfermee dās des places
 “ fortes, & en fin reduite, toute hôte pas-
 “ see, en la captiuité où ie meurs aujour-
 “ d’huy apres mille morts que i’y ayia
 “ souffertes. le sçay que vo^r m’allegueriez
 “ ce qui s’est passé entre le feu Duc de
 “ Northfolk & moy. le maintiens qu’il n’y
 “ auoit rien à vostre preiudice, ne contre
 “ le bien public de ce royaume, & que le
 “ traitté fut approuué par l’aduis & si-
 “ gnatures des premiers qui estoient lors
 “ de vostre conseil, avec assurance de le
 “ vous faire trouuer bon. Comment tels

"personages eussēt ils entrepris devo^r fai
 "re, consētir à ce qu'on vous ostat la vie,
 "l'honneur & la couronne, cōme vous vo^r
 "en demonstrez persuadée à tous ambaf
 "sadeurs & autres qui vous parlent de
 "moy? Cependāt mes rebelles s'apperce-
 "uants que leur cource precipitee les em-
 "portoit plus outre qu'ils n'auoient pour-
 "pensé, & la verité estant apparue des im-
 "postures qu'ō semoit de moy par la con-
 "ference à laquelle ie me soubmisen plei-
 "ne assemblee devoz deputez & desmiēs,
 "avec les autres de partie contraire, en
 "ce pais pour m'en esclaircir publique-
 "mēt. Voyla les principaux pour estre ve-
 "nus à resipiscēce par voz forces assiegez
 "au chasteau d'Edimbourg, & vn des pre-
 "miers d'être eux ēpoisoné, & l'autre tres
 "cruellemēt pēdu, apres q̄ par deux fois ie
 "leur auois fait mettre les armes bas à vo-
 "stre req̄ste en esperāced'accort, où Dieu
 "sçait si mes ēnemis tēdoient (~~Ce fut le se-~~ *le 11 may*
 "cretaire Lindinton qui fut empoisoné

“de peur qu’il decouurist la mort du roy
 “& toutes leurs traïsons: le barõ de gran
 “ge & son frere furent penduz). I’ay vou
 “lu par vn long tẽps experimenter si la
 “patiẽce pourroit amender la rigueur,
 “& mauuais traitement qu’on cõmẽça
 “specialement depuis dix ans à m’vser,
 “& m’accommodant exactement à l’or
 “dre qui m’estoit prescrit pour ma ca
 “ptiuité en ceste maison, tant pour le
 “regard du nombre & qualité des serui
 “teurs que ie retins licẽtiant les autres,
 “que ma diette & exercice ordinaire
 “pour ma santé, i’ay vescu iusques à pre
 “sent aussi quietement & paisiblement
 “qu’vn beaucoup moindre que moy, &
 “plus obligé, que pour tel traictement
 “ie ne vous estois, eust peu faire, iusqu’à
 “me priuer, pour vous oster tout ombre
 “de soupçon & deffiãce de requerir à a
 “voir aucune intelligence de mon fils &
 “mon pays, ce que par nul droit ne rai
 “son ne me pouuoit estre denié, & prin

"cipalement de mon enfant, lequel au
 "lieu de ce on trauailloit par toute voye
 "de persuader contre moy, à fin de nous
 "affoiblir par nostre diuision. Il me fut
 "permis, direzvous, il y a trois ans de l'é-
 "uoyer visiter. Sa captiuité lors à Ster-
 "lin sous la tyrannie de Morton en fut
 "cause, cōme sa liberté l'a depuis esté d'-
 "vn refus pour pareille visitation toute
 "ceste annee passée, ie suis par plusieurs
 "fois étreue en diuerses ouuertures pour
 "l'establissémēt d'une bōne amitié entre
 "no^s, & seure intelligēce d'être ces deux
 "royaumes à l'aduenir. A Chatifuorts il
 "y a enuiron dixans que cōmissaires me
 "furent enuoyez à cest effect. Il en a esté
 "traité avec vo^s mesme par les ambassa-
 "deurs de Frāce & les miens. Moy-mes-
 "me i'en feis l'hyuer dernier toutes les
 "aduātageuses ouuertures à Reale qu'il
 "estoit possible. Que m'en est-il reuenu?
 "Ma bonne intention mesprisee, la sīce
 "rité de mes deportemens negligee &

“calomniee, l'estat de mes affaires tra-
 “uerfé par delaiz, surmises & tels autres
 “artifices. Et pour cōclusion, pire & plus
 “indigne traictement de iour à autre,
 “quelque chose que ie me sois efforcee
 “de faire pour deseruir le contraire, ma
 “trop longue, inutile, & dōmageable pa-
 “tience m'ayant amené à ce poinct, que
 “mes ennemis par leur accoustumance
 “de me mal-faire pensant au iourd'huy
 “auoir droit de prescription de m'vser,
 “non comme prisonniere, telle que par
 “raison ie ne puis estre, mais cōme quel-
 “que esclau, dont la vie & la mort depē-
 “dēt sans aucū respect de la loy de Dieu
 “ne des gens, de leur seule tyrānie. Ie ne
 “le puis, madame, plus longuemēt souf-
 “frir, & faut qu'en mourāt ie descouure
 “les auteurs de ma mort, ou que viuāt
 “i'essaye sous vostre protection à faire
 “mourir les cruantez, calomnies & traï-
 “stres desseins de mesdits ennemis pour
 “m'establir quelque peu plus de repos

« pour ce qui me reste à viure. Pour vui-
 « der les occasions pretēdues de tous di-
 « ferēs entre nous, esclarcissez vo^r s'il vo^r
 « plaist de tout ce qui vous a esté raporté
 « de mes deportemēs: faites reuoir les de-
 « positions des estrāgers pris en Irlande:
 « que celle des Iesuites dernieremēt execu-
 « tez vo^r soiēt representees: dōnez libertē
 « à ceux qui voudrōt entreprēdre de me
 « charger publicquemēt & me permettez
 « d'ētrer en ma defēse: s'il s'y trouue mal,
 « que ie le patisse, ce sera patiēmēt, quād
 « i'en sçauray l'ocasiō: si du biē, ne le mes-
 « cognoissez pas, & ne souffrez que i'en
 « sois plus mal retribuee avec vostre tref-
 « grāde charge deuāt Dieu & les hōmes.
 « Les plus vils criminels, qui sont en vos
 « prisons, naiz soubs vostre obeissance,
 « sont receuz à leurs iustifications, &
 « leur sont tousiours declarez leurs ac-
 « cusateurs, & leurs accusations. Pour-
 « quoy donques le mesme ordre n'aura
 « il lieu enuers moy Royne souueraine,

“vostre plus proche parente & legitime
“heritiere. Je pense que ceste derniere
“qualité en a esté iusques icy la principa
“le cause à l’édroit de mes ennemis, & de
“toutes leurs calomnies, pour en nous
“tenant en diuision faire glisser entre
“deux leurs iniustes pretentiōs. Mais he-
“las ! ils ont maintenant peu de raison
“& moins de besoin de me tourmenter
“d’auātage pour ce regard. Car ie vous
“proteste sur mon honneur que ie n’at-
“tens aujourd’huy royaume, q̃ celuy de
“mon Dieu, lequel ie me voy preparer
“pour la meilleure fin de toutes mes af-
“flictions & aduersitez passees. Ce sera à
“vous de descharger vostre conscience
“vers mon enfant pour ce qui luy appar-
“tiendra apres ma mort en cest endroit,
“& ce pendant de ne laisser preualoir à
“son preiudice les continuelles pratic-
“ques & menees secretes que noz enne-
“mis en ce royaume font iournellemēt
“pour l’aduancement de leursdites pre-

"tentions, trauaillant d'autre costé avec
 "noz traistres subiets en Escosse par tous
 "les moyens qu'ils peuuent pour haster
 "sa ruine. d'ot ie ne demande autre meil
 "leure verification que les charges don-
 "nees à voz derniers deputez enuoyez
 "en Escosse, & ce que lesdits deputez y
 "ont seditieusement prattiqué, comme
 "ie croy, à vostre desceu, mais avec bon
 "ne & suffisante sollicitation du comte
 "mon bon voisin à York (~~elle entend le~~ *de*
 "~~comte de Houdinton~~). Et à ce propos,
 "madame, par quel droit se peut main-
 "tenir, que mere de mō enfant, ie sois to-
 "tallemēt interdite non seulement de le
 "subuenir en la necessité si vrgente où il
 "est, mais aussi d'auoir aucune cognois-
 "sance de son estat? Qui y peut apporter
 "plus de soin, deuoir & sincerité que
 "moy? A qui peut-il toucher d'auātage?
 "Pour le moins si enuoyāt vers luy pour
 "se pouruoir à sa preservation, ainsi que
 "le cōte de Cherusbery m'a fait dernie-

« rement entédre de vostre part, il vous
 « eust pleu receuoir en cela mon aduisa-
 « uec meilleure occasion, ce me semble,
 « & plus d'obligation vers moy vous y
 « fussiez interuenue. Mais considerez ce
 « que m'avez laissé à penser quād oubliāt
 « si soudainement les offenses que vous
 « pretédiez cōtre mon fils lors que ie vo⁹
 « requerois que nous enuoyassions en-
 « semble vers luy, vous avez depesché où
 « il estoit prisonnier, non seulement sans
 « m'en dōner aduis, mais me restraignāt
 « au mesme temps de toute liberté à fin
 « que par voye quelconque, ie n'en eusse
 « aucunes nouuelles. Que si l'intétion de
 « ceux qui ont moyéné en vostre édroit
 « ceste si prōpte visitation de mon fils a
 « esté pour sa preservation & le repos du
 « païs, ils ne doiuent estre si soigneux de
 « le me celer, cōme chose en quoy ie n'
 « eusse voulu cōcurrir avec vous, & vous
 « ont par ce moyē fait perdre le gré que
 « ie vous en deuois auoir, & pour vous en

« parler plus plainement, ie vous prie de
 « n'y vser plus de tels moyens, ny per-
 « sonnes. Car encores que ie tiens le
 « le sieur de Kerri trop se ressentât du lieu
 « dont il est sorti pour engager son hon-
 « neur en aucun vilain acte. Il a eu vn
 « assistant partisan iuré du comte de
 « Hondinton, par les mauuais offices,
 « duquel vne si mauuaise action n'a peu
 « reussir qu'à pareil effect. Il me suffira
 « d'oc seulement que vous ne permettiez
 « que de ce pays mon fils ne reçoie au-
 « cun dōmage: qui est tout ce que i'ay ia
 « mais requis de vous cy deuant, mesme
 « lors qu'une armee fut enuoye sur la frō
 « tiere pour empescher la iustice estre fai-
 « te de ce detestable Morton, & que nul
 « des vostres directement ou indirecte-
 « ment s'entremesse d'auantge des affai-
 « res d'Escoffe, si ce n'est de mon sceu, à
 « qui toute cognoissance en appartient,
 « ou avec assistance de quelqu'un de la
 « part du Roy treschrestien mon bon

C'estuy-
 cy est le
 fils aîné
 du Mi-
 lord
 Hosden
 parent
 d'Eliza-
 bet.

“ frere le quel comme nostre principal al-
“ lie ie desire faire participant de tout en
“ ceste cause pour peu de credit qu’il puif
“ se auoir avec les trahistres, qui detien-
“ nent mon fils à present. Cependant ie
“ vous declare tout ouuertement, que ie
“ tiens ceste derniere conspiration & in-
“ nouation pour vne pure trahison con-
“ tre la vie de mon fils, le bien de ses affai-
“ res, & celuy du pays, & que tant qu’il
“ sera en l’estat que i’entens qu’il est, ie
“ n’estimeray parole, escriture, ou autre
“ acte qui vienne de luy, ou se passe sous
“ son nom procedé de sa franche & libre
“ disposition, mais seulement desdits con-
“ spirateurs, qui au prix de sa vie se fer-
“ uēt de luy pour masque. Or madame a-
“ uec toute ceste liberté de parler, laquel
“ le ie preuoy vous pouuoiren aucune
“ chose desplaire, ores que ce soit la veri-
“ té mesme, vous trouuerez, ie m’asseure,
“ d’auantage estrāge, que ie vienne main-
“ tenāt à vous importuner encore d’une
requeſte

"requeste de beaucoup pl⁹ grāde impor
 "tance, & neantmoins trefaisée à vous
 "de me l'octroyer & effectuer. C'est que
 "n'ayant peu iusqu'icy, en m'accommo-
 "dant patiemment si long tēps au rigou-
 "reux traitemēt de ceste captiuité, & me
 "deportant sincerement en toutes cho-
 "ses, voire iusqu'aux moindres, qui vous
 "touchoient bien peu, m'acquérir quel-
 "que assurance de vostre bonne grace,
 "ne vous en donner aucune de mon en-
 "tiere affection vers vous, tout'esperāce
 "m'estant par là ostee d'auoir mieux en
 "si peu de temps qui me reste à viure, ie
 "vous supplie en l'hōneur de la doulou-
 "reuse passion de nostre Sauueur & re-
 "dempteur Iesus Christ, ie vous supplie
 "encor' vn coup me permettre de me re-
 "tirer hors de ce royaume en quelque
 "lieu de repos, pour chercher quelque
 "soulagement à mon pauvre corps tant
 "trauailé de continuelles douleurs, &
 "avec liberté de ma consciēce preparer

“mon ame à Dieu qui l'appelle iournal-
 “lement. Croyez, madame, & les mede-
 “cins que vous m'enuoyastes cest este
 “dernier le peuuent auoir assez iugé, que
 “ie ne suis pour la faire longue, de sorte
 “qu'il ne vous peut rester aucun fonde-
 “mēt de ialousie ou deffiāce de ma part.
 “Et ce neantmoins prenez de moytelles
 “asseurances & conditions iustes & rai-
 “sonnables quevous les voudrez. La for-
 “ce plus grande reste tousiours de vostre
 “costé pour ~~ne~~ les faire garder, ores que
 “pour chose quelconque ie ne les vou-
 “fisse rompre. Vous avez assez eu d'expe-
 “rience de l'obseruation de mes simples
 “promesses & quelquefois à mon preiu-
 “dice, comme ie vous remonstray sur ce
 “mesme subiet il y a deux ans. Souuenez
 “vous sil vous plaist de ce que ie vous
 “escriuis lors, & que par nulle voye que
 “de douceur vous ne scauriez tant obli-
 “ger mō cœur à vous, ores quevous cō-
 “finies à perpetuité mon pauvre corps
 “languissāt entre quatre murailles, ceux

"de mon rang & naturel n'estant pour se
 "laisser gagner, ou forcer par aucune ri-
 "gueur. Vostre prison sans aucun droit
 "& iuste fondement a ia instruit mon
 "corps, duquel vo' aurez bientost la fin,
 "s'il y continue gueres d'auantage & n'au-
 "ront mes enenmis beaucoup de temps
 "pour assouvir leurs cruautez sur moy, il
 "ne me reste que l'ame, laquelle il n'est
 "en vostre puissance de captiuer. Donnez
 "luy dōques lieu de respirer vn peu plus
 "libremēt son salut, que seul elle cherche
 "aujourd'hui, plus que nulle grādeur de
 "ce mōde. Il me sēble que ce ne vous scau-
 "roit estre beaucoup de satisfactiō, hō-
 "neur & aduantage, q̄ mez ennemis pressēt
 "ma vie aux pieds iusques à m'auoir estouf-
 "fé deuāt vo', au lieu que si en ceste extre-
 "mité, quoy q̄ trop tard, vo' me releuez
 "d'être leurs mains, vous m'obligerez grā-
 "demēt à vo', & tous ceux qui m'appartiē-
 "nēt, speciallemēt mō pauvre enfant, du-
 "quel par là vous vo' pourrez parauēture

“asseurer. Je ne cesseray de vous impor-
“tuner incessamment de ceste requeste
“iusqu’à ce qu’elle me soit accordée. Et
“pource ie vous prie me faire entendre
“vostre intention, ayant pour vous com-
“plaire attendu iusqu’à present depuis
“deux ans pour en renouveler l’instâce
“dont l’estat miserable de ma santé me
“presse plus que ne le pourriez penser.
“Cependant pouruoyez s’il vous plait
“à l’amendement de mon traitemēt par
“deça, qu’il n’est en ma puissance de souf-
“frir plus longuement, & ne me remet-
“tez à la discretion d’autre quelconque,
“que de vous-mesme, de qui seule (com-
“me ie vous escriuois dernièrement) ie
“veux d’oresnauant tenir tout le bien &
“le mal que ie receuray en vostre pays.
“Faites moy ceste faueur que i’aye vo-
“stre intention par escrit, ou l’ambassa-
“deur de France pour moy. Car de m’ar-
“rester à ce que le comte de Scherufben
“ou autres en diront ou escriront devo

"stre part, i'ay trop d'experience qu'il n'y
 "peut auoir assurace pour moy: le moin-
 "dre subiet qu'ils se fantasiront estat suf-
 "fisant pour innouer le tout du iour au
 "lendemain. (~~Elle vfe de ce mot, parce~~
 "~~que le cote de Scherufbery son gardie~~
 "~~est homme fort quinteux & fantasque~~)
 "Outre ce dernièrement que i'escruiis à
 "ceux de vostre conseil, vous me feistes
 "entendre que ie ne me deuois adres-
 "ser à eux, mais à vous seule: Et ainsi d'e-
 "stendre seulement leur credit & autho-
 "rité à me mal faire, il ne seroit raisonna-
 "ble, comm'il est aduenue en ceste dernie-
 "re restriction, ou contre vostre inten-
 "tion, i'ay esté plus qu'indignemēt trait-
 "tec. Cela me donne toute occasion de
 "doubter, qu'aucuns de mes ennemis en
 "vostre dit conseil n'ayent expres pro-
 "curé que les autres dudit conseil ne fus-
 "sent participans de mes iustes com-
 "plainctes, ne voyans parauanture leurs
 "compagnons adherer à leurs meschans

et margale
 Subz al me
 fantasie d'ou

“attentas contre ma vie ou que s'ils en
“auoient cognoissāce ils s'y opposeroiēt
“pour vostre honneur , & leur deuoir
“vers vous. Deux choses en fin ay ie prin
“cipallemēt à requerer, l'vne que proche
“comme ie suis de partir de ce monde
“ie puisse auoir pres de moy pour ma cō
“solation quelque honorable homme
“d'Eglise, afin de me ramenteuoir iour-
“nellement le chemin que i'ay à para-
“cheuer , & m'instruire à le parfaire se-
“lon ma religion, où ie suis fermement
“resolue de viure & mourir. C'est vn der-
“nier deuoir qu'au plus chetif & mise-
“rable qui viue ne se pourroit denyer.
“C'est vne liberté que vous donnez à
“tous les Ambassadeurs estrangers,
“come aussi tous autres Roys Catho-
“liques donnent aux vostres exercice
“de leur religion . Et moy mesme ie
“n'ay iamais forcé mes propres sub-
“iets à aucune chose contraire à leur re-

"ligion, ores que i'eusse tout pouuoir
 "& autorité sur eux, & que ie fusse en
 "ceste extremité priuee de telle licen-
 "ce, vous ne le pouuez iustement fai-
 "re. Quel aduantage vous reuiendra
 "ilquand vous me le denyerez? i'espe-
 "re que Dieu m'excusera si par vous de
 "ceste façon oppressee, ie ne laisse de
 "luy rendre le deuoir qu'en mon cœur
 "me sera permis. Mais vous donnerez
 "tres-mauuais exemple aux autres prin-
 "ces de la Chrestienté d'vser vers leurs
 "subiets la mesme rigueur que vous me
 "tiendrez Royne souueraine & vostre
 "plus proche parente, comme ie suis &
 "seray tant que ie viuray en despit de
 "mes ennemis. Je ne vous veux impor-
 "tuner maintenant de l'augmentati-
 "on de ma maison, dont pour le temps
 "que ie me voy arrester à viure au mon-
 "de ie n'auray pas tât de besoin. Je vous
 "demande doncques seulement deux

“ femmes de chambre pour me subue-
 “ nir durant ma maladie, vous attestant
 “ deuant Dieu qu’elles me sont tresne-
 “ cessaires, quand ie serois vne pauvre
 “ creature d’entre le simple peuple : Ac-
 “ cordez les moy en l’honneur de Dieu,
 “ & demonstrez que mes ennemis n’ont
 “ tant de credit avec vous contre moy,
 “ que d’exercer leur vengeance & cruau-
 “ té en chose de si peu de consequence,
 “ & dependant d’un simple office d’hu-
 “ manité.

“ Ie viēdray maintenāt à ce que le com-
 “ te de Scherufbery m’a chargée (sivn tel
 “ que luy me peut charger) c’est à sçauoir
 “ que contre ma promesse faite à Beale,
 “ & à vostre desceu, i’ay negocié avec mô
 “ fils, pour luy ceder mon tiltre à la cou-
 “ ronne d’Escoffe, m’estant obligee de
 “ n’y proceder qu’avec vostre aduis, par
 “ vn de mes seruiteurs, qui en leur com-
 “ mun voyage seroit dirigé par l’un des
 “ vostres. Ce sont, me semble, les mesmes

" termes dudit comte. Je vous diray la
 " dessus, madame, que Beale n'a iamais
 " eu aucune simple & absoluë promesse
 " de moy, mais bien des ouuertes con-
 " ditionnelles, desquelles ie ne pouuois
 " en façon que ce soit rester liee sans la
 " prealable performance des conditions
 " que i'y auois aposees, ausquelles tant
 " s'en faut qu'il ait esté satisfait, qu'au con-
 " traire ie n'en ay iamais eu aucune res-
 " ponce, ny de sa part ouy faire mention
 " depuis. Et pour ce respect il me souuiët
 " tresbien que le comte de Scherufbery
 " vers Pasques dernieres voulant tirer
 " de moy nouuelle confirmation de ce
 " que i'auois dit audit Beale, ie luy repli-
 " quay tout plainement, que c'estoit seu-
 " lement au cas que lesdites conditions
 " me fussent accordees, & consequem-
 " ment effectuees. L'un & l'autre sont
 " encores viuants pour le vous tesmoi-
 " gner, s'ils en veulent dire la verité.
 " Depuis voyant que nulle responce m'e

" estoit faicte : ains au contraire que par
 " delays & surmises mes ennemis conti-
 " nuoient plus licentieusement que ia-
 " mais leurs pratiques basties dés le se-
 " iour dudit Beale pres de moy, pour
 " trauerser mes iustes intentions en es-
 " cosse, ainsi que les effects l'ont bien
 " tesmoigné, & que par ce moyen la
 " porte demeuroit ouuerte à la ruyne
 " de mon fils & la mienne, ie pris vostre
 " silence pour refus, & me deschargeay
 " par lettres expresses tant à vous qu'à
 " vostre cōseil de tout ce que i'auois trai-
 " té avec ledit Beale. Ie vous feis bien par-
 " ticipante de ce que le Roy Monsieur,
 " & la Royne Madame, m'auoient escrit
 " de leurs mains propres sur cest affaire
 " & en requis vostre aduis, qui est en-
 " cores à venir, avec lequel mon inten-
 " tiō à la verité estoit de proceder, si vo-
 " me l'eussiez en temps departi, & vous
 " m'eussiez permis d'euoyer vers mō fils,
 " m'assitant és ouuertes que ie vous a-

"uois proposees, pour establir entre ces
 "deux royaumes vne bonne amitié
 "& parfaite intelligence à l'aduenir.
 "Mais de m'obliger nuemēt à suiure vo-
 "stre aduis, deuant que sçauoir quel il
 "pourroit estre & de' soumettre pour le
 "voyage de noz gens le mien à la dire
 "ction du vostre, mesmement en mon
 "païs propre, ie ne fusiamais si simple
 "que de le penser. Mainténāt ie remets
 "en vostre consideration, si vous auez
 "sceu le faulx ieu que mes ennemis par
 "deça m'ont ioué en Escosse, pour ame-
 "ner les choses au point qu'elles sont,
 "lequel de nous y a le plus sincerement
 "procedé. (elle entend l'éprisonnement
 "du Roy son fils fait à Reuē) Dieu soit iu-
 "ge entre eux & moy, & destourne de ce
 "ste isle la iuste punition de leurs demeri-
 "tes: renuoyez encor vn coup les aduer-
 "tissemens que mes trahistres subiects de
 "Escosse vous peuuent auoir donnez,
 "vous trouuerez & ie le maintiédray de-
 "uant tous les Princes Chrestiens qu'il

ne s'y est passé de ma part chose quelcō
 que à vostre preiudice, ne contre le
 bien & repos de ce royaume, lequel ie
 m'affecte moins que conseiller, ou sub-
 iet que vous ayez, y ayāt plus d'intrest
 qu'aucū d'eux. Il se parloit de gratifier
 mon fils du tiltre & nom de Roy, & d'as-
 seurer tant luy audit tiltre, que les re-
 belles de toute impunité de leurs of-
 fences du passé, & de remettre toutes
 choses en vn repos & tranquillité pour
 l'aduenir, sans aucune innouation de
 chose quelconque. Estoit ce oster la
 courone à mō fils? mes ennemis, cōme
 ie croy, ne la luy voudroiet estre seure
 & pour ce sont trescontens, qu'il la de-
 tienne par l'illegitime violēce d'aucuns
 trahistres ennemis de toute ancienneté
 à toute nostre race. Estoit ce la chercher
 iustice des offences passees desdits tra-
 histres, que ma clemēce a tousiours sur-
 passez? Mais mauuaise consciēce ne peut
 iamais s'asseurer, portant continuelle-

“ment la crainte en son plus grand trou
 “ble avec elle mesme. Estoit ce vouloir
 “alterer le repos du pays, que de la pro-
 “curer parvne douce abolitiō de toutes
 “choses passees, & generale reconcilia-
 “tion entre tousnozsubiets? C'estce que
 “nos ennemis par deça craignent autāt
 “qu'ilsfont demonstration de la desirer.
 “quel preiudice en celavouse estoit il fait?
 “marquez donques, & faites verifier s'il
 “vous plaist en quelle autre chose: I'en
 “responderay sur mon honneur. He! vou-
 “lezvous, madame, vous laisser tant aveu-
 “gler aux artifices de mes ennemis, que
 “pour establir apres vous, & parauentu-
 “re contre vous mesmes, leurs iniustes
 “pretentions à ceste couronne, vous les
 “souffriez vousviuante, & lesvoyant rui-
 “ner, & faire si cruellement perir ceux
 “quivous touchēt de si pres&en cœur&
 “en sang? Vous peut-ce estre iamais hon-
 “neur ne biē, que par eux mon enfant &
 “moy soyons si longuement separez, &

“ nous d’auec vous? Reprenez les ancien
 “ nes arches de vostre bon naturel, obli-
 “ gez les vostres à vous mesmes, donnez
 “ moy ce contentement auant que mou-
 “ rir, que voyant toutes choses bien re-
 “ mises entre nous, mon ame deliuree de
 “ ce corps ne soit contrainte d’espandre
 “ ses gemissemēts vers Dieu pour le tort
 “ que vous aurez souffert nous estre faict
 “ icy bas: ains au contraire en paix & con-
 “ corde avec vous departant hors de
 “ ceste captiuité s’achemine vers luy que
 “ ie prie vous bien inspirer sur mes sus-
 “ dites tref-iustes, & plus que raisonna-
 “ bles plainctes & doleances. A Sheffeld
 “ ce vingt huitiesme de Nouembre mil
 “ cinq cens octante deux.

“ Vostre tref-desolee, plus proche
 “ parente & affectionnee cousine
 Marie. R.

Voyla des belles remonstrances, voyla
 des iustifications fort, aparentes, voyla

des offres pleines de submission indeue
 & nullement raisonnable, voyla des prie
 res & requestes plusque ciuiles. Mais
 quoy? l'Angloise dissimulee comme de
 coustume, ne fait semblant de les en
 tendre, ains en lieu d'adoucir son cœur
 selon & barbare, luy tient plus de ri
 gueur qu'auparauant. Elle veut qu'elle
 meure, mais elle ne peut trouuer moyen
 de s'en desfaire avec apparence de raisõ,
 le sublimé de Guaschou Irlandois, qu'on
 luy auoit enuoyé pour cuisinier, auoit
 esté descouuert, & l'empoisonnement
 auéré: le saccagement ordonné par
 ceux du bourg d'Olifax à la suscitation
 de Vvalsinghame n'a peu estre execu
 té avec honneur, & avec le contente
 ment de ceux qui l'auoient comman
 dé. Ce n'est rien de tuer la Royne,
 prisonniere, si le fils est demeuré en
 vie, où sion ne trouue quelque pre
 texte & inuention bien specieuse &
 apparente pour leur raur le tiltre de

la couronne d'Angleterre au fils aussi bien qu'à la mere. Je serois trop loügi si ie voulois compter la centiesme partie des indignitez, qu'on a faict à ceste dame durant le temps de sa prison. Mais pour venir à la fin & comble de tout, l'Angloise voyant que les principaux de ses parens en France s'estoient liguez avec les Princes Chrestiens pour la deffence de la religion ancienne de leurs peres contre les hereticques, & autres ennemis iurez d'icelle, ne pouuant contenir le mal talent de son petit cœur offensé, elle faict pendre de nuit vn pauvre Catholique deuant & presque ioignant la fenestre où estoit couchee la Roynie, prisonniere, voulant dire qu'autant luy en pendoit à l'œil, & qu'elle s'en iroit par mesme chemin, si ses parens en France poursuyuoient leur entreprise. Dés ce temps elle confirma son esprit en ses desloyaux & traistreux desseins, &

print

print resolution de se deffaire d'elle à quelque prix que ce fust, en la priuant & semblablement son fils du droict qu'ils pouuoient iustement pretendre à la couronne d'Angleterre. Elle s'aduise avec son conseil Macchiauelistique que pour brauer messieurs de Lorraine & de Guise, & tous les bons & fidelles parens que sa maiesté auoit en France, il la failloit faire passer par la main d'un bourreau, & que neantmoins pour obuier à l'offence qu'elle pouuoit encourir enuers tous vrayes Roys & monarques par le contemnement & mespris de leur estat & dignité souueraine, non subiecte qu'à vn seul Dieu, il se falloir courir de l'ombre d'une iuste vengeance, & controuuer quelque crime, à fin de donner lustre à ceste iniurieuse & tyrannique façon de proceder, & persuader aux idiots (si au monde on en peut trouuer de si lourds & stupides) qu'on a fuiuy la voye de iustice, tout animosité mise arriere, en sequestrant la

rancune du temps passé, & toutes telles affections contraires à droict & à raison. Suyuant ce conseil Elisabet faict assembler son Parlement, & au nom d'iceluy publier vne ordonnance par elle sugeree, comme elle a de coustume de faire. Car ses estats sont tousiours à sa deuotion, & n'ordonnent iamais rien sinon ce qu'ils sçauent luy estre bien agreable.

Ce parlement commença le vingtiesme iour de Nouembre du vingtiesme an du regne d'Elisabet, & cōtinua iusques au vingtneufiesme de Mars ensuyuant. En la premiere seance fut expedie l'acte dont est question, portant ceste inscription en leur langue, *An acte for prouision to be ma de for the suertie of the Queenes maiesties most Royal person, and the continuance of the Realme in peace.*

C'est à dire, Acte concernant la prouision à la seureté de la trefroyalle personne de la maiesté de la Roynes, & la continuation du Royaume en paix.

Je mettrois icy ceste ordonnance en
 ses propres termes, si le lecteur les en-
 tendoit, mais à fin de ne perdre le
 temps & le papier en ce faisant, & pour
 monstrier les moyens exquis & affectez,
 qu'ils ont excogité pour colorer leurs
 desseins en faisant mourir ceste Princesse,
 ie l'ay traduit mot à mot en nostre lan-
 gue Françoisse, & employé & inseré en
 ce discours, comme s'ensuit.

" Pour autant que ce confort & gran-
 " de felicité de l'estat entier de ce Roy-
 " aume consiste apres Dieu en la preser-
 " uation & seureté de la tresexcellente
 " maiesté de la Royne, & nous estant ma-
 " nifestement apparu que plusieurs com-
 " plots & menées depuis n'aguères ont
 " esté dressées & entreprises aussi bien de
 " la la mer és pays estrâges & forains, que
 " dedâs ce Royaume au grâd danger &
 " preiudice de la tresroyalle personne de
 " son altesse, & à l'extreme ruine du bien

High
 esse.

"public, si par la misericordieuse proui-
 "dence de Dieu la chose n'eust esté reue-
 "lee: Pour ceste cause, & à fin de preue-
 "nir les grands perils qui autrement pour-
 "roient croistre par cy apres par le moyé
 "de telles pratiques detestables & diabo-
 "liques, à l'humble poursuite & serieu-
 "se petition & demande des seigneurs
 "spirituels & temporels, & du tiers estat
 "en ce present Parlement assemblez, &
 "de l'auctorité dudit Parlement, soit
 "faict vn acte & enregistré. Que s'il ad-
 "vient apres la fin de ceste presente cel-
 "sion du parlement, qu'aucune ouuerre
 "inuasion ou rebellion se face ou dresse
 "dedans aucun des Royaumes ou sei-
 "gneuries de sa maiesté, ou si aucune
 "chose est attentee tendante au detri-
 "ment de sa tresroyalle personne, par ou
 "en faueur d'aucune personne voulant
 "ou pouuant pretendre aucun droit
 "à la couronne de ce Royaume apres
 "le deces de sa maiesté, ou si aucune

Byorfoe
 may per
 sona.

"chose est proiectee ou imaginee au
 "preiudice de sa royalle personne par au
 "cun pretendant tel droict, ou de son
 "consentement science ou intelligence
 "du faiet, qu'alors par commission de sa
 "maiesté, expediee de son grand seau,
 "les Mi-lords, & autres de son conseil
 "priué, & tels autres Mi-lords ayās voix
 "en Parlement, qu'il plaira à sa maiesté
 "nommer, faisans avec ceux du conseil
 "priué le nombre de vingt quatre au
 "moins, assistez d'aucuns des iuges des
 "courts qu'on appelle de recorde à Vve
 "stmonster, tels qu'il plaira à sa maiesté
 "appoincter & ordóner pour ce regard
 "ou la plus grande partie dudit conseil
 "Mi-lords, & iuges, auront pouuoir &
 "auctorité en vertu de ceste ordonnan-
 "ce d'examiner toutes & chacunes tel-
 "les offenses susdites, & toutes les circon-
 "stances d'icelles, & la dessus donner sen-
 "tence ou iugement selon qu'ils verrót
 "par bonnes preuues le cas le requerir.

Vvith-
 the prim
 tie of a
 ny per-
 son.

“ Et apres telle sentence ou iugement
 “ donné, & declaration d'iceluy faicte &
 “ publiee par lettres de sa maiesté sous le
 “ grand sceau d'Angleterre, toutes per-
 “ sonnes contre lesquelles telle sentence
 “ ou iugement aura esté donné ou pu-
 “ blié en la maniere susdite, seront for-
 “ closes, deshabilitees, & rendues incapa-
 “ bles à iamais d'auoir, demander, ou pre-
 “ tendre aucun droict à la couronne de
 “ ce Royaume, ou en aucune des seigneu-
 “ ries de sa maiesté, non obstant toutes
 “ loix precedentes ou statuts à ce cōtrai-
 “ res. Et en vertu de ceste ordonnance, &
 “ de la commission de sa maiesté sur icel-
 “ le, tous les subiets de sa maiesté pour-
 “ ront iustement par tous moyens pos-
 “ sibles, soit par voye de faict ou autre-
 “ ment, poursuiure à la mort telle per-
 “ uerse & meschäte personne, par laquel-
 “ le, ou par le moyen, consentement, ou
 “ priuauté de laquelle aucune telle inua-
 “ sion, attentat, ou rebellion en forme

Byalle
 forcible
 and pos-
 sible
 meanes.

"sufdite ser^a denoncee auoir esté fai-
 "cte, ou qui ayt attenté, proiecté, ou ima-
 "giné tel meschant acte contre la per-
 "sonne de sa maiesté, & semblablement Confor-
tours
and ab-
betours.
 "tous leurs adiuteurs, fauteurs, adhe-
 "rants ou complices.

" Et si quelque acte semblable vient à
 "estre executé contre la trefroyalle per-
 "sonne de son altesse, par lequel la vie de
 "sa maiesté luy soit ostee (dont Dieu de
 "sa grande misericorde la vueille preser-
 "uer) alors toutes personnes par ou en
 "faueur desquelles tel acte aura esté exe-
 "cuté, & leurs hoirs participans en aucu-
 "ne maniere, cōsentans ou ayans sçauoir
 "& intelligence de tel forfait, seront en
 "vertu de ceste ordonnance deboutez
 "& réduz inhabilles à iouyr, demāder ou
 "pretendre la couronne de ce Royau-
 "me, ou autre quelconque des seigneu-
 "ries de son altesse, nonobstant toutes
 "loix precedentes ou statuts quelcon-
 "ques à ce contraires,

Voyla le fondement de leur proce-
deure contre la Roynne d'Escoffe. Car c'est
elle qui est la meschante personne desi-
gnee par ceste ordonnance des estats
d'Angleterre, comme si elle y estoit sub-
iecte. C'est contre sa vie que ceste machi-
ne a esté dressée, à fin de la defrauder, &
pareillement son fils, du iuste tiltre de
leur Royaume, & l'adiuger aux enfans
bastards d'une bastarde. C'est là qu'ils
ont tédû il y a si long temps. Le Docteur
Vvilsoun en diroit bien des nouvelles
s'il estoit viuant pour estre confronté au
Docteur Vvinden, qu'ils estimoient, (&
non sans cause) le premier iurisqueonsulte
d'Angleterre. Il leur maintiendra en bar-
be qu'apres la mort du Duc de Norfolk,
ce Vvilsoun alors leur maistre des requie-
stes luy fut enuoyé par ceux du conseil,
à fin de sçauoir de luy, s'il y auoit loy Ro-
maine ou municipale, sur laquelle on se
pouuoit fonder pour faire mourir la Roy-
ne d'Escoffe, & luy dresser vne forme de

proces, qui leur dit, que non, de sorte que
 la responce estoit directement contraire
 à leur intention desloyalle, peruerse &
 tyrannique. En ce temps là le seigneur de
 Cauaignes, depuis executé à mort à Pa-
 ris pour ses trahisons, estoit en Angleter
 re traffiquant ie ne sçay quoy, sinon qu'e-
 tre autres choses ie sçay bien qu'il nego-
 tioit la mort de la Roynie d'Escoffe, au
 nom, & comme agent des huguenots de
 France. Ses causes & moyens estoient
 ceux là mesmes du libelle diffamatoire
 par eux composé, & incontinent apres
 publié clandestinement de main à main,
 & dedié à la Roynie Elisabeth, sous le til-
 tre & inscription du reueille matin. L'An-
 gloise voyant que les loix, & le pretexte
 de iustice luy manquoient pour l'effect
 de son dessein cruel & barbare, ne laisse
 de passer outre & sans s'arrester aux for-
 malitez, elle depesche vn courier par de-
 uers le Comte de Scherufbery, grand ma-
 reschal & chef de la iustice criminelle

d'Angleterre, luy donnant charge & mādement qu'incontinent ses lettres receues il feist trancher la teste à la Royne qu'il auoit en garde. Le courrier estant party ceste Megere ne peut reposer la nuit, ains sentant vne autre Megere en son ame, qui la tormentoit estrangemēt en vengeance le paricide de sa cousine, se repētoit de l'auoir commandé, mais elle ne sçauoit quel ordre y mettre, iusques à ce que le Mi-lord de Lecestre, son grand mignon, l'enseigna. Cestui-cy estant au liēt (comme Dieu est seigneur du salut des hommes, & pour engarder les grāds detōber en inconuenient par peché trop enorme, inspire biē souuent quelque vn de leur conseil) voicy venir le sieur Vvalter Midelmy l'un de ses pl^r familiers, qui remonstre la grande offence de Dieu & des hommes, le deshōneur perpetuel de leur maistresse, la hōre & cōfusion de son conseil, le dāger euidēt de sa personne, & la perte de son Royaume, si on suyuoit la

resolution prise de la mort de la Royne
 d'Escoffe sans droict, sans raison, sans ap-
 arence de iustice. Que telle cruauté ne
 se pourroit excuser: que tous les Princes
 du monde seroient contraincts à la van-
 ger pour leur honneur: que l'exemple
 estoit de perilleuse consequence: qu'au-
 tant pourroit arriuer à leur maistresse,
 si le peuple Anglois s'estant mutiné con-
 tre sa maiesté, elle se retiroit en Escoffe,
 en France, ou en quelque autre contree
 pour refuge, comme ceste dame s'e-
 stoit refugiee en Angleterre, & ce sous
 les promesses à elle faictes & assurance
 donnee de la part de la Royne sa pro-
 che parente, ayant mis entre ses mains
 comme en depost sa vie & son estat.
 Lecestre ces propos bien examinez, y
 sentant son honneur plus interessé
 que de nul autre, pour estre le chef
 du conseil, & l'entier gouuerne-
 ment de sa maistresse, se leue du
 liét, prend sa robbe de chambre, va

trouuer la Royne luy remonstre les inconueniens qui pourroient ensuiure vne si sanglante tragedie, si son commandement estoit executé. Il n'eut pas si tost ouuert la bouche, pour entamer ce discours, qu'elle le pria de trouuer moyen d'y remedier. Alors fut depesché tout à l'instant vn gentil-homme nommé maistre Gorge, pour reuoquer le premier courrier avec le commandement qu'il portoit au Compte de Scherufbery. Il y en a qui comptent ce faict autrement, & que madame de Stafford, dame d'honneur de la Royne Elisabet, couchee dans sa chambre se prit à crier en dormant d'une voix fort effroyable, dont elle esueillla sa maistresse, qui ayant demandé ce qu'elle auoit à crier, luy declara qu'elle voyoit couper la teste de la Royne d'Escoffe, & qu'incontinent apres on couppoit celle de sa maiesté, la Royne luy dit alors que la mesme vision luy auoit apparue en dormât, d'où elle se sentoit

grandement espouventee, & que cela fut cause qu'elle chagea si soudainemēt son opinion, & la resolution par elle prise de la mort de sa cousine. Soit ainsi, soit autrement que ce cas est adueni, ie ne voy point d'inconuenient. Car l'une & l'autre façon de faire peut estre veritable. Tant y a que ce dernier courrier fait si bonne diligence qu'il arriue presque en mesme instant avec l'autre precedent, il portoit commandement au Comte de Scherusbery de garder soigneusement & estroictement sa prisonniere, & de luy dire de la part de la maiesté Angloise, que combien que par ses forfaitts elle eust encouruë la mort, pour auoir avec le Duc de Norfolk conspiré contre sa vie & son estat, voulant espouser ce Duc à son desceu, & introduire des estrangers en Angleterre pour saccager ses villes, & ruiner son Royaume, y remettant la religion du Pape: & que sa vie fust si contraire à ses desseins qu'elle ne pou-

uoit establir la doctrine Euangelique en
 l'Isle de la grande Bretaigne, comme elle
 desiroit, l'ayant pour aduersaire, chef, fau-
 trice, & seul appuy des Papistes, principal
 soustien & colôné de la maison de Gui-
 se, ennemie mortelle de l'Euangille, &
 que ceste seule consideratiõ luy bailloit
 de suiet assez à se deffaire d'elle, s'uyuât les
 prieres & remonstrâces faiçtes à sa maie-
 sté non seulemēt de la part de ceux d'An-
 gleterre, mais de ceux de son pays, de Frâ-
 ce, d'Allemaigne, de Flandres, & autres
 prouinces où la pure & sincere religion
 de christ auoit lieu, ce qu'elle ne pouuoit
 ignorer ayant esté bien aduertie de la sol-
 licitation que pour ce regard auoit faiçt
 le seigneur de Camaignes estant parde-
 ça, si est ce que sans auoir esgard à toutes
 ces considerations & autres bien pe-
 remptoires que sa maiesté pourroit de-
 duire si besoin estoit, elle luy pardon-
 noit de bon cœur, & luy donnoit la vie,
 ne la voulant traicter selõ ses demerites,

ains selon la douceur & clemence accoustumee. A quoy la Royne prisonniere fait responce que les conspirations & intelligences avec les estrangers qu'ils alleguoient, estoient crimes par eux forgez & inuentez à plaisir, & que leur dire impliquoit en soy vne contrarieté & apparence, qu'elle voulust saccager les villes, qu'elle pretendoit estre siennes, & ruiner le Royaume, auquel elle aspirait: Que le pourparler & traité de mariage du Duc de Norfolk ne luy doit estre imputé, ains à ceux du conseil de la Royne sa sœur, qui en estoient les auteurs, comme il paroissoit par leurs seings y apposez. Quant au tiltre qu'on luy donnoit d'estre l'aduersaire perpetuelle d'heresie & d'impieté, que faussement ils appelloient euāgile, & le soustien & appuy des vrayes seruiteurs de Dieu en ceste Isle, & membre de l'Eglise Catholique, Apostolique & Romaine qu'ils nommoient

Papisticalle, c'estoit luy faire plus d'honneur qu'elle ne meritoit, & que si elle auoit dix mille vies, elle les employeroit tres-volontiers pour le maintien & aduancement de sa religion, vrayement Papisticalle, c'est à dire, emanee de celuy qui est le pere & aucteur de la foy des Chrestiens. Au parsus estant Royne & Princeesse souueraine aussi bien que pouuoit estre sa sœur, elle ne vouloit receuoir aucun pardon d'elle, qui n'auoit aucun moyen ne de luy donner, ne de luy oster la vie, sinon comme vn brigand à l'esse d'un bois.

Par ce discours vous pouuez iuger si c'est de ce temps cy, ou puis nagueres qu'on commence à dresser des embusches contre la vie de ceste tres-catholique, & tresuertueuse, & tresillustre Princeesse, & si la volonté peruerse & desloyalle leur a oncques manquee, ou seulement l'inuention de quelque pretexte honneste en apparence, & raisonnable
pour

pour donner lustre à leur felonnie: & si
 le pretexte de iustice qu'à la parfin ils ont
 trouué fort specieux, à leur opinion forte
 & meschâte, est suffisant pour frustrer
 la mere & le fils (cōme ils cuidēt) de leur
 droit, & leur raurir l'hōneur & la vie. Voi
 cy vn acte de parlement par lequel ceux
 qui designent ou imaginēt en leur esprit
 chose contre la personne, ou l'estat de la
 Royne Angloise, ceux qui y prestēt con
 sentemēt, ayde, ou faueur, ceux en faueur
 desquels comme pretendants droict à la
 couronne, telle chose est attendee, desi
 gnee, ou imaginee, sont declarez crimi
 neux, inhabiles & indignes de ce droict,
 & permis à tous les subiets du Royaume
 d'Angleterre de leur courir sus, & les
 poursuiure à la mort aussi bien par voye
 de faict que par iustice. Quelques
 moys apres ils trouuent dans leurs cer
 ueaux pleins de trahisons & cruau
 té, que c'est la Royne d'Escoffe, qui
 non seulement a proiecté & imagi

né, mais aussi attenté contre leur maistresse, & la dessus sans aucune forme de justice, sans recoller, ou confronter aucuns tesmoins (côme est requis au proces du plus vil criminel du monde) la delectent de son estat Royal, & la font assassiner par la main d'un bourreau. Mais pour parler à la verité, qu'ils sçauent bien en leurs ames remplies d'abomination & d'iniquité, la seule cause de ce paricide, n'est autre, que sa religion, conforme aux traditions de Iesus Christ & de ses Apostres. En quoy ils ont fuiuy la resolution de leur reueille-matin, laquelle l'auteur du libelle dict estre cause plus que necessaire pour faire mourir ceste Royne, nonobstant toute souueraineté. Car estant la plus proche heritiere de la couronne d'Angleterre, il n'y a point de doute qu'elle n'establisce sa religion, côme auoit faict la Royne Marie auparavant, & depuis Elisabet la sienne, laquelle seroit du tout abolie & exterminée, &

ses meilleurs subiets & plus loyaux serui-
 teurs trauallez en leurs corps, & en leurs
 consciences, & en fin contraincts de ce-
 der à l'iniure du temps, & abandonner le
 Royaume, lors quel'Escossoise luy succe-
 deroit, & auroit sur eux pouuoir, com-
 mandemēt & auctorité souueraine. Les
 autres causes de sa mort que ses ennemis
 alleguent, & qui sont specifiees en leurs
 faux iugemens donnez contre sa maie-
 sté, ne sont que fourbes, pour donner
 ombre à leur tyrannie, à fin de ne rendre
 la cause de leur religion odieuse enuers
 les princes Catholiques, qui auroient iu-
 ste occasion de traicter leurs subiects, se-
 ctateurs d'icelle, de la sorte que l'Angloi-
 se a traictee ceste dame, qui ne luy estoit
 en rien subiecte, ains legitime Princesse,
 & mieux Royne qu'elle. Quand ils fei-
 rent leur acte de Parlement, ils sçauoient
 bien qu'elle deuoit conspirer avec An-
 thoine Babinton contre l'estat & la vie
 d'Elisabet. Ils auoient de si bons agents

en toutes parts, que ceste conspiration ne pouuoit faillir de reüssir à leur souhait & voicy comment.

Il y a vn nōmé Gilbert Gifford, Anglois de nation, qui depuis son enfance auoit rousiours esté nourry & eleué aux colleges & seminaires de Rome, & de Reims en l'âciēne pieté des Catholiques. Depuis deux ans ença, il a esté pratriqué, ie ne sçay par quel moyē, & s'est laissé gagner par le trahistre Vvalsinghan, secretaire d'Elisabet, & ennemy plusque mortel dela Royne d'Escoffe. Ce bon compagnon s'estant fort debauché & distraict des seminaires, faiēt diuers voyages non seulement à Paris & à Rome, mais aussi en Angleterre, sās y estre aucunemēt inquieté, combien qu'il se monstraft exterieurement estre Catholique, n'estant rien moins en son ame. Ceste liberté d'aller & venir si souuent en Angleterre sans recherche, sans trouble, sans empeschement, donnoit argument aux Anglois

Catholicques qu'il auoit des intelligences avec les heretiques leurs malueillans & persecuteurs au conseil d'Elisabet, aussi qu'ils le voyoient viure en abondance de toutes choses encores qu'il ne receust plus rien de seminaires, dont auparauant ce temps là sa vie & la plus part de ses moyens dependoient. Pour leur oster ceste opinion de la teste, & tollir toute cause de soupçon ou deffiance, il se faict passer bachelier en Theologie à pontamousson, & incontinent apres il prend les saincts ordres, & se faict prestre à Reims. Depuis lequel temps on a commencé se doubter plus fort de luy qu'au parauant, de sorte qu'on a fort espié ses actions, & descouuert en fin son hypocrisie, le voyant viure plus licetieusement que les autres de son pays qui font mesme profession. Mais le malheur a voulu q̃ ses trahisons ont tousiours esté cachees, sinõ depuis le paricide commis en la personne de la Royne d'Escoffe, & depuis qu'il est

prisonnier à l'officialité de Paris pour sa
 vie scandaleuse, qu'on l'a trouué faisi de
 quelques chiffres, de plusieurs lettres es-
 crites du ius d'oignon avec alun, & au-
 tres papiers, memoires & instructions,
 par lesquels on voit vne partie de sa ne-
 gotiation, & entre autres choses, comme
 il contrefaisoit le Catholique à fin deti-
 rer les vers du nez aux autres, & descou-
 urir tout ce qu'ils auoient dans le cœur
 pour le rapporter à Thomas Philippes
 principal agent de Vvalsinghan, & l'un
 des plus pernicious instruments qu'ayt
 la Roynne d'Angleterre. Pour mieux effe-
 ctuer son dessein & leur faire vn office
 bien signalé, il se loge à Paris avec Tho-
 mas Morgan gētil-homme Catholique
 & fort affectionné à la Roynne d'Escoffe,
 auquel il faiēt entendre son ardent zele
 au seruice de ladicte dame, le nōbre des
 Catholiques qu'il cognoissoit en Angle-
 terre à la deuotion de sa maiesté, l'enuie
 & les moyens qu'il auoit de procurer sa

deliurance, si ceux qui manient ses affaires par deçà le vouloiēt ayder de leur part, luy fournir argent pour faire le voyage & donner adresse à ceux de leur intelligence. Il s'estoit adressé deux ou trois fois à monsieur Glasgo, ambassadeur de sa majesté, qui le renuoya, ne voulant auoir aucune communication avec luy, ne negotier avec vn tel galland en aucun affaire de consequence. Mais il faiēt tant en fin avec ses ruses qu'il tire quelques lettres de Morgan & autres adressantes à vn nommé Anthoine Babinton, & à quelques autres gentils-hommes de sa religion. Si tost qu'il est en Angleterre, ces lettres sont communiquees à Vvalsinghan, & puis apres deliurees selon leur superscription & endossement. On faiēt aussi qu'on tire quelque lettre de la Roynne prisonniere, ou de ses secretares, laquelle leuë & copiee par sieur Amias Paulet son Geolier, il l'enuoye à Babinton, & retire la responce. Ces choses ainsi faiētes, & le

tout cōmuniq̃ué à Vvalsighã, & par luy
 rapporté au conseil, on donne le mot de
 guet à Giffort, qu'il s'euade, qu'il se retire
 en France pour y continuer son seruice
 accoustumé sans s'estōner de la sentence
 de proscriptiō & bannissement cōtre luy
 dōnce, ny d'autres choses qui pourroiet
 interuenir, que ceste sentēce ne luy sçau-
 roit nuyre, ny luy porter aucun preiudi-
 ce, ains luy seruiroit pour couvrir ses des-
 feins, & pour mieux iouer son personna-
 ge à l'aduenir sans deffiāce. Il ne faut pas
 trouuer estrange ceste façon de faire de
 Vvalsinghã, ce sont les pratiques ordinai-
 res. Il a esté si impudēt que d'enuoyer vn
 cōpagnon à Rome avec fausses lettres &
 sous fausse enseigne se porter pour frere
 bastard du Roy d'Escoſſe, à fin de descou-
 urir les intelligēces que sa mere pouuoit
 auoir avec le Pape, & ce qui se brasſoit
 pour sa deliurance. Mais estant reconnu
 pour affrōteur, d'autāt que ledit Roy n'a-
 uoit point de frere bastard, il fut mis dās
 le chasteau de S. Ange, & depuis en l'in-

quisition dont ie ne puis dire, cōme il es-
chappa. Mais ayāt esté depuis trouué à Pa-
ris, & cōstitué prisonnier au petit Chaste-
let, il y mourut assez pauuement, s'exéptāt
du suplice deu à ses demerites, nōobstāt
les promesses d'Elisabet, & les frequētes
visitatiōs de s^{on} ambassadeur. On a descou-
uert assez de sēblables agēts d'Elisabet à
Rome & en Espagne, qui ont esté chastiez
cōme il apartenoit, Dieu vueille qu'ē Frā-
ce on fasse ainsi de Giffort, auteur de la
mort de celle qui a esté leur Royne. Car a-
pres qu'il eust accorremēt executé sa ne-
gotiatiō au souhait de Vvalsinghā, les let-
tres de Morgā, Babintō & autres veues au
cōseil, sieur Amias Paulet suyuant l'auis qui
luy fut donné, fait sēblāt de mener sa priso-
niere à l'esbat de la chasse. Mais elle n'est
pas si tost dehors q̄ voicy arriuer les M.
Gorge & M. Vvalde avec grande troupe
de gēs à cheual, qui faississent au corps les
deux secretares Nau & Curl, meluin son
maistre d'hostel, pasquier son argétier, &
tous les autres seruiteurs, les sequestrant

les vns des autres, & sans les permettre parler ny entre eux mesmes, ny pareillement à sa maiesté. Ils sont incōtinent enuoyez çà & là prisonniers. Et quant à la personne de sa maiesté, Paulet son geollier la faiçt mener sans aucune suite des siens chez vn gentil-homme là auprès, où elle fut enuiron huiçt iours pendant lequel temps il fait rompre son cabinet, leuer les claueures de ses coffres, & pareillement celles de ses seruiteurs & seruan-tes, prendre & emporter tout son or, argent, bagues & ioyaux ses lettres missi-ues, liures, memoires, instructions, chiffres, & tous autres papiers. Ce faiçt il la faiçt ramener à Chartely avec dix mille indignitez, & en fin apres qu'il l'eust biē promenē de maison en maison sans aucun honneur ou respect, il la rend au chasteau funest de Fodringhay qui merite le nom du domicile du bourreau, & non habitation Royale. Ce Paulet est le plus rude vilain que vous sçauriez

veoir, & pour ceste cause auoit esté choi
 si expressement comme vn Cerberus
 pour la garder. Mais de cela il ne se faut
 pas esbahir, car il auoit charge de l'em-
 prisonner s'il l'eut peu faire secrettemēt
 & à propos, & au cas qu'il entendist au-
 cun bruit ou remuement en son logis,
 ou alētour du lieu où elle estoit, il auoit
 charge de la tuer, sans attēdre plus ample
 pouuoir, iussio, ou cōmādemēt. Et de fait
 ce miserable podagre puritain voyāt q̄ le
 feu s'estoit prins en la cheminee de sa chā-
 bre pēsant q̄ cela fust fait d'industrie & de
 propos deliberé pour seruir de signal, il a-
 uoit appointé quatre de ses estafiers (qui
 depuis l'ont confessé) pour la tuer en son
 antichambre, si elle eust fait la moindre mi-
 ne ou contenance de vouloir euader, ou
 sortir de la maison. Estāt à Fodringhaye
 detenue fort miserablemēt. on y enuoye
 des cōmissaires suyuant leur acte de Par-
 lemēt, non pas pour luy faire son proces
 (ce qu'ils ne pouuoient & ne deuoient) ains

seulement pour l'ouyr à la legere, à fin de
 donner couleur à leur dessein de la faire
 mourir. Ils luy presenterent certaines
 lettres escrites par ses secretares à Babin
 ton & autres à fin de moyenner sa deli-
 urance, car elles ne cōtenoient autre cho-
 se. Mais les commissaires en adioustāt au
 contenu des lettres la chargeoient de ce
 que pour se libérer de captiuité, & s'em-
 parer du Royaume d'Angleterre, elle a-
 uoit corrompu les subiects de leur mai-
 stresse, & cōspiré cōtre son estat & sa vie.
 La pauvre Princesse se doutāt à quoy ils
 tendoiet, & qu'il falloit necessairement
 que leurs menées dressees de si longue
 main prinssent fin, elle n'insista pas lon-
 guement en son declinatoire, ains leur
 ayant allegué perfunctoirement, & com-
 me par maniere d'acquit ses qualitez &
 leur incōpetēce, nya fort & ferme la con-
 spiration par eux alleguee, ne que ses se-
 cretares eussent escrit aucune chose de
 son sceu ou par son cōmādemēt qui eust

peu tourner au preiudice de la vie ou de
 l'estat de sa cousine, ou debauscher ses su-
 jets de leur deuë obeissance, ce qu'elle iu-
 ra & protesta solēnellement, & y a perseue-
 ré iusques au dernier soupir de la vie.
 Biē leur dit elle, q̄ s'il se trouuoit q̄ ses se-
 cretaires ayēt escrit ou negocié quelque
 cas à son desceu, cela ne luy deuoit estre
 imputé pour la trop perilleuse cōsequē-
 ce. Car la vie, l'hōneur, la reputatiō & les
 biēs & facultez de to^r Princes souuerains
 & grāds seigneurs seroiēt exposez à grād
 hazard, si la simple escriture de leurs secre-
 taires les pouuoit obliger. Neantmoins
 quāt aux siēs elle ne pēsoit pas qu'ils euf-
 sent escrit aucune chose, ne à Babintō (le
 quel elle n'auoit iamais ne veu ne con-
 gneu) n'à autres sinō pour sa deliurāce de
 ceste captiuité iniuste & tyrānique, ce q̄
 toutes les loix du mōde luy permettoiēt
 faire. mais si en procurāt sa liberté, ils ont
 escrit, sollicité ou procuré chose preiudi-
 ciable à la personne, ou à l'estat de la Roy-
 ne sa cousine, ils ont outrepassé son cō-

mādēmēt, & leur folie & temerité ne luy
 doit tourner à blasme, qui n'auoit on-
 ques consenty, proiecté, ou imaginé tel-
 le chose, s'asseurant que ne ses secretares
 ne autres voudroient maintenir le con-
 traire luy estât representez. Tout son di-
 re ne sert de rien. Car messieurs les iuges
 la pluspart ses ennemis iurez, ignorans,
 sans lettres, & nullement entēduz au fait
 de iudicature, n'estoient point là venu
 pour entendre ses iustifications: leur sen-
 tence estoit donnee auparauant qu'y ve-
 nir, & par ce sans recoller tesmoins, sans
 luy confronter ne ses secretares ne au-
 tres, sans s'amuser à aucune ceremonie
 de iustice qu'on obserue à l'endroiēt des
 plus abiectes personnes du monde, s'en
 allerent aussi sçauans, & tout ainsi cōme
 ils estoient venuz. Incontinent apres le
 bruiēt court d'une sentence de mort par
 eux donnee cōtre ladite dame, de laquel-
 le ie n'ay peu recouurer la copie, car elle
 contient des misteres qu'ils ne veulent
 pas estre diuulguez, seulement ay-ie peu

recouurer à grande peine la publication de ceste sentēce, avec la cōmission pour l'executer, lesquelles i'ay translaté presque mot à mot de leur langue en la nostre, par lesquelles vous pouuez diuiner, & cognoistre au plus pres le contenu de ladite sentence, & veoir les moyens dont se sont seruy pour pallier leur felonnie.

Proclamation, ou publication de la sentence donnée contre la Royne d'Escoffe.

“ Elifabet par la grace de Dieu Royne
 “ d'Angleterre, Frāce, & Irlāde, defen-
 “ trice de la foy &c. Nous ayāt esté dōné
 “ à entēdre avec tres-grāde apparence de
 “ verité, cōbien qu'à nostre grād regret,
 “ que puis n'aguères plusieurs choses ont
 “ esté cōplotees, imaginees & resolumēt
 “ designees, tendātes directemēt à l'offē
 “ ce & destructiō de nostre Royale persō
 “ ne, & à la subuersiō de l'estat de ce Roy
 “ aume par inuasions foraines, & par re-
 “ bellion domestique tāt par le moyē de
 “ l'escossoise Royne demourāt en nostre
 “ Royaume sous nostre protectiō, q̄ par

“ plusieurs autres meschantes personnes
 “ de son intelligēce, qui l’ōt libremēt cō-
 “ fessé, & ladefus apres deuē information
 “ ont esté iugez & executez par les loix
 “ cōme ils auoiēt deseruy: Et cōbiē qu’à
 “ la pure verité ce nous a esté vn grād &
 “ profōd desplaisir en nostre cœur, de pe
 “ ser ou imaginer que tels actes non na-
 “ turels & mōstrueux ayēt esté volōtaire
 “ mētattētez ou consentis cōtre nous par
 “ elle, qui est Princesse nee de nostre sīg
 “ & de nostre sexe, & celle à qui par plu-
 “ sieurs fois auparauāt no^r auriōs sauué &
 “ preserué la vie & l’honneur: Ce neant-
 “ moins nous auōs esté si directemēt atti-
 “ ree à croire le tout estre vray, par la veue
 “ & intelligēce des preuues euidētes qui
 “ ont esté produictes pardeuāt nous des
 “ choses procedees d’elle aussi biē q̄ de cō
 “ spirateurs, qui volōtairement & libremēt
 “ sans cōtraincte aucune auroiēt cōfessé
 “ leurs cōspiratiōs cōioinctemēt avec el
 “ le, & par elle dressées cōtre nostre per-
 sonne

"sonne & nostre royaume, qu'auōs eu
 "raisō de pēser q̄ ce seroit chose trop dā
 "gereuse de souffrir qu'elles passent ou-
 "tre à leur plein & entier effect. Pour
 "ceste cause nous auons esté par diuers
 "seigneurs de nostre noblesse, & au-
 "tres noz amez & feaux subiects serieu-
 "sement conseillez & meuz à donner or-
 "dre sans delay à l'inquisition & exami-
 "nation de toutes ces dangereuses en-
 "treprises & conspirations par plusieurs
 "moyens auerees auoir esté directemēt
 "faites cōtre nous & nostre royaume par
 "ladite Escossoise Roine, & aussi de no-
 "seruir de tous moyēs les plus prompts
 "& expediens à fin de resister, ou plustost
 "les preuenir & aller au deuant d'icelles.
 "Et par ce qu'il nous desplaisoit grande-
 "ment de proceder contre elle (attendu
 "sa qualité estant nee Roine & fille de
 "Roy) par la voye ordinaire des loix de
 "nostre royaume, cōme nous pouuiōs
 "legitimemēt faire, cōme par informa-

“ tion, decret, inscription, confrōtemēt
 “ de tesmoins & autres voyes semblables,
 “ pour le respect de nostre honneur & de
 “ la personne nous nous sommes aduisez
 “ par le sage conseil à nous dōné, de pro
 “ ceder à l'examination de tels cas en la
 “ maniere la plus honorable que nous a-
 “ uōs peu excogiter en ce royaume, con-
 “ formement à vn acte du dernier parle-
 “ mēt du 23. de Nouembre de l'annee 27.
 “ de nostre regne. Suiuant lequel par no-
 “ stre cōmission sous le grand seau d'An-
 “ gleterre donné au chasteau de Vvind-
 “ sor en nostre comté de Barkshire le 6.
 “ d'Octobre dernier, no^r auons pour cet
 “ effect assigné, nōmé & appointé to^r les
 “ mi-lords & autres du conseil priué, &
 “ autant d'autres comtes, barons & sei-
 “ gneurs du parlemēt du premier rāg, &
 “ de la plus ancienne noblesse de ce no-
 “ stre royaume, lesquels avec les milords
 “ & autres de nostredit conseil faisoient
 “ le nombre de 42. y adioustant encores

“quelquesvns des chefs & principaux iu
 “gesdescoursderecorde à Vvestmīster,
 “faĩsat en tout 47. à fin d'examinertoutes
 “choses designees & imaginees au detri-
 “mēt de nostre royale persōne tāt par la-
 “dite Roïne des Escossois, appellee la
 “Roïne d'Escosse douariere de Frāce, q̃ par
 “autres de son intelligēce, & toutes leurs
 “circonstāces, selon la teneur dudit acte
 “du Parlement, & dōner sentence ou iu-
 “gemēt cōm' ils verront par bōnes preu-
 “ues le cas le requerir, cōm' il apert par
 “ladite cōmission. Et depuis la plus part
 “desdits conseillers, mi-lords & iuges nō
 “mez en nostredite cōmissiō, sçauoir est
 “le nōbre de 36. ont en presence & oyāt
 “ladite Roïne en sa demeure à nostre cha-
 “steau de Fodringhayc à diuerses sean-
 “ces en lieu public tresexactement, equi-
 “tablement & avec meure deliberation
 “examiné toutes les matieres & crimes
 “dōt elle estoit chargee & accusee tēdās
 “aux dāgers susdits, mentiōnez en nostre

“ commissiō, & toutes leurs circonstan
 “ ces, & ont aussi ouy & entendu en la
 “ maniere la plus fauorable qu'ils ont peu
 “ ce que ladite Royne a voulu ou peu di
 “ re pour s'excuser & pour sa iustificatiō.
 “ Surquoy quelque temps apres, sçauoir
 “ est le vingt cinquiesme d'Octobre der-
 “ nier passé, tout le dit conseil, Mi-lords
 “ & iuges ayants ouy, entendu, & exami-
 “ né ladite cause en sa presence, comme
 “ dit est, d'une voix, assentemēt & consen-
 “ tement, apres meure deliberation ont
 “ donné leur sentence & iugement en la
 “ maniere qui s'ensuit.

“ Qu'apres le premier iour de Iuing de
 “ l'an vingt septiesme de nostre regne &
 “ auparauant la datte de nostre commis-
 “ sion diuerſes choses ont esté complot-
 “ tees & imaginees dedans ce royaume
 “ d'Angleterre par Anthoine Babinton
 “ & autres avec l'intelligence de ladite
 “ Marie pretendante, droit à la couronne
 “ de ce royaume, tendantes au detrimēt

mort & ruine de nostre royale person
 ne. Et semblablement qu'apres ledit
 premier iour de Iuing, & au parauant
 la datte de ladite commissiion, ladite
 Marie pretendante droit à ladite cou-
 ronne, auoit complotté & imaginé de-
 dans cedit royaume diuerses choses au
 detriment, ruine & mort de nostre roy
 alle personne contre la forme dudit sta-
 tut. Laquelle sentéce & iugemēt lescits
 Milords & cōmissairesont d'vn accord
 fait rediger en escrit, & deument gros-
 soyer, avec le proces verbal de leur fa-
 çon de proceder, qu'ils ont soubscrit de
 leurs mains, comme plus amplement
 appert par le rapport qui nous a esté
 fait. Et depuis ladite sentence & iuge-
 ment ainsi donné & rapporté les Mi-
 lords & le tiers estat en ce parlement as-
 semblez, ont à plusieurs fois en plain
 parlemēt ouy & consideré les principal
 les euidences du fait, preuues & circon-
 stances sur lesquelles ladite sentence e-

“ estoit fondee, & par leurs suffrages don
“ nez en parlemēt l’ont affirmé estre vne
“ iuste vraye & legitime sentence. & telle
“ approuué par escrit à nous presēté, no’
“ remonstrant cōm’ils preuoyoient sans
“ doute les grans & imminens dangers à
“ nostre personne, & au royaume, qui
“ pourroient accroistre si ceste sentence
“ n’estoit pleinement executee. Et par ce
“ par humbles supplications & demādes
“ fort serieuses d’un accord à nous faites
“ apres auoir eu à nous acces par diuer-
“ ses requestes presentees nous ont prié
“ tresinstamment sur leurs genoux, & ad-
“ iuree avec plusieurs raisons de grande
“ importante, force & vertu, & pressée &
“ meüe à ce que ladite sentence si iuste-
“ ment donnee & par eux approuuee,
“ cōme dit est, fust par nostre proclama-
“ tion sous nostre grand seau declaree &
“ publiee, & en fin executee selon la te-
“ neur dudit acte de parlement.
“ Mais lesdits milords & tiers estat apres

«tant de requestes si serieusemēt par eux
 «faictes en Parlement, s'apperceuās par
 «noz parolles & par les responce que
 «leur faisions, cōbien il nous desplaisoit
 «d'oyr si horribles & nō naturels atten-
 «tats de ceste Royne, de laquelle les of-
 «fences precedentes manifestement &
 «dangereusement cōmises contre nous,
 «nostre couronne & nostre royaume a-
 «uoient esté surpassees par nostre clemē
 «ce repugnāte aux aduis & requestes de
 «noz subiects faictes tant en Parlement
 «qu'ailleurs, & outre ayans entendu de
 «nous mesmes combien nous desirions
 «que par eux & chacun d'eux en general
 «& en particulier fust trouué quelque
 «autre expedient pour resister à telles
 «meschancetez attentees aussi bien con-
 «tre nous que contre l'estat publicque
 «de ce royaume tranquille & pacific-
 «que, & seureté de noz bons & loyaux
 «subiets, autre di-ie, que par l'execution
 «de ladite sentence, comme il apparte-

“noit, apres plusieurs consultations par
 “eux faictes à part & à diuis, & conferē-
 “ces faictes partousensemble au nom de
 “tous les Milords du parlemēt par suffra-
 “ges particuliers de to^r assēblez, & du tiers
 “estat d’un consētemēt vniuersel, represe-
 “tās l’estat entier de nostre royaume. A
 “chaque fois qu’ils ont eu accez à no^r, ils
 “ont allegué, déclaré, & protesté q̄ par
 “les longues consultations & conferen-
 “ces à plusieurs & diuerses fois par eux
 “faictes par nostre commandement, &
 “pour nous rendre contens en cest en-
 “droit, ils n’ont peu trouuer autre expe-
 “diēt & moyē de pouruoir à la seureté de
 “nostre personne, à la preservation d’eux
 “& de leur posterité, ne à la continuatiō
 “de l’heureux estat de nostre royaume
 “sans la publication & deuē execution
 “de ladite sentence. Pour ce est il qu’e-
 “stant emeuē non seulement de nostre
 “offence & grief, mais aussi vaincue par
 “les requestes serieuses, declarations

“& raisons de grand poid & importan-
“ce de tous noz subiets, les nobles & le
“tiers estat de nostre royaume, qui en iu-
“gement, sçauoir, & naturel soin de nous
“& de nostre royaume surmontent tous
“autres qui en ce n’ont point tant d’inte-
“rest, & ne doiuent estre estimez qu’eux:
“Et cognoissant aussi ladite sentence a-
“uoir esté donnée honnorablement, legi-
“timement & iustement, & estre icelle cō-
“forme à iustice & aux loix de nostre roy-
“aume, nous nous sommes laissez aller à
“leur desir, selon ledit statut par ceste
“nostre proclamation soubs le grand se-
“au d’Angleterre declarons, notifions
“& publions à tous noz amez subiets, &
“à toutes autres personnes quelconques
“que ladite sentence & iugement a esté
“donné en la forme susdite, afin qu’eux &
“chacun d’eux le puisse sçauoir, & pleine-
“ment entendre par ceste nostre procla-
“mation, laquelle nous voulons estre ra-
“portée à la cour de nostre chancellerie le

“plustost que faire le pourrez, avec l'en-
 “doisemēt du lieu & du tēps qu'elle aura
 “esté faite, & n'y faillez. En tesmoin de ce
 “auons voulu q̄ ladite proclamatiō fust
 “faite patēte, & seellée du grād seau d'An-
 “gleterre: A nostre maison de Richemōt
 “le 4. iour de Decembre du 29. an de no-
 “strerregne, & de nostre Seigneur l'ā 1586.

Il y a beaucoup de choses icy à confide-
 rer, & en premier lieu l'outrecuidāce, or-
 gueil & fiereté de ceste bastarde, s'intitu-
 lant Roynede France, comme si elle y a-
 uoit quelque chose, ou que ses ancestres
 y eussēt peu pretēdre aucū droit. Et neāt-
 moins elle s'attribue ceste qualité, de for-
 te que quād elle parle de nostre Roy tres-
 chrestien, elle ne l'appelle pas Roy de Frā-
 ce, ains en sōpattois, *the fraish king*, c'est à
 dire, le François Roy, par mespris & de-
 dain, cōme elle fait le Roy d'Espaigne, &
 tous autres Roys chrestiens & nōmemēt
 la Roynede Escosse, qu'elle qualifie en to'
 les endroits de ceste publicatiō *the Scotis*

queene, c'est à dire, l'Escossoise Royne, cō-
 me si elle n'estoit ne Royne d'Escosse, ne
 des Escossois, ains du royaume d'Vtopie,
 & cōe s'il n'y auoit aucū vraymēt roy ou
 royne au mōde qu'elle, qui s'inscrit, Roy
 ne d'Angleterre, & nō l'Angloise Royne.
 Secōdemēt elle dit q' cest' Escossoise Roy
 ne est demourante en son royaume sous
 sa protectiō. Si ce mot de protectiō se prēt
 pour defēse, vo⁹ voyez quelle protection,
 l'issue l'a biē monstree. Car l'aigneau est
 ainsi so⁹ la protectiō d'vne louue affamee
 de sō s'ag. mais si ce mot se prēt pour sub-
 iectiō ou vasselage, comme il sēble qu'el
 le le veut entēdre, c'est vn mensōge trop
 euidēt. Car ceste Royne ne luy fut onc,
 & ne pouuoit estre subiecte ou vassale, cō
 me nous dirons en son lieu. Il y en a qui di
 sent, que par acte de son parlement elle a
 faict declarer to⁹ ceux & celles qui sont de
 mourās'en & aude dās de son royaume, de
 quelque estat, qualité, condition, ou se
 xe qu'ils puissent estre, subiets à ses loix.

S'il est ainsi cela demonstre bien où ils tendoient, & que c'est vne loy trop affectee & exquise contre le droit des gēs pour fonder leur iurisdiction sur la Roine d'Escoffe. Mais en cela elle est biē fotte, & son conseil ignorant & mal aduisé, n'estant en leur pouuoir de faire vne telle loy, repugnante à la loy de nature, & directement cōtraire au droit de toutes les nations du monde, qui luy doiuent courir ius pour se venger d'une telle barbarie inuentee par ceste bastarde, nō naturelle ne legitime Roine à la ruine & dissolution entiere de la societē humaine. Les autres disent que la Roine d'Escoffe s'est volontairement soubmise à ceste loy, & souscrite à ie ne sçay quelle association avec les subiects de l'Angloise par laquelle ils iurent & protestent de maintenir leur maistresse, & de venger iusques à l'extremité toutes entreprises qui seront faites contre sa vie & son estat. S'il est ainsi que la Roine d'Escoffe

a soubſcrit à ceſte aſſociation, c'eſt vn argument infalible de ſa bonne volonté en uers ſa couſine, & que le crime qu'on luy a mis ſus, n'eſt qu'une calomnie recherchee, apoſtee & faite à plaſir, pour ſeruir de pretexte de iuſtice à ſa mort deſignee & preparee long temps auparauant. Mais ie ne penſe pas qu'elle ayt onques reconnu l'Angloïſe pour ſuperieure, ne qu'elle ſe ſoit ſoubmise à ſes loix, ayant preueu de tout temps les deſſeins de ſes ennemis qui la gouuernoient corps & ame à leur volonte. Mais prenez le caſqu'elle ſe ſoit aſſociee avec les ſubiets d'Elisabet, ce n'eſt pas à dire que ce qu'elle faiſoit pour demonſtration de ſon bon zele & affection enuers elle doit ceder à ſon preiudice, & eſtre interpreté contre ſon intention pour luy raur l'honneur & la vie. La diſpute n'eſt pas petite entre les legiſtes, ſi vn Roy ou Prince ſouuerain ſe peut abaïſſer iuſque là, que de rendre ſa perſonne où ſon peuple ſubiet aux loix

d'autrui, & par ce moyen se priuer & abdiquer de sa iurisdiction, qui est la forme essentielle de souveraineté La resolution des plus doctes est, qu'il ne le peut faire. Et par ainsi ne sert de rien au conseil de l'Angloise d'auoir tiré par ses ruses de ceste dame vne telle souscription de leur ligue ou confederation, puisqu'elle ne pouuoit se demettre de sa iurisdiction souveraine. Et ores qu'elle eust peu se demettre, si est ce que ceste pretendue subiection estant extorquee d'une prisonniere par crainte, par force, par violence pour sauuer sa vie ou son estat, en esperant par ce moyen euader leurs mains sanglantes, ne scauroit auoir lieu deuant aucun iuge du monde, tant corrompu soit il, s'il n'est pur itain Anglois. Mais ie suis tout assure que sa maiesté ne pensa onc tant hazarder sa personne, tant obscurcir l'honneur & autorité de ses progeniteurs, tant preiudicier à son fils & à son peuple, que de proroger la iurisdiction de l'Angloise, pour y assubie-

tir sa vie & son estat, plus ancien sans comparaison, plus noble & plus illustre que n'est celuy d'Angleterre, qui tât de fois a esté réuersé, conquesté & reconquesté par hommes qui n'estoiēt pas bonnemēt souuerains, ains subiets d'autres Roys. Et pour me confirmer en ceste opinion, en toutes les procedures faiçtes contre sa maiesté, elle a tousiours protesté ne recoïstre l'Angloise pour superieure, ne son conseil pour ses iuges, comme vous verrez par ses lettres cy dessous à ceste fin produites. Je ne puis donc comprendre comment on peut dire qu'elle soit sous la protection d'Elizabet, ains croy que ce dire est vn mensonge, ou manifeste illusion & moquerie, comme est tout le narré des conspirations imaginees & complottees par la Royne d'Escoffe, comme nous dirons cy apres.

Et quād à ce qu'Elizabet dit, q̄ par le sage aduis de sō cōseil on a procedé cōtre ceste Royne en la maniere la plus honorable

qu'ilsont peu excogiter. Je responds, que
 si il est ainsi, elle & son conseil sont fort mal
 apprins, & ne sçauent ne bien ne hōneur:
 & prie Dieu que tel hōneur leur aduiēne,
 cōme ils l'ont beaucoup mieux meritē, q̃
 n'auoit faict la defūcte, qui s'est tousiours
 estimee fort heureuse & grandement o-
 bligee à dieu de receuoir tant d'honneur
 de sa diuine prouidence, que de mourir
 pour l'adueu de son nom, pour le main-
 tenement de son Eglise, & pour la profes-
 sion & deffence de sa sainte religion, le-
 quel honneur tāt plus luy sembloit grād,
 que la façon de proceder contre, dont a
 vsé le conseil de l'Angloise, estoit outra-
 geuse & pleine de contumelie. Dont ie
 vous en ay raconté vne partie cy/dessus,
 comme ils l'auoient pillée, vollee, seque-
 strée de tous ses seruiteurs, promenee de
 maison en maison, sans suite des siens,
 sans equipage, sans consolation, sans au-
 cune cōmodité des choses qui luy estoient
 les plus necessaires, soit pour le iour, soit
 pour la

pour la nuit, comme de logis, d'habits, de linge, de couverture pour se garentir la nuit du froid, qui en ce pays là est assez aspre en saison d'hyuer. Mais d'autant que le narré de telles indignitez me ritera mieux estre creu venant de sa bouche, que de ma plume, ie vous produiray vne lettre par elle escrite à vn grand seigneur, qui estoit l'un de ses plus feaux & mieux affectionnez seruiteurs, laquelle i'ay bien voulu icy inserer, pous vour faire veoir non seulement leur forme de proceder contre sa maiesté, mais aussi pour vous faire entendre la vraye histoire & les causes de ceste tragedie descrites par elle mesme sans fard ou passio, n'ayât besoin de rien desguiser escriuât à celuy qui scauoit l'estat entier de ses affaires, sa vie passée, son intention, & la pluspart de ses secretes pensees.

“ Monsieur &c. apres auoir lōg temps
 “ differé pour le respect des dangers im-
 “ minents des entrepreneurs, en fin i'ay

Bb

“ condescendu à la propositiō qui si sou-
“ uēt m’a esté faicte de me sauuer. Ce qui
“ en est aduenu vous l’entédrez de mon
“ medecin & de mes autres seruiteurs,
“ qui iusques à present me sont laissez, ie
“ ne sçay pour cōbien, ny si i’auray loisir
“ de faire mon testamēt, & l’ayant, ie ne
“ sçay si i’en auray licence, m’estant tout
“ mon argent, & mes papiers ostez, &
“ n’ayant personne pour m’ayder à escri-
“ re ou seruir en tel faict bien que ie l’ay
“ requis, & d’auoir mon aumonier par
“ faute d’un plus idoine, si cela s’eust peu
“ faire, mais ie n’en ay encores aucune
“ responce. Parquoy si cela māque vous
“ auez à faire instance tāt vers sa saincte-
“ té, le Roy tres-chrestien, & le Roy d’Es-
“ paigne, Duc de Lorraine & tous autres
“ Princes Chrestiens, mes parens & amis
“ que mes papiers & argēt soiēt restituez
“ & meubles qui n’apparoistront auoir
“ esté par moy distribuez à mes serui-
“ teurs, à ce que ma cōsciēce soit deschar-

"gée vers mes pauvres seruiteurs & créa
 "ciers. Vous trouuerez ce langage estrā-
 "ge si vous n'estiez aduerty q̄ par la bou-
 "che du Lord Boukharst, Amias paulet
 "mō grand aduanceur, vn Dreu Droury
 "cheualier, & M. Beel m'estoit signifié
 "que l'assemblee des estats de ce pays
 "m'ont condamné à la mort, ce qu'ils
 "m'ont denoté de la part de leur Roynne
 "m'exhortant à confesser & recognoi-
 "stre vers elle, mes offences. Et pour cest
 "effect, & pour m'inciter à patiemment
 "& bien mourir deschargeant ma con-
 "sciēce, elle m'euoyoit vn Euesque & vn
 "Doyen, disant l'occasion d'icelle mort
 "estre l'instance requeste qu'en fait son
 "peuple, considerant que moy viuante
 "la cōpetitrice (cōme apparoiſſoit, ayant
 "pris de longue main le nom & les ar-
 "mes de ceste couronne, sans les auoir
 "voulu quicter sinon avec condition
 "de secōde personne) qu'elle ne pouuoit
 "viure seure en son estat: veu mesmes

Voyla
les vray
es rai-
sons du
recueille-
ment.

“ qu’entre tous les Catholiques i’estois
 “ appelée leur souueraine, & sa vie auoit
 “ si souuent esté attente à ceste fin. Se-
 “ condement, & ce de quoy elle auoit le
 “ plus d’egard, c’estoit que moy viuante,
 “ l’estat de sa religion ne pouuoit subsi-
 “ ster en ce Royaume seuremēt. Je remer-
 “ cie lors Dieu & eux de l’honneur qu’ils
 “ m’attribuoient d’estre vn si necessaire
 “ instrument pour le restablissement de
 “ la religion en ceste Isle. De quoy, bien
 “ qu’indigne, ie voulois prendre sur moy
 “ d’estre tres instante & heureuse defen-
 “ deresse. En tesmoin de quoy (comme
 “ ia l’auois protesté, i’offrois volontaire-
 “ ment respādre mon sang en la querelle
 “ de l’Eglise Catholique. Et encores
 “ mesmes si pour le bien & repos publi-
 “ que de ceste Isle, le peuple pensoit
 “ ma vie pouuoir seruir, ie ne refuserois
 “ de leur en estre liberale pour recom-
 “ pense de vingt ans de prison où ils
 “ m’ont detenue. Quant à leurs euesques

"ie louë Dieu que sans eux ie cognoif-
 "sois assez mes offences vers Dieu & son
 "Eglise, & que ie n'approuuois leurs er-
 "reurs ny ne voullois y communiquer
 "en rien. Mais s'il leur plaisoit me per-
 "mettre vn prestre Catholique, tres-vo-
 "lontiers ie l'acceptois, & le requerois au
 "nom de Iesus Christ, pour pouuoir dis-
 "poser de ma conscience & participer
 "aux saincts sacremens partât de ce mon-
 "de. Ils me dirent que i'auois beau faire
 "si ne seroy-ie pas saincte ne martyre.
 "Car ie mourrois pour le meurtre de
 "leur Royne, & pour l'auoir voulu depof-
 "seder. Je respondy que i'estois si pre-
 "somptrueuse que d'aspirer à ces deux
 "honneurs, mais que bien qu'ils eussent
 "puissance sur mon corps par permissiõ
 "diuine, non par iustice, estant Royne
 "souueraine, comme i'ay tousiours pro-
 "testé, si n'auoient ils puissance sur mon
 "ame ny de m'epescher d'esperer q par
 "la misericorde de Dieu qui est pour

“ moy mort, il receura de moy mō sang
 “ & ma vie, que ie luy offre pour le main
 “ tien de son Eglise, lors laquelle ny icy,
 “ ny ailleurs ie ne desireray iamais cōmā-
 “ der à Royaume mondain pour perdre
 “ l’eternel, & que ie luy suppliroy que la
 “ douleur & autres persecutiōs tāt de l’es-
 “ prit que du corps soiēt en deductiō de
 “ mes pechez. Mais d’auoir cōtrouué, cō-
 “ seillé ou cōmandé sa mort ie ne l’auois
 “ iamais faiēt, ny ne souffrirois que pour
 “ mon particulier vne chiquenaude luy
 “ fust donnee. Ho, disent ils, vous auez
 “ souffert, conseillé & permis que les An-
 “ glois vo’ nōmassēt leur souueraine, cō-
 “ me appert par les lettres d’Allain & de
 “ Louys & de plusieurs autres, & n’y auez
 “ contredict. A quoy ie respondy, que ie
 “ n’auois riē pris sur moy en mes lettres,
 “ mais d’empescher les docteurs & gens
 “ d’Eglise de me nommer à leur plaisir,
 “ il ne m’appartenoit pas, estant sous l’o-
 “ beissance de l’Eglise, pour approuuer
 “ ce qu’elle decretoit, mais nō pas la cor-

"riger, mesmement si (comme ils se di-
 "soient sçauoir) sa saincteté faisoit par
 "tout prier pour moy sous tel tiltre, de-
 "quoy i'estois ignorate. Au reste ie vou-
 "lois mourir pour obeir à l'Eglise, mais
 "non meurtrir personne pour auoir leur
 "droit. Mais qu'en cela ie voyois manife-
 "stement la poursuite de Saul contre
 "Dauid, mais que ie ne pouuois fuyr cō-
 "me luy par la fenestre, toutesfois de mō
 "sang en pourroient naistre des prote-
 "cteurs de ceste generale querelle. Brief
 "deuāt hier Paulet reuint avec ce Drou-
 "ry le plus modeste & gracieux de beau-
 "coup, me dire, que puis qu'estāt aduer-
 "tie de me preparer, confesser, & repētir
 "de mes fautes vers leur Royne ie n'auois
 "mōstré nulle repētance ny sentimēt de
 "ma faute, elle auoit cōmandé qu'ō detē
 "dist mon days, me signifiāt que i'estois
 "vne fēme morte, sans aucū hōneur, ny
 "dignité de Royne. Le respōdy q̄ Dieu m'a
 "uoit appellé de sa grace à ceste dignité,

“ & que i'auois esté oincte & sacree iuste
 “ ment telle , & que de luy seul ie tenois
 “ ceste dignité, qu'à luy seul ie la rēdrois
 “ avec mon ame, & que ie ne recognois-
 “ sois leur Royne pour ma superieure, ny
 “ son cōseil & assemblee heretique pour
 “ mes iuges, & que ie mourrois Royne
 “ en despit d'eux, & qu'ils n'auoient puif-
 “ fance sur moy, que comme les volleurs
 “ au coing d'un bois sur le plus iuste Prin-
 “ ce ou iuge de la terre, mais q' i' esperois
 “ que Dieu monstreroit sa iustice apres
 “ ma mort sur cet estat present. Les Roys
 “ de ce pays ont souuent esté meurtris, il
 “ ne me sera pas estrange d'estre parmy
 “ eux, & ceux de leur sang. Le Roy Ri-
 “ chard a esté ainsi traicté pour luy offer
 “ son droict. Apres ces propos voyant
 “ que mes pauvres seruiteurs n'y vou-
 “ loient mettre la main, & que tous le re-
 “ fusoient hardiment, mesmes les pau-
 “ ures filles criant tout haut vëgence sur
 “ luy & sur sa compagnie, il appella sept

“ou huiet satellites, & ayant faict abatre
“le days s’assit & se couurit. Et puis me
“dit qu’il n’estoit plus temps d’exercice
“& passer temps pour moy, & pour ce il
“falloit oster vne table de billard. Je dis
“que graces à Dieu ie ne m’y estois ia-
“mais esbatu depuis l’auoir faict dresser,
“car i’auois assez par eux d’autres occu-
“pations. L’assemblay hier mon petit
“troupeau pour leur repeter à tous en-
“semble ma protestation tant en la reli-
“gion, que pour ma descharge de ce que
“l’on me mettoit sus, mesmes comme
“i’auois distribué les estats, & autres mé-
“teries dont ie n’ouy iamais parler. Auf-
“si les ay tous chargez deuant Dieu de
“vous compter tous mes deportemens
“& ceux des autres en ce faict. Je remets
“à messieurs de Lorraine & de Guise &
“tous nos parens de tout ce qui sera re-
“quis pour le salut de mon ame, la des-
“charge de ma conscience & reparation
“de mon honneur & de celuy de ceux à

“ qui i'apartiens, que par ma mort on
“ taschea mettre sous les pieds, ne me re-
“ prochant à moy seule, mais à mon cou-
“ sin de Guise & tous ses parens d'auoir
“ donné de l'argent pour sa mort. Je dis,
“ & est vray, q̃ ie n'auois rien sceu, & n'en
“ croiois rien. Je vous recommande mes
“ pauures seruiteurs tant souuent recom-
“ mandez de rechef, ie les vous recom-
“ mande au nom de Dieu. Ils ont tout
“ perdu me perdant, dictes leur à Dieu
“ de ma part, & les consolez par charité.
“ Recommandez moy à la Ruhe, & luy
“ dictes qu'il se souuienne que ie luy a-
“ uois promis de mourir pour la religiõ,
“ & que ie suis quicte de ma promesse,
“ ie le requiers de me recommander à
“ tous ceux de son ordre. Je suis trescon-
“ tente & ay tousiours esté de sacrifier
“ ma vie pour le salut des ames de ceste
“ Isle. A Dieu pour la derniere fois, &
“ ayez memoire de l'ame & de l'honneur
“ de celle qui a esté vostre Royne, mai-

“stresse & bonne amie, & si par informa
 “tion ou autre interpretation de voz ser
 “uices i’ay eu aucune offense contre
 “vous, ie la vous pardonne, & vous prie
 “& à tous mes seruiteurs me pardonner
 “ce que ie puis auoir faiet ou par chole-
 “re iuste, ou mal entendue, protestant
 “que ie ne vous estime en rien coulpab-
 “les vers moy, mais me sens speciale-
 “ment à vous, comme au principal &
 “plus ancien de mes seruiteurs tresobli-
 “gee de recognoistre vos seruices si
 “Dieu me donnoit iours plus longs, de-
 “quoy faillant ie prieray Dieu à la fin de
 “ma vie vous recompenser pour moy.
 “Dieu soit avec vous & tous mes serui-
 “teurs que vous laissez comme enfans de
 “Fodringhaye, ce ieudy vingt-quatrief-
 “me de Nouembre. 1586.

“Vostre affectionnee & bonne
 “maistresse.

Marie R.

Et au dessus estoient ces mots.

“ Ils maintiennent faulcement que ma
 “ venue en ce pays estoit contre mon
 “ gré, & ne pouuant aller ailleurs, & pour
 “ ce i'estois en leur protection. I'ay dict
 “ le contraire, & appelé Lochimbar, He-
 “ reis le ieune & les heritiers de saint An-
 “ dré & de Flammius, qui prindrent tous
 “ lettres de descharge de ma main pour
 “ contre leur gré me laisser venir à mon
 “ commandement en ce pays sur la pro-
 “ messe de support. Je vous prie en faire
 “ recouurer vne copie pour monstrier
 “ leur faulceté.

Je n'ay voulu obmettre ceste derniere
 clause & appendice, à fin de conuaincre
 l'histoire de Buchanan d'impudence, &
 de mensonge trop euident, rapportant
 tout le discours des derniers troubles ad-
 uenus en Escosse par la rebellion de ses
 complices à l'intention del'Angloise pre-
 tendue Royne, dont il a tousiours suiuy
 le party contre son pays, & contre la
 vraye & legitime maistresse: i'ay opinion

qu'il estoit fils de putain, tant il fauorise les bastards en tous ses escrits, & en toutes ses actions. Mais pour retourner à l'honorable façon de proceder que l'Angloise dict auoir esté gardée à l'endroit de la Roynne d'Escoffe, vous ne voyez par ceste lettre que la moindre partie, aussi ne l'ay ie produict à ceste fin, ains pour vous instruire de quoy ils l'ont accusée, & vous monstrier le peu d'apparence ou zele de iustice qui les menoit, ains que la seule cause de sa mort estoit sa religion, à laquelle ils la voyoient par trop plus affectionnée qu'ils ne souhaitoient. Car tant s'en faut qu'elle ayt attenté, cōspiré, ou imaginé aucune chose cōtre la vie d'Elisabet, qu'au contraire par tous moyens elle taschoit la preseruer des embusches & mauuaises intentions de ceux que sa cousine mal aduisee estime encores pour le iourd'huy ses meilleurs seruiteurs, luy estās rien moins, ains les plus grands trahistres qu'on sçauoit.

imaginer, & qui en fin ne faudrōt à se de
 pestrer d'elle, apres qu'elle sera venue à
 bout de ses parens les plus proches, & les
 plus fcaux, & qu'elle les aura faict mou-
 rir pour assouuir leur ambition, qui sous
 le masque du zele qu'ils feignent auoir à
 son seruice luy preparēt la perte de sa vie
 & l'extreme ruine de son estat, à fin de
 transferer son sceptre en autre famille,
 qui leur attouche de plus pres que la sien-
 ne. Comme vous pouuez presumer par
 la lecture d'une lettre à elle escrite par
 sa cousine quelque temps auparauant
 sa mort, laquelle ie n'ay peu laisser en ar-
 riere pour le discours qui y est contenu,
 aussi que par icelle vous pouuez iuger
 par indices certains l'innocence de ceste
 dame, la fauceté des crimes à elle impo-
 sez, & la sincere amitié qu'elle portoit à
 sa plus grande ennemie, & outre vous
 verrez en icelle vne partie de l'honnora-
 ble forme de proceder qu'ils disent auoir
 obseruée à l'édroiēt de leur prisonniere,

& laquelle nous poursuiurons apres la lecture.

“ Madame ayant peu obtenir licence
 “ de ceux, ausquels i ay esté comme don-
 “ nec par vous, de vous remōstrer ce que
 “ i auois sur le cœur, tāt pour ma deschar-
 “ ge d’aucune malueillance ou enuie de
 “ cōmettre cruauté ou acte d’ennemie
 “ contre vous, à qui ie suis si conioincte
 “ de sang, comme aussi pour charitable-
 “ ment vous communiquer ce que ie pē-
 “ sois pouuoir seruir tant à vostre salut &
 “ preservation, que pour l’entretien de la
 “ paix & repos de ceste Isle, chose qui ne
 “ pouuoit nuyre, estant en vous de pren-
 “ dre ou iecter mon aduis, croire ou mes-
 “ croire mon discours cōme il vous eust
 “ semblé meilleur, ie me resolu de me for-
 “ tifier en Christ seul, lequel à ceux qui
 “ en tribulatiō l’inuoquēt de bō cœur ne
 “ māque iamais de iustice, ne de cōsola-
 “ tiō, & principalemēt alors q̄ sās aucū ay
 “ de humain ils sōt en sa seule protectiō.

" A luy en soit la gloire, il ne m'a deceue
 " de mon expectation, m'ayant donné
 " le cœur & la force *in spe contra spem* d'en
 " durer les iniustes calomnies, accusatiōs
 " & condamnations de ceux qui n'ont
 " telle iurisdiction sur moy, avec constā
 " te resolution de souffrir la mort pour
 " le maintien, obeissance de l'Eglise Ca-
 " tholique, Apostolique & Romaine.
 " Or depuis m'ayāt esté de vostre part e-
 " stē signifiée la sentence de vostre der-
 " niere assemblee d'aucuns des estats,
 " m'admonestant par Lord Boukharst &
 " Beel de me preparer à la fin de mon
 " long & ennuyeux pelerinage, ie les ay
 " priez de vous remercier de ma part de
 " si agreables nouvelles, & vous supplier
 " de me permettre certains points pour
 " la descharge de ma conscience, dont
 " depuis le sieur Paulet m'a faict fausse-
 " ment entendre que vous m'avez grati-
 " fice, m'ayāt ia rendu mon aumonier, &
 " l'argēt qu'on luy auoit osté. m'asscurāt
 que

"que le reste fuiuroit. Dequoy ie vous
 "ay bien voulu r  dre graces, & vous sup-
 "plier plus outre d'une derniere faueur,
 "laquelle ie pense pour plusieurs raisons
 "ne deuoir c  muniquer qu'   vous, pour
 "estre vne derniere grace, de laquelle ie
 "ne desire estre oblig  e    autre, pour n'e-
 "sperer trouuer entre les puritains que
 "cruaut  , qui sont les plus grans aujour-
 "d'huy en auctorit  , & les plus animez
 "contre moy. Dieu s  ait pour respect de
 "qui ie ne veux accuser personne, ains
 "pardonne de bon c  ur    chacun, com-
 "me ie desire que chacun me pardonne,
 "& Dieu le premier. Et puis ie s  ay qu'  
 "vous plus qu'   nul autre doit toucher
 "au c  ur l'honneur ou deshonneur de
 "vostre sang, & d'une Royne & fille de
 "Roy. Dont, madame, en l'honneur de
 "Iesus (sous le nom duquel tous pou-
 "uoirs obeissent) ie vous requiers de per-
 "mettre, apres que mes ennemis auront
 "assouui leur desir de mon sang innocent;

" que mes pauures desolez seruiteurs to
 " ensemble puissent emporter mō corps
 " pour estre enseveli en terre sainte, & a
 " uec aucū de mes predecesseurs, qui sōt
 " en Frāce, spécialement la feuë Roine ma
 " mere: & ce en cōsideration qu'en Es
 " cosse les corps des Roys mes predeces
 " seurs ont esté outragez, & les eglises ab
 " batues & profanees, & que souffrāt en
 " ce pays, ie ne puis auoir lieu aupres de
 " voz predecesseurs, qui sont les miēs: &
 " qui plus est, selon nostre religion nous
 " estimons beaucoup d'estre enterrez en
 " terre sainte. Et puisque lon m'a dit que
 " ne vouliez en rien forcer ma consciēce
 " contre ma religion, & que mesmes m'a
 " uez concedé vn prestre, i'espere que ne
 " me refuserez ceste derniere requeste,
 " permettāt au moins sepulture libre au
 " corps dont l'ame aura esté separee, puis
 " qu'estās vniz ils n'ont iamais sceu obte
 " nir liberté de viure en repos en le vous
 " procurāt à vous mesmes. De quoy de-

"uant Dieu ie ne vous dōne aucune coul
 "pe: mais Dieu vueille vous faire voir la
 "verité de tout apres ma mort. Et pource
 "(aussi que ie crains la secrette tyrannie
 "d'aucū) ie vous prie ne permettre que
 "sās vostre sceu executiō se face de moy,
 "non pour crainte du tourment que ie
 "suis trespresse de souffrir, mais pour le
 "bruit qu'on feroit courir de ma mort,
 "sans tesmoins nō suspects, comme on a
 "fait, à ce que ie suis persuadee, d'autres
 "de differentes qualitez. Pourquoi eui-
 "ter ie requiers q̄ mes seruiteurs demeu-
 "rēt spectateurs & tesmoins de ma fin en
 "la foy de mō Sauueur, & l'obeissāce de
 "son Eglise, & que tous ensēble empor-
 "tās mon corps tant secretement qu'il
 "vous plaira, ils puissent se retirer sans
 "que l'ō leur oste ne meubles, ne ce que
 "en mourant ie leur puisse laisser, qui est
 "bien peu pour leurs bons seruices. Vn
 "ioyau i'ay receu de vous que ie vous

“renuoiray avec mes dernieres paroles,
 “ou pluſtoſt, ſ’il vous plaift: ie vous ſup-
 “plie de rechef, & vous requiers au nom
 “de Ieſus Chriſt, en reſpect de noſtre cō-
 “ſanguinité, & en faueur du Roy Henry
 “ſeptieme voſtre ayeul & le mien, & en
 “l’honneur de la dignité que nous auōs
 “tenue & du ſexe commun d’entre nous,
 “que ma demande me ſoit oſtroyee. Au
 “reſte ie penſe que vous aurez bien ſceu
 “qu’en voſtre nom on m’a fait abbatre
 “mō days, & apres on m’a dit, que ce n’e-
 “ſtoit par voſtre cōmandemēt, mais par
 “l’aduiſ d’aucūs du conſeil: ie louë Dieu
 “de telle cruauté ne ſervant qu’à exercer
 “malice, & m’affliger apres m’eſtre reſo-
 “lue à la mort: ie crains qu’ainſi ne ſoient
 “beaucoup d’autres choſes. Parquoy on
 “ne m’auolu permettre vo’eſcrire qu’à
 “pres m’auoir, en tant qu’à eux eſt, en
 “forme degradee de principauté & no-
 “bleſſe, me diſant que ie n’eſtois qu’une
 “ſimple femme morte, incapable de tout

“te dignité. Dieu soit loué de tout. Je
“voudrois que tous mes papiers vous
“eussent esté presentez sans desguiser,
“à fin qu’il apparust que le seul soin
“de seureté feist mouuoir tous ceux qui
“sont si prôpts à me poursuiure. Si vous
“m’accordez ceste mienne derniere re-
“queste, cōmandez que ie voye ce qu’en
“escrirez. Car autrement on me fera pas-
“ser par où l’on voudra. Et ie desire sça-
“uoir à ma derniere requeste vostre der-
“niere responce. Et pour fin ie prie le
“Dieu de misericorde, & le iuste iuge
“qu’il vo’ vueille illuminer de son saint
“esprit, & qu’il me donne la grace de
“mourir en parfaite charité, comme ie
“me dispose de faire, pardonnant ma
“mort à tous ceux qui en sont cause, ou
“y ont cooperé. Et telle sera ma priere
“iusques à ma fin, laquelle i’estime heu-
“reuse de preceder à l’affliction que ie voy
“menacer ceste isle, si Dieu n’y est plus
“veritablement craint & reueré, & la va-

“ nité, & police mondaine mieux reglee
 “ & reduite. Ne prenez à présumption si
 “ abandonnant ce monde, & me prepa-
 “ rat pour vn meilleur, ie vous remonstre
 “ qu’vn iour vo^s aurez à respondre de vo-
 “ stre charge, aussi bien que ceux qui y
 “ sont enuoyez les premiers, & que ie de-
 “ sire mon sang & ma patrie reduits à
 “ songer en tēps à ce que dès le premier
 “ iour de nostre capacité d’entēdre nous
 “ deuons mettre nostre esprit auant tou-
 “ tes autres choses temporelles, qui doi-
 “ uēt ceder aux eternelles cogitatiōs. De
 “ Fodringhaye ce 19. Decembre 1586.

“ Vostre sœur & cousine prisonniere
 “ à tort, Marie R.

Vous voyez ici tout à l’entree l’honora-
 ble façon de proceder à la belle iustice
 qu’on exerce à l’endroit d’une Roine. El-
 le est donnee en proye à ses ennemis, elle
 est liuree entre leurs mains pour en vser

ou abuser à leur fantasie. Ils la gourmandent, ils la desdaignēt & la tiennent si estroitement, qu'elle n'a pas seulement la liberté de se plaindre: il ne luy eût pas permis d'écriture à celle qui luy doit la iustice, sinon apres auoir enduré dix mille indignitez. Le droit cōmun, & la police des royaumes bien instituez, où les loix & la iustice ont lieu, ne donnēt pas li cēce aux geolliers de traicter leurs prisonniers à leur discretion: ils n'osent empescher vn prisonnier de s'adresser aux iuges, ils n'osent outrepasser l'ordre qui leur est prescript: ils n'osent brauer vne personne affligee qui leur est donnee en garde. Mais icy vous voyez le traictemēt qu'on fait à ceste Princesse, qui ne peut estre iustement prisonniere, qui ne peut auoir iuge que Dieu, qui n'est pas donnee en garde à vn geolier, mais en proye à vn bourreau pour la vexer & tourmenter, pour se dōner gorge chaude, & en prendre curee, on permet à vn criminel de

se faire seruir à ses despens, d'auoir quelque valet, quelque chambriere, selon sa qualité, d'auoir des habits, & du linge pour changer à sa volonté, de se traiter de viures & de toutes autres choses selon ses facultez, & qui plus est, d'auoir aduocats & procureurs pour lui seruir de cōseil & solliciter son droit. Toutes ces choses sont refusees à ceste Royne, si non qu'en fin la voyant malade & mal disposee pour se seruir elle mesme ils la permirent auoir quelque valet & quelque chambriere pour empescher le monde de parler. Mais quand à ce que Paulet luy auoit dict, que son aumonier luy seroit rendu, cela est faux. Car sa maiesté ne l'a iamais veu ne pas vn des officiers & principaux seruiteurs, si non son medecin, & son apoticaire desquels elle ne se pouuoit passer, & sans lesquels elle fust morte auparauant qu'ils eussent mis fin à leurs desseins, & dressé tous les mysteres qu'ils estimoient necessaires auant qu'elle liurer entre les

mains du bourreau. Quant au transport
 de son corps, sa sepulture, & autres reque
 stes par elle si sérieusement faictes en ceste
 lettre, vous voyez cōme elles ont esté en
 terinees, & le peu de cōte qu'ō en a tenu.
 Et neantmoins vous pouuez iuger asseu
 rement de la douceur & de la bonne vo
 lonté de ceste princesse enuers sa cousine
 sa plus grande ennemie: Elle ne luy impu
 te pas la cause de sa mort, elle ne luy don
 ne pas la coulpe ne le blasme, combié que
 ce fut elle qui lui eust procuré ce malheur
 des long temps a, & auoit tout pouuoir
 de l'en garentir si elle eust voulu. Elle luy
 pardonne sa mort de bon cœur, elle prie
 pour son amendement, elle l'enseigne &
 remonstre la voye de salut. Mais à qui?
 aux ondes del'Océan agité du vent, &
 escumant de rage, aux rochers effroya
 bles de la coste d'Angleterre, qui ne sont
 si sourds, ne si durs que leur maistresse. Et
 cependāt elle nous veut persuader qu'ils
 l'ont respectée, qu'ils ont eu esgard à sa

qualité, qu'ils ont procedé fort honora-
 blement à la faire mourir. Je ne vous sçau-
 rois rapporter les propos pleins d'iniures
 & mespris à toute heure à elle tenus par
 ce Paulet son geollier & autres, ne la cen-
 tiesme partie des brauâdes & autres indi-
 gnitez à elle faites iusqu'à la fin de sa vie.
 Mais quâd à celles qui luy furent faites à
 l'heure de son martyre, ie vous en dedui-
 ray vne partie apres la lecture de la cômif-
 sion de l'Angloise adressée à ses officiers
 pour procéder à l'executiõ reelle & actu-
 elle de sa sentence. Ceste commission est
 fort considerable, car par icelle vous pou-
 uez voir euidẽment les vrayes causes de la
 sentẽce, qui sont l'abolition de la foy ca-
 tholique, & l'establissement d'heresie au
 royaume d'Angleterre, & l'asseurance de
 qlqu'vns du cõseil, qui pour les outrages
 par eux faits à ceste dame durât sa capti-
 uité, & pour les trahisons, cõplots & me-
 nees par eux dressees de tout temps con-
 tre sa vie & son estat se desespéroient de

trouuer amitié ou grace en son endroit
 si fortune aduenoit à leur maistresse, &
 que selon le cours & commun ordre de
 nature la Royne prisonniere succedast
 à la couronne. Ce que vous pouuez aise-
 ment iuger par la lecture de ceste com-
 mission, laquelle à ceste fin i'ay bien vou-
 lu produire translatee au vray de leur lan-
 gage en François.

“ Elizabet par la grace de Dieu Royne
 “ d'Angleterre, Frâce & Irlande, defen-
 “ trice de la foy &c. A noz amez & feaux
 “ cousins George de Schernsbery grand
 “ Mareschal d'Angleterre, Henry comte
 “ de Kent, Henry comte d'Erby, Geor-
 “ ge Comte de Comberland, Henry com-
 “ te de Pembrok, salut.

“ Veul la sentence par nous donnee, &
 “ autres de nostre conseil, noblesse &
 “ iuges, contre la iadis Royne d'Escoffe,
 “ portant le nom de Marie, fille heritiere
 “ re de laques cinquiesme Roy d'Escoffe,

“ appelée communement Royne d’Es-
 “ cosse, douariere de Frâce, laquelle tous
 “ les estats de nostre royaume assemblez
 “ en nostre dernier parlement non seule-
 “ ment conclurent, mais avec meure de-
 “ liberation ratifierent pour estre iuste &
 “ raisonnable: Veue pareillement l’instan-
 “ te priere & requeste de noz subiets, nous
 “ sollicitas & pressans de proceder à la pu-
 “ blication d’icelle, & la passer en execu-
 “ tion alencontre de sa personne selon
 “ qu’ils la iugent auoir deument meritée,
 “ adioustant en cest endroit que la deté-
 “ tion d’icelle estoit & seroit iournelle-
 “ ment vn certain & euident danger non
 “ pas seulement de nostre vie, mais aussi
 “ à eux mesmes & à leur posterité, & à l’e-
 “ stat publique de ce royaume, tant à cau-
 “ se de l’Euangile & vraye religion de
 “ Christ, que pour la paix & tranquillité
 “ de cest estat: Surquoy nous fismes, ia-
 “ çoit qu’avec temps & delay, publier la-
 “ dite sentence par nostre proclamation

“ & encores que iusques à ceste heure
“ nous nous foyons absteins d’octroyer
“ commission pour l’executer, toutesfois
“ pour l’ample satisfaction desditesreque
“ stes faictes par les estats de nostre par
“ lement, par lequel iournellement nous
“ entendons que tous noz amez subiets
“ tant de la noblesse, conseil qu’aussi des
“ plus sages grands & deuots, voire
“ iusques à ceux d’inferieure condition,
“ avec toute humilité & affection, pour le
“ soin qu’ils ont de nostre vie, & conse
“ quemmēt pour la crainte qu’ils ont de
“ la ruine du present diuin & heureux e
“ stat de ce royaume si nous espargnons
“ la finale execution, consentent & desi
“ rēt ladite execution: & bien que les ge
“ nerales & continuelles requestes, pri
“ eres, conseil & aduis fussent en telle
“ chose contraires à nostre naturelle in
“ clination,, toutesfois estant conuain
“ cue de l’vrgent poids de leurs conti
“ nuelles intercessions, tendantes à la

“seureté non seulement de nostre per-
 “sonne, mais aussi du publique & par-
 “ticulier estat de nostre royaume, nous
 “auons consenti & souffert que iustice
 “print lieu, & pour l’execution d’icel-
 “le, pour la singuliere fiâce & confian-
 “ce que nous auons de vostre fidelité &
 “loyauté, ensemble pour l’amour & af-
 “fection que particulièrement vous a-
 “uez en nostre endroict à la sauuegar-
 “de de nostre personne & de nostre nai-
 “ue patrie, de laquelle tous estes tref-
 “nobles & principaux membres, nous
 “mandons, & pour descharge d’icelle
 “nous vous enioignons, que la presen-
 “te veue vous ayez à vous transporter
 “au chasteau de Fodringhaye, là où la ia-
 “dis Royne d’Escoſſe est en la garde de
 “nostre amé & feal seruiteur & conseil-
 “ler le seigneur Amias Paulet, & la pren-
 “dre en vostre charge, & faire que par
 “vostre commandemēt l’execution soit
 “faicte sur sa personne en la presence de

“vous mesmes & dudit sieur Amias Pau
 “let, & de tous autres officiers de iusti-
 “ce que vous commanderez estre là at-
 “tendans à vous pour cest effect. Et i-
 “celle execution faictes en telle manie-
 “re & forme, & en tel temps & place, &
 “par telles personnes que vous cinq,
 “quatre, trois ou deux trouuerez expé-
 “dient par vostre discretion, nonob-
 “stant toutes loix, statuts & ordōnances
 “quelconques cōtraires & ces presentes
 “seellees de nostre grād seau d’Angleter-
 “re, qui vous seruiron t à chacun de vous
 “& à tous ceux qui serōt presēts ou ferōt
 “par vostre cōmādemēt aucune chose ap-
 “partenāt à l’execution susdite pleine &
 “suffisāte descharge à tout iamais, faict &
 “donné à nostre maison de Grenniche le
 “premier iour de Feubrier l’annee 29. de
 nostre regne. Ceste cōmission ainsi don-
 nee, le septiesme iour ensuyuāt, qui estoit
 le 17. de Feubrier selon le Calendrier gre-
 gorien, dont aujourd’huy les Chrestiens

se feruent, le comte de Scherufbery, le comte de Kent, Maifter Beel & autres commissaires d'Elizabet arriuent à Fordinghaye enuiron les deux ou trois heures apres midy, & y estans en presence de Paulet font lecture de leur commission à leur prisonniere, luy declarant que le lendemain matin ils procederoiēt à l'exécution de sa personne, l'admonestant de s'apprester entre sept & huit. Elle sans s'estonner aucunement les remercia de leurs bonnes nouuelles, leur disant qu'ils ne luy en pouuoient apporter meilleures, pour voir maintenant la fin de ses miseres, & que long temps y a qu'elle s'estoit aprestee à mourir, se doutant tousiours depuis sa retention en Angleterre, de ne rencontrer meilleure issue, mais qu'elle estoit marrie de n'auoir esté plustost aduertie, à fin de faire son testament, donner ordre à ses affaires, & disposer de si peu de moyēs qui luy pouuoient rester à la descharge de sa conscience enuers ses

pauures

pauvres seruiteurs & creanciers, leur suppliant luy donner quelque temps pour ce faire, puisque cela gisoit en leur volonté, comme leur commission le portoit. A quoy le Côte de Scherufbery luy dict assez rudement, non non madame, il faut mourir, il faut mourir, tenez vous preste demain entre sept & huit du matin, on ne vous prorogera pas ce delay d'un moment. Quoy voyant, & eux retirez, elle se met incontinent à faire son testament, & à distribuer le peu d'argēt qu'elle auoit de reste entre ses seruiteurs, leur faisant à chascun vne petite boursete selon leurs qualitez & merites. La nuit se passa en prieres & oraisons, en la lecture de la passion de nostre seigneur, & en semblables consolations de l'ame, & meditations saintes. Entre neuf & dix heures du soir voyant la rigueur qu'on luy tenoit, & l'empeschement donné à son aumonier d'appro-

cher de sa maiesté pour disposer de son
ame librement & selon l'institution du
sainct esprit obtenir remission de ses pe-
chez par le ministere du prestre, elle luy
escrit en ces mots.

“ J'ay esté combatue ce iour de ma re-
“ ligion , & de receuoir la consolation
“ des heretiques , vous entendrez par
“ Bourgoin & les autres que pour le
“ moins i'ay fidellement faict prote-
“ station de ma foy en laquelle ie veux
“ mourir . J'ay requis de vous auoir
“ pour faire ma confession , & receuoir
“ mon sacrement . Ce que m'a esté
“ cruellement refusé , aussi bien que le
“ transport de mon corps , & le pou-
“ uoir de tester librement , ou rien es-
“ crire que par leurs mains , & sous
“ le bon plaisir de leur maistresse . A
“ faute de cela ie confesse la griefuete
“ de mes pechez en general , comme
“ i'auois deliberé de faire à vous en

“ particulier , vous priant au nom de
“ Dieu de prier & veiller ceste nuit
“ avec moy pour la satisfaction de
“ mes pechez , & m'enuoyer vostre
“ absolution , & pardon de toutes les
“ offences que ie vous ay faictes . l'es-
“ sayeray de vous veoir en leur pre-
“ sence , comme ils m'ont accordé du
“ maistre d'hostel , & s'il m'est per-
“ mis deuant tous à genoux ie de-
“ manderay la benediction . Aduisez
“ moy de plus propres prieres pour ce-
“ ste nuit , & pour demain matin . Car
“ le temps est court , & ie n'ay loisir
“ d'escrire , mais ie vous recomman-
“ deray comme le reste , & sur tout
“ voz benefices vous seront asseurez ,
“ & ie vous recommanderay au Roy .
“ Je n'ay plus de loisir . Aduisez moy
“ de tout ce que vous penserez pour
“ mon salut par escrit . Je vous enuoye-
“ ray vn dernier petit token .

D d ij

Le iour venu enuiron les huiet heures
 entre en sa chambre vn compaignon a-
 uec vn baston blanc en la main, lequel
 sans autrement s'adresser à personne,
 voyant sa maiesté encores sur les ge-
 noux à ses prieres dit en se promenant,
 me voicy venu, me voicy venu. La Roy-
 ne se doutant qu'il l'aduertissoit de l'heu-
 re de l'execution, se leue & prend en la
 main vne croix d'yuoire, qui estoit sur
 l'autel, & par ce que ses seruiteurs qui la
 tenoient desia sous les bras se rauiserent
 abhorrans de la conduire à vn lieu si mal
 plaissant à leur gré, luy estre guides à la
 mort & spectateurs d'une si piteuse tra-
 gedie, Pauler luy donna deux de ses va-
 lets, qu'ils appellent seruimen, pour la
 mener, d'autant que son indisposition
 estoit telle qu'elle ne pouuoit marcher
 seule. Le lieu de l'execution estoit en
 la salle, au milieu delaquelle on auoit
 dressé vn eschaffault large de douze

pieds en quarré, & haut de deux, qui e-
 stoit tapissé de meschante reuefche noi-
 re. Elle y monta si dispostement & si
 allegrement que vous eussiez dict à la
 veoir qu'elle alloit disner en quelque fe-
 stin, car iamais elle ne changea de
 contenance. S'adressant aux officiers
 d'Elisabet elle les pria que leur bon plai-
 sir fust luy faire venir son aumonier, à
 fin de se consoler en Dieu & receuoir
 de luy quelque remonstrance avec la der-
 niere benediction. Ce que luy fut re-
 fusé tout à plat, luy disant le Comte de
 Kent, qu'il la plaignoit grandement de
 la veoir ainsi adonnee aux superstitions
 du temps passé, & qu'il falloit porter la
 croix de Christ en son cœur, & non
 en la main. A quoy elle feit responce
 qu'il estoit malaisé de porter tel obiect
 en la main sans que le cœur en fust tou-
 ché de quelque notion & souuenance:
 que la chose la plus seante à toute per-

femme Chrestienne c'estoit de porter la
 vraye marque de sa redemption lors
 que la mort la menaçoit. Voyant qu'il
 n'y auoit point de moyen d'auoir son
 aumonier, elle leur feit vne autre requie-
 ste, que ses seruiteurs fussent tous pre-
 sents pour estre tesmoins oculaires de sa
 constance en la vraye religion & Catho-
 lique pieté de ses maieurs. Ce qu'ayant
 fort instamment requis, leur promet-
 tant qu'elle leur imposeroit silence, de
 sorte que par leurs brayements, hurle-
 mens & lamentations l'acte de l'execu-
 tion ne seroit aucunement troublé ou
 empesché, ils feirent venir iusques au
 nombre de cinq & deux damoiselles ser-
 uantes. L'vne desquelles à son entree
 dans la salle apperceuant sa maistresse en
 tel equipage parmy des bourreaux, ne
 se peut engarder de gemir, & de perdre
 contenance, mais incontinent sa maie-
 sté luy ayant faict signe du doibt contre

la bouche, elle se retint. Ces damoiselles montees sur l'eschaffaut ayderent à oster son voile, sa coiffeure, & ses autres ornemens. Mais sa maiesté ne peut onques empescher le bourreau d'y mettre aussi la main. Car apres qu'on eust abaissé sa robe iusques à la ceincteure, il la tira par le bras assez lourdement, & luy osta son propoint. Son corps de cote auoit le collet bas, de maniere que son col & sa gorge plus blancs qu'albastre apparoiſſoiēt nuds & bien descouuerts. Elle mesme s'accommoda le plus diligemment qu'elle pouuoit, disant qu'elle n'estoit pas accoustumee de se despouiller en si grande compagnie, ne se seruir de tels valets de chambre. Le bourreau se meit à genoux, & luy demanda pardon, à quoy elle dit, qu'elle luy pardonnoit, & à tous ceux qui estoiēt auteurs de sa mort, d'aussi bon cœur qu'elle desiroit ses pechez luy estre pardonnez de dieu, protestant

n'auoir onques attenté contre la vie ou l'estat de sa cousine, ne commis autre chose digne de blasme, si on ne vouloit imputer à crime sa religion, pour laquelle respendre la derniere goutte de son sang, elle s'estimoit beaucoup plus heureuse que de viure plus longuement, & attendre que nature paracheuast le cours ordonné de sa vie : qu'elle esperoit en celuy qui estoit représenté par la croix qu'elle tenoit en main, & deuant les pieds duquel elle se prosternoit, que ceste mort temporelle soufferte pour son nom luy seroit le passage, le commencement & l'entree de la vie eternelle avec les anges & les ames bien heureuses, qui receuroient d'elle son sang & le representeroient deuant Dieu en deduction de toutes ses offenses, les priant de luy estre intercesseurs pour obtenir pardon de grace. Telles estoient ses prieres estant

à genoux sur l'eschaffaut lesquelles elle faisoit d'un cœur fort ardent, y adioustant plusieurs autres pour le Pape, pour les Roys de France & d'Espaigne, & mesmement pour la Royne d'Angleterre, priant Dieu la vouloir enluminer de son saint esprit, & la convertir à son seruice, & à sa sainte religion. Autant en disoit elle de son fils, Roy d'Escosse, & qu'il pleust à Dieu d'auoir pitié de son Eglise, & destourner son ire de l'Isle de Bretagne qu'elle voyoit menacée grandement de ses fleaux à cause de son impiété. Elle auoit à son entree sur l'eschaffaut prié de mesme, & depuis les reitera deux ou trois fois, mais tousiours elle estoit interrompue & troublee par vn ministre qu'on luy auoit amené pour l'exhorter, combien qu'à la premiere fois elle l'eust prié de luy donner patience, luy declarant qu'elle ne vouloit

communiquer avec luy, ny auoir aucun commerce avec ceux de sa secte: qu'elle s'estoit apprestee à mourir sans son conseil, & que telles gens que luy ne luy pouuoient apporter aucune consolation ou contentement d'esprit. Ce neantmoins voyant qu'il continuoît ses prieres en son baragoin, elle ne laissa de faire les siennes en latin, eleuant sa voix par dessus celle du ministre. Elle portoit vne croix d'or au col, avec l'image de nostre seigneur, qu'elle vouloit bail-
ler à l'vne de ses damoiselles, mais le bourreau l'empescha, qui le voulut auoir, nonobstant que sa maiesté l'eust prié de ce faire, luy promettant que la damoiselle luy payeroit trois fois la valeur. En fin s'estant tout aprestee, apres auoir baisé ses damoiselles, elle leur donna congé de se retirer avec sa benediction leur faisant le signe de la croix sur elles. Et voyant que l'vne des

deux ne se pouuoit contenir qu'elle ne plorast, elle luy impose silence, disant qu'elle s'estoit obligee de promesse, qu'elles ne feroient aucun trouble par leurs pleurs & larmes, leur commandant de se retirer doucement, de prier Dieu pour elle, & porter bon & fidelle resmoignage de sa mort en la religion ancienne, sainte & Catholique. L'une des deux luy ayant bandé les yeux de son mouchoir, incontinent elle se iecte à genoux de grand courage sans donner la moindre demonstration ou signe d'aucune contraincte de la mort. Sa constance estoit telle que toute l'assistance, mesmement ses ennemis furent esmeuz, & n'y auoit pas trois ou quatre personnes en toute la compagnie, qui peurent retenir l'humeur qui leur distilloit des yeux, tant ils trouuoient ce spectacle estrange, se condemnans eux mesmes en leur conscience d'une telle iniustice & plus que tyrannique cruauté.

Et parce que le ministre de Sathan l'importunoit, luy voulant ruer l'ame avec le corps, & la troubloit en ses prieres, en haussant sa voix pour le surmonter elle dict en latin le pseaume, *In te domine speravi, non confundar in aeternum*, lequel elle recita tout au long. Ayant acheué, se meit la teste sur le billot, & comme elle repetoit encores de rechef le verset, *In manus tuas domine commendo spiritum meum*, le bourreau luy bailla vn grand coup de hache, dont il luy enfoncea ses attifets dans la teste, laquelle il n'emporta qu'au troiesme coup, pour rendre le martyre plus illustre, combien que ie sçay que ce n'est pas la peine, ains la cause qui faict le martyre. Ce faict il prend la teste en la main & la monstrant aux assistans, dict, Dieu sauue la Royne Elisabeth: ainsi aduienne aux ennemis de l'Euangille, & en ce disant il la de-

coiffa par maniere de meſpris & deriſion à fin de monſtrer ſes cheueux deſia blancs, & le ſommet de ſa teſte nouvellement tondu. Ce qu'elle eſtoit contraincte de faire bien ſouuent à cauſe d'un reume auquel elle eſtoit ſubiecte. La tragedie finie les pauvres damoiſelles curieuſes de l'honneur de leur maiſtreſſe ſ'adreſſerent à Paulet ſon gardien & le prierent que le bourreau ne touſchaft plus au corps de ſa maieſté, & qu'il leur fuſt permis de la deſpouiller apres que le monde ſeroit retiré, à fin qu'aucune indignité ne fuſt faiet au corps, promettant de luy rendre la deſpouille & tout ce qu'il pourroit demander. Mais ce mauidict & hideux & eſpouventable Cerberus les renuoya fort lourdement, leur commandant de ſortir de la ſalle. Cependant le bourreau la deſchauffe, & la manie à ſa diſcretion: Apres qu'il euſt

faict tout ce qu'il vouloit, le corps fut
 porté en vne chambre ioignante celle
 de ses seruiteurs, bien fermee de peur
 qu'ils y entraissent pour luy faire aucun
 bon office. Ce qui leur augmenta gran-
 dement leur ennuy, car ils la voioient
 bien par vn trou à demy couuerte d'un
 morceau de drap de bur qu'on auoit ar-
 raché de la table de billard, dont auons
 parlé cy dessus. Ce pauvre corps y fut
 assez long temps en ceste sorte, iusques à
 ce qu'il commença se corrompre & fen-
 tir à bon escient, qu'en fin ils furent
 contraincts de le falloir & embaumer à la
 legere pour espargner les frais, & puis le
 mirent en coffre de plomb, où il fut
 gardé sept mois, & puis porté en terre
 prophane du temple de Peterbrouch.
 Vray est que ceste Eglise est dediee sous
 le nom de monsieur saint Pierre, & la
 Royne Catherine d'Espaigne y a esté en-
 terree à la Catholique, mais elle est au-

iourd'huy prophane, comme sont toutes les Eglises d'Angleterre. Il y a des Anglois qui ont descrit ceste execution en leur langue, & y ont adiousté les causes qui ont meu leur maistresse à ceste cruauté recherchees les vnes de bien loing, les autres la plus part fauses, mais ils n'ont peu si bien desguiser le faict qu'ils n'ayent donné à entendre vne partie de la verité, sçauoir est que le desir de vengeance, la rancune qu'elle luy portoit de tout temps, tant à cause de sa religion, qu'à cause des armoiries & escussions d'Angleterre par elle pris apres son mariage en France sont les vrayes causes de ce paricide. I'adiousteray vne autre la principale & la plus peremptoire de toutes, & de laquelle nous auons parlé le plus sobremēt, le peu de moyen qu'elle voyoit de frustrer la maison Royale d'Escoffe de la couronne tāt que ceste Royne viuroit & son fils, & l'opinion

qu'elle auoit que la mere esteincte fort
aisement elle viendroit à bout du fils,
& du reste par le moyen de ses Anges,
qui ont grand pouuoir sur le climat
d'Escoffe pour faire beaucoup de trahi-
stres, nommement sur ceux qui peu-
uent le plus, & qui à sa persuation ont
toufiours esté rebelles & ennemis iurez
de sa mere. Ces anglois ont aussi es-
crit entre autres choses que la despouille
de la Royne morte fust ostee au bour-
reau, en luy payant la vailleure en argent:
que ses habits royaux, ses ornemens, la re-
uesche dont l'eschaffaut estoit couuert,
mesmement les ais d'iceluy, le paucé de
la maison, & toutes autres choses arrou-
sees ou touschees de son sang, furent in-
continent vne partie bruslez, vne partie
lauez, de peur qu'au temps à venir ils ser-
uissent à superstition, c'est à dire, de peur
qu'ils fussent, recueilliz par les Catholi-
ques avec respect, honneur, & reuerence
comme

comme les bons peres anciens auoient de coustume de garder les reliques & obseruer avec deuotion les monuments des martyres. Ce n'est pas de ce tēps que les heretiques en ont ainsi fait, *qui omnia quæ martyrum erant cremabant*, comme dit Eusebe, *& cineres in Rhodanum spargebant, ut cum corporibus interiret eorum quoque memoria*. Mais en despit d'Elizabet, & de son conseil infernal, & à leur grande honte & confusion la memoire de ceste martyre viura perpetuellement en triomphe & gloire parmy les Chrestiens, *nec ab auditio- ne mala timebit*: mais au contraire leur memoire sera damnee comme celle d'Herode, celle de Iudas, de Caiphé, de Pilate & des autres ennemis de nostre seigneur. Voyez vous pas maintenant l'honnorable façon de proceder dont ils ont vsé à l'endroit de ceste Royne? Voyez vous pas le grand respect qu'ils luy ont porté. Nous auons veu condamner à mort par iustice des seigneurs & gentils hommes

pour trahison & rebellion commise contre leurs maistres, qui à l'heure de l'exécution iamaïs ne veirent le bourreau, aussi iamaïs ne les toucha il de la main, ains apres qu'ils auoient les yeux bandez le bourreau montoit sur l'eschafaut & leur bailloit vn coup, & puis s'en alloit. Ils n'estoient pas de la qualité de ceste dame, leurs maistres faisoient respecter leurs personnes, encores qu'ils fussent criminels de leze maiesté parce qu'ils estoient gentils hommes & seigneurs de marque. Ceste dame n'estoit pas, & ne pouuoit estre criminelle: Elisabet ne luy pouuoit estre maistresse, ne superieure, ains au contraire estoit sa seruâte par la loy de nature & droict de gens, & neantmoins elle la faict manier, prophaner, violer sa royale personne, plus belle & plus illustre, sans comparaison, que la sienne, à l'appetit d'un bourreau la faict assommer, meurtrir & assassiner à plusieurs coups par mespris & dedain: la faict despouiller

de ses ornements & habits royaux par
ce vilain gueu deuant tout le peuple.
Quelle barbarie? Si elle se fust retiree
pardeuers les Canibales demander ay-
de en son affliction, ils n'eussent pas vsé
enuers elle de telle cruauté. Inhumai-
ne & plus que barbare, ils eussent adiu-
ré sa singuliere vertu: sa constance &
grandeur de courage les eust facile-
ment estonnez: sa beauté surpassant
toutes autres les eust ravis, le seul nom
souuerain de Royne les eust meus à
pitié. Ceste maudite filie de Lyczon en
violant tout droit d'hospitalité, ne se
sent touchée d'aucune affection humai-
ne. La puis-ie comparer à Lycaon? Ly-
caon mangeoit ses hostes le iour, ou lende-
main qu'ils estoient arriuez, sans les fai-
re languir en perpetuelle crainte: Lyca-
on ne mangeoit pas ses proches pa-
rents: Lycaon ne mangoit pas ceux qu'il
auoit inuitez en son royaume, ny
ceux auxquels il auoit donné sa foy, &

iuré loyauté, ny ceux qui par humble supplication s'adreffoient à luy implorants son ayde & secours en leur aduersité. Ceste tigresse transportee de rage & de furie, apres s'estre liguee avec sa plus proche parente, & avec elle iuré paix & amitié, apres l'auoir inuitee en son royaume par lettres, par ambassades, par dons & presens, la voyant poursuyue de fortune, & rendue suppliante, contre sa foy & promesse la detient encagee par l'espace de vingt ans, luy faisant tous les iours dix mille indignitez, & en fin la sentant si desfaite & harassée par son mauuais traitement, qu'elle fust bien tost morte sans y mettre la main, elle n'a peu contenir sa gloutonnie insatiable, qu'elle ne se soit rassasiee du sang innocent, faisant deuorer la plus illustre dame de l'Europe par le glaive infame d'un bourreau, sans aucune reuerence ny de Dieu, ny des hommes. Elle se denoit biē adresser pour demãder secours à celle qui n'a iamais secouru per

sonne viuante, qui ne fust meschant, trahistre & desloyal comme elle. La fortune du renard d'Æsope la deuoit destourner de la resolution qu'elle print de se réfugier en Angleterre, & de l'attente du secours d'Elisabet, Ce renard mal adoussé, pour euitier la cheute (dont il se voyoit en danger) du haut en bas de certaine haye, où il estoit monté, s'appuya sur vne ronce, qu'il auoit empoigné pour ayde, laquelle, en lieu de le soustenir, le laissa non seulement tomber, mais aussi en tombât luy deschira vileinement les pieds. Il faut cognoistre les personnes, ausquelles on veut auoir recours en temps de necessité. Ceste dame n'auoit pas encores beaucoup pratiqué Elizabet lors qu'elle entra en son pays, & encores que par plusieurs experiences elle eust aprins qu'elle fauorisoit tousiours les meschants, ses semblables, siest ce qu'attendu sa foy si solennellement donnee par ses Ambassadeurs & par ses lettres & outre confirmée par pre

iens & dons, qui estoient les gages de son amitié reciproque, elle pensoit qu'elle deust corrompre son naturel mauvais & peruers, en considerant la fragilité des choses humaines, & donnant lieu à pitié & cōpassion ou, si d'auenture elle ne vouloit gratifier, & soy redre obligee perpetuellement vne telle suppliāte (cōme elle deuoit faire par infinies raisons que persōne ne peut ignorer) à tout le moins qu'elle la renuoyroit & s'abstiendrait de luy nuire. Mais ainsi qu'on ne se peut appuyer sur la roce s'estre piqué aussi ne se pouuoit on adresser à vne fēme si maligne de nature, sans estre cruellement offēsé. Son pere & sa mere ont trāsmis en elle toutes leurs belles perfections, l'impietē, l'heresie, la tyrānie, l'ābitiō, l'auarice, la perfidie, la cruauté, la paillardise, l'hypocrisie, l'ingratitude, l'ire, l'āvegāce, l'implacabilité, les ruses, l'astuce pour trōper, & autres infinies vertus de ceste sorte, dōt ils estoient richement douez, lesquelles elle a si biē augmentees,

qu'elle demonstre bien que ce talent n'a pas esté caché sous terre, ains qu'elle l'a bien mis à profit pour le faire multiplier. Mais pour laisser ce discours qui ne luy peut estre agreable, retournons à l'ordonnance de ses estats, & voyons si elle y pouuoit assubiectir la Roynie d'Escoffe, princesse autant, ou plus libre qu'elle, & qui n'a iamais rien tenu ny d'elle, ny de ses estats. Elle mesme s'est tousiours exēptee & a mesprisé leurs iugements, quand il y auoit quelque chose qui la concernoit. Ce qu'elle demonstra bien par la resolution par elle prise cōtre l'aduis de ses estats qu'elle auoit conuoqué au mois d'Octobre 1566. Où estant arresté d'un commun consentement de tous, de ne traicter aucune chose iusques à ce qu'elle eust nommé vn successeur à sa couronne, pour obuier aux troubles qui cōmençoient à pulluler dans le royaume par les menees & complots de ceux qui y

Ec iiii

aspiroient, mettoient desia leurs titres en
 auant, elle leur commanda de passer ou-
 tre, leur disant que leurs resolutions ne
 pouuoient auoir aucun effect contraire à
 son vouloir. Ce qu'ils furent contraints
 de faire apres qu'elle leur eust reproché,
 qu'ils luy vouloient faire sa fosse aupara-
 uant qu'elle fust decedee. C'est vne cho-
 se sans aucune controuerse ou dispute, &
 confirmee par trop d'experiences, que
 son pere & elle ont tousiours fait de leur
 parlement ce qu'ils ont voulu, sans aucu-
 ne resistance: Et si d'auanture s'y est trou-
 ué quelque homme de bien plus que les
 autres, qui leur ayt voulu contredire, &
 contreroller leurs demandes, ils se sont
 brauement depetrez le faisât seruir d'exé-
 ple aux autres, à fin de se donner garde
 d'encourir leur indignation. Par quel
 moyen y veut elle dōques obliger la Roi-
 ne d'Escoffe? ie sçay bien que vous
 me direz qu'une personne commettant
 crime dans vn royaume estranger, contra-

de traitement avec le Prince, & se rend
 subiecte à ses loix. A quoy ie vous res-
 ponds en premier lieu, que ne ceste loy,
 ne la loy Romaine, *qua in prouincia*, ne au-
 tres semblables ne peuuent estre enten-
 dues de la persõne des princes souuerains
 qui ne peuuent estre assubiectis aux loix
 soient les leurs, soient celles d'autrui. Se-
 cõdemet, ie dis qu'elle n'estoit en vostre
 royaume sous vostre protection comme
 vous mentez impudemment en la publi-
 cation de vostre sentence, ains y estoit de
 tenue par force plusque tyrannique &
 barbare, contre la loy de Dieu, & le droit
 des gens. Elle n'y estoit pas de son gré, ny
 pour aucun plaisir qu'elle y prenoit, puis-
 qu'elle ne trouuoit pas ce qu'elle cher-
 choit. Quand elle y entra, elle pensoit à
 tout le moins trouuer ce qu'elle eust trou-
 ué en vn royaume le plus estrange, barba-
 re, & payen du monde. Car il ne se trouue
 nation où Iupiter ne soit respecté en l'un
 de ses trois titres, ξένως, ἱκετήσιος, φίλως c'est

à dire deffenseur du droict d'hospitalité, de supplication & d'amitié, vengeur du tort fait aux estrangers, aux suplians & aux amis. Elle pensoit que la moindre de ces trois qualitez attribuees au souuerain Dieu, la deuoit garantir de toute iniure. Elle auoit appris que non seulement les hommes, mais aussi les bestes auoient ce sentiment de raison, qu'elles respectent leurs hostes, ne mesprisent les supplians & sont fideles à ceux qui se fient en leur amitié, ou desquels elles ont receu courtoisie. Pour exéple nous auons ce grād & effroyable lyon d'Affrique, qui nourrit par l'espace de trois ans Androdus Dacus pauvre esclau, qui s'estoit sauué dans sa tefniere, fuyant la cruauté de son maistre. Et cōbien qu'Androdus eust delaisé son hoste sans le remercier & sans prendre cōgé, ce neātmoins au bout de quelques anneés estans tous deux par rencontre amenez à Rome, & mis au cercle ou champ clos, pour se combattre, & don-

ner plaisir au peuple tant s'en fault que
 ce genereux animal se voulust ressentir
 de l'ingratitude de cet esclauue, comme il
 auoit la force, qu'au contraire le reco-
 gnoissant pour son hoste, comme luy
 ayāt voué amitié le caressa & flatta com-
 me il peut de la queuë, & ne peut onc-
 ques estre prouoqué par l'instigation &
 agacement des spectateurs à luy faire au-
 cun desplaisir. Cest animal a cela de natu-
 re, qu'il ne reiette pas les prieres des sup-
 plians, ains les entend, & ne fait aucun
 dōmage à ceux qui se prosternēt & s'hu-
 milient deuant luy. Vne esclauue Getulien-
 ne fugitiue & espauue, estāt par les deserts
 & forests de la Guinee se sauua & escha-
 pa par douces parolles la fureur de plu-
 sieurs lyons, ayant eu la hardiessse de leur
 remonstrer qu'elle estoit pauvre femme,
 fuitiue, bānie, malade & sans deffense, &
 qu'elle n'estoit digne de seruir de proye
 à la generosité & gloire de celuy, qui cō-
 mandoit à tous animaux. C'est le vray

Lyon qui est ainsi genereux, & magnanime, & non celuy qui est engendré de l'adultere de la lyonnelle & du liepart, ou du lyō & de la tigresse, ou autres bestes semblables. Car ceste espece de lyons qui ne sont francs & naturels, ains conceus de la commixtion d'autres bestes, ne retiēt pas cest instinct naturel de clemēce, de courtoisie, d'amitié du vray lyon, non plus que faiēt Elizabet Tither des Roux, vrays & legitimes Roys d'Angleterre, de la race desquels elle ne rapporte aucune chose, si non la cruauté barbare, & impiété de son pere. Mais nous parlons icy de l'animal, qui par le commun consentement de tous le hommes est estimé le Roy des autres, à cause de sa generosité. Il y a d'autres animaux abietts & vils, qui ne sont produits au monde q̃ pour malfaire, lesquels toutesfois ont recognoissance de leurs amis de leurs biēfaiteurs, & leur rēdēt grace de leur hospitalité. Les histoires anciennes rapportent q̃ Thoas deuoit la vie à vn

dragõ qui le sauua en Arcadie. Cerhoas a
 uoit nourry de ieunesse chez s^{on} pere cest
 nimal impur & vilain: mais le pere le uoi-
 ant venir si grand, & craignant son natu-
 rel & sa grandeur, le fit porter es deserts,
 esquels par fortune Thoas estant vn cer-
 tain iour assailly des brigans, il fut secou-
 ru soudain par ce dragon, qui l'ayant en-
 tendu crier le reconnut à la voix. Vne vi-
 pere tua l'vn de ses petits, qui auoit mor-
 du l'enfant de son hôte. Le dragon, la vi-
 pere corrompent leur naturel, & se sur-
 montent eux mesmes en respect de l'hos-
 pitalité. Elisabet ne peut dompter sa co-
 lere, ains a gardé vingt cinq ans ou plus s^{on}
 venin, pour en fin le vomir contre son
 hostesse. L'escarbot se végea cruellemēt
 de l'aigle, qui auoit mesprisé sa priere &
 supplication faiçte en faueur du lieure:
 l'aigle auoit reietté la priere d'vn animal
 vil & puant, & indigne de s'adresser à elle
 qui estoit la Roynie des oyseaux. Elizabet
 dedaigne & mesprise la supplication de sa

pareille ou plustostsuperieure. Laformie
 se vengea de l'oïseleur qui tendoit ses fi-
 lets pour prendre le pigeon, auquel elle
 estoit obligee d'amitié. Le pigeon ne
 s'attendoit pas à ceste courtoisie de la for-
 mie, & n'auoit d'elle aucũ gage ou pro-
 messe. Elizabet auoit iuré amitié à la Roi-
 ne d'Escoſſe, & promis secours au besoin
 & de ce luy en dõna gage. Elle se mōstre
 donc beaucoup inferieure aux bestes, &
 auoir moins de sentiment de raison, que
 n'ont ces petits insectes, qui ne sont pas
 bonnement bestes, ains partie bestes par
 tie plantes. Voila donc ce que ie respons
 en premier lieu à l'obiection d'Elizabet,
 que la Roine d'Escoſſe ne peut estre sub-
 iette à ses loix, n'estant en son royaume
 que par force & violēce, cōtre tout droit
 des hōmes & de nature: & ores qu'elle y
 fust de son gré cōm'elle y entra, les estats
 d'Angleterre ne peuuent entreprendre
 aucune cognoissance de ses affaires & en-
 core moins vsurper aucune iurisdiction

sur sa vie, ou son honneur. Secondement
 ie fay denegation qu'elle y ait cōmis au-
 cun crime, & di que celuy qu'ō luy a mis
 sus est vne cruelle menfonge, imposture,
 & calomnie trop exquise & trop affectee
 pour donner couleur de iustice à la tyrā-
 nie de ceste maudite louue. Cer cōment
 luy estoit-il possible d'attenter à sa persō-
 ne, ou de coniurer avecques ses ennemis
 à son preiudice, estant detenuë si estroi-
 tement, que les plus fidelles de ses ser-
 uiteurs ne pouuoient auoir accez aucun
 à sa maiesté, & ne communiquant qu'a-
 vecques ceux qui estoient aussi bien pri-
 sonniers qu'elle? vous me direz qu'elle
 auoit des intelligences avec les catholi-
 ques d'Angleterre. Cōment cela se pou-
 uoit-il faire, ne leur ayant rien peu com-
 muniquer? il falloit necessairemēt quel-
 que proxeneté, q̃lque interprete, q̃lque
 negociateur, ou intercesseur & moyen-
 neur entr'eux. Qui estoit-il? Les lettres
 de ses secrettaires escrites à Babintō ont

esté descouuertes. O le pauvre moyen
d'effectuer le crime que vous pretendez,
& de venir à chef d'une si haute entrepri-
se, puisqu'il n'y a que le papier qui peut
parler! Ces lettres que portent elles? la de-
liurance d'une Royne iniustement prisõ-
niere. Sont elles escrites ou signees de sa
main? non. Ie veux qu'elles le soient, ceste
cause est elle suffisante pour la faire mou-
rir? Si les Catholiques d'Angleterre ont
praticqué quelque chose en sa faueur au-
tre que pour sa deliurance, qu'en peut el-
le mais, qui n'a iamais rien sceu de ce, tât
s'en faut qu'elle y ait consenty? Vous me
direz qu'on a faict mourir ses complices,
par les confessions desquelles elle a esté
chargee. Nous le nions formellement.
Il n'y a que vous qui estes ses ennemis
mortels, qui le dites, qui estiez iuges &
parties, & qui en meurtrissant les gens de
bien leur attribuez tel dire que bon vous
semble en falsifiant leurs proces. On sçait
biẽ que vous faites mourir tous les iours
assez de

assez de pauvres catholiques, leur imputant des crimes auxquels ils n'ont iamais songé, & remplissez les proces verbaux de leur mort de plusieurs mensonges infames & execrables, à fin de pallier la tyrannie dont vous usez contre ceux de nostre religion, & pour destourner de voz testes la iuste vengeance des autres princes Chrestiens, qui se pourroient ressentir de ceste impieté. Nous disons doncques que personne ne l'a iamais chargée, & si aucune charge se trouue dedans vos papiers, qu'elle vient de vous, & non de ceux sous le nom desquels elle a esté employée, & que toutes les procédures par vous faictes, ont esté faictes contre tout ordre de iustice, & contre voz propres consciences pour obeir à la mauuaise volōté de vostre maistresse. Laquelle depuis qu'elle s'est emparée de la tyrannie d'Angleterre n'a cessé de rechercher tous les moyens à elle possibles de nuire à celle à qui la courōne ap-

partenoit, comme legitime princesse. Tous homes de bon & sain entédemēt tous ceux qui sont versez & experimen-
tez au faict de iudicature, estans aucu-
nement informez des rebellions & tra-
hisons par vous suscitees en Escosse cō-
tre ceste dame diront que c'est la louue
qui accuse l'aigneau de luy auoir trou-
blé l'eau, & presumeront que rien n'a
esté par vous fait & executé par aucune
voye de iustice, ains contre droict, con-
tre raison, & contre verité, attēdu le com-
mēcement de voz actions iniques & per-
uerfes, son emprisonnement & detentiō
de si long temps tortionnaire, & plein
de violence, avec ce que tout ce que
vous auez pour la verification du pretē-
du crime, ce ne sont que les seings de ses
ennemis apposez à leur faux iugement,
& lesquels elle eut recusé pour causes
trop notoires à tous ceux du pays, si elle
les eust recogneu pour iuges. Mais sça-
chant bien qu'ils ne pouuoient par aucun

ne loy du monde entreprendre telle co-
 gnoissance, & que leur maistresse n'auoit
 pas le pouuoir de les commettre, elle
 leur a laissé dire tout ce qu'ils ont voulu
 dedaignant leur respondre, comme fai-
 soit nostre seigneur à Pilate, quand il l'in-
 terrogeoit de choses qui n'estoient de sa
 iurisdiction, & qui excedoient sa capaci-
 té. Qui est celuy qui eust esté si hardy, de
 dire vn seul mot en sa faueur? Qui eust
 osé refuser de soubsigner ce maudit iuge-
 ment, infame & tyrannique? la mort du
 Duc de Nortfolk leur a bien appris à iu-
 ger à la fantaisie de leur Maistresse. Ceste
 miserable dogue pense faire trouuer sa
 cause bonne, n'ayant rien pour la garen-
 tir qu'un grand libelle soubscrit de plu-
 sieurs de ses plus intimez, qui luy ont tou-
 siours conseillé toutes les trahisons, vol-
 leries & brigandages qu'elle a commis,
 non seulement à l'édroit de sa cousin mais
 aussi à l'endroit des Roys de France, &

d'Espaigne, & qui mesmement ont tousiours participé au butin. Voyla vn crime bié verifié, voyla encores bié mieu xiugé. Son pere en faisoit de mesme, qui ne manqua iamais ny de iuges, ny de tefmoins, pour faire mourir vne infinité de gens d'honneur, de vertu, de bonne & saincte conuersation, qui ne pouuoient tant repugner à leurs consciences, que de consentir à ses adulteres, & oublier la loy de Dieu pour adherer à ses incestes, & trouuer bonne sa plus que brutalle paillardise. Tiercement ie dy que ceste procedure, & tout ce qui s'en est ensuyui est directement contraire à la loy municipale d'Angleterre qui de tout temps a esté generalmente obseruee sinon en ceste cause, qui veut que le proces d'un criminel soit examiné & iugé par ses egaux, & gens de semblable qualité iusques au nombre de douze pour le moins. Auez vous douze Roynes en Angleterre ou princes souuerains qui se peu

uent apparier à la Roine d'Escoffe & dou
 ariere de France? C'est vn estrange priui-
 lege d'ot vous auez vſé à l'endroit d'une ſi
 grande princeſſe. Pour conſeſion ie dy
 qu'encores qu'elle euſt conſpiré cōtre l'e
 ſtat, ou la vie d'Elizabet, l'ayant traictee
 ſi tyranniquement, qu'elle a faict, ſans au
 cune raiſon, elle ne peut eſtre grādemēt
 blaſmee, n'ayāt rien attenté, ſi non ce que
 la loy de nature luy octroye, laquelle eſt
 approuuee non ſeulement par les iuriſcō
 ſultes, qui concedēt beaucoup de choſes,
 cōme dit Seneque, quel'hōneſteté, lafoy,
 la religion, la pieté nepermettēt pas, mais
 auſſi par les Philoſophes, qui n'approu-
 uent rien ſi non ce qui eſt cōforme a l'hu-
 manité, à la pieté, à lafoy, à la probité, & à
 toutes autres vertus. *Quam enim anguſta*
innocentia eſt ad legem bonum eſſe? Ils diſent
 que toute nature eſt conſeruatrice de ſoy
 meſme, & par ce ſ'efforce non ſeulement
 d'appeter & pourſuiure ce qui luy eſt prof
 fitable, & aduātageux aux ſiens, mais auſſi

de fuir ce qui luy est contraire, & s'en deffaire par toutes voyes possibles. Les ordonnances des anciens Empereurs, & le droit ciuil fondez sur ceste maxime de nature permettēt de repousser force par force contraire, d'exēpter & defendre son corps d'iniūre, & de racheter son sang par quelque voye que ce soit. *Omnis enim honesta ratio est expedienda salutis.* Le droit commun permet à vn homme priué de resister par force à l'iniure d'un iuge, si elle est irreparable. A plus forte raison il est loysible à vne princesse de repousser par toutes voyes à elle possibles la tyrannie de celle qui ne luy est rien, & qui luy peut commander. Si vous l'eussiez renuoyé du commencement qu'elle s'estoit refugiée à vous, la laissant aller où bon luy eust semblé, tels accidents ne feussent aduenus: elle n'eust iamais eu le moyen de negotier aucune chose, ny dedans, ny dehors de vostre royaume, qui vous eust peu tourner à desplaisir ou à dommage. Auoit elle pas bōne raison de procurer sa

liberté, naturelle à tous animaux, laquelle sans raisõ vous luy auiez ostee & rauie? Vn oyseau, quelque bon traictemēt que vous luy puissiez faire, s'efforce rompre sa cage pour reprendre l'air des champs.

“Ut bene sint cauea clausæ Pandionenatæ,

“Nuitur in syluas quaqueredire suas.

Vous me direz la vieille chanson: que la loy de nature ne permet pas de s'adresser à son Prince, ou au magistrat, qui ne doit estre violé pour quelque cause, tant iuste qu'elle puisse estre: & que les Roys d'Escoffe sont vassaux & subiets du royaume d'Angleterre, & qu'ils ont recogneu voz ancestres pour superieurs. Balde grād iuriscōsulte Romain dit qu'un peuple prescrit sa liberté cōtre le Prince en cent ans. Je m'asseure qu'il y a biē troiscēs ans que les Anglois n'ont riē pretendu en Escoffe. & qu'ils n'ōt onc peu pretendre aucune chose par droit & raison. Enquoy ie voy de noz Huguenots François qui se trompent grandement pour flater ceste bōne

dame n'ayant leu aussi bien l'histoire d'Es-
 cosse que celle d'Angleterre. Mais quand
 i'oy ceste obiection, il me semble que ie
 voy les arbres qui s'assemblēt pour eslire
 vn Roy. L'oliuier, le figuier, la vigne re-
 fusent la charge, & ne peuuēt abādonner
 leurs fruits, & delaisser leur liqueur qui
 resiouist Dieu & les hommes, pour com-
 māderauxautresarbres. Mais rhamne, qui
 n'est pour vray dire ny arbre, ny plante,
 ains vne espeece bastarde entre deux, est si
 ambitieux qu'il accepte l'Empire, & leur
 dit, si à bon escient & sans faintise vous
 me constituez vostre Roy, venez & re-
 posez sous mō ombre. Mais si vo^r refusez
 de cefaire, qu'il sorte vn feude rhamne, &
 qu'il brusle tous les cedres du Libā. Ie ne
 pense pas Elizabet, encores que tu te soys
 monstree sans honte & vergongne en
 toutes tes actions passees, que tu sois si
 impudēte, que de pretēdre aucun droict
 au royaume d'Esosse. Mais d'autant
 que tu n'y puis paruenir, selon le grand

desir que tu astantvrayrhamne ou ronce, qui n'as iamais produit aucun fruit agreable ny à Dieu, ny aux hommes, indigne & incapable de tous royaumes, nō seulement à cause de la sterilité de tes fruits, c'est à dire de tes bonnes actions & merites, mais aussi pour ta bastardise, tu fais sortir vn feu de toy, qui a embrasé les cedres du Liban, tu t'es adressé aux vrays Roys, qui sont nez pour commander par leur merite, & par la vertu de leurs ancestres, tu as deffait celle qui estoit cedre du Liban, & non comme toy, ronce ou nerprun, qui croist parmy les hayes ou ne sçait de quelle semence, & qui n'a ny feuille ny fruit qui vaille, tu as fait mourir la legitime princesse de deux royaumes, & digne de cōmander pour la fecondité de ses vertus dont elle estoit richement parée, & ornee, comme l'olivier, comme le figuier, comme la vigne de feuilles & de fruits plaisans à Dieu, & profitables aux hommes. Estant donques

ainsi de toy mesme comme le rhamne, arbre bastard & infructueux, par quel titre veux-tu aspirer à la superiorité du royaume d'Escoffe? Par celuy du Roy Edouard Langschamkis ton ancestre meschant & desloyal, cōme toy? Car tu n'en as point d'autre. Je voy bien que tu ne rougiras iamais, quelque vilennie de toy, où des tiens qu'on te puisse mettre deuant les yeux. Alexandre Roy d'Escoffe estat decedé sans hoirs procreez de son sang, s'e-leuerēt deux competeurs au royaume, Robert Bruce & Iean Baliol, lesquels ne se pouuans accorder de leurs droicts, & craignans le grand desordre de tous les estats, & la ruine du peuple, si leur different eust esté defini par armes, en fin s'a-uiferent de compromettre, & prendre le Roy Edouard premier de ce nom, leur proche voisin, pour arbitre. Cestuy-cy fort ioyeux de ceste occasiō, fait la chose pl^d douteuse, qu'ellen'estoit & pour auoir moyen de gratifier celuy des deux qui se

roit sa partie meilleure, il fait consulter l'affaire non seulement en Angleterre, mais aussi en France. Et ayant proposé diuersement le fait au cōseil, il en tira diuers aduis, de sorte que la decision depēdoit de sa bōne volonté, pour fauoriser celuy qu'il lui plairoit. Voyāt le titre de Robert Bruce estre tout euidēt, comme ayant droict du masse, & que Iean Baliol, n'estoit que successeur d'une femme, il desiroit fort gagner ledit Robert, & obtenir de luy ce qu'il demandoit en le preferant au royaume. Il s'adresse à luy, & luy declare, qu'il falloit necessairement que celuy qui voudroit estre Roy le recogneust pour superieur, & aduouast tenir son sceptre de luy, & si ceste condition luy plaisoit, il luy mettroit la couronne sur la teste, & le maintiendrait contre tout le mōde. Robert hōme tresmagnanime, preux, & courageux, luy respond en vn mot, qu'il ne vouloit, & ne pouuoit vendre son pays, & corrōpre les

loys de la couronne, & que celuy n'estoit pas Roy, qui recognoissoit autre supérieur que Dieu. Et l'Anglois se sentant frustré de son attente de ce costé là, il s'adresse à Baliol, luy proposant les mesmes conditions, lesquelles aussi tost sont acceptees & moyennant ce il est déclaré Roy par Edouart contre droit & raison, & auquel incontinent il fit hommage, aduouant tenir le royaume de luy, comme de son supérieur, dont en sont ensuiuies infinies guerres entre les deux royaumes. Baliol ayant esté dechassé d'Escoffe, & priué de son estat par la noblesse du païs, & Robert Bruce mis en son lieu, comme vray successeur, & legitime heritier du Roy dernier decedé. Edouard ayant fait ce trait de Iudas, l'a tousiours voulu maintenir tant qu'il a vescu, se faisant recognoistre pour chef par la plus part des barons du pays, lequel il auoit redigé en forme de prouince, ayant mis des garnisons, & des lieutenants de sa part,

& trāsportée en Angleterre la chaire de marbre dās laquelle on courōnoit les Roys, & osté toutes les autres antiquitez, & effacé les vestiges du royaume. Mais ceste rage ne dura gueres, le Roy, Robert l'ayant exterminé & chassé d'Escoffe entierement avec sa courte honte, & remis le royaume en son obeissance, apres que le Pape eust declaré le tiltre d'Edouard iniuste & tyrannique. Aussi nel'auoit il pas eu par aucun droict, ne du consentement des estats d'Escoffe, ains seulement par fraude & tromperie, l'ayant acquis d'un homme priué, qui n'auoit aucun droict, la nature de la chose, & les loys de la couronne y repugnantes. Aussi depuis la mort d'Edouard les Anglois se sont contentez de se dire Roy de leur pays, sans auoir iamais rien pretendu en Escoffe. Vray est que depuis ils se sont dicts Roys de France comme faiēt Elizabet encores aujourd'hui, combien qu'elle n'y a pas

vn seul pied de terre, ny homme ne vassal qui la recognoisse, & n'en a iamais eu, ny pas vn de ses ancestres, aucun tiltre iuste & vallable pour s'attribuer ceste qualité. Toutesfois elle ne laisse de l'vsurper pour ostentation de sa grandeur, selon l'ambitieuse parade, & magnifique façon de parler des Anglois, se flattans eux mesmes, & s'attribuans plus de tiltres qu'ils n'ont, & qu'ils ne meritent. Mais elle ne s'est encores iamais fait appeller Royne d'Escoffe, combien qu'elle y aspire bien fort, & ne sçait par quel moyen y paruenir, en ayant desia tenté & essayé beaucoup. En quoy elle ressemble aux matins qui iappent contre la lune sans la pouuoir mordre. Puis dōques que la Royne d'Escoffe ne luy est inferieure, en aucune chose, ains son egalle, ou plustost superieure en toutes choses, & sa vraye dame & maistresse, si droict & iustice auoient lieu, par quelle loy l'aveut elle assubiectir à ses estats? comment, &

par quelle forme de proceder la peut elle faire mourir? Quelle couleur de iustice peut elle prendre pour voiler sa cruauté? Mais repetons sommairement le fait pour veoir si nous pouuons rencontrer quelque cas qui puisse excuser Elizabet, & adoucir l'indignité de l'assassinat & massacre par elle barbarement executé en la personne d'une si grande, & si vertueuse Princesse.

La Royned'Escoffe douairiere de France, fuyât la tyrannie de son frere bastard, qui luy ayant rauie le sceptre royal de la main, & enuahi & occupé son royaume par l'aide & support d'Elizabet, la poursuioit à la mort, comme suppliante & portant avec soy le saufconduit de Dieu elle descend en Angleterre, & se iette entre les bras de sa cousine, pensant y estre trefasseuree, & d'y trouuer aide & assistance, tant à cause de la consanguinité qu'à cause de plusieurs promesses d'amitié, & estroicte confederation,

qui estoit entre elles confirmee par ambassades, par lettres priuees, & par plusieurs autres marques & enseignes entrechangees & enuoyees reciproquement del'vne à l'autre, & speciale promesse & obligatiō de parolles, Mais incōtinēt au lieu de ce (nōobstāt q̄ tout hoste, cōme dit Homere, est enuoyé de Iupiter) elle est arrestee prisoniere, & mise entre les mains de ses principaux ennemis, cōfederezauec ses rebelles qui tout aussi tost sont mādēz pour l'accuser de la mort de son mary, estans au prealable bien instruits de tout ce qu'il falloit faire & dire, par ceux du cōseil mesme d'Elizabet. Mais en fin la malice des accusateurs estant descouuerte, pour auoir faussemēt & calomnieusemēt argué leur souueraine dame & maistresse d'un crime, dont ils estoient auteurs, ce neantmoins elle a esté plu' rigoureusement traittee qu'auparauāt, & ceux qui disoiēt q̄lque parolle en sa faueur pour la verité cōtre les trahistres, vexez de toute façon,

quelques

quelques grands seigneurs qu'ils fussent
 iusques à la perte de leurs vies & de leurs
 biens. Et depuis Elisabet & les amis de
 Lecestre voyans leurs intentions peu ad-
 uancees par la voye de iustice, se sont
 voulu mesler de la cuisine de leur prison-
 niere, & luy faire des fausses prises dans la
 boutique de Circe, dont ils ont aussi peu
 profité par la prouidence de ses officiers.
 Apres ils se sont aduisez de vouloir a-
 uoir le fils avec la mere, & n'ont rien ob-
 mis de ce qu'ils ont peu pour corrompre
 ceux qui le gardoient. Mais ils n'ont sceu si
 bien faire, qu'il n'y ayt tousiours eu quel-
 qu'un mal contêt, qui empeschoit les des-
 feins des autres, de sorte q̄ par vne special-
 le prouidence de Dieu, cet enfant Iuno-
 nien, *Et verè partus matris aureus*, a esté si
 souuentesfois rai de leur gueule, qu'en
 fin il s'est sauué. *Hinc iræ, hinc lacrimæ*. Ils
 se sont reposez pour quelque temps, &
 ont laissé iouer les ieuz aux ministres &
 rebelles d'Escoſſe, auxquels ils ont tous-

7-5
- iours assisté, iusques à ce qu'ils les ayent
rendu maistre du Royaume sans cōtredit
ou resistance. Mais voyans en fin que le
ieune Roy vouloit prendre cognoissan-
ce de cause, & rechercher ceux qui auoiēt
tué son pere, & diffamé sa mere par leurs
poursuittes calomnieuses, luy impropo-
rans le paricide par eux commis, & que
desia il en auoit fait mourir le trahistre in-
signe Jacques Donglas Comte de Mor-
ton l'œil dextre de la Royne Elisabet, &
que la religion Catholique commēçoit
en Escosse renaistre à bon escient, &
qu'elle auoit desia faict fort grand pro-
gres, imputans la cause de cela à la pre-
uoyance, sollicitation, & bonne diligen-
ce de la Royne prisonniere, ils enragent
de despit, ils se prennent aux pauures Ca-
tholiques Anglois, & par tout où ils en
peuent trouuer, ils les font mourir cru-
ellement, les rendant criminels de lese-
maiesté, en donnant fausement à en-

tendre au peuple, qu'ils auoient des secrettes intelligences avec la Royne Escossoise, & qu'ils auoient avec elle conspiré contre la vie, & contre l'estat de leur maistresse. *Gradus à magnis ad maiora fit.* En fin ne se contentans de respandre le sang innocent de leurs subiects, & ayans receu nouuelles de la ligue faicte en France pour la deffense de la religion ancienne & Catholique, ils se resoluent d'exterminer leur prisonniere, après l'auoir gardee pres de vingt ans contre le droict des gens, & au mespris des Roys de France, & de tous ses parens. Pour y paruenir ils prennent le voile de iustice, & font ordonner par leurs estats vne belle loy, ou plustost priuilege, contre la Royne d'Escosse, suggeree par Elisabet, & par les faciendaires de son grand amy, dont vous auez veu la copie cydessus. Ceste ordonnance est gardee sans dire mot presque

l'espace d'un an, iusques à ce que son amy Lecestre apres auoir bien mal faict ses affaires en Flandres, transporté de rage & de furie, fut contrainct retourner au pays à sa bõne maistresse luy faire ses plainctes de sa fortune. Oû estant il ne cessa que ceste ordonnance ne fust mise en execution, comme si la Roynne d'Escoce eust esté cause de quoy il auoit esté bien battu, & perdu presque tous les brigans que sa maistresse luy auoit donné pour l'accompagner, à fin de troubler le pays d'autrui, & auquel elle ne pouuoit pretēdre aucun droit. Mais q̃ voulez vo^{us} la pauvre dame ne viüroit pas si elle ne brouilloit, si elle ne pilloit, si elle ne volloit. Mais voyons la forme de proceder, voyōs l'executiō de ceste belle ordonnāce. Par le moyē d'un nōmé Bournā, & de Thomas Philippes seruiteurs & faciendaires de Vvalsingham, ils corrompent Gilbert Giffort escholier du seminaire des Anglois à Reims, à fin de pratiquer quel-

que crime pour donner couleur à leur intention peruerse & abominable. Gifford faict tant enuers Maister Paget & Morgan, pëfionnaires de ceste dame en France qu'il tire d'eux quelque lettres adressantes à certains catholiques en Angleterre afin de les inciter à moyenner sa deliurance. Ils en tirët d'autres du mesme subiect escrites de la main des secretares de sa maiesté. Voyla donques le souhait d'Elisabet & de son conseil accompli: Voyla le pretexte, qu'ils cherchoient tout trouué. Ces lettres & la responce donnee à icelles communiquees à Vvalsingham, les pauvres Catholiques ausquels elles auoient esté escrites, sont tous saisis au corps, & pareillement tous les seruiteurs de la Roynie prisonniere, & sa personne estroictement gardee & promenee de maison en maison, avec dix mille indignitez cependant qu'on luy emportoit tous ses papiers, or, argent, bagues & ioyaux. Estant ouye elle con-

fesse auoir faict ce que Dieu & nature luy permettoient faire pour se liberer de si longue misere d'une captiuité tyrannique . Mais quant au crime qu'on luy imposoit , d'auoir conspiré ou attenté contre la personne, ou contre l'estat de sa cousine, elle prenoit Dieu & ses Anges à tesmoins que c'estoit vne pure calomnie, & qu'elle n'auoit proiecté ny imaginé telle chose, ny faict autres exploicts ou efforts à son preiudice . Ses secretaires sont aussi ouys & examinez avec grandes & outrageuses menaces s'ils ne disoient la verité, c'est à dire quelque chose contre leur maistresse . On ne sçait le contenu de leurs depositions, mais il y a grande apparence qu'ils ne la chargent d'aucune chose, puis qu'ils ne luy ont pas esté confrontez, ny autres tesmoins quelconques . Pour cela messieurs les commissaires ne different de iuger, & d'executer leur dessein . Ils sçauoient bien en leurs consciences que

le crime par eux pretendu estoit forgé & inuenté à plaisir, & ores qu'il eust esté veritable, qu'ils ne pouuoient estre iugez d'une Princesse souueraine, qui estoit Roynne de France & d'Escoffe, qui ne tenoit rien en leur fief, & telle qui selon le droict de gens & condition de sa naissance, leur deuoit commander, & nō Elisabet. Aussi ne les recognoissoit elle pas pour ses iuges ou superieurs, ains cōme esclaués d'une bastarde infame, & ministres de la tyrannie d'une felonne Iesabel, maudicte de Dieu & des hommes. Son audition redigee par escrit, sans autres solemnitez ils donnent leur sentence, laquelle ie n'ay peu veoir, mais à ce que i'ay entendu, les crimes dont elle est accusee sont declarez veritables, & dont elle estoit iustement attaincte & cōuaincue, & par ce moyen degradee de noblesse & de tout hōneur, forfaitte & descheue du droit qu'elle ou les siés pouuoiet pretendre à la courōne d'Angleterre

Voyla vn iugement fort sommaire. Il n'y a pas vn seul tesmoin recollé ny confronté. Il n'y a qu'un seul mot dit par l'accusée, qui ne concerne en rien le fait dont est question, & neantmoins ils exclamēt comme feirent les Iuifs cōtre nostre seigneur, *audistis blasphemiā, ecquid iam opus est testibus?* On n'a iamais veu, ny leu, qu'on ayt procedé si sommairement, & gardé ceste forme de iustice ny contre la plus obiecte, ny contre la plus criminelle & dānable personne du monde. Car encores qu'elle eust confessé le crime intenté, & aduoué de sa propre bouche, si est ce que les loix ne permettent pas asseoir iugement de condēnation, si le dire du criminel n'est auéré, si sa confessiō n'est appuyé sur autres indices, & confirmée par les dires & depōsitions de tesmoins sans reproche, biē & deument confrontez. Car que sçait on si par la longueur, ou si par la rigueur de la prison, si par le degoust ou mespris de la

vie, si par hayne, par ennuy, par contem-
 nement & dedain de sa condition pre-
 sente, vne personne attediee ne souhaite
 pas la mort pour finir ses malheurs? La
 mort n'est pas effroyable à to⁹, plusieurs
 s'y precipitent, pour euitier plus grand
 mal, plusieurs ne la declinent, comme e-
 stant chose indifferente: plusieurs la desi-
 rent, aspirans à vne vie plus heureuse. Ce
 n'est doncques pas la raison, & les iuris-
 consultes anciens & modernes le prohi-
 bent & defendent, de faire mourir vne
 personne sur la simple parolle. Et neant-
 moins voyla messieurs les Anglois mini-
 stres de Iesabel, ennemie mortelle de ce-
 ste princesse, tenans lieu d'accusateurs, de
 tesmoins, & de iuges, qui la condamnent
 à la mort, par elle desiree, sur sa seule con-
 fession, nō d'aucun crime, ains d'vne cho-
 se permise & licite par le droict de natu-
 re, sçauoir est, des'estre voulu mettre en
 liberté, & s'exépter de tyrannie plus que
 barbare & gygantee. Si elle eust confessé

que pour 'se liberer elle eust conspiré contre Elisabet, ou attenté chose preiudiciable à son estat, ou à sa vie, ils eussent eu quelque apparéce d'ainfi iuger. Mais elle a tousiours iuré & protesté le cōtraire, mesmement en l'article de la mort voulant rendre son ame à Dieu. Ceste sentence signee de leurs mains est enuoyee au Roy tres-chrestien, pour seruir d'excuse, & pour donner couleur de iustice à la violence d'Elisabet, donnant à entendre à sa maiesté, que la Roynne d'Escoffe luy estoit si contraire, que leurs deux vies ne pouuoient compatir & subsister ensemble: & qu'il estoit necessaire quel'vne de deux fust asseuree de sa vie, & de son estat, par la mort de l'autre. Il y a vne chose bien remarquable pour demonstrier la fausseté de l'accusatiō, & que c'estoit vn crime aposté & premedité de longue main, plusieurs huguenots en France auoient la copie de ceste senten-

ce contre la Royn^e d'Escoffe, non seulement auparauāt qu'elle luy eust esté prononcee, mais aussi auparauant que les cōmissaires eussent entrepris congnoissance de la cause, & auparauant la façon du proces encommencee. Le vous laisse à penser que cela veut dire, & si la sentence n'a pas esté tout aussi tost dressée, que le crime. Le Roy tres-chrestien aduert^y du danger où estoit sa belle sœur, depesche monsieur de Bellicure, conseiller de son conseil priué, par deuers Elisabet, luy remonstrer l'insolence & la nouveauté d'un tel iugement, & la iuste occasion qu'il auoit de s'en ressentir si elle passoit outre à l'exécution d'iceluy. Les ennemis de la Royn^e d'Escoffe pour empêcher le sieur de Bellicure d'auoir acces à leur maistresse, font courir vn faux bruiet, qu'il apportoit la peste de Paris, & qu'aucuns des siens en estoient morts par les chemins, & quelques autres

demourez malades. Ayant aussi deman-
 dé logis en ville conuenable à la qualité
 d'un Ambassadeur, il fut refusé, & con-
 trainct de se loger en vne tauerne. La pre-
 miere fois qu'il eut audience, il ne fut ef-
 couté qu'à demy, & intertompu presque
 à chascun mot qu'il disoit. La seconde au-
 dience luy fut donnée comme elle iou-
 oit aux cartes, comme dedaignant de le
 oyr, & ne luy fait autre responce, sinon
 qu'ils se reuerroient dans quatre iours.
 Pendant ce delay, comme par contem-
 nement & mespris du Roy de France, qui
 la prioit & menaçoit par son Ambassa-
 deur, elle fait publier par la ville de Lon-
 dres à son de trôpette, & afficher aux car-
 refours sa sentence, apres l'auoir enuoyé
 prononcer à la Roynne prisonniere par le
 Mi-lord Boukharst & maister Beel secre-
 taire ou greffier commis à la façon de ce
 propos. Durant la prononciation iamais
 sa maiesté ne mua sa contenance, ains a-
 pres auoir ouy la lecture doucemēt &

paisiblement, leur dit qu'elle louoit Dieu
 de l'honneur qu'elle receuoit de souffrir
 pour son nom. Seulement elle les pria
 que le bõ plaisir de la Roynes sa sœur fust
 de luy faire vne grace sçauoir est, qu'il
 luy fust permis auoir quelque honneste
 homme de sa religiõ pour l'ayder à prier
 & recõcilier à Dieu. A quoy ils dirẽt que
 sa maiesté auoit pourueu, & luy auoit en
 uoyé deux de ses Euesques. Elle leur de-
 mande de quelle religiõ ils estoient: luy
 ayans respondu qu'ils n'estoient pas de la
 siene Papisticalle, ains de celle de la Roy-
 ne leur maistresse, elle leur dit qu'elle s'e-
 passeroit, les priant de se retirer. La pronõ-
 ciation de ceste sentẽce ayant esté incor-
 poree à Londres, en signe d'allegresse on
 sonne les cloches par l'espace de vingt-
 quatre heures, on tire l'artillerie, on cõ-
 mande à faire les feuz de ioye par tout le
 Royaume. Bref on n'obmet riẽ qui peut
 seruir à faire demonstration de resiouys-
 sance. Mais i'ay opinion & confiance en

Dieu qui venge le sang des innocents
 respendu deuant sa face, qui estime fort
 pretieuse & chere la mort de ses saints,
 & que ceste ioye se conuertira en deuil
 & tristesse, & que la prophetie d'E-
 saye sera icy accomplie, *Ne lateris tu
 Philistela omnis, quoniam comminuta est vir-
 ga percussoris tui. Ingemuerunt omnes qui
 letabantur corde, cessauit gaudium tympa-
 norum, quieuit sonitus letantium, conticuit
 dulcedo cytharæ, attrita est ciuitas vanita-
 tis, clausa est omnis domus nullo introeun-
 te.* L'Ambassadeur du Roy d'Escoffe,
 qui faisoit fort grande instance pour
 sa mere ne fut pas mieux traicté, que
 celuy de France, ains furent tous
 deux vilipendez par mesme façon de
 brauades. Pour toute resolution en
 fin leur fut dict par Elisabet en les li-
 centiant, qu'elle depescheroit quel-
 qu'un des siens par deuers leurs mai-
 stres leur porter sa responce. Enui-

ron six semaines ou deux mois apres,
 ils procedent à l'execution de leur mal-
 heureuse sentence en la forme par
 moy cydessus deduiete, laquelle i'ay
 horreur de repeter pour les vilen-
 nies qui ont esté faictes à la person-
 ne, estat, & condition, ie ne dy pas
 de ceste Royne, mais de tous les
 Roys & Princes souuerains de la ter-
 re. Lesquelles ont esté si grandes &
 outrageuses que celle qui les a com-
 mandees est contraincte de les desad-
 uouer. Elle dict qu'on y a procedé à
 son desceu, & contre son inten-
 tion. Et pour donner apparence de
 verité à son dire, elle a faict empri-
 sonner le secretaire David en la tour *Davidson*
 de Londres, où il est mieux traicté, &
 plus à son aise, qu'il ne seroit en sa mai-
 son. O la fausse hypocrite? Que ne
 s'est elle adressé à Lecestre & aux autres

qui l'ont commandé, & non à ce pauvre
 valet, qui n'ē peut mais, & qui ne leur eust
 osé defobeir? Sçauoit il pas bien que ces
 gens là n'eussent osé songer à telle cho-
 se cōtre le gré de leur maistresse? N'auoit
 elle pas signé la sentence de sa main?
 N'auoit elle pas signé la commission des
 executeurs? Elle ne pouuoit faire d'auāta-
 ge, si elle n'y eust mis la main, & entre-
 pris sur l'office du bourreau. Ce que tref-
 volontiers elle eust faict vingt ans sont
 & plus, si l'occasion se fust presentee telle
 qu'elle l'a rencontré depuis vn an, qu'el-
 le voyoit tous les Roys Chrestiens tāt em-
 barassez en affaires par ses ruses, cōplots &
 trahisons par elle suscitees, q̄ persōne n'au-
 roit le moyē de se resfētir de sa pl^e que ty-
 rannique felonnie. Elle voyoit le Roy
 d'Escoſſe ieune & biē enuironé de trahi-
 stes à sa deuotion: le Roy tref-chrestien
 luy sembloit desia ruiné par vne forte &
 puissante armee des Reistres prests à en-
 trer en France pour le secours des hu-
 guenots

guenots rebelles, le Roy d'Espagne ne pouuoit abādōner les affaires de Flādres à fin de passer en Angleterre. Voyla la seureté qu'elle se propoſoit en mal faifāt. On m'a dict q̄ certain trahistre du cōſeil d'Escoſſe luy auoit eſcrit, que *mortui non mor-*
dent. Ce la peut biē eſtre vray. Car les ministres & toute leur ſinagogue luy ont touſiours procuré tout le bien & aduāce mēt qu'ils ont peu pour exterminer leur naturelle dame & maiſtreſſe. Il y a encores vne choſe q̄ ie ne puis obmettre, que pour couurir ſa cruauté del'ōbre de iuſte vègeāce, & perſuader aux hōmes que ſa mort eſtoit certaine & reſolue ſi les menes des cōſpirateurs euſſent eu lieu, Elle ſuscita le maiſter Staffort, frere de ſō Ambaſſadeur en France pour y embrouiller mōſieur de Chateau-neuf Ambaſſadeur du Roy tres-chreſtien, & a eſté ſi impudente que de luy vouloir le confronter, & luy auoit dōné Cecile & Vvalſighame, ſes bons ſuppoſts, auteurs de toutes ces

belles inuentions, pour iuges. Aussi feit elle courir apres monsieur de Trapes, & le ramener prisonnier à Londres, luy ayant osté le pacquet du Roy qu'il portoit. Mais l'ayāt decacheté, ne trouua vn seul mot de la pretendue conspiration. Aussi sçauoit elle bien que riē ne se trouuoit de ce qu'elle faisoit semblant de chercher. Mais pour bien faire la peureuse & persuader aux hommes la iuste cause de craincte qu'elle simuloit auoir, il se failloit adresser au Roy tres-chrestien & violer le droict feciale en la personne de son ambassadeur, pour dire qu'elle n'eust voulu attenter vne chose de tel poids sans raison fort euidente & necessaire pour le salut de sa vie & de sō estat. Mais en ce faisant ceste meschante diableſſe pensoit nous esblouir les yeux, de maniere qu'il seroit malaisé de nous garētir de ses prestiges & veoir son hypocrisie. C'est trop faict, c'est trop se mocquer de toute la Chrestienté. Nous auons esté

chastiez & touchez de la main de Dieu pour noz pechez. C'est elle qui a esté l'instrument pour nous punir par la permission de Dieu. C'est elle qui a esté le fleau des pauvres Catholiques. Il est maintenant temps que ce fleau soit rompu & brisé, que ceste verge soit iectee dans le feu. Ce que nous esperons, ce que nous attendons de la bonté de nostre Seigneur.

“ Οὐ γὰρ δὴν θνητῶν ὑβριος ἔργα πέλει.

Ily a long temps qu'Elisabet commence à se mesconnoistre, il y a long temps qu'elle braue to^r ses voisins: il y a lōg tēps que sa trop grande prosperité l'aveugle, qu'elle ne peut veoir marcher Dieu avec ses pieds de laine. Son trop bon heur, ou plustost malheur, luy rait l'entēdemēt, qu'elle, qui entend bien le latin, ne peut auoir souuenance de la respōce, que feit iadis Cesar aux Ambassadeurs des Suisses, qui se vantoient par trop de leur bonne fortune, & de leurs victoires passées, *cōsueſſe deos immortales, quō grauius homines*

Hh ij

ex commutatione rerum doleant, quos pro scelere eorum ulcisci velint, secundiores interdum res, & diuturniorem impunitatem concedere. Amasis Roy d'Egypte preuoyant la ruine de Polycrates son amy, à cause de sa trop longue & continuelle felicité, renonça à son amitié, & à l'hospitalité mutuelle qu'ils auoient. Qui estoit vne maniere de faire fort louable, que les anciens obseruoient quand il aduenoit quelque differend entre eux & leurs hostes ou amis, de leur defendre leur logis, & leur faire sçauoir qu'ils renonçoient à leur amitié, auparavant qu'attenter aucune chose contraire à leur necessitude & conionction accoustumee. Ainsi feit Germanicus à Piso, luy declarant, qu'il quictoit son amitié: Ainsi feit Crispinus à Badius, luy denonçant qu'il ne vouloit plus estre s^{on} hoste. Ainsi deuoit faire Elisabet à sa cousine, & luy de fêdre l'êtree de son Royaume lors qu'elle s'y adressa: luy réuoyer ses gages avec l'a-

mitié vouee: luy declarer la cōfederation
 qu'elle auoit avec ses rebelles, & qu'elle
 preferoit leur amitié à la siēne. Mais elle
 s'est biē donnee garde de ce faire. Car sō
 intētion a tousiours esté d'allecher ceste
 Royne, par ses belles promesses, & sous
 ombre d'amitié l'attirer à sa derniere rui
 ne. Pense-elle que telle perfidie demou
 rera impunie? Pense-elle abuser tous les
 Roys & monarques du mōde, qui ont in
 terest en ceste cause, cōme elle a deceu &
 trōpé ceste pauvre Princesse? Pense-elle
 cōtinuer ses ieuz, & si bien brouiller les
 cartes aux autres Royaumes, que sa tyrā
 nie sera perpetuelle? Le luy pronostique
 vn certain & asseuré supplice & vëgean
 ce de ses trahisons & insignes forfaits:
 ie luy prophetise & annonce vne puni
 tion infallible, qui en peu de temps re
 compensera sa longue prosperité, qui a
 tāt causé de maux au reste de la Chrestie
 té. Bu siris allechoit ainsi cōme elle les hō
 mes par simulation d'hospitalité à fin d'

les immoler. Diomedes auoit accoustu-
mé ses cheuaux à la chair humaine, à fin
de manger ses hostes. Vn seul Hercules
en fin les attrapa tous deux, & vengea le
violemēt du sainct & sacré droict d'hos-
pitalité. La cruauté de Phalaris outrageux
enuers ses hostes fut punie par la multitu-
de Agrigentine, ne pouuant supporter
que leur pays fust ainsi diffamé enuers
les nations estrangeres par la tyrannie
d'un seul homme. Cesar vengea la mort
de Pompeius son ennemy, réfugié en E-
gypte & trahy par le Roy à qui il s'estoit
fié. Le Roy de France parent & beau fre-
re de ceste dame laissera il son meurtre
impuny? Sa maison est la troisieme, qui
par la loy de sa naissance doit succeder à
la couronne d'Escoffe, de laquelle il ne
souffrira iamais estre par la voix & com-
mune renommee des hōmes déclaré indi-
gne. Il ne souffrira iamais que ceste tache
denigre son tresillustre nom. Il ne souf-
frira iamais que ceste note obscurfisse la

gloire de la tref-royalle & tresgenereuse
 maison de Valois, ny que telle infamie
 tombe sur le Royaume de France, iadis
 tant redouté de toutes les nations du mō
 de. Les Rollands, les Regnaults, les Oli-
 uiers, bons & naturels Frāçois fussent al-
 lez chercher vne telle occasion iusques
 au bout du monde, non seulement pour
 venger la querelle de Dieu contre vn tel
 monstre, infidelle & pire que payé, mais
 aussi pour monstrier leur prouesse, en exi-
 geāt la raison des offenses faićtes aux da-
 mes, encores qu'elles ne leur fussent rien
 & que l'outrage ne leur touchast aucu-
 nement en leur particulier. Qu'eussent
 ils doncques faićt pour vne parente pro-
 che, pour vne Roynie de France, contre
 l'heresie, contre l'impieté, contre l'A-
 theisme?

“ Non solos tangit Atreidas

“ Iste dolor. Ce n'est pas aux Frāçois seuls
 que ceste iniure appartient: elle est com-
 mune à tous les Roys & monarques d'

H h iiii

la terre. Ils sont indignes de leurs noms, s'ils ne s'en ressentent. Il faut laisser là le Turc & le Iuif, & s'adresser à ceste Sarasine, à ceste maudicte Ismaëlité, qui a tant desprisé Dieu, tant de daigné les Roys, tāt vilipendé l'honneur, la vertu, & toute la prouesse de la terre. Il faut que les Princes s'accordent de leurs querelles particulieres, qui ne leur peuuent apporter aucun aduantage, ains la ruine de leurs estats, la desolation de leurs Royaumes, pays & seigneuries, l'oppression de leurs suibers irreparable, & dont en fin la plus grande perte & dommage tombera sur leurs testes. Il faut, di-ie, qu'ils remettent leurs offenses, & se liguent & conspirent de volonté fraternelle, embrassans vnion, paix, & charité Chrestienne pour exterminer ceste louue enragee. Si cela se faisoit le moindre d'entre eux la iecte-
roit hors de sa bauge, avec ses petis cheaux. Elle n'auoit pas la hardiesse

de se dresser contre le plus petit che-
 ualier des Catholiques . Ses propres
 dogues la deschireroient . Esope n'e-
 stoit qu'homme de condition liber-
 tine , si contrefaiët & difforme de
 corps qu'il representoit la figure d'un
 singe , & au reste il estoit des plus mal
 fortunez du monde , & toutesfois sa
 mort fut vangee sur tout vn peuple
 par tous les Princes de la Grece , crai-
 gnans l'ire & l'offense de Dieu , s'ils euf-
 sent souffert vn tel forfait impuny.
 Et vous, Princes Chrestiens , entre les-
 quels il n'y a pas vn seul qui ne soit pa-
 rent ou allié de ceste Royne cruellemēt
 occise & massacrée par son hostesse, pire
 que Lycaonienne , n'avez vous point
 d'horreur de vous presenter quelque
 iour deuant Dieu, qui vous demandera
 compte & raison du sceptre, de l'espee
 qu'il vous a mis és mains pour fou-
 stenir sa gloire contre la tyrannie,
 contre l'heresie, contre l'infidelité, ayans

soufferts vn tel phalarisme contre la vie
 & la bonne renommee d'une si vertueu-
 se Princeſſe, au meſpris de voſtre ſang, de
 voſtre puissance, de voſtre auctorité: au
 preiudice de voſtre honneur, de voſtre
 religion & de la pieté de voz ancestres,
 laquelle vo^r deuez eſtimer & cherir plus
 que choſe du monde, comme ſeule cau-
 ſe de la conſervation de voz eſtats, de l'o-
 beſſance de voz ſubiects, & de l'heur &
 felicité de voz empires & monarchies?
 Que direz vous quand ce grand Roy, vo-
 ſtre maistre, vous reprochera que vous
 aurez cōniué à telle impiété? que par vo-
 ſtre ſilence vous aurez conſenty à telle fe-
 lonnie? que par voſtre ſouffrance vous
 aurez non ſeulement ratifié & approuué,
 mais auſſi deſigné, commis & perpetré
 ce crime le plus inhumain, qui ayt on-
 ques eſté proiecté ou imaginé, & du-
 quel vous ne pouuez trouuer vn ſeul exē-
 ple au monde? Marc Anthoine fait bien
 mourir Antigonus, Roy des Iuiſs, Agrip-

pa fait occire Bogus, Roy des Maurusiés,
 & de plus fresche memoire Charles fre-
 re du Roy sainct Loys, fait trencher la vie
 par le glaiue d'un bourreau à Conradin
 se pretendan Roy de Naples, & nomme
 rois beaucoup d'autres Roys, qui ont esté
 tuez & meurtris à tort & à droict: mais
 tels exemples n'ont rien de semblable, ny
 de commun avec cestui cy. Ce que ie lais-
 se à iuger à tous hommes de bon esprit,
 ayant faict la conference des vns avec les
 autres. Et en tout cas, le dy, que *legibus non
 exemplis iudicandum*. Telles actions de
 Marc Anthoine, d'Agrippa, de Charles,
 & d'autres, ne leur ont apporté que mal-
 heur, estans contre tout droict & raison.
 Euer tuez vous donques, Princes Chre-
 stiens, refueillez voz esprits, pour mon-
 strer la generosité de voz cœurs, en ven-
 geant l'iniure de Dieu, & de vous mes-
 mes, qui estes ses ministres, & dispensa-
 teurs de sa iustice en terre. Vn seul Hercu-
 le dompta tous les monstres, & exter-

mina tous les tyrans du monde. Le monstre que vous auez à combattre, n'est pas vne hydre, n'est pas vn Geryon, il n'a qu'un ne testé, il n'a qu'un corps flestri de vieillesse, rompu de paillardise, mangé de verolle & de ladrerie. Elle n'a que l'ame monstrueuse, plus difforme, plus vitieuse, plus châtreuse mille fois que n'est son corps. Assaillez la seulement, sa puanteur propre l'infectera, son ordure l'empoisonnera, son venin la creuera. Ce sont les guerres qu'il faut entreprendre, & laisser arriere toute ialousie, rancune, & enuie, cause de vostre ruine, & de l'auancement de voz ennemis. Ceste guerre vous acquerra la grace & benediction de Dieu, qui vous accroistra vostre grandeur, louange, & gloire en ce monde, & vous rendra contens & bien heureux en l'autre.

FIN.

EPITAPHIVM ELISABE-
thæ Titheræ, anglæ.

Quam nata stupro suscepit auunculus, & quam
Incestu triplici pro genitrice soror
Nominis ancipitem celi produxit in auras,
Picquerino prolem quæ sine matre tulit,
Multis fossa viris, Veneris lasciva sacerdos,
At nexu casti libera coniugii
Ne male, cum vellet, tribados foret æmula Sapphus,
Turbaretve sacros iusta querela iocos,
Hostis calicolûm, patriæ crudelis Erinnyis,
Et fidei, & famæ prodiga, parca boni,
Mechorum voto dominam mactavit, & aras
Polluit insonti sanguine turpis auus,
Numinis irati flagrum, sine numine vixit,
Tarda nimis Strygiis præda recepta rogis,
Dum luat insane damnata piacula vite,
Hic iacet Elisabet, si bene fecit, habet.

Aliud.

CVi mater pellex auia, pelléxque sororis,
Et fratris scortum perneciale sui,
Vulgi prostibulum, vitiati lerna pudoris,
Carnificis merito iussa perire manu,
Quæ germana soror matris (quis talia credat?)
Neptis & incesti prodigiosa patris,
Maternorum heres scelerum, chaos impietatis,
Regalis probrum perneciesque throni,
Fax orbis, patriæ pestis, paricida propinqui
Sanguinis, & decori semper iniqua suo,
Flagitius animo, defunctaque corpore stupris,
Hic iacet Elisahet, quod male fecit habet.

